

VITT. EMANUELE III

NAZIONALE

FONDO
DORIA

I


30 2/4


NAPOLI

BIBLIOTECA


VITTORIO EM. III











FONDO DORIA
LES

FACECIEUSES
NUITS
DU SEIGNEUR
STRAPAROLE.

TOME I.



M. DCC. XXVI.

FONDO DORIA I, 302 1966430



EPISTRE DEDICATOIRE
DE
GUILLAUME ROVILLE,
*Qui se trouve au devant de l' Edition
de 1615.*

A MONSEIGNEUR
MONSIEUR
FRANCOIS ROGIER,

Chevalier , Baron de Ferrals & de Saint
Benoist , Seigneur de Tournebois &
de Malras , Conseiller du Roy , Thre-
sorier de France , Secretaire & Con-
troolleur general de ses Guerres.



OMME jadis & à
present maints excellens
& doctes personnages ad-
donnez à l'étude des sain-
tes lettres de Philosophie , de Ma-
thematique , ou de Medecine , telles

Tome I.

ij E P I S T R E.

autres sciences graves & arduës ,
 donnant quelquefois intermission à
 leur labeur journalier , n'ont desdai-
 gné & ne desdaignent encore la le-
 ctüre de quelques Livres facecieux ,
 comme Fables , & autres nouvelles
 joyeusetez , recréans par ce moyen
 leurs esprits du travail enduré ; &
 encore mesmement y ont prins telle
 delectation , que abbaissans le vol de
 leurs plumes , ils ont escrit & com-
 posé semblables volumes pleins de
 singuliere allegresse : Ainsi , MON-
 SIEUR , induict par leur exemple ,
 je me suis proposé ce but de ne de-
 voir encourir blasme aucun, si ayant
 par cy-devant imprimé notable nom-
 bre de Livres , yssus d'Autheurs ex-
 quis & renommez en diverses Fa-
 cultez , je m'addonne à mettre en
 lumiere aucunesfois quelques petits
 Livres , esquels on peut cueillir quel-
 que plaisir & contentement d'esprit.
 Pour ce en visitant ces jours passez
 plusieurs copies de Livres nouveaux

EPISTRE. iiij

que je me retrouve en mon estude,
d'aventure me tomba ès mains le
Livre des Facecieuses Nuits &
Enigmes du Seigneur Jean-Fran-
çois Straparole ; lequel pour sa naï-
ve recreation j'avois ja dès l'an passé
faict traduire d'Italien en François,
par Maistre Jean Louveau ; celuy
mesme qui fut aussi le traducteur des
Problemes de Garimbert , que vous
receutes de moy n'a gueres , alors
qu'estiez en Cour vers la Majesté
Royale. Et ayant entendu par au-
cuns de vos plus familiers amis , le
gracieux accueil avec lequel le Li-
vre présenté a trouvé grace devant
vos yeux , mon desir a esté excité à
perseverer , & dedier à vostre Illu-
stre nom ce facecieux & plaisant re-
cueil de Straparole ; lequel je vous
presente pour tesmoignage de l'obeyss-
ance & sincere affection que je vous
dois : par laquelle je proteste m'em-
ployer à jamais à vous donner quel-
que contentement de mes impressions.



P R E F A C E.



E goût que le siecle témoigne aujourd'huy pour l'antique , nous a fait croire que les
FACECIEUSES NUITS DE STRAPAROLE, luës autrefois avec plaisir, retrouveroient dans l'esprit des Lecteurs la même disposition. Les Livres , à le bien prendre , les plus charmans, sont ceux qui ont le don d'amuser : ce qui est si vray , que de nos jours , à l'occasion d'une *Histoire Ecclesiastique*, dont il s'agissoit de faire l'éloge , un de nos Journalistes crût ne la pouvoir mieux louer , qu'en disant qu'elle étoit fort *amusante*. Cette expression qui parut alors n'être pas tout à fait en sa place , y sera parfaite-
a iij

vj P R E F A C E.

ment, si on l'applique aux Contes dont nous donnons une nouvelle édition. La naïveté du langage, jointe à l'agrément de la fiction, sera la preuve de ce que nous disons. Les momens coulent le plus doucement du monde dans ces lectures : elles attachent, elles enchantent. Nous nous en rapportons à cette dévote, sous les mains de laquelle par hazard un Décameron tomba. Les premières lignes qu'elle en lut l'ayant engagée à passer outre, elle mordit si bien à la grappe, qu'elle ne pût s'empêcher de voir la conclusion. Après quoy, de l'abondance du cœur : *Ah, s'écria-t'elle, que n'est-ce ici dire ses heures !*

Bocace a trouvé des imitateurs sans nombre, des faiseurs, & même des faiseuses de Journées ; témoin la Reine de Navarre. Straparole, pour diversifier, s'est

avisé de donner des *Nuitées* : il a plus fait ; pour mieux reveiller l'attention, il a proposé des Enigmes ; invention dont les *De Vifex* François & Lorrains ſçavent tous les mois ſi bien enrichir leur travail. Nous ne nions pas que Straparole , outre la négligence du ſtyle , & le mépris outré du vraisemblable, n'ait encore très-ouvertement péché contre la bienséance des caractères, lorsqu'à de jeunes Damoifelles, qu'il ſuppoſe vertueuſes & bien élevées , il prête des paroles & des manières qui ne conviennent ni à l'innocence de leur âge , ni à la retenue de leur ſexe. On voit que nous ne pallions point les fautes de nôtre Auteur ; mais en même temps que nous les avouons avec tant d'ingenuité , nous prétendons que , bien loin de rabaiſſer ſon mérite, cet aveu tout au contraire le relève , & fait conce-

voir qu'il falloit nécessairement que les FACECIEUSES NUITS eussent un attrait bien prédominant, puisqu'on ne pouvoit s'empêcher de les lire avec avidité, malgré les défauts que nous venons d'y remarquer.

On ne connoit gueres au reste le Seigneur Jean-François Straparole que par le titre de son Livre. Straparole ne paroît pas autrement un nom de famille : on croiroit plutôt que ce seroit un de ces noms bizarres qu'on se donne en certaines Academies d'Italie, tels que *Stordito*, de *Balordo*, de *Capassone* ; car *Straparola*, c'est un homme qui parle trop : Il est même nommé *Streparola*, par allusion, ce semble, à *Strepere*, dans le recueil de ses Poësies, imprimées à Venise in 8. l'an 1508. lesquelles consistent en *Sonetti*, *Strambotti*, *Epistole*, & *Capitoli*. A la verité on

pourroit croire que ce seroit une corruption à la Venitienne, parce qu'au lieu de *Giovan Francesco Straparola da Caravaggio*, il est là nommé, *Zoan Francesco Streparola da Caravazo*. Cette datte de 1508. fait voir qu'il devoit être fort âgé en 1553. temps auquel il vivoit encore, comme l'atteste la seconde partie de son ouvrage dediée aux Dames, par une courte Epître du 1. de Septembre de cette année-là. Il s'y plaint amèrement de ses envieux, qui l'accusoient d'avoir volé de tous côtez les Fables de ses deux volumes. Il déclare qu'il ne se les est jamais attribuées, & se contente du mérite de les avoir fidèlement rapportées d'après les dix Damoiselles, de qui elles venoient. Cela, comme tout bon entendeur le comprend, ne signifie autre chose, sinon qu'il avoit tiré d'ailleurs la matière de ces

Fables, mais qu'il leur avoit donné la forme. Il seroit à souhaiter qu'il en eût indiqué les sources. Heureusement feu M. Laisnez, homme versé dans ces sortes de recherches, avoit travaillé à celle-ci quelque temps avant sa mort arrivée le 18. Avril 1710. Il n'a pas véritablement deterré le tout, mais ce n'est pas peu qu'il ait pû découvrir quelques-uns, non seulement des modèles, mais aussi des copistes de Straparole. Il a de plus, chemin faisant, reconnu que les deux Traducteurs ont par-ci par-là substitué d'autres Enigmes & d'autres Fables à celles de l'original. Jean Louveau d'Orleans, qui donna en 1560. la traduction des cinq premières Nuits, n'y a rien changé, hors un seul petit endroit. Pierre de Larivey Champenois, qui seize ans après traduisit les huit dernières, y fit des changemens con-

Remarques sur les Nuits, &c. xj
fiderables. Ces remarques & les
suivantes, toutes écrites de la
main de M. Laifnez, nous ayant
été communiquées, nous avons
pris soin de les rapporter ici dans
leur ordre, pour la satisfaction
tout ensemble & l'instruction des
curieux.

REMARQUES

Sur les Nuits de Straparole.

I. N U I T.



FABLE II. Cette Fable contient quelques-uns destours subtils de Cassandrin, habile larron. J'ignore d'où Straparole a tiré l'invention dont il dit qu'usa ce matois pour enlever au Juge de Perouse, sans qu'il s'en apperçût, le propre lit où il étoit couché; j'observerai seulement que ce conte a été depuis employé dans le Livre François, qui a pour titre : *Inventaire generale de l'Histoire des Larrons*, in 8. à Paris 1625. & que le nom de Cassandrin y a été changé en celui d'A-draffe.

FABLE III. C'est une imitation de la *Novella di Campriano*, en rime octave à Venise 1524. in 4.

I I. N U I T.

FABLE II. C'est la même que la 2. Nouvelle de la 2. Journée du *Pecorone di Ser Giovanni Fiorentino*, nel quale si contengono cinquanta *Novelle antiche*. Ce Ser Giovanni commença en 1378. trois ans après la mort de Bocace, à écrire son Livre, imprimé pour la première fois à Milan in 8. par les soins de Louis Domenichi. Straparole en avoit vû quelque part le Manuscrit. L'édition de Milan est l'unique bonne : celle de Trevis a passé par les mains de l'Inquisition, & contient deux Nouvelles de moins. Une chose encore à remarquer touchant cette Fable 2. c'est qu'elle ressemble assez à la 3. du tome 1. des Nouvelles de Bancel, contemporain de Straparole.

FABLE III. Elle est tirée de la Comédie intitulée *Dalcitius*, une des six que Roswite Religieuse Saxonne a composées vers la fin du X. siècle, ou de la Légende dorée de Jacques de Voragine, Vie de sainte Anastase.

FABLE IV. C'est, comme tout le monde sait, le Belpégor de Machiavel. Le Doni pourtant, feuillet 89. de sa *seconda Libreria* de l'édition du Marcolini in 12. à Venise 1551. dit que cette Nouvelle, après

sur les Nuits de Straparole. xiiij
avoir eu cours sous le nom de Machiavel ,
a été depuis imprimée parmi celles du
Brevio à Florence , ensuite de quoi il
la rapporte lui tout au long , telle que
l'Auteur , dit-il , l'avoit originairement
écrite. Ce qui a toute la mine d'être une
supposition du Doni. Un Chanoine de S.
Martin de Tours m'a dit que dans un vieux
Manuscrit Latin de la Bibliothèque de cet-
te Eglise , l'Histoire du mariage du Dia-
ble se trouvoit rédigée en cinq ou six lignes.

I I I. N U I T.

FABLE I. Aloïse Cinthio de gli Fabritii
dans le Livre où il donne *in terza rima* l'o-
rigine de quelques proverbes Italiens ,
raconte la Fable d'un Pêcheur , qui par l'o-
pération merveilleuse d'un poisson fée ,
sentit tout à coup croître en lui copieuse-
ment la partie qui le faisoit homme , & de
plus parut si semblable , tant de taille , que
du visage au Roy du pays , qu'on n'auroit
pû distinguer l'un de l'autre , si s'étant dé-
poüillez tous deux , la difference seule que
mit entre eux la nudité , n'eût déterminé
la Reine à reconnoître pour Roy le Pê-
cheur. A propos de quoi dans le Poëme sur
la mort du Roy d'Ethiopie , on peut voir
la décision de Proserpine en faveur de Za-
gachrist au préjudice de Pluton.

I V. N U I T.

FABLE IV. Molière doit l'idée de son Ecole des femmes à cette Fable, que de son côté Straparole a tirée du *Pecorone de Ser Giovanni*, Journée 1. Nouvelle 2.

V. N U I T.

FABLE III. On a fait de cette Fable une farce que les Bateleurs representent, & qui est imprimée.

V I. N U I T.

FABLE I. Voyez la 8. Nouvelle de la 8. Journée de Bocace, la 3. des cent Nouvelles nouvelles, le 9. Conte de ceux qu'on attri-à des Periers, le 16. Proverbe d'Aloïse Cinthio, & enfin le Faiseur d'oreille, & le Raccommodeur de moule de la Fontaine.

FABLE V. Elle est tirée de Jérôme Morlin, Nouvelle 61. *Parvus Sacerdos*. Les Nouvelles Latines de Morlin, Docteur *in utroque* Napolitain, furent imprimées à Naples *in* 4. l'an 1520. plus de 30. ans avant la 1. édition des *Nuits* de Straparole.

V I I. N U I T.

FABLE V. de Morlin, Nouvelle 79. *Egenus vir*.

sur les Nuits de Strapatole. xv

V I I I. N U I T.

FABLE III. Cette Fable a une Enigme Italienne différente de l'Enigme Française. Le mot de l'Italienne c'est *la plume*, & celui de la Française *le vent*.

FABLE VI. De Morlin, Nouvelle 32.
Medicus quidam.

I X. N U I T.

FABLE III. L'action faussement attribuée ici à François Sforce, est véritablement de Maximilien d'Autriche, depuis dit Maximilien II. Empereur, jeune alors, dans le temps qu'en 1548. il passa en Espagne pour y épouser sa Cousine germaine, fille de Charles Quint. On peut voir la relation Latine que Jean Justinien Candiot en écrivit l'an 1550. imprimée à Bâle chez Oporin, 1554. in 16.

FABLE IV. Cette Fable, dont voici le titre dans l'original: *Frate Tiberio Palavicino apostata, poi fatto Prete Secolare, e Maestro in Theologia, ama la moglie di Maestro Checino Intagliatore. Ella con consenso del marito in casa l'introduce, e trovato da lui, con una ignominiosa beffa fuori lo manda, e da morte lo libera*; est supprimée dans la plupart des éditions Italiennes, même dans celle où l'on a conservé sans changement la 4. Fable de la 6. Nuit. On a en la place de la Fable de

XVj Remarques

Frate Tiberio, substitué celle de la vengeance qu'un Escolier prit de son Curé qui avoit voulu passer pour plus savant que lui en Latin. Le titre en Italien est ainsi conçu : *Pre Papiro Schizza presumendosi molto sapere, e d'ignoranza pieno, e con la sua ignoranza beffa il figliuolo d'un Contadino, il quale per vendicarsi gli abbruscì la casa, e quello che dentro si trovava.* Ce Conte est aussi le 21. du prétendu des Periers. Pour l'Enigme, le mot de la Françoisé est *la langue*, & de l'Italienne *le Balon*.

X. N U I T.

FABLE II. Cette fiction de l'Ane & du Lion est divertissante. J'ai inutilement cherché l'ancien Manuscrit qu'on m'a dit qui contenoit des gentilleses que n'a pas le nouveau *Brancaleone*, imprimé pour la dernière fois à Venise in 8. l'an 1617. C'est apparemment d'après l'ancien que Straparole a produit sa Fable. Le Bruno Nolano, venu depuis, en a donné une plaisante scène dans son *Candelaio*, où il rapporte l'expedient dont au passage d'une riviere l'Ane s'avisa dans le danger, pour se tenir ferme sur le Lion qui lui servoit de monture.

XI. N U I T.

FABLE II. Le Traducteur a changé l'Enigme

sur les Nuits de Straparole. xvij
nigme Italienne de cette Fable en une
Françoise, dont le mot est *le fuseau*.

FABLE IV. De Morlin, Nouvelle 26.
Hector Carafa.

FABLE V. De Morlin, Nouvelle 36.
Ex nobili prosapia.

X I I. N U I T.

FABLE I. De Morlin, Nouvelle 26. *Vir
quidam.*

FABLE II. De Morlin, Nouvelle 30.
Venustissima mulier.

FABLE III. De Morlin, Nouvelle 71.
Pu. eolanus.

FABLE IV. De Morlin, Nouvelle 27.
Famigerabilis.

FABLE V. Au lieu de la Fable Italienne
tirée de la 5. Nouvelle de Morlin, le Tra-
ducteur François substituë icile 142. Con-
te du Livre 2. des Faceties de Bebelius.
Quidam histrio.

X I I I. N U I T.

FABLE I. Au lieu de la Fable Italienne
tirée de la 76. de Morlin, qu'il avoit em-
prunté de la 2. de Pogge, le Traducteur
substituë la 25. du Livre 2. de Bebelius :
Properarunt olim Romam.

FABLE II. Au lieu de la Fable Italienne
tirée de la 13. de Morlin, c'est la 126. du
Livre 2. de Bebelius: *In montibus & Alpibus.*

XVij *Remarques sur les Nuits, &c.*

FABLE III. Au lieu de l'Italienne tirée de la 6. de Morlin, c'est la 143. du Livre 3. de Bebelius : *Filiam quædam mater rogavit.*

FABLE IV. De Morlin , Nouvelle 21. *Aromatarii famulus.*

FABLE V. De Morlin , Nouvelle 20. *Nummosus Cerdo.*

FABLE VI. De Morlin , Nouvelle 29. *Mater defidiosum.* L'Enigme Italienne de cette Fable est ici changée en une Françoisise , dont le mot est *le feu & la cendre.*

FABLE VII. De Morlin , Nouvelle 73. L'Enigme Italienne de cette Fable est aussi changée ici en une Françoisise, dont le mot est *le jeu des tarots*, sorte de jeu de cartes aujourd'hui hors d'usage. Quant à la Nouvelle que j'ai dit être la 73. de Morlin , elle commence par : *Argutulus famulus.* On en a fait une farce en vers François.

FABLE VIII. Au lieu de la Fable Italienne tirée de la 59. de Morlin , c'est la 129. du Livre 2. de Bebelius : *Wormatiæ erant duo futores.*

FABLE IX. De Morlin , Nouvelle 22. *Pulchra scitulaque puella.*

FABLE X. De Morlin , Nouvelle 68. *Civis Parthenopæus.*

FABLE XIII. De Morlin , Nouvelle 51. *Afotus juvenis.*



P R E F A C E

DES FABLES ET PLAISANS

Enigmes du Seigneur Jean
François Straparole.
intitulées.

Les Faccienſes Nuits.



EDANS Milan (qui eſt l'une
des anciennes, & principales
citez de Lombardie, garnie
de belles & gracieuſes Dames,
ornée de magnifiques Palais
& abondante de toutes choſes, qui appar-
tiennent à une triomphante cité) habitoit
Oſtavian Marie Sforce, eſleu Eueſque de
Lode, auquel appartenoit par droit de ſuc-
ceſſion la Seigneurie & Duché, après la
mort de François Sforce Duc de Milan ;
mais par la mutation des temps dangereux
& pervers, par les cruelles haines, par les
ſanglantes batailles, par le continuél chan-
gement & revolution des Seigneurs ; ſe
vint à partir de là, & ſe retira ſecretement à
Lode avec ſa fille Lucrece, eſpouſe de Jean

Tome I.

A.

François Gonzaga, cousin de Federic Marquis de Mantoue : & demeura quelque temps en ce lieu , ce que entendans ses parens le commencerent à poursuivre à son grand dommage & desplaisir: tellement que le pauvre gentilhomme voyant la persecution de ses propres parens , & le mauvais vouloir qu'ils avoient contre luy, & sa fille (qui peu de temps auparavant estoit demeurée vefve) print ce peu de bagues , & deniers qu'il avoit peu sauver, & s'en alla avec sa fille à Venise : où il trouva le fourrier Bertrand , homme de grand lignage , de nature benigne , amiable & gentille , lequel le receut avec grand honneur & courtoisie , en son propre logis. Or pour autant que la trop longue conversation des choses d'autrui engendre le plus souvent ennuy , & fascherie , iceluy d'un meur jugement , & rassis , se voulut partir de là , & trouver en quelque autre part un logis pour estre sien particulierement. Et de fait estant un jour monté sur une nacelle , s'en allant à Muran , où ayant contemplé , & choisi à son gré (entre les autres) un palais de merveilleuse beauté , qui pour lors estoit vuide, il entra dedans, & ayant considéré la plaisante situation du lieu , la court spacieuse, la magnifique galerie, le delectable jardin , renply de riantes fleurs , mille petites mignardises , abondant aussi de diverses sortes de fruiçts & verdoyantes herbes , tant y a que le lieu luy pleut merveil-

leusement. De là montant par les riches degrez de marbre , arriva en une magnifique sale accompagnée de bonnes chambres , & autres commoditez , avec la plate forme sur l'eau, qui descouvroit tout le lieu circonvoisin, en belle veüe. Alors la fille ravie de ceste plaisante & recreative situation, fit tant envers le pere avec ses douces & amiables paroles , que pour satisfaire à sa requeste, il print ce palais à loüage : dont elle receut un merveilleux contentement : parceque soir & matin elle s'en alloit sur la plate forme, & voyant la diversité des poiss-
sons voltiger çà & là à grosses troupes dedans les eaux claires de la mer , prenoit un doux & agreable plaisir. Et pour autant qu'elle n'avoit plus après soy les belles Damoiselles , qui luy souloient autrefois faire la cour , elle en esleut dix autres , non moins gracieuses que belles : les graces & vertus desquelles seroient longues à raconter. La premiere d'icelle s'appelloit Loyse, qui par ses beaux yeux luisans, comme claires estoiles , donnoit grand esbahissement à ceux qui la regardoient. L'autre estoit Vincende , de louables mœurs , de beau corsage , de maintien gracieux ; le beau & delicat visage de laquelle donnoit aux assistans un contentement incroyable. La troisieme estoit Alienor , laquelle nonobstant que par sa naturelle beauté sembloit estre quelque peu hautaine, si estoit elle autant gracieuse & courtoise, que quelque au-

tre Damoiselle qu'on eust peu trouver. La quatriesme estoit Alterie aux blonds cheveux:la quelle par fidelité & devoir de femme, estoit continuellement au service de Madame. La cinquiesme estoit Laurette d'un gracieux regard,vray est qu'elle estoit un peu depiteuse, toutesfois son friand & amoureux regard enchainoit ceux qui la contemploient.La sixiesme estoit Enritrée, la quelle nonobstant qu'elle fust petite, si n'estoit elle point inferieure aux autres en grace & beauté; parce qu'elle avoit les yeux plus flamboyans,& clairs que le Soleil, une petite bouche, le sein un peu eslevé: finalement n'y avoit chose en elle qui ne meritaist singuliere loüange.La septiesme estoit Catherine surnommée Brunette, laquelle avec sa bonne grace, & ses amoureuses parolles, non seulement auroit attiré les hommes, mais auroit fait descendre Jupiter du ciel. La huitiesme estoit Ariane encores jeune, d'un visage honorable, d'une contenance grave,& d'eloquence singuliere,joint que ses divines vertus, accompagnées de loüanges infinies,reluisoient en elle comme les estoilles au ciel. La neufiesme estoit Isabelle, de grand esprit,laquelle avec ses subtils & gracieux propos,rendoit les assistans esmerveillez.La derniere estoit Fleurdiane, sage,garnie de grand entendement, & veux bien dire que ses façons de faire honnestes & vertueuses, surmontoient toutes celles que je veis oncques.Ainsi ces dix gracieuses

Damoiselles toutes ensemble & chacune en son endroit ser voit Madame Lucrece ; laquelle avec icelles esleut deux venerables & honnestes matrones de noble race , d'aage competant , & grandement estimées , afin que par leurs sages conseils , elles ne se partissent de la presence de leur maistresse. L'une d'icelles s'appelloit Madame Claire , femme de noble Jerosine Guidisson , gentilhomme Ferrarois. L'autre estoit Madame Veronique , jadis femme de feu Orbat , gentilhomme de Creme. A ceste douce & notable compagnie , se vindrent joindre plusieurs gentilshommes & doctes personages : entre lesquels estoit l'Evesque Casal de Bologne , Ambassadeur du Roy d'Angleterre , le docte Pierre Bembo Chevalier de Rhodes , Evangeliste des citoyens Modenois , homme de grande entreprinse , qui estoient des premiers de ceste Cour. Apres eux estoient Bernard Capel grand Poete , l'Amoureux Antoine Bembo , le Familier Benoist Trevisan , le Facetieux Antoine Moulin , dit Bourquiella , le cerimonieux fourrier Bertherand , & beaucoup d'autres gentilshommes , qui seroient longs à raconter. Estant donc ainsi ceste notable compagnie , où la pluspart assemblée quasi tous les soirs au logis de Madame Lucrece , passans le temps en danses & plaisans propos , l'entretenans avec sons & chants , tellement que par un moyen & par l'autre , le soudain temps se passoit.

joyeusement, dont elle recevoit un plaisir merueilleux avec ses Damoiselles. Outre cela, on proposoit souventesfois quelques problemes, desquels ceste Dame donnoit la resolution. Or pour autant que Carefme-prenant s'approchoit, qui sont jours dediez à resjouissance & passe-temps, Madamẽ commanda à tous que chacun retournast le soir ensuivant au consistoire, sous peine d'encourir son indignation, afin qu'on peust dechiffrer l'ordre, & le moyen qui devoit estre tenu entr'eux. Parquoy les tenebres de la nuit ensuivante n'eurent pas si-tost couvert la terre, que tous comparurent suivant le commandement à eux fait. Et quand chacun se fut assis selon son degré, la Dame commença ainsi à dire: Mes Gentilshommes honorables, & vous gracieuses Dames, nous sommes icy assembles à la maniere accoustumée, pour donner ordre à nos doux & joyeux esbatemens, afin que ce Carefme-prenant, qui s'aproche en peu de jours, nous puissions prendre quelque galante recreation. Au moyen de quoi chacun de vous proposera ce qui luy sera plus agreable, & tout ce qui sera delibéré par la plus grande partie, soit tenu pour fait. Alors les Dames & les Gentilshommes respondirent tous d'une voix, qu'il estoit très-convenable qu'elle determinât tout. Ainsi donc la Dame se voiant telle charge imposée, se tourna vers toute ceste belle compagnie, en disant: Puisqu'il vous plaist qu'à vostre consentement je determine l'ordre qui se doit tenir, quant

à moy je serois d'advis qu'on dançast tous les soirs jusques à Carefme prenant: cela fait il seroit bon que cinq Damoiselles chantaissent quelque belle petite chanson à leur plaisir, & que chacune d'icelles sur qui tombera le sort, viennent à raconter une Fable, adjoustant tousjours un Enigme, qui sera par nous autres tous subtilement interpreté & resolu; ce passetemps finy, chacun se retirera à son logis pour se reposer: mais si vous ne trouvez mon opinion bonne en cela, je proteste de suivre vostre vouloir, & chacun de vous dira ce qu'il trouvera mieux à son goust. Ceste deliberation fut louée de tous grandement. Alors elle se fist apporter un petit vaisseau d'or, où elle mit les noms de cinq Damoiselles: & le premier qu'on tira, ce fut celuy de gracieuse Laurette, laquelle rougissant de la honte qu'elle avoit, devint comme la rose du matin. Puis consequemment selon l'ordre commencé, le second qui vint dehors, ce fut celuy de la belle Alterie. Le troisieme de Catherine. Le quatrieme d'Eritrée. Le cinquiesme d'Ariane. Incontinent après elle commanda qu'on fit venir les instrumens de musique: & ayant fait apporter une petite couronne de Laurier verd, en signe de souveraineté & excellence, la posa sur la teste de Laurette, en luy commandant que le soir ensuivant elle deust commencer le doux & plaisant deduit des Fables. Puis voulut que le seigneur Antoine Bembo menast une dance avec les autres

Gentilshommes. Elle n'eust pas si tost ouvert la bouche , pour satisfaire à son commandement, il print par la main Fleurdiane, de laquelle il estoit un peu passionné, & les autres firent le semblable. La dance finie assez lentement, avec propos amoureux, les jeunes Gentilshommes avec les Damoiselles se retirerent en une chambre , où estoit preparée une colation excellente , de confitures exquisës , & vins delicieux. Alors chacun d'une grande resjouissance & contentement, se mit à deviser qui d'un propos, qui d'un autre. Puis les gracieux propos finis , chacun print congé de Madame , en se partant avec sa bonne grace. Quand ce vint au soir ensuivant , & que toute l'honorable compagnie fut assemblée après quelques dances à la maniere accoustumée , Madame fit signe à Laurette , qu'elle commençast à chanter, & raconter la Fable, suivant l'assignation donnée le soir precedent : ce qu'elle fit promptement : car s'estant levée, & ayant fait une grande reverence à Madame, & à toute la compagnie , vint à monter en un lieu éminent, où il y avoit une belle chaire , garnie de riches paremens de soye : & ayant faict venir les quatre compagnes esleuës & deputées à ce , chanterent ce petit motet ensuivant, composé à la louange & honneur de Madame, avec voix angeliques, & harmonieuses.

Ce beau maintien & port qui tant aggrée :


PREFACE.

9

*Modeste accueil tant rare & gracieux ;
Gentille Dame en la troupe sacrée ,
Des esprits saints monter vous fait ès cieux :
Et vostre estat de Royale excellence ,
Pour qui le cœur si doucement me faut ,
Cest ornement plein d'un loz, qui tant vaut
En me paissant de vostre alme presence ,
Sont le sujet qui mes esprits dedie
Si fort à vous , que si d'autrui je veux
Faire propos, soudain contre mes vœux ,
Faut que de vous seule au monde je die.*

Après que les cinq Damoiselles eurent mis fin à leur chanson plaisante , les instrumens commencerent à sonner, & la gracieuse Laurette , à qui estoit escheu le premier lieu pour ceste nuictée , sans plus attendre autre commandement de Madame , commença sa Fable en la maniere qui s'ensuit.







LA

PREMIERE NUICT

Des Fables & Enigmes du
Seigneur Jean François
Straparole.

FABLE I.

*Un nommé Salard , se partant de
Genes , vint à Montferrat , où il
desobeit à trois commandemens du
pere, ordonnez par son testament :
& estant condamné à la mort, fut
délivré, & retourna au pays.*



E toutes les choses que
l'homme fait , ou propose de
faire, soient bonnes, ou mau-
vaises , il en doit tousjours
considerer , & diligemment
prevoir l'issüe. Au moyen de quoy, puis que
sommes reduits à ce point qu'il nous faut
commencer nos plaisans propos, & recrea-

tives nouvelles , il m'eust esté beaucoup plus agreable qu'une autre Dame eust ouvert ceste douce & louable entreprise , veu mesmement que je ne me sens pas assez capable & suffisante en telles matieres, me sentant privée du tout d'eloquence , qui est principalement requise en tels propos , par faute de m'estre exercée en l'art de bien & proprement dire comme ont très bien fait nos gracieuses compagnes. Mais puis qu'ainsi vous plaist, & que le sort a voulu que je sois la premiere à deviser , afin que mon silence ne mette quelque desordre en ceste notable & amiable compaignie, je commenceray assez maigrement nos propos , avec ce peu de moyen qui me sera donné & departy par la divine faveur, laissant le champ ample & spacieux aux compagnes qui me suivront, pour mieux & plus eloquemment raconter leurs fables. Je dis donc que bien heureux, & très-heureux est l'enfant qui en bonne & redevable reverence est obeyssant au pere: parce qu'il accomplit le commandement que Dieu luy a donné , vivant longuement sur terre, & ayant bonne yssue de toutes ses affaires. Au contraire , le desobeyssant est tousiours estimé miserable & malheureux: car la fin de ses entreprises est coustumierement dommageable & pernicieuse, comme vous pourrez aisément comprendre par la presente Fable que je vous diray.

Vous devez donc sçavoir, gracieuses Dames, qu'à Gennes (cité très ancienne, & pos-

sible autant plaisante & recreative que quelque autre que ce soit) y avoit depuis peu de temps en ça un Gentil-homme, nommé Renaud Scaille, homme veritablement non moins abondant aux biens de la fortune, qu'aux graces de l'esprit. Outre plus, estant ainsi riche & docte, il avoit un fils nommé Salard, qu'il aimoit sur toutes choses. Au moyen dequoy il l'instruisoit & façonnoit comme doit faire un bon & amiable pere, ne luy laissant avoir faute de chose qui luy fust utile & louable. Or advint que Renaud, estant desja parvenu à vieillesse, tomba en une grosse maladie, & se voyant en extremite de mort, fit appeller un Notaire pour faire escrire son testament, par lequel il institua Salard son heritier, en le priant, comme bon pere, qu'il se souvinst de trois commandemens, sans jamais s'esloigner d'iceux. Le premier estoit, que pour quelque amour qu'il portast à sa femme, qu'il ne luy revelast aucunement son secret. Le second, qu'il ne deust en façon quelconque nourrir & entretenir comme fils, un qui ne seroit point engendré de luy, en le faisant son heritier. La troisieme, qu'il ne s'assujettist jamais à aucun Seigneur, qui gouvernast son pays à sa teste. Cela fait, luy ayant donné sa benediction, tourna le visage vers la muraille, & en moins d'un quart d'heure vint à rendre l'esprit. Incontinent après sa mort Salard demeure seul heritier. Et se voyant jeune, ri-

che , & de grosse lignée , en lieu de penser aux commandemens, du pere, & à la multitude des affaires qui luy servenoient , comme nouveau possesseur des biens paternels, luy vint en fantasie de prendre femme, & la prendre telle, & yssue de telle maison, qu'il s'en trouuast content. Tant y a qu'il ne passa pas un an après la mort du pere qu'il se maria, & print pour femme Theodore , fille du Seigneur Odescalque Doria , Gentil-homme Genevois, & des plus apparens de la ville. Et pour autant qu'elle estoit belle, & de bonne grace, nonobstant qu'elle fust quelque peu dépiteuse , si estoit elle tant aymée de son mary , que jour & nuict il ne l'abandonnoit jamais. Ayant demeuré quelque espace de temps ensemble, sans en pouvoir avoir ou nourrir enfans , il print fantasie à Salard, par le consentement de sa femme, d'en prendre un pour son fils adoptif , contre le commandement du pere , & iceluy nourrir & entretenir comme son propre fils legitime & naturel , & finalement le faire son heritier en tous ses biens. Et de fait, tout ainsi qu'il avoit déterminé , & resolu en son esprit, aussi tost fust-il mis en execution : car il print pour fils adoptif un jeune enfant d'une pauvre femme vefve , nommé Postume , lequel fut par eux nourry & entretenu un peu plus mignardement qu'il ne luy appartenoit. A quelque temps de là Salard print sa quinte de se partir de Genes pour aller demeu-

rer autre part , non point que la ville ne fust belle & honorable à son gré , ains fut esmeu d'un certain appetit , qui le plus souvent vient à esbranler ceux qui vivent sans le gouvernement d'aucun superieur.

Ayant donc fait une bonne bourse de deniers , avec bagues , & autres richesses , après avoir mis en bon équipage ses chevaux , & harnois , se vint à partir de Genes avec sa femme Theodore , & son fils adoptif Postume , & prenant son chemin vers le Piedmont , s'en vint à Montferrat , où s'estant accommodé assez honorablement , commença à prendre amitié avec les uns & les autres , & s'en alloit bien souvent à la chasse avec les Bourgeois & Citoyens , prenant avec eux mille autres passe-temps , en quoy il se delectoit. Au reste sa magnificence estoit desja si notoire à un chacun , qu'il n'estoit pas seulement aimé , mais grandement honoré des plus apparens. Desja si grande liberalité estoit venue aux oreilles du Marquis , & le voyant jeune , riche , noble , sage , & metable en toutes choses , luy commença à porter si grande amitié , qu'il ne se pouvoit passer qu'il ne l'eust tous les jours en sa compagnie. Bref l'amitié du Marquis estoit si grande vers Salard , que quiconques vouloit impetrer grace de luy , il falloit passer par ses mains , autrement la grace n'avoit point de lieu. Au moyen dequoy , se voyant Salard estre en si grand credit , taschoit par tous moyens de luy

complaire en ce qu'il pensoit luy faire chose agreable. Le Marquis qui estoit pareillement jeune, prenoit grand plaisir à la chasse des oyseaux & bestes sauvages, & de fait, il tenoit ordinairement chiens & oyseaux, selon l'estat d'un magnanime Seigneur, & jamais on ne l'eust veu aller à la chasse si Salard n'eust esté avec luy. Advint qu'un jour entre les autres se trouvant Salard seul en sa chambre, commença à penser au grand honneur que luy faisoit le Marquis, puis venoit à contempler la bonne grace, l'honneste maintien, & les bonnes mœurs de son fils Postume, & comment il luy estoit obeyssant. Estant sur ces discours, il disoit en luy-mesme : Mon pere n'estoit-il pas bien abusé ? certes j'estime que il radotoit, comme font coustumierement les vieilles gens, je ne sçay quelle frenesie, ou quelle sottise l'incita à me commander expressement, de ne nourrir jamais enfant qui ne fust engendré de moy, ny de me soumettre au vouloir d'un seigneur qui gouvernast ses sujets à sa seule fantaisie : je cognois bien maintenant assez evidemment que les commandemens estoient bien esloignez de la verité, par ce que Postume est mon fils adoptif, & jamais ne l'engendray : si est-il bien fils sage, gentil, bien nay, & assez obeyssant. D'avantage pourrois-je estre mieux caressé que je suis du Marquis ? il est certain qu'il ne connoist aucun superieur sur soy,

& neantmoins l'amour est si grand qu'il me porte, & me fait tant d'honneur, qu'on diroit que je suis son supérieur, & qu'il tient de moy. En quoy je suis si fort esmerveillé, que je ne sçay que dire. Il y a un tas de vieillards radotez & insensé qui ne se souvenans plus de ce qu'ils ont fait en leur jeunesse, veulent donner loy & ordonnances à leurs enfans, & se veulent mesler de leur imposer charges; qu'ils ne toucheroient pas avec le doigt. Et font cela non point d'un amour qu'ils leurs portent, mais incitez d'une simplicité, afin qu'ils soient longuement en quelque travail. Mais tant y a que de deux poincts que m'avoit ordonné mon pere, j'en ay eu contre mon espoir trèsbonne yssue, & quant au troisiéme, j'en veux faire en brief experience, car je suis asseuré que ma chere & douce compagne & amie m'en confirmera d'avantage en son cordial & loyal amour. Alors elle, que j'ayme beaucoup plus que la lumiere de mes yeux, donnera à connoistre quelle simpleesse ou sottise est celle de la miserable vieillesse qui se baigne quand elle peut emplier son testament de conditions ridicules. Je cognois bien maintenant que mon pere estoit privé de sa bonne memoire, en faisant son testament, & comme vieillard insensé & hors de bon iugement, faisoit des actes d'enfant. En qui me pourray-je plus seurement fier, qu'en ma propre femme, laquelle a abandonné le pere, la mere, les

freres, les sœurs de sa propre maison pour estre une mesme ame, & un mesme cœur avec moy ? tellement que je me puis bien asseurer que je luy peux bien reveler mon secret, de quelque importance qu'il soit. Je feray donc experience de sa loyauté, non pas en mon endroit, veu que je suis asseuré qu'elle m'ayme plus que soy-mesme, mais j'en veux un peu faire l'essay, suivant la coustume des autres jeunes gens, qui sottement croient estre un peché irremissible de contrevenir aux lourds, & bestiaux commandemens des peres, qui entrent continuellement en quelque frenaisie, comme ceux qui resvent. Se moquant ainsi Salard en soy-mesme des sages, & profitables commandemens paternels, il se delibera de rompre le troisieme. Et de fait, il se partit sur le champ de sa chambre, & estre descendu des degrez, s'en alla droit au Palais du Marquis, & s'estant approché de la perche, où y il avoit assez grand nombre de Faucons, print le meilleur, & celuy que le Marquis tenoit le plus cher, & sans estre veu de personne, l'emporta sans dire mot, au logis d'un sien amy nommé François, & en le luy presentant le pria estroitement pour l'amitié qui estoit entr'eux deux, de le luy garder jusques à ce qu'il entendroit son vouloir. Cela fait, il s'en alla en son logis, & print un des siens qu'il tua secretement sans que personne s'en apperceust, puis le porta à

sa femme , en luy disant tels propos : Mammie Theodore , je ne puis avoir , comme vous pouvez sçavoir , une heure de repos avec nostre Marquis : car en chassant , oyse-
lant , maniant les armes , ou faisant autres braveries, il me tient continuellement occupé en quelque exercice: tellement que le plus souvent , je ne sçay si je suis mort ou vif. Parquoy à fin de le divertir d'aller tous les jours à la chasse , je luy ay donné une telle trouffe qu'il ne s'en trouvera gueres content : & peut-estre qu'il sera de repos quelque temps , & en ce faisant nous nous reposérons pareillement. Alors la femme luy dit : Que luy avez-vous donc fait? Et il luy respondit: J'ay tué le meilleur faucon , & le plus cher qu'il eust point , & pense que quand il ne le trouvera point, qu'il en mourra de despit , & de rage. En disant cela , il tira de dessous sa cappe le faucon mort , & le bailla à sa femme , en luy enchargeant de le faire cuire , & qu'il le mangeroit pour l'amour du Marquis. La femme , oyant les paroles du mary , & voyant le faucon mort , en fit une grande plainte , & se tournant vers luy , luy com-
mença à reprocher l'offence qu'il avoit fait. Je ne sçay , dit-elle, comme vous avez peu commettre un si grand forfait à l'en-
contre du seigneur Marquis , qui vous porte si grande affection. Il vous complaist en ce que luy demandez , vous donnant le premier lieu vers sa personne. Helas mon

amy Salard , mon amy vous avez procuré une grande ruine. Si de malheur le Marquis en a la moindre cognoissance de ce monde , que sera-ce que de vous ? Certes vous seriez en danger de mort. A quoy luy répondit Salard : Comment voudriez-vous qu'il en fust adverty ? Homme du monde ne le sçait que vous & moy : au moyen dequoy je vous voudrois bien prier pour l'amour que m'avez tousjours porté , & me portez à présent , que ne le manifestiez à personne , autrement ce seroit ma ruine , & la vostre. Ne doutez point de cela , dit-elle , j'aymeroie mieux souffrir mille morts , que jamais reveler un tel secret. Après que le faucon fut bien cuit , Salard , & Theodore se mirent à table , & pour autant qu'elle ne vouloit point manger du faucon , ny faire conte des paroles du mary , qui la prioit amiablement d'en manger , il vint à haussier la main , & luy donna si beau horion sur le visage , que la joue dextre luy en devint rouge , tellement qu'elle se mit à plorer , & faire les plus grandes plaintes de ce monde , de ce qu'il l'avoit ainsi asprement battuë. Puis se leva de table , & en grondant entre ses dents le menassoit disant qu'il s'en souviendrait à tout le temps de sa vie , & s'en vengeroit à temps & lieu. Et de fait , le matin ensuyvant elle se leva assez tost , & sans plus retarder s'en alla trouver le Marquis , en luy racontant de poinct en poinct la mort du faucon. Ce

que entendant le Marquis , se mit si fort en colere , qu'il le fit prendre , & sans ouyr aucune raison ny deffense, le condamna sur le champ à estre pendu & estranglé , & que tous ses biens seroyent confisquez , & divisez en trois parties. La premiere seroit baillée à sa femme qui l'auoit acculé , l'autre au fils , & la troisième seroit assignée à celuy qui le pendroit.

Or Postume qui estoit d'une corporance assez bien formée, & assez adroit de sa personne , ayant esté abreuvé de la sentence donnée contre son pere , s'en alla trouver incontinent la mere , & luy dit : Mere , ne vaudroit-il pas mieux que je pendisse mon pere , & que je gagnasse plustost le tiers de son bien que quelque autre estrange personne ? Alors la mere luy respondit : Certes , mon fils , c'est trèsbien dit à toy : car en ce faisant tout le bien demeurera à nous deux. Incontinent après ce fils s'en alla trouver le Marquis , & luy requist d'avoir ceste faveur de luy ; qu'il pendist son pere , afin qu'il fust successeur de la tierce partie du bien , comme il avoit ordonné pour le bourreau. Ceste requeste luy fut gracieusement par le Marquis octroyée. Or Salard avoit prié un sien fidele amy , nommé François , à qui il avoit descouvert son secret , que quand la justice le meneroit au gibet pour le faire mourir , il s'en allast soudainement au Marquis le priant , que Salard fust mené devant luy , & que ce fust

son plaisir l'escouter devant qu'il fust executé, ce qu'il fit de point en point. Cependant, estant le pauvre Salard en la dure prison ayant les fers aux pieds, & attendant d'heure en heure, d'estre mené au supplice souffrir mort ignominieuse, commença à dire en soy-mesmes en pleurant amèrement: Je cognois bien maintenant, que mon bon vieillard de pere avec sa longue experience, me conseilloit mon profit, & mon salut. Iceluy comme prudent, & sage me donnoit un bon conseil, & moy malheureux, & insensé n'en fis conte. Pour me sauver il me commanda que je deusse fuyr ces miens domestiques ennemis, & moy pour leur donner occasion de me mettre à mort, & prendre plaisir en icelle, je me suis mis à leur discretion. Cognoissant pareillement la nature des Princes, qui en une mesme heure ayment, & hayssent, exaltent, & abaissent, me conseilla de m'eslongner d'eux; & moy lourdaud que je suis, pour perdre les biens, l'honneur, & la vie, les ay imprudemment cherchez. Pleust à Dieu que je n'eusse jamais experimenté ma desloyable femme. O Salard, Salard, combien t'eust-il esté plus profitable si tu eusses suivy les traces de ton pere, laissant les flateurs, & badins faire la court aux Princes, & Seigneurs? Je voy bien maintenant où je suis réduit pour m'estre trop fié en moy-mesme, en ma femme, & en mon maudit enfant, &

sur tout pour avoir trop creu à ce Marquis tant ingrat. Je suis maintenant tout assuré combien il m'aimoit. Mais que me pouvoit-il faire pis ? rien certainement : car il m'offense mon bien , mon heur , & ma vie tout à un coup. Helas comment son amour s'est soudainement changé en cruelle & sanglante haine ! Je cognois bien que ce proverbe n'est pas dit sans cause , c'est à sçavoir , que le seigneur est semblable au vin du flascon , qui est bon au matin & le soir corrompu. O malheureux Salard , où es tu reduit ? où est ta noblesse ? où sont tes chers parens , où sont tes magnifiques richesses ? où est ta loyauté , integrité , & courtoisie ? O pere debonnaire , je croy que mort comme vous estes en regardant au miroir de l'éternelle bonté , me voyez en ce lieu prest à estre pendu , non point pour autre raison , sinon parce , que je n'ay pas voulu croire vos sages & amiables commandemens : & croy fermement , que vous m'aymez pour le present d'aussi grande affection , que vous fistes oncques , & priez incessamment le bon Dieu qu'il ait pitié de mes jeunes folies , fautes & ignorances : & de ma part comme fils ingrat en vostre endroit , & desobeyssant à vos bons , & louables commandemens , je vous supplie me pardonner. Cependant que Salard se reprenoit ainsi en luy-mesme , faisant telles plaintes , son fils Postume , comme bon bourreau bien appris , s'en alla avec tou-

te la court vers la prison, & se représentant assez arrogamment devant le pere luy tint tels propos : Mon pere , puis que la fortune veut que par la sentence de Monseigneur le Marquis , vous devez aujourd'huy estre infailiblement pendu , & estranglé , & que le tiers de vos biens doit estre appliqué à celuy qui vous pendra , cognoissant l'amitié que me portez , je pense qu'il ne vous desplaira point si je fais tel office moy-mesme : car en ce faisant vos biens ne tomberont point en autre main , ains demoureront au logis comme auparavant , en quoy me semble , que vous devez estre content. Salard , qui escoutoit attentivement les paroles de son fils, répondit ainsi : Dieu te benie mon fils , ta raison est fort bonne : & me plaist , & si auparavant je mourois mal content , je t'assure que je mourray maintenant fort content. Fay donc ton office mon fils , & n'attens plus. Alors Postume luy demanda premierement pardon, & le baïsa en la bouche, puis print le cordeau & le luy mit au col en le confortant , & priant de prendre la mort en patience. Salard voyant le soudain changement des choses demeura tout estonné , & en sortant de la prison ayant les mains liées par derriere , avec le cordeau à l'entour , du col , accompagné du bourreau & de tous les Sergens & ministres de justice , se mist à cheminer assez hastivement vers le lieu de la justice : où estant arrivé il tourna
les

les espaules à l'eschelle, qui estoit appuyée au gibet, & ainsi monta d'eschelon en eschelon iusques au plus haut; où d'un courage constant & assuré, il commença à regarder le peuple à l'entour, en racontant par le menu la cause pour laquelle il estoit ainsi mené au gibet: puis avec douceur, & amiables paroles demanda humblement pardon de toutes les fautes commises, exhortant principalement les enfans à estre obeissans à leurs peres anciens. Le peuple ayant entendu la cause de la condamnation de Salard, il n'y eut celuy en la compagnie qui ne pleurast, & regretast le malheur de ce pauvre jeune homme, & qui ne desirast sa grace. Cependant ces entrefaictes François s'en estoit allé au Palais vers le Marquis luy disant telles parolles: Illustissime Seigneur, si jamais aucune estincelle de pitié fut allumée au cœur d'un juste Seigneur, je suis assuré qu'elle se redoublera, & multipliera en vous, si avec vostre accoustumée clemence, & douceur vous escoutez, & considerez l'innocence de l'amy reduict en extremité de mort par erreur, non appercu. Quelle cause (Monseigneur) vous esmeut à condamner le pauvre Salard, qui vous aymoit d'un tel cœur? il ne vous offensa jamais, & n'y pensa oncques. Mais si c'est vostre plaisir le faire venir icy devant qu'il meure, je vous feray cognoistre apertement son innocence. Le Mar-

quis, ayant les yeux enflambez de colere, sans donner autre responce à François, le vouloit chasser, quand il se jetta en terre, & luy ayant embrassé les genoux commença à dire en plorant: Ayez pitié, Seigneur bening, je vous supplie, que l'innocent Salard ne meure point pour vostre regard: cessez vostre perturbation, & je monstrey son innocence; cessez pour une heure, Seigneur, & attendez pour l'amour de justice, que vous avez tousjours maintenüe avec vos ancestres. Monseigneur je vous prie, qu'on ne die point de vous, que vous faciez si precipitamment mourir vos amis. Le Marquis d'un grand despit dit contre François telles paroles: Je voy bien que tu veux estre compagnon de Salard, & si tu attens plus gueres le feu de mon courroux, je t'en feray incontinent autant. Alors François luy respondit: Je suis content, Monseigneur, que ma longue servitude aye ceste recompense, que vous me faciez pendre avec Salard, si vous ne le trouvez innocent. Le Marquis considerant la grande amitié de François vers son amy Salard, pensast en soy-mesmes, qu'il ne s'obligeroit pas à estre pendu avec luy, s'il n'estoit asseuré de son innocence: tellement qu'il accorda d'attendre encores une heure, & si François ne prouvoit qu'il estoit innocent, qu'il se deliberaست de souffrir mort avec luy. Puis fit appeller un serviteur, & luy commanda qu'il s'en allast

en diligence au lieu de la justice , & qu'il commandast en son nom aux ministres , qu'ils ne passassent point outre ; ce que Salard ainsi lié avec le cordeau au col , fut amené devant luy , estant accompagné du bourreau , & de tous les satellites. Si tost que Salard fut arrivé en la présence du Marquis , & le voyant encores enflambé du visage , commença d'un hautain courage & d'un visage assuré , & couvert , sans estre aucunement troublé , à luy dire tels propos : Monseigneur , le service , que je vous ay fait , & l'amour que je vous porte , n'avoient point mérité l'outrage , & la honte que vous m'avez fait , en me condamnant à si vituperable , & ignominieuse mort. Et combien que le desdain , que vous avez prins pour ma grande folie , si folie se doit nommer , vous incitoit à devenir cruel à l'encontre de moy , contre vostre naturel , si ne me deviez vous point si soudainement condamner à la mort , sans ouïr mes raisons & defenses : car le faucon pour lequel vous estes tant courroucé , pensant qu'il soit mort , est encores vivant & au mesme estat qu'il estoit auparavant : & ne pensez point que je l'aye jamais prins pour le tuer , ny pour faire tort en façon quelconques ; mais pour faire experience de quelque objet , lequel je vous manifesteray. Et ayant appelé son amy François , qui estoit là présent , le pria de porter ce faucon , & le rendre à son maître. Cela fait depuis le

commencement jusques à la fin luy raconta les bons commandemens du pere, & la desobeyssance d'iceux. Le Marquis oyant les propos de Salard, qui sortoient du profond du cœur, & voyant son faucon aussi gras, & en bon point qu'il estoit auparavant, devint quasi muet. Mais après qu'il fut revenu un peu en soy-mesme, il vint à considerer sa faute d'avoir ainsi inconsidérément condamné à mort l'amy innocent. Puis vint à hauffer les yeux enflés de larmes, & en regardant au visage de Salard luy dit ces parolles : Salard, si tu pouvois maintenant penetrer avec tes yeux la partie interieure de mon cœur, tu cognoistrois infailliblement, que le cordeau qui t'a jusques à present, environné le col, & les mains, ne t'a point donné tant de douleur, qu'à moy de fascherie, ny tant de peine à toy, que de douleur à moy : tellement que je ne pense plus vivre joyeux, & content, puis que je t'ay offensé en telle maniere, veu mesmement que tu m'aimois, & servois d'une si grande loyauté. Et s'il estoit possible de pouvoir annuler ce qui s'est fait, ne doute point que je ne le fisse. Mais pour autant qu'il est impossible, je m'efforceray de tout mon pouvoir de reparer si bien ceste offence, que tu en seras content. Cela fait, le Marquis de ses propres mains luy osta le cordeau du col, & luy deslia les manettes, & l'embrassant de grande affection, & le baisant par plu-

ieurs fois , le print avec sa main dextre , & le fit asseoir près de soy. Puis voulant , que le cordeau fust mis au col de Postume , pour son meschant abominable forfait , & qu'il fust pendu , & estranglé ; Salard ne le voulut jamais permettre , mais l'ayant faict venir devant soy , luy dit telles paroles : Mon fils Postume , qui as esté nourry , & entretenu de moy jusques à present pour l'amour de Dieu , je ne sçay que je dois faire de toy : Dieu le sçache : car d'un costé l'amour que je t'ay porté jusques à present m'attire , de l'autre costé le despit que j'ay de ton mauvais , & impitoyable vouloir me vient à esbrantler. L'un veut que je te pardonne comme bon pere , l'autre m'incite d'exercer vengeance à l'encontre de toy. Que doy-je donc faire en cecy ? Si je te pardonne , on me monstrera au doigt ; si je fais aussi juste vengeance de ton forfait , je desobeyray au divin commandement. Mais à fin que je ne sois point trop pitoyable , ny trop cruel , je prendray la voye du milieu , & ne seras point de moy corporellement puny , aussi ne te sera-il point du tout pardonné. Prends donc ce cordeau que tu m'avois , n'agueres , lié à l'entour du col , & en recompense des biens que tu esperois avoir après ma mort , porte-le avec toy en te souvenant tousjours de moy , & de ta vilennie , estant de moy si esloigné que je n'entende jamais nouvelles de toy. Cependant Theo-

dore estant abreuvée de ceste nouvelle deliberation de Salard, s'ensuit, & se retira dedans un monastere de Nonnains, où elle finit miserablement ses jours. Alors Salard estant adverty de sa mort print congé du Marquis, & se partit de Montferrat, & retourna à Genes où il vesquit longuement en grande liesse, & donna pour Dieu la pluspart de ses biens, retenant seulement ce qu'il luy estoit bastant pour soy vivre.

Ceste Fable de Laurette, avoit desja faict plorer par plusieurs fois les compaignes : mais entendans que Salard estoit delivré du gibet, & Postume vituperamment chassé, & Theodore miserablement morte, se resjouyrent grandement, rendans graces à Dieu qui l'avoit ainsi delivré. La Dame qui avoit attentivement escouté la piteuse Fable, plorant quasi de joye, commença ainsi à dire : Si ces autres damoiselles se portent aussi bien, en racontant leurs Fables, comme a faict la plaisante, & gracieuse Laurette, chacun de nous se pourra bien contenter, & sans dire autre chose, ny sans attendre aucune responce, commanda qu'elle proposast son Enigme afin que l'ordre du soir precedent fust observé, tellement que pour obeyr à son commandement, dit avec un visage riant :

*Entre deux serrures née
Je fus & emprisonnée :*

*Fils de moy mauvais naquit ,
 Lequel de grandeur n'acquit
 Qu'à la mesure d'un grain
 De millet , & qui par faim
 Me devora sans respect ,
 Ny conseil : ô dur aspect !
 Quand ma fortune proterve
 Mere ne souffre pour serve.*

Ce docte & subtil Enigme proposé par la gracieuse Laurette , fut de tous diligemment escouté, au grand contentement & plaisir d'un chacun; & qui l'interpretoit en une maniere , & qui en l'autre ; mais il n'y eut aucun qui frappast au but : tellement que la gentille Laurette le voyant ainsi douteux , dit en se souffriant: L'enigme par moy proposé, si je ne suis deceue , ne signifie autre chose , sinon la fève sèche , laquelle estant née se tient enclose entre deux serrures , c'est à sçavoir deux escorces : puis naist en icelle un petit ver de la forme d'un grain , qui la ronge & consomme si asprement , que de mere elle ne peut demeurer servante. Ceste exposition donnée par Laurette , pleut merveilleusement à un chascun : en quoy elle fut louée de tous generalement. Puis ayant fait une grande reverence à la compagnie , se mit à seoir en sa place. Alors Alterie , qui estoit assise près de Laurette , à qui estoit escheu le second lieu pour dire sa Fable, desirant beaucoup plus de raconter,

92 LA I. N U I C T,
que d'escouter, sans attendre autre com-
mandement de Madame, commença à
dire ainsi:

F A B L E II.

*Un fameux larron nommé Cassan-
drin, amy du Prevost de Perouse,
luy desroba son liçt & son cheval.
Puis luy ayant présenté Messire
Severin lié dedans un sac, devint
homme de bien & de grande en-
treprinse.*



A vertu de l'entendement hu-
main, très-honorables dames,
est si haute & subtile, qu'il
n'y a chose en ce monde si
griefve & si malaisée, qu'estant
présentée devant elle ne luy semble leger-
e & facile. Au moyen de quoy le menu
peuple dit coustumierement, que l'hom-
me fait ce qu'il veut; lequel proverbe
me donne matiere de vous raconter une
Fable, laquelle nonobstant qu'elle n'est
pas à rire, si est-ce que vous y prendrez
grand plaisir, & delectation: veu qu'elle
nous apprendra facilement à cognoistre la
ruse, & finesse de ceux, qui continuelle-
ment volent & desrobent les biens, & l'a-

voir d'autrui en mille sortes.

En l'ancienne Perouse, noble cité de Romagne, fameuse aux lettres, & très-abondante en vivres, habitoit, depuis peu de temps en ça, un jeune rustre autant bien dispos de sa personne, qu'il y eut onc; & s'appelloit Cassandrin. Il avoit si bon bruit, que par ses larrecins, & pilleries tout le peuple de Perouse le cognoissoit tellement que plusieurs citoyens & artisans s'estoient allé souventesfois plaindre au Prevost, avec grosses charges, & informations pour les biens qu'il leur avoit volé: si n'en fut-il jamais pourtant châtié, sinon par menaces. Or combien que Cassandrin fust pour ses larrecins, & forfaits, infame & du tout desespéré, si estoit-ce qu'il avoit en soy une loüable vertu, veu qu'il exercoit son larrecin non point par avarice, mais pour pouvoir à temps & lieu monstrier sa liberalité, & magnificence, vers ceux qui luy estoient benigns, & favorables. Et pour autant qu'il estoit affable, plaissant & facecieux, le Prevost l'aymoit de si grande affection, qu'il ne pouvoit estre un jour sans l'avoir en sa compagnie. Perseverant ainsi Cassandrin en ceste vituperable partie: & d'autre costé en une loüable vie; venant aussi le Prevost à considerer les justes plaintes, qui luy estoient portées de jour en jour contre Cassandrin, ne le pouvant pareillement punir pour l'amour grande qu'il luy

portoit ; un jour l'appella secrettement en son arriere chambre , & commença à l'admonester charitablement , en luy conseillant de laisser ceste mauvaïse vie , & suivre la vertu , fuyant les precipitans dangers où il pouvoit encourir pour sa malheureuse vie. Cassandrin qui diligemment avoit entendu les paroles du Prevost , répondit : Monseigneur , j'ay ouy , & clairement entendu les amiables & doux admonestemens qu'il vous a pleu me faire , de vostre grace : & cognois que cela depart de la claire fontaine de l'amitié que me portez , dont je vous remercie grandement. Vray est qu'il me fait mal qu'un tas d'insensez envieux du bien d'autruy , tachent à semer scandales , & oster avec leurs venimeuses paroles , l'honneur , & bonne renommée d'autruy. Ces gens quels qu'ils soient , feroient beaucoup mieux à tenir leurs langues entre les dents , que de blâmer autruy. Le Prevost qui avoit faute d'un peu de levain , adjousta foy aux paroles de Cassandrin , ne se souciant gueres des plaintes , qui estoient journellement faites contre luy , pour autant que l'amour que le Prevost luy portoit , luy avoit tant esblouy les yeux , qu'il ne voyoit point plus outre. Advint un jour , se trouvant Cassandrin avec le Prevost à table , en devisant de diverses matieres plaisantes & faccieuses , luy vint à raconter entre autres choses , d'un jeune homme , que nature

avoit doié d'une telle astuce, qu'il n'y avoit chose au monde si cachée & diligemment gardée, que par son art il n'emporta furtivement. Ce que entendant le Prevost luy dit : Ce jeune homme que tu dis, ne peut estre autre que toy, qui es homme prompt, malicieux, & rusé : mais quand tu me pourrois desrober ceste nuit le liét où je couche, je te promets ma foy de te donner cent florins d'or. Oyant Cassandrin les propos du Prevost, se troubla grandement, & luy respondit en telle maniere : Monseigneur, à ce que je puis cognoistre, vous m'estimez un larron, si est-ce que je ne le suis pas, sous correction, & ne suis point fils de larron : ains je gaigne ma vie avec mon industrie, & à la sueur de mon corps, & ainsi je passe ma vie le mieux qu'il m'est possible. Mais si c'est vostre plaisir de me faire mourir pour tel cas, je suis content de vous faire ce plaisir là, pour l'amitié que je vous ay tousjours portée, & vous porte maintenant, puis je mourray content. Desirant donc Cassandrin de complaire au Prevost, sans attendre autre response, se partit incontinent, songeant & imaginant tout ce jour là, comment il luy pourroit desrober son liét, & qu'il ne s'en apperceust point. Estant en ceste deliberation, il luy vint en la fantasia un tel moyen. Le propre jour de ceste imagination il estoit mort à Perouse un pauvre coquin qui avoit esté enterré en

une sepulture hors de l'Eglise des Jacobins. Quand ce vint sur le premier sommeil de la nuit, il s'en alla secrettement à ceste sepulture, & tira dehors par les pieds ce corps mort, & l'ayant despouillé tout nud, le revestit de ses propres accoustremens, qui luy estoient si bien accommodez sur luy, qu'on ne l'eust point estimé un belistre, mais plustost Cassandrin. Cela fait, l'ayant chargé sur ses épaules le mieux que il peut, s'en alla vers le Palais, où estant arrivé avec ce corps sur les épaules, monte par une eschelle qu'il avoit portée, & fit tant qu'il monta sur la couverture du Palais. Puis commença dextrement à descouvrir les tuiles, & avec ses ferremens il perça si bien les lattes & chevrons, qu'il fit un pertuis sur la chambre où estoit couché le Prevost, lequel ne dormoit pas, ains oyoit clairement tout ce que faisoit Cassandrin : & combien qu'il sentist son domage par ceste ouverture, si est-ce qu'il prenoit plaisir, attendant tousjours le point qu'il desrobast son liét, disant en soy-mesme : Fay le pis que tu pourras, Cassandrin, car je t'assure bien que tu n'auras pas ceste nuit mon liét. Estant ainsi le Prevost avec les yeux ouverts, & les oreilles arguet, attendant que le liét luy fust volé, voila Cassandrin qui laissa tomber par le pertuis du plancher ce corps mort, qui donna si grand coup sur les carreaux de la chambre du Prevost, qu'il en fut tout

espouventé: & croyant pour vray que Cassandrin mesme fust tombé, parce qu'il avoit ses accoustremens, dit en soy-mesme, en se plaignant: Helas! qu'ay-je fait? voila comment par un mien sot appetit, je suis cause de la mort de cet homme icy. Que dira-t'on de moy quand on saura qu'il est mort en ma maison? Comment les hommes doivent estre prudens & rassis? Estant le Prevost en ses regrets, il vint à heurter à l'huis de la chambre d'un sien loyal & fidele serviteur, & l'ayant esveillé luy raconta ce piteux inconvenient, le priant de faire une fosse au jardin pour mettre le corps mort dedans, afin qu'un tel scandaleux cas ne vint en lumiere. Or cependant que le Prevost & le serviteur estoient empeschez après la sepulture, voicy Cassandrin qui estoit au dessus, voyant tout le mystere sans dire mot, ne voyant & entendant personne en la chambre, premierement se laissa devaler par une corde, & ayant fait un fardeau du liêt, l'emporta à son aysé sur le champ. Si-tost que le corps mort fut ensevely, & que le Prevost fut retourné en sa chambre pour se reposer, il vit que son liêt n'y estoit pas: dont il fut tout estonné, & s'il voulut reposer force luy fut trouver autre party, pensant toujours à la subtilité & finesse de ce rusé larron. Le matin ensuivant, Cassandrin, suivant la coustume, s'en alla au Palais, & se presenta devant le Prevost, lequel luy dit:

Assurément Cassandrin, tu es un gentil larron. Qui se seroit jamais imaginé de voler si finement mon liét que toy ? Cassandrin ne répondit rien, ains faisoit de l'esbahi, comme s'il n'y eust jamais touché. Tu m'as donné une belle trouffe, disoit le Prevost ; mais je veux que tu m'en fasses une autre ; alors je cognoistray ton esprit : si tu me desrobes la nuit ensuivant mon cheval que je tiens si cher, je te promets, outre les cent florins que je te promis, de t'en donner autres cent. Cassandrin oyant l'intention du Prevost, fit semblant d'estre troublé, se plaignant grandement de ce qu'il avoit si mauvaise opinion de luy, le priant continuellement de n'estre point cause de sa ruine. Le Prevost voyant que Cassandrin luy refusoit sa demande, se mit en colere, en luy disant : Si tu ne fais ce que je te dis, n'attens autre chose de moy, sinon d'estre pendu & estranglé aux creneaux des murailles de ceste ville. Voyant Cassandrin la chose estre dangereuse, & que c'estoit à bon escient, dist au Prevost : Je feray tout mon pouvoir de vous contenter, quoy qu'il en advienne, combien que je ne sois pas propre à ce faire, & print congé de luy. Le Prevost, qui vouloit encore esprouver l'esprit subtil de Cassandrin, appella un sien serviteur, & luy dit : Va t'en à l'estable, & selle & bride mon cheval, puis monte dessus, & fay que tu n'en descende point de ceste

nuict : mais donne toy bien garde , & aye l'œil qu'il ne te soit osté. Puis commanda à un autre qu'il se tint à la garde du Palais : & ayant très-bien fermé les portes, tant du Palais que de l'estable avec bonnes & puissantes clefs, se partit. La nuit venue, Cassandrin print ses ferremens , & s'estant approché de la porte du Palais, trouve que le gardien dormoit assez doucement. Et pour autant qu'il sçavoit bien tous les lieux secrets du Palais, le laissa dormir à son aise , & ayans prins un autre chemin vint à entrer en la cour , de là en l'estable ; & la trouvant close , il besongna si bien avec ses ferremens , qu'il ouvrit la porte : & voyant le serviteur dessus , tenant la bride en sa main , il s'estonna quelque peu , & s'approchant de plus près cogneut qu'il dormoit asprement. Alors le fin & rusé larron , voyant le serviteur dormir comme un marmot , trouva la plus belle ruse que jamais homme vivant sceut imaginer : car il print la mesure de la hauteur du cheval , en luy donnant toutefois l'avantage qui convenoit à son œuvre ; puis s'en alla au jardin, où il print quatre grands paux qui soustenoient les treilles , & les ayans aiguisez s'en retourna en l'estable , où ayant veu le serviteur dormir comme une pierre, commença à couper la bride du cheval , que le serviteur tenoit en sa main, puis vint couper le poitrail, les sangles , la croupiere , & toutes autres choses qui luy

sembloient nuire à son entreprise : & ayant planté l'un des paux sous l'un des coings de la selle , l'enleva posément de dessus le cheval , & l'assist sur le pau. Cela fait , il en mit un autre sous l'autre coin , & consecutivement aux deux autres : tellement qu'il enleva du tout la selle , cependant que le serviteur dormoit tousjours sur la selle assise sur quatre paux , puis il print le licol , & le mit à la teste du cheval & l'emmena. Le Prevost s'estant levé de grand matin , s'en alla droit à l'estable pensant trouver son cheval , trouva son serviteur qui dormoit fort pesamment sus la selle , soustenuë par quatre paux. L'ayant esveillé , il luy dit les plus grandes injures de ce monde , puis comme un homme estonné , se partit de l'estable. Le jour apparu , Cassandrin , suivant sa coustume , s'en vint au Palais , & se presenta d'un visage joyeux devant le Prevost , en le saluant. Alors le Prevost luy dit : Vrayement Cassandrin tu emporte le prix sur tous les larrons , & qui plus est , je te puis bien appeller le Roy & Prince de tous les larrons. Mais je cognoistray bien maintenant si tu as de l'esprit & habileté : tu cognois , comme je pense , messire Severin , curé de la paroisse de saint Gal , qui n'est gueres loin de la ville , si tu me le portes icy lié dedans un sac , je te promets outre les deux cens florins promis , t'en donner autant , & si tu ne le fais , delibere toy de mourir. Ce messire Severin estoit
un

un homme de bonne vie , & meilleure renommée, vray est qu'il n'estoit pas des plus fins de ce monde , se meslant seulement de servir à l'Eglise , sans avoir soin d'autre chose. Voyant Cassandrin le vouloit du Prevost si mal disposé à l'encontre de luy , dit en soy-mesme: Cest homme icy , comme je voy , tasche de me faire mourir, en quoy il pouroit bien estre deceu : car je me veux deliberer de luy satisfaire en ce que je pourray. Voulant donc faire Cassandrin tous les moyens pour contenter le Prevost, s'imagina de donner une trouffe au Prestre , laquelle seroit mise en execution selon son desir. La trouffe fut telle , qu'il emprunta d'un sien amy une aube de Prestre , qui luy descendoit jusques aux talons, avec une estolle faite en broderie , & la porta en son logis. Puis accoustra deux cartons & en fit deux belles aisles , peintes de diverses couleurs , & un diademe qui donnoit un grand lustre. Quand le soir fut venu il sortit hors la ville avec ces belles fanfares, & s'en alla au village où se tenoit messire Severin , & là se cacha dedans un bocage de piquantes espines , où il demeura jusques à l'aube du jour. Alors Cassandrin se vestit l'aube de Prestre , & se mit l'estolle au col , le diademe en la teste , & les aisles aux espaules : puis se cacha , & se tint quoy jusques à ce que le Prestre vint sonner *Ave Maria*. A grand peine s'estoit Cassandrin vestu , & mussé en ce bocage ,

que messire Severin avec son petit clerc arriva à l'huis de l'Eglise qu'il laissa ouvert en entrant, & s'en alla faire ce qu'il avoit à faire. Cassandrin qui avoit l'œil au guet, voyant l'huis de l'Eglise ouvert, cependant que le bon Prestre sonnoit *Ave Maria*, il sortit de son boccage, & entra secrettement en l'Eglise, où s'estant approché de l'Autel, estant sur ses deux pieds avec un grand sac, qu'il tenoit entre ses mains, commença à dire tout bas par deux ou trois fois ce qui s'ensuit : Qui veut aller en gloire, qu'il entre dedans ce sac. Continuant ainsi Cassandrin ce propos, le petit clerc vint à sortir de la Sacristie, & voyant ceste aube blanche comme neige, & le diademe qui reluisoit comme le Soleil, avec les ailles, qui sembloient plumes de Paon, oyant ceste voix, fut tout estonné : mais estant un peu revenu en soy-mesme s'en alla trouver le Prestre, luy dist : Monsieur mon amy, n'ay-je pas veu un Ange du ciel, avec un sac en la main, qui disoit : Qui veut aller en gloire, qu'il entre dedans ce sac : j'y veux aller moy, dit le clerc. Le Prestre, qui n'avoit gueres la teste bien faite, adjousta foy aux paroles du clerc, & si-tost qu'il fut sailli de la Sacristie, il apperceut l'Ange tout revestu, & entendit ses paroles, tellement qu'ayant grand desir d'aller en gloire : & craignant que le clerc ne luy ostast d'avantage en entrant dedans le sac, fit semblant d'a-

voir oublié son breviaire au logis, & dit à son clerc: Va t'en à la maison, & cherche bien par la chambre, & m'apporte mon breviaire que j'ay oublié sur le banc. Cependant que le clerc s'en alla au logis, messire Severin s'approcha reveremment de l'Ange, & avec grande humilité se mit dedans le sac. Callandrin qui estoit fin, rusé, & malin, voyant que son entreprise alloit bien, ferma incontinent le sac; & le lia estroitement: & s'estant despouillé l'aube, le diademe, & les aïsses, fit un fardeau de tout cela, & ayant chargé tout cela sur ses espaules, s'en alla vers Perouse, & si-tost que le jour fut esclarcy, il entra en la ville, & à heure competente s'en alla presenter le sac au Prevost, & l'ayant deslié tira hors messire Severin, lequel se trouvant en la presence du Prevost, plus mort que vif, cognoissant aussi d'estre moqué, fit une grande plainte à l'encontre de luy, criant à haute voix qu'il avoit esté brigandé, & mis finement dedans le sac, non pas sans son grand dommage & deshonneur: le priant humblement d'en faire justice, & ne laisser point un si grand forfait sans quelque punition, pour donner exemple manifeste à tous les autres malfaïcteurs. Le Prevost, qui avoit desja entendu le fait depuis le commencement jusques à la fin, ne se pouvoit tenir de rire, & se tournant vers messire Severin, luy dit: Mon pere spirituel, mon amy, ne

dites mot, & ne vous fâchez point, car ma faveur & la justice ne vous manquera point, nonobstant que ce soit une cassade, comme nous avons peu entendre. Tant y a que le Prevost sceut si bien faire & dire, qu'il l'appaisa, & print un petit sachet, avec quelques pieces d'or, & le luy mit en main, & ordonna qu'il fust accompagné jusques hors la ville. Et se tournant vers Cassandrin, luy dit : Cassandrin, Cassandrin, les effets de ton larcecin sont plus grands que le bruit n'est semé par le monde. Parquoy prens les quatre cens florins d'or que je t'avois promis, parce que tu les as gaignez fort honnorablement : mais fay que pour l'advenir tu vives plus modestement que tu n'as fait par le passé : s'il me vient plus quelques plaintes de toy, je te promets que je te feray pendre par ton col. Cassandrin ayant receu les quatre cens florins, & ayant remercié le Prevost, se partit, & se mit à traffiquer marchandise, tellement qu'il devint après sage, & homme de bien, & de grande entreprinse.

La fable racontée par Alterie pleut merveilleusement à toute la compagnie, & mesmement aux dames, en la loüant grandement. Mais le Moulin d'un amoureux visage & contenance joyeuse, dit : Mademoiselle Alterie, vous estes pareillement une petite larronnesse, comme j'ay peu comprendre, veu que vous avez si manifestement descouvert les malices des larrons,

qu'on n'y pouvoit rien adjouſter, ce qui demontre que vous avez quelque intelligence avec eux. Le Bembe reſpondit, elle n'eſt pas larronneſſe du bien d'autrui; mais avec ſes yeux flamboyans deſrobe le cœur de ceux qui la regardent. Alors Alterie rougie par telles paroles, ſe tourna vers le Moulin, & le Bembe, en leur diſant : Je ne ſuis point larronneſſe du bien d'autrui, ny moins brigande du cœur d'autrui : mais nous vous vendons à deniers contans la fable de Caſſandrin, tout ainſi que nous l'avons achetée. Mais pour autant que les paroles ſ'augmentoient, Madame vint à commander que chacun ſe teuſt, & que Alterie pourſuivift ſon Enigme : laquelle ayant laiſſé ſa colere, & adoucie quelque peu, dit ainſi :

*Haut & bas cheminant d'un lent & tardif
pas*

Un j'apperceus qui regardoit en bas :

Lors m'en allay criant coucher, coucher, vuidex,

Aſſez, ſire Bernard, icy plus ne tardez.

Deux le deſchauffent, quatre de bon guet vont

Fermer portes, huis auſſi, huit ſont à mont :

Cependant toutesfois que je fais telle feinte

S'enſuit deſcouvert l'un tout à net ſans crainte.

Ceſt Enigme ne donna point moins de plaisir à la compagnie, que la Fable ſubtilement racontée par Alterie. Et combien

que chacun dist son opinion, il n'y en eut aucun toutesfois qui le peust entendre, & dechiffrer : tellement que Alterie voyant que le temps se perdoit, & que nul n'arriveroit au point, s'estant levée dit. Non point que je merite cest honneur, mais afin que les paroles ne se sement point en vain, je diray ce qu'il m'en semble.

Il y avoit un Gentilhomme, qui estant allé aux champs avec toute sa famille, comme il advient le plus souvent, mesmement en esté, avoit laissé en son Palais une vieille pour le garder, laquelle comme prudente, & bonne mesnagere, tous les soirs visitoit le logis par tout, de peur qu'il ne se fust caché quelqu'un pour desrober, & piller la maison. Un soir la bonne femme allant par la maison, & feignant de faire quelques negoces, apperçut un larron qui estoit sur la planche, & espioit par un pertuis ce que faisoit ceste femme: laquelle ne se voulut pas escrier, mais faignant sagement que le maistre estoit au logis avec beaucoup de serviteurs, dit : Allez-vous-en coucher, messire Bernard, & deux servans le voient deschausser, & quatre ferment la porte, & les fenestres, & huit foyent dessus à faire bon guet. Cependant que la bonne femme faisoit cest office, le larron craignant de n'estre descouvert s'enfuit, & par ce moyen elle eschappa.

Estant fini & interpreté le docte & subtil Enigme raconté par Alterie; Catherine,

qui estoit assise près d'elle, cogneut que la troisiéme harangue de la premiere nuit luy appartenoit, tellement qu'avec un visage riant, luy commença à dire en ceste maniere.

F A B L E I I I.

Messire Scrapafigue decen une fois seule par trois brigands, les abusa par trois fois; & finalement s'en retourna victorieux avec sa Nine.



A fin de la Fable de Mademoiselle Alterie, assez prudemment racontée, me donne matiere d'en raconter une, laquelle vous sera non moins plaisante que agreable, mais elle sera en un seul point differente, c'est à sçavoir, qu'en icelle messire Severin fut par Casfandrin abusé, mais en ceste-cy messire Scrapafigue abusa par plusieurs fois, ceux qui le pensoient abuser, comme vous pourrez entendre par le discours de ceste presente fable.

Assez près d'Imola, qui est une cité assez vindicative, & de nostre temps quasi reduite à l'extremité par les factions &

partialitez, y a un village nommé Poste-
me, où estoit autresfois pour Curé de la
paroisse, un Prestre, nommé messire Scra-
pafigue, homme veritablement riche, &
merveilleusement chiche, & avaricieux,
lequel tenoit pour son gouvernement une
femme fine & rusée, nommée Nine, la-
quelle estoit si prompte, qu'il n'y avoit si
gentil compagnon à qui elle n'eust la har-
dieffe de dire ce qui luy appartenoit. Et
pour autant qu'elle estoit fidelle, gou-
vernant prudemment son bien, il l'aimoit
grandement. Ce bon Prestre lors qu'il
estoit jeune, estoit un des plus gentils
compagnons qui fust en tout le territoire
d'Imola : mais estant reduit sur la vieillesse,
il ne pouvoit plus endurer le travail d'aller
à pied, tellement que sa bonne servante
luy conseilla souventesfois qu'il deust ache-
ter un cheval, afin qu'il ne vint à abbre-
ger ses jours en cheminant tant à pied sur
sa vieillesse. Messire Scrapafigue, vaincu
des prieres, & persuasions de sa chambrie-
re, s'en alla un jour au marché; où ayant
veu un mulet, qui luy sembloit propre
pour son affaire, il l'acheta sept florins
d'or. Or advint qu'il y avoit à ce marché
trois bons compagnons, qui prenoient
plus de plaisir à vivre du bien d'autrui que
du leur, comme on fait pour le jourd'huy.
Si-tost qu'ils eurent veu que messire Scra-
pafigue avoit acheté un mulet, l'un d'en-
tre eux vint à dire aux autres : Mes com-
pagnons

pagnons , je veux que ce mulet soit à nous. Comment se pourra faire cela ? dirent les autres. Je veux , dit-il , que nous l'allions espier sur le chemin où il doit passer , & que l'un soit à demy quart de lieuë de l'autre , & chacun de nous séparément luy dira que le mulet qu'il a acheté est un asne : & si nous sommes fermes en ce propos , facilement le mulet sera nostre. Et de fait , s'estans partis de commun consentement , se vindrent à accommoder sur le chemin tout ainsi qu'ils avoyent proposé. Or quand messire Scrapafigue vint à passer, l'un des brigands feignant de venir d'ailleurs que du marché, luy dit : Dieu vous gard' , Monsieur. A qui respondit messire Scrapafigue : Tu sois le bien venu frere. D'où venez-vous ? dit le voleur. Du marché , respondit le Prestre. Qu'avez-vous acheté de beau ? dit le compagnon. Ce mulet , respondit le Prestre. Quel mulet ? dit l'autre. Cestuy-cy que je chevauche , dit le Prestre. Dites-vous à bon escient , ou si vous vous moquez ? Pourquoi , dit le Prestre ? Parce qu'il ne me semble pas un mulet , mais plustost un asne. Comment un asne , dit le Prestre : & sans dire autre chose s'en alla son chemin , & ne fut pas à deux traits d'arc , qu'il rencontra l'autre compagnon , qui luy dit : Bon-jour , Monsieur , d'où venez-vous ? Du marché , respondit le Prestre. Y a il beau marché , dit le com-

pagnon ? Ouy bien , respondit le Prestre.
 Avez-vous point fait quelque bon achat ?
 J'ay acheté ce mulet que vous voyez, res-
 pondit le Prestre. Est-il possible ? dit
 l'autre ; l'avez-vous acheté pour un mu-
 let ? Oüy, respondit le Prestre. Allez,
 c'est un asne, dit le compagnon. Com-
 ment un asne, respondit le Prestre, si
 quelqu'un m'en parle plus, je luy en feray
 un present. Ainsi poursuivant son che-
 min, il rencontra un troisième compa-
 gnon, qui luy dit : Vous soyez le bien ve-
 nu, Monsieur, vous venez volontiers du
 marché. Oüy vraiment, respondit le
 Prestre. Qu'avez-vous donc acheté ? dit
 le compagnon. J'ay acheté ce mulet, que
 vous voyez. Comment mulet ? dites-vous
 à bon eücient, ou si c'est moquerie. Je
 vous dit vray, dit le Prestre, & ne me mo-
 que point. O pauvre homme, dit le bri-
 gand, ne cognoissiez-vous pas bien que
 c'est un asne, & non pas un mulet : voylà
 de mauvaises gens de vous avoir ainsi
 trompé. Ce qu'entendant messire Scrapa-
 figure, luy dit : Il y en a desja deux autres
 qui me l'ont dit n'a gueres, je ne les pou-
 vois croire. Et en descendant de son mulet,
 luy dit : Tenez, je vous en fais un pre-
 sent. Le bon compagnon le print, en le
 remerciant de sa courtoisie ; puis s'en alla
 trouver ses compagnons, laissant aller le
 Prestre à beau pied sans lance. Si-tost que
 messire Scrapafigue fut arrivé au logis, il

commença à raconter à la Nine, comment il avoit acheté une monture, & pensant avoir acheté un mulet, il avoit acheté un asne : & pour autant que plusieurs le luy avoient dit sur le chemin, il en avoit fait un present au dernier. Alors la Nine luy dist : Et pauvre homme que vous estes, ne cognoissez-vous pas que c'est une trouffe qui vous a esté donnée ? je pensois bien que vous fussiez plus fin que n'estes : par mon serment ils ne m'en eussent pas fait autant. Messire Scrapafigue luy va dire : Ne te soucie point de cela, que s'ils m'en ont donné d'une, je leur en feray deux, n'en doute point : car ceux qui m'ont ainsi abusé ne se contenteront pas de cela, ains avec nouvelles ruses viendront voir s'ils me pourront arracher quelque autre chose d'entre les mains. Or y avoit-il en ce village-là un paysan assez près de la maison du Prestre, qui avoit entre les autres deux chevres, qui se ressembloient si fort, que l'une ne se pouvoit pas bonnement cognoistre d'avec l'autre. Le Prestre les acheta toutes deux, & les paya deniers contans. Le jour ensuivant il ordonna à la Nine qu'elle appareillast un beau dîner, parce qu'il vouloit semondre quelques-uns de ses plus familiers amis, pour venir avec luy dîner, enchargeant qu'elle print de la chair de veau pour mettre bouillir, & qu'elle fist rostir les poulets, & la longe : puis.

luy bailla quelques bonnes espices, & luy ordonna qu'elle fist quelque bonne saussé, avec une tartre, selon qu'elle avoit accoustumé de faire. Cela fait, le Prestre print une des chevres, & la lia à un sep dedans le jardin, luy donnant à manger; & lia l'autre d'une corde, & la mena au marché: où il ne fut pas si-tost arrivé, que les trois compagnons de l'asne l'eurent incontinent descouvert, & s'estant approchez, luy dirent: Vous soyez le bien venu, Monsieur; que faites-vous icy? vous voulez possible acheter quelque chose de beau. Je suis icy, dit-il, pour acheter des vivres, parce que je donne aujourd'huy à dîner à aucuns de mes amis, & quand ce seroit vostre plaisir d'y venir, vous me feriez service & honneur. Les bons compagnons accepterent volontiers l'offre. Messire Scrapafigue, ayant acheté ce qu'il luy faisoit de besoin, mit tout ce qu'il avoit acheté sur le dos de la chevre, & en la présence des trois compagnons, dist à la chevre: Va t'en au logis, & dy à la Naine qu'elle mette bouillir ce veau, & qu'elle fasse rostir les poulets, & la longe: dy luy aussi que avec ces espices elle fasse quelque bonne tartre, avec quelque bonne saussé selon nostre coustume. Entends-tu? Or va t'en de par Dieu. La chevre chargée de ces bagages & laissée en sa liberté, se partit: mais on ne sçait pas entre les mains de qui elle tomba. Cela fait, le

Prestre & les trois compagnons, avec quelques autres de ses amis, firent un tour ou deux par le marché, & leur semblant l'heure de se partir, s'en allerent au logis du Prestre, & estans entrez en la cour, apperceurent la chevre liée au sep, qui ruminoit l'herbe qu'elle avoit brou-tée, croyans que ce fust celle, à qui le Prestre avoit baillé ces viandes pour porter au logis; dont ils furent grandement estonnez. Si-tost qu'ils furent entrez au logis, messire Scrapafigue dist à la Ninc: As tu fait ce que je t'avois mandé par la chevre? Elle qui estoit rusée, & qui entendoit le mot de guet, oüy (dit-elle) j'ay rosty les poulets, & la longe, & ay mis le veau bouïllir. Voila qui va bien, dit le Prestre. Ces trois compagnons voyans le rosty, le bouïlly, & la tartre au four, & ayant oüy les paroles de la Ninc, s'esmerveillerent plus qu'ils n'avoient fait auparavant, & commencerent à penser entr'eux à la chevre comment il la pourroient avoir. Quand ce fut sur la fin du dîner, & ayans desja entr'eux arresté de dérober la chevre, & de donner une trouffe au Prestre, & voyans de n'en pouvoir avoir leur honneur, luy dirent: Monsieur, il faut que vous nous vendiez ceste chevre. Le bon Prestre leur respondit, qu'il ne la vouloit pas vendre, parce qu'on ne la pouvoit payer avec tous les deniers du monde: toutesfois quand ils auroient fan-

rasie de l'avoir , il la prisoit cinquante florins d'or. Les bons compagnons pensans avoir trouvé la fève au gasteau , luy conterent incontinent cinquante florins d'or. Je vous veux advertir , dit le Prestre , afin que vous ne vous plaignez après de moy , parce que la chevre ne vous cognoissant pas du commencement , à cause qu'elle n'est pas encores apprivoisée avec vous , elle ne fera pas possible l'effect qu'elle devroit. Mais les compagnons sans luy donner autre responce , s'en allerent tous resjoüis , & menerent la chevre en leur maison , & dirent à leurs femmes : Demain ne nous apprestez point à disner , jusques à tant que nous vous le mandions au logis. Cela fait , ils s'en allerent en la place , & acheterent poulets , & autres vivres pour leur disner : & ayans chargé tout cela sur le dos de la chevre , qu'ils avoient amené avec eux , luy dirent tout ce qu'ils vouloient qu'elle fist , & dist à leurs femmes. La chevre chargée ainsi de vivres , se trouvant en liberté , se partist , & s'en alla en si bonne heure , qu'ils ne la veirent jamais depuis. Quand l'heure du disner fut venue , les bons compagnons s'en retournerent au logis , & demanderent à leurs femmes si la chevre estoit point venue au logis avec des vivres , & si elles avoient fait ce qu'ils avoient mandé par elle. Les femmes leurs respondirent : Pauvres lourdaux & insensez que vous estes , estimez-

vous qu'une beste puisse faire vos services ? vous estes bien abusez : il n'y a point de danger que vous soyez trompez , puis que vous voulez tous les jours tromper autrui : & certes vous serez à la fin abusez. Les compagnons se voyans ainsi moquez du Prestre , qui leur avoit arraché les cinquante florins , monterent en si grande colere qu'ils le vouloient tuer , quoyqu'il en advinst : & de fait ayans prins leurs armes s'en allerent le trouver. Mais le fin galand de Prestre , qui n'estoit pas sans quelque soupçon de sa vie, ayans tousjours ces compagnons devant les yeux , de peur qu'ils ne luy fissent quelque desplaisir , dit à sa servante : Tien , Nine, prends ceste vessie pleine de sang , & la mets sous ta cotte : car quand les brigands viendront je mettray toute la faute sur toy , & feignant d'estre courroucé à l'encontre de toy , je te donneray un coup de cousteau en la vessie , alors tu tomberas par terre tout ainsi , que si tu estois morte , puis laisse faire à moy. Le Prestre n'avoit à grand peine finy ces propos , que les brigands arriverent , qui coururent sur le Prestre , pour le tuer. Mais le Prestre leur dit : Messieurs , mes amis , je ne suis pas cause de ce que vous me voulez offenser. Possible que ceste mienne servante vous a fait quelque desplaisir , que je ne sçay pas. Et se tournant contre elle , mit la main au cousteau , & en luy tirant d'un coup de pointe,

luy perça la vessie, qui estoit pleine de sang. Et elle feignant d'estre morte tomba par terre, & le sang couloit à grands ruisseaux de toutes parts. Puis le Prestre voyant ce cas estrange, fit semblant d'en estre repentant, & commença à crier à haute voix : Helas ! malheureux que je suis, qu'ay-je fait ? comment ay-je sottement mis à mort ceste femme qui estoit le baston de ma vieillesse ? comment pourray-je plus vivre sans elle ? Alors il va prendre un hautbois fait à sa fantasie, & luy leva ses habits, & luy mit entre les fesses, & y souffla tant dedans que la Nine retourna saine & sauve, & se leva sur ses pieds. Ce que voyans les brigands furent plus estonnez que jamais, & laissant toute leur colere ils acheterent ce hautbois deux cens florins, & s'en retournerent tous joyeux en leurs maisons. Advint cependant que l'un des brigands se courrouça contre sa femme, & en ceste chaude colere, il luy donna d'un cousteau en l'estomach, dont elle mourut sur le champ. Le mary print le hautbois qu'il avoit acheté du Prestre, & le luy mit entre les fesses, tout ainsi que le Prestre avoit fait, esperant de la resusciter : mais en vain il souffloit, parce que sa pauvre ame estoit desja hors de ceste vie pour aller en l'autre. L'autre compagnon qui estoit là present, oyant ces paroles là, dit : Va, sot que tu es, tu n'y entens rien, laisse faire à moy :

& print la femme par les cheveux , puis luy couppa d'un rasoir le fiflet de la gorge, & print son hautbois , & luy souffloit par dedans ; mais pour cela elle ne resuscita pas. Autant en fit le troisiéme , tellement qu'ils demeurèrent tous trois sans femme. Au moyen de quoy , estans comme enragez , s'en allerent au logis du Prestre , déliberez de ne plus ouyr ses fables , mais le prindrent & le mirent dedans un sac pour le porter noyer dedans le prochain fleuve. Cependant qu'ils le portoient ainsi l'un après l'autre , il leur survint quelque chose dont ils furent contraints le laisser là dedans le sac , & s'enfuir. Bien-tost après par fortune vint à passer un berger , avec son troupeau paissant l'herbe deliée : & ainsi qu'il se pourmenoit , il entendit une voix plaintive , qui disoit : Ils me la veulent bailler , & je ne la veux pas , car je suis Prestre , & ne la puis prendre. De quoy fut tout estonné le berger , ne pouvant sçavoir d'où venoit cette voix reitée tant de fois. Et se tournant ça & là , finalement il apperceut le sac , où le Prestre estoit lié : s'estant approché , continuant tousjours le Prestre ceste plainte , il delia & trouva le Prestre auquel il demanda , pour quelle cause il estoit ainsi clos dedans le sac , criant à haute voix : & il luy respondit , que le Seigneur de la ville luy vouloit faire espouser une sienne fille , mais qu'il ne vouloit pas , à cause qu'il se

trouvoit desja trop aagé, joint qu'il estoit Prestre, & que de raison il ne la pouvoit prendre. Le pauvre berger qui adjoustoit foy entierement aux paroles du Prestre, luy dit : Pensez-vous, Monsieur, que le Seigneur me la baillast ? Je croy que oüy, respondit le Prestre, si tu estois lié en ce sac comme j'estois. S'estant mis le berger dedans le sac, le Prestre le lia estroittement, & s'esloigna assez de ce lieu avec son troupeau. Devant qu'il fust une heure de-là voycy les trois brigands qui arriverent au propre lieu, où ils avoient laissé le Prestre dedans le sac, & sans regarder dedans ils prindrent le sac sur leurs espaulles, & le jetterent dedans le fleuve. Voylà comment le pauvre berger, en lieu du Prestre, finit miserablement sa vie. Les brigands pensans estre bien vengez, prindrent leur chemin vers leurs maisons, & ainsi qu'ils devoisoient ensemble, ils apperceurent un troupeau de brebis qui païssoient assez près de là : tellement qu'ils se vont deliberer de desrober une couple d'agneaux : & s'estant approchez du troupeau, ils apperceurent messire Scrapafigue, qui en estoit le gardien, dont ils resterent tous confus, pensans l'avoir noyé dedans le fleuve. Au moyen dequoy ils luy demanderent comment il avoit fait à sortir de ce fleuve, il leur respondit : Allez, vous n'estes que des gros asnes : vous ne sçavez rien. Si vous m'eussiez un peu jetté

plus avant, je m'en fusse retourné avec dix fois autant de brebis. Ce que entendans les trois compagnons, luy dirent: Monsieur, nous voulez-vous faire ce bien de nous porter en un sac, & nous jeter dedans le fleuve? en ce faisant, de volleurs nous deviendrons gardiens de brebis. Je suis prest (respondit le Prestre) à faire ce qu'il vous plaira, & n'y a chose en ce monde, que je ne fisse pour l'amour de vous. Et ayant trouvé trois bons sacs, de fort & puissant canevats, les mit dedans & les lia si estroitement qu'ils n'en pussent jamais sortir, puis les jetta dedans le fleuve: & ainsi leurs ames prindrent le chemin du lieu qu'ils avoient deservy, & messire Scrapasigue s'en retourna vers sa Nine, riche de deniers, & de bestial, & vescu encore quelque temps assez joyeusement.

La Fable racontée par Catherine, pleut à toute la compagnie, dont elle fut loüée & encore plus la finesse du Prestre, qui pour avoir donné un mulet, acquist beaucoup deniers & de brebis, sans la vengeance qu'il print contre ses ennemis du tort qu'il avoit receu: & en ce faisant demeura joyeux avec sa Nine: & afin que l'ordre commencé ne se vint point à rompre, proposa son Enigme en la maniere qui s'ensuyt.

*Un forgeron & sa femme à leur table,
N'avoient qu'un pain, qu'un seul pain & demy.*

*Un Prestre fut avec sa sœur aimable ,
 En ce souper appelé , comme amy :
 Ces quatre dont , de ce pain favorable
 Firent trois parts , fendans l'entier parmy :
 Le droit meilleur dont chacun eut sa part ,
 Faisant grand chere ainsi jusqu'au depart.*

Estant finy le sententieux Enigme proposé par la gracieuse Catherine, & escouté d'un chacun avec grande admiration , ne se trouvant aussi personne en toute la noble , & ingenieuse compagnie , qui de la dure escorce en peut tirer la vraye substance , Catherine dit : Mesdames, le sens de mon Enigme est, que se trouvant un forgeron avoir espousé la sœur d'un Prestre , ainsi qu'ils s'estoient tous deux assis à table pour souper , voycy arriver le Prestre , tellement qu'ils estoient quatre , c'est à sçavoir , la femme d'un forgeron avec son mary , puis le Prestre avec sa sœur : & nonobstant qu'ils semblassent estre quatre , si est-ce qu'ils n'estoient que trois , & chacun d'eux print la moitié d'un pain , tellement que chacun d'eux demeura content. Après que Catherine eut finy son subtil Enigme , la Dame fit signe à Eritrée qu'elle continuast l'ordre , laquelle d'un visage riant commença ainsi à dire.

F A B L E IV.

Thibaut Prince de Salerne veut espouser sa fille Doralice, laquelle estant sollicitée du pere, arriva en Angleterre, où Genese l'espousa, & a deux enfans d'elle qui furent mis à mort par Thibaut : dont Genese se vengea depuis.



E pense qu'il n'y a aucun d'entre vous, qui par experience n'ait esprouvé quelle est la puissance d'amour, & les esguillons de la chair corruptible. Iceluy comme puissant Seigneur conduit & gouverne son Empire sans espée; ains de son seul vouloir, comme vous pourrez entendre par le discours de ceste presente Fable, que j'espere vous raconter.

Vous devez donc sçavoir, gracieuses Dames, que Thibaut, Prince de Salerne, comme j'ay souventesfois ouy dire à nos anciens, eut pour femme une prudente, & gentille Damoiselle d'assez bon lignage : de laquelle il eut une fille, qui en beauté & bonne grace surmontoit toutes les autres Dames de Salerne. Mais

mieux eust valu à Thibaut de ne l'avoir jamais eue; car il ne luy seroit advenu ce qu'il luy advint. Sa femme jeune d'aage & aagée de sens, venant à l'extremité de la mort, pria le mary qu'elle aimoit très affectueusement, qu'il ne prinst jamais autre femme, si l'anneau qu'elle portoit au doigt, ne s'accommodoit au doigt de celle qu'il prendroit pour la seconde femme. Le Prince qui n'aymoit pas moins sa femme qu'elle luy, fit serment qu'il maintiendrait tout cela. Après que ceste Dame fut allée de vie à trespas, & qu'elle fut honorablement ensevelie, il vint en fantaisie à Thibaut de prendre femme: mais se souvenant de la promesse faite à sa femme, ne voulut aucunement rompre son ordonnance. Le bruit estoit desjà semé par tout, que Thibaut se vouloit remarier, tellement que ces nouvelles vindrent aux oreilles de beaucoup de pucelles, qui en biens & vertus, n'estoient point inferieures à luy. Mais luy qui desiroit sur toutes choses, d'accomplir le vouloir de sa feu femme, voulut premierement essayer à toutes les pucelles qui luy estoient offertes en mariage, si l'anneau de sa femme leur convenoit, & n'en trouvant aucune à qui l'anneau s'accommodast, ou qu'il estoit trop estroit à l'une, ou trop large à l'autre tant y a qu'il leur donna à toutes congé, sans dire autre chose. Or advint que la fille de Thibaut, nommée Doralice, dis-

nant un jour avec son pere, & ayant veu sur la table l'anneau de sa feu mere, lequel elle se mit au doigt, & se tournant vers le pere, luy dit : Voyez, mon pere, comment l'anneau de ma mere me convient bien; ce que voyant le pere le confirma. Mais il ne fut pas long-temps qu'une estrange, & diabolique deliberation entra au cœur de Thibaut, de prendre pour femme sa fille Doralice, & demeura longuement entre ouy & non. A la fin estant vaincu de ceste diabolique pensée, & embrasé de sa beauté, un jour l'appella à soy, & luy dit : Ma fille Doralice, quand ta mere vivoit, se trouvant à l'extremité de la mort, me pria estroittement que je ne deusse point prendre pour femme, sinon celle à qui convenoit l'anneau qu'elle portoit en son doigt, lors qu'elle vivoit. Alors je luy fis serment de faire tout ce qu'elle voudroit; tellement qu'ayant expérimenté beaucoup de pucelles, je n'en ay peu trouver aucune à qui s'accommodast l'anneau de ta mere, sinon a toy : Au moyen dequoy j'avois deliberé de te prendre pour femme; car en ce faisant j'accompliray mon vouloir, & ne violeray point la promesse faite à ta mere. La fille qui n'estoit pas moins honneste que belle, entendant la malheureuse intention du mauvais pere, se troubla fort en elle-mesme, & considerant son meschant & abominable vouloir, craignant de ne le mettre en cole-

re, ne luy voulut rien répondre pour lors, ains se montrant joyeuse au visage, se partit d'avec luy. Et n'ayant aucun de qui mieux elle se fiast, que de sa nourrice, recourut franchement à elle, comme à la fontaine de son salut, pour en avoir son conseil. Icelle cognoissant l'exécrable desir du pere, remply d'iniquité, voyant aussi la constante & ferme intention de la jeune fille, préparée d'endurer plustost tout grand tourment, que de consentir à la fureur du pere; la reconforta, luy promettant fa-veur & ayde, afin que sa virginité ne fust point souillée avec son deshonneur. Cependant la nourrice, qui pensoit continuellement quel remede elle pourroit trouver pour sauver la pauvre fille d'un tel inconvenient, entroit tantost en une deliberation, tantost en l'autre, & ne trouvoit aucun moyen où elle se peut bonnement asseurer: car elle trouvoit bon de la faire fuir, & esloigner du pere; mais la crainte de sa finesse qu'elle ne tombast entre ses mains, l'en desgoustoit grandement, estant asseurée qu'il la mettroit à mort. Ainsi donc que ceste fidelle nourrice faisoit ces discours en son esprit, il luy vint une nouvelle deliberation en son entendement, qui fut telle que vous entendrez. Il y avoit en la chambre de sa feu mere un beau garde-robe, fort magnifiquement ouvré, où la fille tenoit ses riches accoustremens & bagues, & n'y avoit
 personne

personne qui le peust ouvrir, sinon ceste sage nourrice ; laquelle osta secrettement toutes les robes & bagues qui estoient dedans , & mit dedans ce garde-robe d'une certaine liqueur , qui avoit une telle vertu , que quiconques en prenoit une cucillérée , ou bien peu , il vivoit long-temps sans prendre autre refection : & ayant appelé ceste fille , l'enferma là dedans , luy conseillant d'y demeurer jusques à ce que Dieu luy envoyast meilleure fortune , & que le pere fust hors de ceste bestiale deliberation. La fille obeyssante à sa bonne nourrice , fit tout ce qu'elle luy enchargea. Le pere qui perseveroit en sa mauvaise intention , sans aucunement se divertir de son desordonné appetit , demanda par plusieurs fois nouvelles de sa fille , & ne la trouvant pas , & ne sçachant où elle estoit , monta en si grande fureur , qu'il la menassoit de la faire mourir vilainement. Peu de jours après advint que Thibaut entra un matin sur la levée du Soleil , en la chambre où estoit ce garde-robe , & le voyant devant ses yeux , & ne le pouvant souffrir , du despit qu'il en avoit , commanda qu'il fust osté de-là , & porté ailleurs , & qu'il fust vendu , afin d'oster cest object de devant ses yeux. Les serviteurs qui furent diligens à obeyr au commandement de leur maistre , le chargerent incontinent sur leurs espaules , & le porterent en la place: Advint que sur ce point

arriva en ce lieu un bon & riche marchand Genevois, lequel ayant contemplé ce beau garderober si magnifiquement ouvré, en fut ravy, delibérant en soy-mesme de ne le laisser point aller, quoy qu'il coustast. S'estant approché du serviteur qui avoit charge de le vendre, & ayant fait marché avec luy, le fit incontinent charger sur le dos d'un porte-faix, & le fit emmener en sa navire. La nourrice qui avoit veu tout cela, trouva le moyen fort bon, combien qu'elle fust grandement marie en elle-mesme de sa fille qu'elle avoit perduë. Toutesfois elle se venoit un peu à consoler, considerant que quant il advient deux grands inconveniens, il faut toujours eviter le plus grand. Le marchand s'estant party de Salerne avec son garderober, & autres riches marchandises, vint en l'Isle de Bretagne, aujourd'huy appellée Angleterre, & estant descendu en un lieu où il y avoit assez spacieuse campagne, apperceut Genese, qui avoit esté de n'agueres créé Roy d'Angleterre, lequel courant à bride avalée le long de la plage, poursuivoit une fort belle biche, qui par crainte s'estoit jettée en l'eau de la mer. Le Roy se trouvant las & fasché d'avoir si longuement couru, se reposoit; & si-tost qu'il eut veu la navire, il demanda à boire au patron, lequel feignant de ne cognoistre pas le Roy, le receut amiablement, en luy faisant le plus bel accueil qu'il estoit

possible, & fit tant qu'il le fit monter en la navire. Le Roy qui avoit desja veu ce beau garderobe si bien ouvré, eut grand desir de l'avoir; & de fait il demanda au patron de la navire combien il l'estimoit, on luy respondit qu'il valoit un grand prix. Le Roy estant ravy d'une chose si precieuse, ne se partit pas de là qu'il ne convint du prix avec le marchand. Et ayant fait venir argent à suffisance, & contenté le marchand de tout, il print congé de luy, & le fit porter tout droit au palais, le faisant mettre en sa chambre. Or Genese estant encore trop jeune, n'avoit point encore esté marié, & prenoit son plaisir d'aller tous les jours de grand matin à la chasse. Cependant Doralice, fille de Thibaut, qui estoit cachée en ce garderobe, qui estoit assis en la chambre de Genese, entendoit tout ce qui se faisoit en la chambre du Roy: & pensant aux dangers passez, commença à esperer quelque bonne fortune. Et si-tost que le Roy s'estoit party de sa chambre pour aller à la chasse, selon sa coustume, la jeune fille sortoit de son garderobe, & d'un grand artifice & subtilité accoustroit la chambre, en nettoyant, dressant le liét, & accommodant les oreilliers, en les mettant sur une coïette ouvrée à certains compas de grosses perles, & autres merveilleuses braveries. Outre cela, la belle jeune fille semoit sur le liét, roses, vio-

lettes, & autres fleurs odoriferantes, mêlées de précieux parfums, qui sentoient fort bon, & confortoient le cerveau. Tant y a que ceste jeune Dame tint cet ordre par plusieurs fois, sans estre veüe de personne. Ce qui donnoit un merveilleux contentement au Roy Genesé : car quand il venoit de la chasse, & qu'il entroit en la chambre, il luy sembloit estre au milieu de toutes les drogues & espiceries du pays de Levant. Un jour le Roy voulut sçavoir de sa mere & des Damoiselles, qui estoit celle tant gentile & gracieuse, qui si magnifiquement luy accoustroit sa chambre. On luy respondit qu'on n'en sçavoit rien, parce que quand on alloit accoustrer la chambre, on trouvoit ordinairement le liët couvert de roses, violettes, & de parfums odoriferans. Le Roy entendant telles merveilles, delibera de sçavoir du tout d'où cela procedoit, & fit semblant d'aller ce matin à un chasteau, qui est à dix lieües de là : puis se cacha secrettement en la chambre, regardant par une fente, en attendant ce qui en pourroit advenir. Il ne fut pas long-temps que Doralice, plus claire que le Soleil, sortit hors de son garde-robe, & se mit à nettoyer la chambre, & à dresser les tapis, & appareiller le liët, & toutes les autres choses, comme elle avoit fait les jours precedens. Ayant donc la gentille pucelle accompli le digne & loüable office, se

voulut retirer en son garde-robe : mais le Roy, qui attentivement avoit prins garde à tout, la vint incontinent surprendre, & la print par la main, & la voyant belle & fraîche comme un lys, luy demanda à qui elle estoit. La jeune fille luy respondit qu'elle estoit fille d'un Prince, du nom duquel elle ne se pouvoit bonnement souvenir, parce qu'il y avoit desja trop long-temps qu'elle estoit cachée en ce buffet, & ne voulut manifester la cause pourquoy elle estoit ainsi leans. Le Roy entendant tout cela, par le consentement de sa mere, la print pour femme, & engendra avec elle deux enfans. Cependant Thibaud perseverant en son meschant & execrable vouloir, ne trouvant point sa fille qu'il avoit long-temps cherchée & recherchée, se vint à imaginer qu'elle pourroit bien estre en ce garde-robe qu'il avoit vendu. Au moyen dequoy il se delibera d'aller chercher par le monde, pour voir s'il la pourroit point trouver, tant il estoit vaincu d'un despit & courroux. Et s'estant accoustre en marchand, print force bagues, & autres ouvrages d'or, & se partit ainsi desguisé de Salerne, & en ayant couru divers pays, il vint par fortune à rencontrer celui qui l'avoit premierement acheté, & luy demanda s'il en avoit bien fait son profit, & entre les mains de qui il estoit tombé. L'autre marchand luy respondit qu'il l'avoit vendu au Roy d'An-

gleterre, & qu'il y avoit gagné la moitié par dessus. Ce qu'entendant Thibaut, se commença à resjouyr, & print son chemin vers Angleterre; & si-tost qu'il fut entré en la ville où se tenoit le Roy, il commença à mettre par ordre toutes ses bagues & ouvrages contre la muraille du palais, & y mit pareillement des quenouïlles & fuseaux, & commença à crier : ça femmes, à mes belles quenouïlles & fuseaux. Ce qu'entendant l'une des Damoiselles, se mit à la fenestre, & voyant ce marchand avec si precieuses bagues, courut incontinent vers la Royne, luy dit qu'il y avoit en la ruë un marchand avec quenouïlles & fuseaux d'or, qui estoit la plus riche chose qu'on vit onc. La Royne commanda qu'on le fit monter au palais, & ayant monté les degrez, & estant venu en la sale, la Royne ne le cogneut aucunement, parce qu'elle ne pensoit plus à son pere; mais le marchand la recogneut fort bien. La Royne donc ayant veu ces quenouïlles & fuseaux de merveilleuse beauté, demanda au marchand combien il les prisoit : je les prise beaucoup, dit-il, mais quand ce seroit vostre plaisir que je couchasse une nuit en la chambre de vos enfans, je vous en feray après un present. La bonne Dame, pure & simple, qui ne se fust jamais doutée de la maudite entreprise de ce marchand, à la persua-sion de ses Damoiselles, y consentit. Mais

devant que les serviteurs l'eussent mené reposer, les Damoiselles delibererent de luy bailler un breuvage pour le faire dormir. Quand la nuit fut venue, le marchand feignant d'estre las, l'une des Damoiselles le mena en la chambre des enfans du Roy, où on avoit appareillé un magnifique liect : & devant qu'on le mit reposer, la Damoiselle luy dit : mon pere, avez-vous point de soif ? Ouy bien (dit-il) ma fille, & en prenant le verre, qui luy sembloit d'argent, le luy presenta ; mais luy qui estoit malicieux jusques au bout, & feignant de boire tout, le versoit petit à petit sur ses vestemens, puis s'en alla reposer.

Or il y avoit un petit huis en la chambre des enfans, par lequel on pouvoit aller en la chambre de la Royne. Quand ce vint sur minuit, il s'en alla secretement en la chambre de la Royne, & s'approchant du liect, luy osta un petit cousteau, qu'il avoit desja espié le jour precedent, qu'elle portoit à son costé : & s'approchant du berceau où estoient les enfans, les tua tous deux, puis remit le cousteau tout saigneux en la gaine : & ayant ouvert une fenestre, se devala à bas avec une corde nouée, & de grand matin sur le point du jour s'en alla en la boutique d'un barbier, & se fit abbatre sa longue barbe, de peur qu'il ne fust cogneu, & se vestant de nouveaux habits, s'en alla par la ville. Cependant les nourrices, qui

s'estoient endormies au besoin , se leverent à l'heure accoustumée pour allaiter les enfans , & se mettant sur les berceaux trouverent les enfans tuez. Au moyen dequoy elles s'escrierent , & se mirent à plorer , en s'arrachant les cheveux , & rompant leurs vestemens par devant : tellement qu'elles monstroient l'estomach. Incontinent les piteuses nouvelles furent portées au Roy & à la Roynne , qui se leverent tous deschauffez , & accoururent à ce piteux spectacle : & entendans que leurs enfans estoient morts , se mirent à plorer amerement. Desja toute la cité estoit abreuvée de ce miserable meurtre , & qu'il estoit arrivé un fameux Astrologien , qui selon le cours des estoiles sçavoit les choses , & predisoit ce qui est à venir. Ayant esté le Roy adverty de la renommée d'iceluy , le fit appeller , & luy demanda s'il pourroit point sçavoir par son art qui auroit tué ses enfans , & il luy respondit que ouy : & s'approchant à l'oreille du Roy , luy dit secrettement : Sire , faites que tous ceux qui portent un couteau à leur costé , en vostre cour , viennent & se presentent devant vous , & celuy qui seroit trouvé saisi d'un couteau qui estoit encore saigneux , seroit le vray meurtrier de ses enfans. Alors tous les courtisans par son commandement comparurent par devant luy , & de ses propres mains les voulut visiter l'un après l'autre , regardant

gardant diligemment si leurs cousteaux estoient point saigneux, & n'en trouvant aucun qui fust souillé, s'en retourna vers l'Astrologue, & luy raconta de point en point tout ce qu'il avoit fait, & qu'il avoit generalement tout visité, hors mis sa mere & la Royne. Sire, dit-il, cherchez bien, & n'ayez respect à personne, pource que vous trouverez infailliblement le mal-faicteur. Le Roy ayant visité la mere n'en trouva aucun indice, finalement appellant la Royne, luy print la gaine qu'elle portoit à son costé, & trouva le cousteau tout souillé de sang. Alors le Roy voyant l'evident argument, se tourna d'une rage vers elle, luy disant: Ah meschante & cruelle femme, ennemie de ton propre sang, traistresse de tes propres enfans, comment as tu peu jamais avoir le courage de souiller tes mains avec le sang innocent de tes pauvres enfans? Je te jure mon Dieu, que tu porteras la penitence d'un si grand forfait. Et combien que le Roy fust enflambé d'un courroux & despit, desirant de se venger sur le champ, en la faisant mourir vilainement & malheureusement; toutefois afin qu'elle souffrist plus grand & plus long tourment, luy vint une nouvelle fantasie en son esprit, & commanda que la Royne fust despouillée, & qu'elle fust ainsi toute nue ensevelie en terre jusques à la gorge, estant tousjours nourrie de viandes exquisés, afin

que vivant ainsi longuement, en ce faisant elle endurest plus grande punition. La Royne, qui par le passé avoit enduré beaucoup d'autres miseres, cognoissant son innocence, print la mort en patience. Ce bon Astrologue, qui estoit le pere, entendant que la Royne, comme coupable, avoit esté condamnée à souffrir une très-cruelle mort se resjouyt grandement, & prenant congé du Roy, se vint à partir d'Angleterre en grand contentement: & si-tôt qu'il fut secrettement arrivé en son palais, il raconta de poinct en poinct à la nourrice tout ce qu'il luy estoit advenu, & comment sa fille avoit esté ainsi condamnée. Ce qu'entendant la nourrice, demonstra par dehors signe de resjouissance; mais par dedans elle se trouvoit en grande fâcherie, & ayant pitié de sa pauvre fille, vaincuë du tendre amour qu'elle luy portoit, se partit un jour de grand matin de Salerne, & chevaucha si fort jour & nuict qu'elle arriva au Royaume d'Angleterre; & estant montée au palais, trouva le Roy qui donnoit audience à tous en une spacieuse sale, & s'estant mise à genoux devant les pieds du Roy, luy demanda une secrette audience, pour choses concernant l'honneur de sa Couronne. Le Roy l'ayant embrassée, la fit lever: & l'ayant prinse par la main, fit absenter toute la compagnie, & s'assit tout seul avec elle. La nourrice fort bien instruite des choses

passées, luy dit assez reveremment : Vous devez sçavoir, Sire, que Doralice vostre femme, & ma fille (non pas que je l'aye portée dedans ce miserable ventre, mais parce que je l'ay allaitée & nourrie avec ces mammelles) est innocente du faict qui luy est faussement imposé, dont elle est cruellement condamnée à mort. Et quand vous auriez par le menu entendu & touché avec le doigt qui a esté le meurtrier inhumain, & la cause qui l'a esmeu de mettre ainsi à mort malheureusement vos enfans ; je suis assurée que vous seriez esmeu de pitié, & la delivreriez incontinent de si grand tourment. Et si vous me trouvez que je mente d'un mot, je m'offre de souffrir la mesme punition que souffre maintenant la Royne. Et commençant depuis le commencement jusques à la fin, luy raconta de poinct en poinct tout ce qui estoit advenu. Le Roy entendant ce discours, adjousta foy à ses paroles, & commanda que la Royne, qui estoit plus morte que vive, fust ostée de sa sepulture & l'ayant fait medeciner en grand diligence, fit tant qu'elle revint en peu de temps à convalescence.

Cela fait, le Roy fit un grand preparatif par tout son Royaume, & assembla une grolle armée, qu'il envoya à Salerne, où on ne fut pas long-temps que la ville fut conquestée, & Thibaut fut prins, & pieds & poings liez, fut mené prisonnier en

Angleterre. Le Roy voulant avoir plus grande assurance du fait proceda contre luy rigoureusement, & le fit mettre à la question, où il confessa de point en point tout ce qui estoit advenu; & le jour ensuivant fut mené par toute la ville sur un chariot, tiré par quatre chevaux, & fut tenaillé, puis fut mis en quatre quartiers comme Grenes, & ses membres jettez aux chiens. Voylà comment le meschant & abominable Thibaut finit miserablement sa vie: & le Roy & la Roynne Doralice vesquirent encore longuement en grande félicité, laissant après leur mort de beaux enfans, qui succederent au Royaume.

Chacun fut estonné, & esmeu à pitié en escoutant la piteuse Fable, laquelle estant finie, Eritrée sans autre commandement de Madame, proposa ainsi son Enigme.

*Nature nous produit entr'autres animaux ,
Un animal si vil , & de vile nature ,
Qu'il deteste , & hait sa propre geniture ,
J'entends qu'à ses petits il fait cent mille maux ,
Les voyant prosperer , devenir grands & beaux ,
Avec son bec crocheu de leur chair fait fracture :
Tellement qu'au moyen d'une telle piqueure ,
Il les vous rend si bas , que d'iceux les plus hauts
Ne se peuvent mouvoir pour chercher nourriture.*

Il y eut grande varieté d'opinions entre les hommes & les femmes : car l'un disoit une chose , & l'autre l'entendoit autre-

ment , ne se pouvans imaginer qu'il se trouvaſt aucun animal ſi cruel & inhumain, qui contre le cours naturel porte envie , & devienne cruel à l'encontre de ſa propre lignée : mais la gentile Etrée dit avec douces paroles , en ſouzriant : Meſſieurs , ne vous eſbahiffez point de cela , car on trouve des peres qui portent envie à leurs enfans , comme fait le raviſſant Milan : lequel eſtant maigre & ſec , voyant ſes petits engraiſſer , leur porte envie & haine , tellement qu'avec ſon bec les vient tant à piquer , qu'il les fait devenir maigres & minces.

La reſolution de ceſt argument pleuſt merveilieuſement à un chacun , en la louant grandement. Puis elle ayant fait l'honneur qu'il appartenoit , ſe miſt à ſon ſiege. Cela fait , la Dame fiſt ſigne à Ariane qu'elle pourſuyviſt l'ordre : laquelle s'eſtant levée de ſa place , commença ainſi ſa Fable.



FABLE V.

Demetrius Bassariot se faisant nommer Gramotivege, surprint sa femme Polissene avec un Prestre ; & l'ayant envoyée vers ses freres , qui la mirent à mort , il espousa après sa servante.



ON voit plus souvent , amoureuses Dames , qu'en l'amour y a grande diversité de vouloir ; car si l'homme ayme la femme , il ne sera point aymé d'elle , & au contraire , si la femme ayme l'homme , il luy portera haine. De là vient la rage de la soudaine jalousie , ennemie de tout nostre bien , & contraire à la vie honneste. De là naissent les deshonneurs , les morts scandaleuses , non pas sans grand blasme & reproche de nous autres femmes. Je laisse là les precipitans dangers ; je me taiz des maux innumerables , que peuvent encourir , tant les hommes , que les femmes , à cause de ceste maudite jalousie. Somme , si je voulois de part en part amener les grands inconveniens qui en adviennent , je serois plustost facheuse & ennuyeuse , que plaisante & agreable

à la compagnie. Mais afin que nous puissions ce soir mettre fin à nos plaisans propos , j'ay deliberé vous raconter une Fable de Gramotivege , non point encore entendüe , de laquelle je pense que prendrez plaisir & edification.

Il vous est assez notoire , que Venise est une très-noble cité , veu le bon ordre des Magistrats , abondante pareillement de nations estranges , & très-heureuse par les bonnes loix , & statuts qui y sont ; estant assise en l'extreme destour de la mer Adriatique , & est appelée Royne de toutes les autres citez , refuge des miserables , receptable des foulez : ayant la mer pour muraille , & le ciel pour couverture. Et combien qu'il n'y croisse aucune chose , si est-ce qu'elle est abondante en ce qu'il fait de besoin en une cité. Tant y a qu'en ceste noble & magnifique cité y avoit autresfois un marchand nommé Demetrius , homme loyal , & de bonne vie ; au reste il estoit d'assez basse condition. Iceluy ayant grande affection d'avoir enfans , espousa une belle & gracieuse fille , nommée Polistene ; laquelle il aymoît si ardemment , qu'il n'y eut jamais homme qui tant aymast femme que luy ; & la tenoit vestüe si magnifiquement , qu'il n'y avoit à Venise femme , exceptées les nobles , qui la passast en accoustremens , bagues & grosses perles. Outre cela , elle avoit abondance de viandes exquisës , ne

convenans pas à son estat, qui la rendoient plus fresche, & en bon poinct qu'elle n'eust esté autrement. Advint que Demetrius, qui par le passé avoit fait beaucoup de voyages par mer, delibera de s'en aller en Cypre avec sa marchandise : & ayantourny sa maison de vivres, & autres choses qui appartiennent à un mesnage, laissa sa chere femme Polissene avec la chambriere, jeune & assez belle, & s'estant party de Venise, s'en alla poursuivre son voyage. Cependant Polissene, qui faisoit grandissime chere, & s'adonna à toutes mignardises, se sentant gailarde de sa personne, & ne pouvant plus souffrir les dards piquans d'amour, jetta l'œil sur un Prestre de sa parroisse, & s'embrasa merveilleusement de luy. Le Prestre pareillement estant jeune, dispos & de belle apparence, s'apperceut un jour que Polissene luy en vouloit, & la voyant jolie de visage, d'un gentil corsage, & garnie de toutes qualitez de beauté qui appartiennent à une belle femme, luy commença donner des œillades de grand affection : & elle faisoit le semblable ; tellement que leurs cœurs si fidelles, & liez d'un amour reciproque, firent tant qu'il ne passa pas long-temps que Polissene, sans estre veüe de personne, tira le Prestre en sa maison pour en avoir son plaisir : & continuerent ainsi furtivement leur amour par quelques mois, reiterans par plusieurs fois les es-

troittes accolades, & baisers amoureux, laissant le pauvre lourdaud de mary à la discretion des dangers de la mer troublée. Ayant esté Demetrius quelque temps en Cypre, & ayant raisonnablement fait son profit sur mer, s'en retourna à Venise, & si-tost qu'il fut descendu de la navire, trouva sa chere femme qui pleuroit amere-ment. Et luy ayant demandé la cause de ses pleurs, respondit que c'estoit tant pour les mauvaises nouvelles entendues, que par l'incroyable joye qu'elle sentoit de sa venue; parce qu'elle avoit entendu qu'il estoit pery grand nombre de navires Cyprianes, & craignoit qu'il ne luy fust survenu quelque inconvenient. Mais maintenant, dit-elle, vous voyant (la Dieu grace) estre sain & sauve, retourné par deçà, je ne me puis tenir de pleurer. Le pauvre homme, qui estoit retourné de Cypre à Venise, pour recompenser le temps que la femme avoit perdu par longue absence, pensoit bien que les larmes & souspirs de sa femme procedoient d'un pur & loyal amour qu'elle luy portoit; mais le pauvre malheureux ne consideroit pas qu'elle disoit en elle-mesme: Pleust à Dieu que tu fusses noyé au milieu de la mer; parce que je me donneroie du bon temps plus seurement, & avec plus grand contentement avec mon amy qui m'ayme tant. Devant qu'il fust un mois de là, Demetrius s'en retourna à son voyage, dont

Polissene fut autant joyeuse qu'elle fut jamais : & ne mit gueres à en advertir son muguet, lequel n'estoit pas moins vigilant qu'elle ; & quand l'heure convenable & assignée fut venue, il s'en alla secrettement. Mais les menées du Prestre ne peurent estre si secrettes, qu'il ne fust apperceu de Manusse, qui demouroit vis-à-vis du logis de son compere Demetrius. Au moyen dequoy ce Manusse qui aymoît grandement Demetrius, d'autant qu'il estoit assez compagnable, & prest à faire service, ayant quelque soupçon sur sa com-mere, souventesfois y print garde. Ayant donc veu evidemment, qu'à certains signes & certaines heures l'huy estoit ouvert au Prestre, tellement qu'il entroit dedans, & jouoit avec la com-mere un peu plus indiscrettement qu'il ne appartenoit, il delibera de n'en dire mot, afin que ce fait qui estoit caché, ne vint à se manifester, & qu'il ne s'en ensuivist quelque scandale, mais voulut attendre la venue de son compere Demetrius, afin qu'il y donnast ordre plus à loisir. Quand le temps fut venu de s'en retourner au pays, Demetrius monta sur mer, & avec vent favorable s'en retourna à Venise, & estant descendu de la navire il s'en alla tout droit à son logis, & ayant frappé à la porte, la servante ouvrit la fenestre, & l'ayant reconnu, courut incontinent pour luy ouvrir, pleurant quasi de joye. Polissene

entendant la venue du mary descendit incontinent à bas , & en ouvrant les bras l'embrassa & baïsa , luy faisant les plus grandes caresses de ce monde. Et pour autant qu'il estoit un peu las , & tout rompu de la navire , s'en alla coucher sans souper , & se mit si fort à dormir , que sans recueillir le dernier fruit d'amour , le jour vint. La nuit passée , & le jour clair retourné , Demetrius s'esveilla , & s'estant levé du lit sans luy complaire d'un seul baiser , s'en alla prendre un petit coffre , duquel il tira quelques petites gentilleses & mignardises , qui n'estoient pas toutes de grand prix , & estant retourné au lit , les presenta à sa femme ; laquelle ayant autres choses en la fantasie , ne fist pas grand estime de ces dons. Advint cependant à Demetrius une occasion d'aller en Pouille faire son emplaite d'huile & autres choses : & l'ayant manifesté à sa femme , se commença à preparer pour son voyage. Alors sa femme rusée & malicieuse feignant d'estre marrie de son departement , le caressoit en le priant de demeurer quelque temps avec elle : mais en son cœur une heure luy sembloit mil ans , qu'il s'ostast de devant ses yeux , afin de se pouvoir mettre plus seurement entre les bras de son mignon. Or Manusse qui avoit veu souventesfois le Prestre faire la court à sa commere , & faire choses qu'il ne convient pas dire , estima faire tort à son

compere s'il ne luy reveloit ce qu'il avoit veu faire : tellement qu'il delibera , quoy qu'il en advint , de luy raconter & faire le recit. Et l'ayant un jour invité à dîner , après s'estre assis à table , Manusse dit à Demetrius : Mon compere , vous sçavez (si je ne suis deceu) que je vous ay tousjours aimé , & aimeray tant que l'esprit gouvernera ce mortel corps ; & n'y a chose en ce monde , tant difficile soit elle , que je ne fisse pour vous : & quand vous ne le prendriez point en mal , je vous raconteray choses qui vous porteroient plustost ennuy que plaisir ; mais je nay pas la hardiesse de vous en parler craignant de vous troubler l'entendement. Toutesfois si vous estes sage & prudent (comme je pense) vous appaiserez vostre fureur & desdain , qui empesche l'homme à cognoistre la verité. Ne sçavez-vous pas bien (respondit Demetrius) que vous me pouvez communiquer tout ce qu'il vous plaist ? Avez-vous point possible tué quelqu'un ? dites-le , & ne craignez point. Je n'ay tué personne (dist Manusse) mais j'ay bien veu quelqu'un tuer & destruire vostre honneur & renommée. Parlez-moy clairement , dit Demetrius , & ne m'entretenez plus avec ces propos tant obscurs. Voulez-vous que je vous le die en un mot , dit Manusse , escoutez , & portez en patience ce que je vous diray : Vostre Polissene , que vous aimez tant , cependant que vous

estes absent , couche toutes les nuits avec un Prestre , en se donnant du bon temps avec luy. Comment cela est-il possible ? respondit Demetrius , veu qu'elle m'ayme de si grande affection : car toutes les fois que je me viens à partir d'icelle , me vient à remplir le sein de larmes , & l'air de souspirs : & si ne le voyois avec mes yeux , je ne le croyrois jamais. Si vous estes sage (comme je pense) dit Manusse , & s'il y a raison en vous ne vous bandez point les yeux , comme font un tas de niaiz , & lourdaux , & je vous feray voir avec vos yeux , & toucher avec le doigt , tout ce que je vous dis : vous en serez du tout asseuré. Mais faites que vous soyez secret , luy montrant bon visage : autrement la queue du faisan se gasteroit. Le jour que vous voudrez partir , vous feindrez de monter sur mer ; puis le plus secrettement que pourrez , vous viendrez en mon logis , & je vous feray voir tout le mystere. Quand ce vint au jour que Demetrius se vouloit partir , il fit de grandes caresses à sa femme , en luy recommandant le menage ; & ayant prins congé d'elle fit semblant d'aller en la navire , & se retira secrettement au logis de Manusse. La fortune voulut que devant qu'il fust deux heures il s'eleva un mauvais temps , avec une pluye si terrible , qu'il sembloit que le ciel deust ruiner , & ne cessa toute la nuit de plouvoir. Le Prestre qui avoit desja esté

adverty du departement de Demetrius ; ne craignant ne pluye ne vent , attendit l'heure accoustumée pour aller visiter ses amours : & si-tost qu'il eut donné le mot du guet, on luy ouvrit la porte ; & après estre entré , elle luy donna un doux & savoureux baiser. Ce que voyant le mary qui estoit caché près d'un pertuis , ne pouvant contredire à ce que le compere luy avoit dit , fut tout estonné , & pour la juste douleur qu'il en avoit , il se mit à pleurer. Alors le compere luy dit : Or bien , que vous en semble ? avez-vous pas veu ce que ne pensiez pas ? mais ne dictes mot , & ne vous troublez point : car si vous m'escoutez , en faisant ce que je vous diray , vous verrez encore mieux. Allez poser ces habits que vous portez , & prenez ceux de quelque belistre & les vestez , & vous barbouillez les mains & le visage de fange , & en contrefaisant vostre voix , allez-vous-en à vostre logis , & feignez de mendier & demander logis pour ce soir : la chambriere possible , voyant ce mauvais temps aura pitié de vous & vous logera ; en ce faisant vous pourrez voir ce que vous ne voudriez pas. Si-tost que Demetrius eut entendu ces propos , il s'en alla depouiller ses habits , & se vestit les haillons d'un pauvre homme qui estoit entré en la maison demandant logis pour Dieu , & cependant qu'il pleuvoit ainsi asprement , il s'en alla à la porte de son logis , & frappa

trois fois à la porte en pleurant & soufpirant amèrement. La chambrière ayant ouvert la fenestre, demanda qui est là ? Et luy d'une voix cassée & contrefaite, respondit : Je suis un pauvre vieillard, qui suis quasi noyé de la pluye, & demande logis pour Dieu pour ceste nuict. La bonne servante qui n'estoit pas moins pitoyable aux pauvres, que la maistresse envers le Prestre, s'en alla vers la maistresse, & la pria que ce fust son plaisir de contenter un pauvre homme qui estoit tout mouillé de la pluye, & le loger jusques à tant qu'il se fust rechauffé & eslué. Il pourra aller tirer de l'eau (dit-elle) & faire du feu, afin que les poulets se puissent rostir plus tost. Cependant je pourray mettre le pot au feu, & apprestera les escuelles, faisant d'autres services par la cuy sine. La maistresse consentit à cela, & la chambrière luy ayant ouvert l'huis, le fit entrer, & le mit près du feu : & cependant que le pauvre homme tournoit la broche, le Prestre & la maistresse estoient en la chambre à passer leur temps. Advint qu'en se tenant par la main s'en allerent à la cuy sine, & saluerent ce pauvre en se moquant de luy, de ce qu'il estoit ainsi souillé de fange. Et s'estant approché de luy, la maistresse luy demanda son nom : à quoy il respondit : J'ay nom Gramotivege, Madame ; ce que entendant la maistresse, commença à rire si fort qu'on luy eut peu

arracher les dents. Puis vint embrasser le Prestre, en disant : Or sus, mon petit cœur doux, que je vous baise, & en voyant tousjours ce pauvre, ne laissoit pas de l'accoler & baiser. Vous pouvez penser quelle fantasie avoit le mary, voyant ainsi sa femme estre baisée & embrassée du Prestre en sa presence. Quand l'heure du souper fut venue, la servante mit ces amoureux à table, & estant retournée en la cuysine s'approcha de ce pauvre, & luy dit : Mon pere, mon amy, vous devez entendre, que ma maistresse a un autant bon mary & aussi homme de bien qu'on puisse trouver en ceste ville, & ne luy laisse avoir faute de rien. Dieu sçait où il est maintenant par ce mauvais temps. Et elle ingrate, ne se souciant aucunement de luy & moins de son honneur, s'est laissée aveugler d'un amour lascif, caressant son mignon, & fermant la porte à tous, hors mis à luy. Mais je vous prie, allons tout doucement à l'huis de la chambre, & voyons ce qu'ils font & comme ils mangent. Estans venus à l'huis, ils virent comme l'un & l'autre se traittoient fort bien, continuant leurs amoureux propos. Quand ce vint sur l'heure de s'aller reposer, ils s'en allerent tous deux coucher, & en joiant ensemble & passant le temps, commencerent à moudre fort & ferme, & soufflans & remuans les talons de si grande puissance, que le pauvre qui estoit couché en une chambre tout joignant,

joignant , pouvoit facilement tout entendre : tellement qu'il ne ferma jamais les yeux de toute la nuit , mais si-tost que le jour fut venu il s'en alla au logis de Manusse , lequel dit en se soufriañt. Or bien (compere) comment se porte le mestier ; avez-vous trouvé ce que ne vouliez ? Ouy certes , dit-il , & ne l'aurois jamais creu , si je ne l'eusse veu de mes propres yeux ; mais patience , puis que mon malheur le veut ainsi. Or Manusse qui estoit assez fin , luy dit : Mon compere , il faut que vous fassiez ce que vous diray. Lavez-vous fort bien & prenez vos accoustremens , & sans perdre plus temps , allez-vous-en vers vostre logis , feignant de n'avoir jamais peu partir , à cause du mauvais temps , & vous prenez garde que le Prestre ne se sauve ; car cependant que vous serez au logis , il se cachera en quelque lieu , & ne se departira point jusques à tant qu'il ait loisir de se partir à son aise , & cependant vous manderez les parens de vostre femme , qu'ils viennent dîner avec vous , & quand vous aurez trouvé le Prestre chez vous faites-en après ce que bon vous semblera. Ce conseil de Manusse pleut merveilleusement au compere , & ayant despoüillé ses meschans habits , s'en alla vers son logis , & commença à frapper à la porte. La chambriere voyant que c'estoit le maistre , courut incontinent vers sa maistresse , qui estoit encore dedans le lit avec le Prestre,

& luy dit : Madame , voicy mon maistre qui est retourné. Ce que entendant la maistresse fut toute effrayée , & s'estant levée le plustost qu'elle peut, cacha le Prestre (qui estoit en chemise) en un coffre où elle tenoit les plus beaux vestemens qu'elle eust ; Puis s'en courut avec sa robe fourrée , & luy alla ouvrir , estant toute deschaussée , & luy dit : Mon mary , vous soyez le bien venu ; je n'ay jamais clos les yeux pour l'amour de vous , pensant tousjours à ceste grande fortune qui a esté depuis ; mais Dieu soit loüé de ce que vous estes retourné sain & sauve. Si-tost que Demetrius fut entré en la chambre, il dit à sa femme : Mamie Polissene , je n'ay jamais peu dormir ceste nuit , à cause du mauvais temps ; tellement que je me voudrois bien un peu reposer ; & cependant la chambriere s'en ira vers vos freres , & les invitera en nostre nom pour venir dîner ce matin avec nous. Alors Polissene luy respondit : Attendez plustost un autre jour , à cause qu'il pleut ; & la chambriere est empeschée à faire la lessive pour nos chemises , linceux & autres draps de lin. Demain il fera peut-estre meilleur temps , respondit Demetrius , & me faudra partir. Alors Polissene luy dit : Vous y pourriez bien aller , & si vous n'y voulez aller , à cause que vous estes las , appelez nostre compere Manusse qui vous fera ce service. C'est bien dit à vous , respondit Deme-

trius. Ayant fait appeller son compere, il fit tout ce qu'on luy avoit enchargé. Les freres venus, ils dînerent tous joyeusement de compagnie. Les tables desservies, voilà Demetrius qui va dire à la compagnie : Messieurs mes beaux freres, je ne vous ay jamais montré ma maison, ny les beaux vestemens que j'ay fait faire à ma femme Polissene vostre sœur : parquoy il vous plaira considerer comment elle est traitée avec moy. Or sus Polissene, levez-vous belle Dame, & montrez un peu la maison à vos freres. S'estant Demetrius levé, il leur montra les magasins remplis de froment, de bois, d'huiles & autres marchandises : puis les bottes pleines de malvoisie, de vins Grecs & exquis. Puis dit à sa femme : Montrez-leur vos bagues, & les belles perles que je vous ay achetées, prenez un peu ces belles esmeraudes, qui sont en ce petit coffre, les diamants, les rubis, & autres precieuses bagues. Or que vous en semble, mes freres ? Vostre sœur n'est-elle pas bien traitée ? Alors tous luy respondirent d'une voix : Nous le sçavons bien, frere, & si nous n'eussions esté asseurez de vostre preud'homme, nous ne vous l'eussions pas baillée. Et non content de ce, luy commanda qu'elle commençast à ouvrir les coffres, & leur monstroit ses beaux habillemens. Mais Polissene qui trembloit toute de crainte, luy dit : Qu'est-il maintenant

de befoing d'ouvrir les coffres, & leur monſtrer mes accouſtrements ? Ne ſçavent-ils pas bien que vous me tenez tousjours honorablement veſtueë, & beaucoup plus qu'il n'appartient à noſtre eſtat ? Ouvrez ce coffre, dit-il, & vous depeſchez, & ceſt autre pareillement; & leur alloit monſtrant tous les accouſtrements. Or n'y avoit-il plus qu'un ſeul coffre à ouvrir, duquel on ne pouvoit trouver la clef, à cauſe que Monſieur le Preſtre eſtoit caché dedans. Demetrius voyant qu'il ne pouvoit trouver la clef, print un marteau, & cogna tant qu'il rompit la ſerreure, & ouvrit le coffre. Alors le Preſtre ne ſe peut ſi bien cacher qu'il ne fuſt cogneu de tous. Les freres de la femme voyant le fait evident, en eurent ſi grand deſpit, que peu s'en fallut qu'ils ne les tuaſſent tous deux ſur le champ; mais le mary ne le voulut jamais permettre, eſtimant eſtre un grand deſhonneur de tuer un homme en chemiſe, quelque vaillant homme que ce fuſt. Puis ſe retourna vers les freres, & leur dit : Que vous ſemble maintenant de ma truande de femme, en laquelle j'avois mis tout mon eſpoir ? meritois-je un tel honneur de toy, dy vilaine ? qui me tient maintenant que je ne te coupe la gorge, malheureuſe que tu es. La pauvre deſolée ne ſe pouvant autrement excuſer, ne diſoit mot, pour ce que le mary luy diſoit au viſage tout ce qu'elle avoit fait, & veu la

nuiſt precedente ; tellement qu'elle ne le pouvoit nier. Puis ſe tournant vers le Preſtre , qui baiſſoit la teſte comme un canard , luy dit : Prenez vos habits (Monſieur le ruſtre) & vous en allez en la maſeure , que je ne vous voye jamais ; car je ne veux pas ſouiller mes mains au ſang ſacré pour une maſtine. Or ſus levez-vous, qu'attendez-vous plus ? Le Preſtre ſans ouvrir la bouche ſe partit , penſant toujours avoir Demetrius après luy , & ſes beaux freres avec leurs couſteaux à ſa gorge. Cela fait , il ſe tourna vers ſes beaux freres , & leur dit : Mes freres , menez voſtre ſœur où bon vous ſemblera , car je ne la veux plus ſouffrir devant mes yeux. Les freres remplis de deſdain & courroux , ne furent pas ſi-toſt au logis qu'ils la tuèrent. Ce que entendant Demetrius , & conſiderant ſa chambriere qui eſtoit aſſez belle & de bonne grace : ſe ſouvenant auſſi de la pitié qu'elle-avoit eu de luy , la prit pour ſa femme , en luy faiſant un preſent de toutes les bagues & accouſtrements qui eſtoient à ſa premiere femme , & veſquit long-temps avec elle en joye & paix.

Si-toſt que Ariane eut finy ſa Fable, toute la compagnie dit d'une voix , que la vertu & conſtance du pauvre Demetrius avoit eſté grande , meſmement ayant devant ſes yeux le Preſtre qui eſtoit cauſe de ſon deſhonneur , ſi eſt-ce que la crainte ne fut pas moindre du Preſtre , lequel eſtant

94 L A I. N U I C T ;
en chemise & deschauffé , & se voyant le
mary & les freres près de luy , trembloit
comme la fûeille esbranlée par le vent.
Cela fait , la Dame oyant plusieurs & va-
riables discours qui se faisoient sur ceste
matiere , imposa silence à tous , & com-
manda à Ariane de proposer son Enigme ,
laquelle d'un beau & gracieux maintien ,
avec visage affable & riant , commença
ainsi :

*Trois compagnons estans à table ;
Cherchans toujours les bons morceaux ,
Vint un valet fort serviable ,
Qui presentoit aux joudenceaux
Trois beaux pigeons (chose agreable)
Pour en frotter leurs gras museaux :
Lors que chacun eut prins le sien ,
Deux y restoient à dire bien.*

Cest Enigme sembla assez difficile à la
compagnie: tellement que tous l'estimoient
quasi impossible , ne se pouvans imaginer
comme se pouvoit faire que les trois pigeons
estans mangez , il en demeura encore deux
sur table ; mais ils ne confideroient pas
que le serpent estoit sous le buisson. Voyant
donc Ariane , que son Enigme n'estoit pas
entendu , & consequemment qu'il estoit
inextricable , se tourna d'un visage deli-
cat vers la Dame , & luy dit : Madame ,
combien que l'Enigme par moy proposé ,
semble à tous quasi impossible , si est-ce

qu'il n'est point si obscur, qu'il ne se puisse aisément entendre. La resolution donc est telle : Il y avoit trois compagnons, l'un desquels s'appelloit Chacun ; & estans tous trois à une table, après avoir remply leur ventre de viande, comme bestes brutes, arriva un serviteur qui leur presenta trois pigeons, donnant à chacun le sien. Or celui qui avoit nom Chacun, mangea le sien, & les autres qui estoient saouls, laisserent les autres deux sur la table, & se partirent. La resolution de cest obscur Enigme, fut grandement loüée d'un chacun, non pas sans rire abondamment : & n'y avoit celui en la compagnie qui l'eust jamais peu imaginer. Après que ceste dernière charge de deviser pour icelle nuit fut finie, la Dame commanda à un chacun de se retirer au logis pour reposer, & qu'on retournast neantmoins le soir ensuivant, sous peine d'encourir sa mauvaise grace. Les torches furent allumées, qui estoient blanches comme neige, les Gentilshommes accompagnez jusques au rivage; & ainsi chacun se retira.





L A

SECONDE NUICT.

DES FABLES ET ENIGMES

du Seigneur Jean-François
Straparole.

DESJA Phebus avoit trem-
pé ses routès dorées dedans
les eaux salées de la mer In-
diene, & ses luyfans rayons
ne donnoient plus de splen-
deur sur la terre : sa sœur cornuë pareille-
ment dominoit desja par tout les obscures
tenebres avec sa claire & flamboyante lu-
miere : aussi les belles & estincellantes
estoilles avoient desja par leur lueur donné
la nayve peinture au Ciel, quand l'honne-
ste & honorable compagnie se retira au
lieu accoustumé, pour continuer leurs plai-
sans propos. Et s'estant assis selon leur de-
gré, Madame Lucrece commanda qu'on
eust à poursuivre l'ordre tenu le soir pre-
cedent. Et pour autant qu'il restoit encore
cinq Damoiselles pour raconter leurs nou-
velles,

velles : la Dame en chargea au Trevisan
 qu'il eust à mettre en escrit leur nom , &
 le mettre en un vaisseau d'or : puis l'ex-
 traire l'un après l'autre , comme on avoit
 desja fait le soir precedent. Le Trevisan
 obeyssant au commandement de Madame,
 mit incontinent son vouloir en execution,
 & par fortune le premier qui saillit , ce
 fut le nom de la belle Isabelle ; le second
 de Fleurdiane ; le troisième d'Alienor ; le
 quatrième de Loyse ; le cinquième de Vin-
 cende : puis au son des fleutes ils com-
 mencerent à danser des branles que Mou-
 lin conduisoit , & Alienor , dont les Da-
 mes & les Gentilshommes en firent si
 grands ris, & en rient encore à present. Le
 branle rond finy , chacun s'assist. Alors les
 Damoiselles commencerent ceste belle
 chanson à la loüange de Madame :

*Je dy tousjours, & sans cesse diray ,
 Sans que jamais je change de propos :
 Quand vos vertus à tous j'annonceray ,
 Quand tout honneur en vous prend son repos.
 Quelle beauté à vous compareray ?
 Quel cœur gentil , à bien du tout dispos ?
 Digne n'est pas du bien de l'autre vie ,
 Si vostre los tousjours ne le convie.*

La chanson amoureuse finie , Isabelle , à
 qui estoit escheu le premier lieu de la se-
 conde nuit , commença joyeusement à
 raconter ce qui s'ensuit.

F A B L E I.

*Galiot Roy d'Angleterre , eut un
fils nay porc , lequel se maria
par trois fois , & ayant perdu
sa peau de porc , devint un très-
beau jeune fils , qui depuis fut
appellé le Roy porc.*



L n'y a au monde (mes
gracieuses Dames) langue
tant éloquente & excellente
en bien dire , qui peust assez
suffisamment exprimer com-
bien l'homme est tenu à son Createur , de
l'avoir fait & formé homme en ce monde ,
& non point beste brute. Et sur ceste ma-
tiere il me souvient d'un conte qu'on a
fait de nostre temps d'un personnage qui
naquit porc , & depuis devint un très-beau
jeune fils , appellé de tous le Roy porc.
Vous devez donc sçavoir , mes très-cheres
Dames, que Galiot fut Roy d'Angleterre ,
homme non moins riche aux biens de for-
tune , qu'en ceux de l'esprit , & avoit pour
sa femme la fille de Matthias , Roy de
Hongrie , nommée Hersile , qui en beau-
té , vertu & courtoisie , surmontoit toutes
les autres Princesses de son temps. Au re-

ste , Galiot gouvernoit si bien son Royaume , qu'il ne se trouvoit aucun qui raisonnablement se peut plaindre de luy. Ayans demeuré par longue espace de temps ensemble , fortune voulut que jamais Herfile ne se peut engrossir ; ce qui desplaisoit grandement à l'un & à l'autre. Advint que Herfile se pourmenant une fois par son jardin s'en alloit recueillant des fleurs , & se trouvant desja un peu lassé , apperceut un lieu plein de verdoyantes herbes , où elle s'assit , & invitée du sommeil , à cause des oyseaux qui chantoient sur la ramée , se vint à endormir. Cependant voila trois hautaines Fées qui vont passer en l'air , lesquelles voyans ceste jeune Dame endormie , s'arrestèrent , & ayans considéré la beauté & bonne grace d'icelle , vont deliberer entr'elles de la faire inviolable & Fée. Elles furent donc en cela toutes trois d'accord. La premiere va dire : Je veux qu'elle soit inviolable , & la premiere nuit qu'elle couchera avec son mary qu'elle soit engrossie , & enfante le plus beau fils de ce monde. La seconde dist : Je veux que personne ne la puisse offenser , & que le fils qui naistra d'elle soit doué de toutes vertus & gentilleesses qui se peuvent imaginer. La troisiéme dit : Je veux qu'elle soit la plus sage & la plus riche femme qui se puisse trouver ; mais que le fils qu'elle concevra , naisse tout couvert de poil de porc , avec les contenance & maintien d'un porc ,

& ne se puisse jamais changer de tel estat ; s'il ne prend premierement trois femmes. Ces trois Fées parties, Herfile s'esveille , & se leva incontinent , & ayans prins ses fleurs qu'elle avoit recueilli , s'en retourna au palais. Il ne passa pas long-temps que Herfile s'engrossit , & quand ce vint au temps d'enfanter , elle fit un fils qui n'avoit point les membres d'homme , mais plustost de porc. Ce qu'estant venu aux oreilles du Roy & de la Royne, ils en conceurent une douleur merveilleuse : & afin que tel enfantement ne redondast point au deshonneur de la Royne qui estoit debonnaire , le Roy eut souventesfois fantasie de le faire tuer & le jetter en la mer. Mais considerant en son esprit , & pensant discrettement que le fils , quel qu'il fust , estoit engendré de luy , & estoit de son sang , laissant toute mauvaise intention qu'il pouvoit avoir en son cœur , ayant meslé la pitié avec la douleur , voulut qu'il fust nourry & entretenu , non point comme beste brute , mais comme animal raisonnable. Ce petit enfant estant nourry en toute diligence , venoit souventesfois vers la mere , & se levant sur deux pattes , luy mettoit le petit groin en son giron , & les petites pattes sur ses genoux. Et la bonne mere ne laissoit pas de le caresser, en luy mettant les mains sur sa peau pelue , & le baisoit & embrassoit tout ainsi qu'une creature humaine. Cependant le

petit fils se tourtilloit la queue , montrant par signes evidens que les caresses maternelles luy estoient fort agreables. Estant ce petit porc creu , commença à former la parole humaine , & s'en aller par la ville , & se fourroit par les ordures & immondices , comme font les autres porcs. Puis se trouvant ainsi ord & sale , s'en retournoit en la maison , & en s'approchant du pere & de la mere , se frottoit à leurs beaux accoustremens , en les soüillant de fange & puanteur : & pour autant qu'ils n'avoient autre enfant que luy , ils portoient tout en patience. Un jour entre les autres , s'en venant au logis , ord & sale comme de coutume , se mit ainsi sur les vestemens de sa mere , & luy dit en grondant : Ma mere , je me voudrois marier. Ce qu'entendant la mere , luy respondit : Va fol que tu es , qui est celle qui te voudroit bien prendre ? tu es puant & sale , & tu veux qu'un Baron ou un Chevalier te donne sa fille ? Il luy respondit en grondant , qu'il vouloit estre marié , quoy qu'il en fut. La Royne ne sçachant comment s'y gouverner , s'en alla trouver le Roy , en luy disant : Que ferons-nous ? vous voyez en quel estat nous sommes , nostre fils veut à toutes forces estre marié , & n'y a aucune qui le vueille prendre pour mary. Bien-tost après le petit Cochon retourna vers sa mere , en grondant encore plus haut qu'il ne faisoit auparavant , & disoit : Je veux estre

marié , & ne cesseray jamais jusques à tant que j'aye ceste jeune fille que j'ay aujourd'huy veu , car elle me plaist grandement. C'estoit la fille d'une pauvre femme qui avoit trois filles , & chacune d'icelles estoit belle à merveille. Ce qu'entendant la Royne , envoya incontinent querir ceste pauvre femme avec sa fille aînée , & luy dit : Mere m'amie , vous estes pauvre , & chargée de filles , si vous voulez consentir à ce que je vous diray , vous deviendrez incontinent riche. J'ay ce fils que vous voyez lequel je voudrois bien marier à vostre fille la plus grande. N'ayez point d'esgard à luy qui est porc , mais au Roy & à moy : car à la fin elle demeurera jouïssante de ce Royaume avec luy. La fille oyant ces paroles , se troubla grandement : & estant devenuë rouge comme la rose du matin , dit franchement qu'elle ne vouloit consentir par aucun moyen à telle chose. Toutesfois sa pauvre mere luy sceut si bien persuader avec plusieurs douces paroles , qu'elle en fut à la fin consentante. Le Cochon estant de retour au logis , tout souillé , courut vers sa mere , qui luy dit : Mon fils , nous t'avons trouvé une femme selon ton desir. Et ayant fait venir l'espousée , accoustrée de riches vestemens , selon l'estat d'une Royne , se presenta devant le Porc , lequel la voyant belle & gracieuse , s'en resjouïssoit tout : & ainsi puant l'environnoit , & avec le groin &

les pattes luy faisoit les plus belles caresses de ce monde, & pour autant qu'il luy souilloit tous ses accoustremens, elle le repoussoit en arriere. Et le Porc luy disoit : Pourquoy me repoussez-vous ainsi ? ne vous aye pas fait faire ces accoustremens ? Et elle luy respondit d'une voix hautaine : Ne toy, ni ton Royaume des Porcs ne me les fis onc faire. Quand l'heure fut venue de s'en aller reposer, la jeune mariée dit : Que feray-je de ceste puante beste & infecte ? je le veux tuer ceste nuict quand il sera sur le premier sommeil. Le Cochon, qui n'estoit pas trop loing de là, entendant ce propos ne dit autre chose, mais s'en alla mettre en ce liât tant magnifique, estant tout couvert de fumier & de charogne puante ; & avec son sale groin & ordes pattes, se mit à lever les linceulx deliez, & ayant tout souillé de puantes infections, se coucha près de l'espousée, laquelle ne demeura gueres quelle ne s'endormist. Mais le Porc feignant de dormir, luy vint à donner si grand coup en l'estomach avec ses crochets, qu'elle demeura incontinent morte. Le Porc se levant le matin assez tost s'en alla suivant sa coustume à paistre & se souiller. Cependant la Royne s'en alla visiter sa belle fille, & l'ayant trouvée mise à mort par le Porc, en receut une très-grande douleur. Estant le Porc de retour au logis, & estant rigoureusement repris de sa mere, il respondit qu'il luy avoit fait ce qu'elle

luy avoit voulu faire : puis se partit tout courroucé. Bien-toſt après le Porc vint à ſolliciter ſa mere de le vouloir remariar à l'autre ſœur , & quand la Royne luy voudroit reſuſer ſa demande , luy comme obſtiné la vouloit avoir à toute force , menaſſant de mettre tout en ruine ſ'il ne l'avoit. La Royne entendant ces rudes propos , ſ'en alla vers le Roy , & luy raconta tout : & il reſpondit qu'il vaudroit mieux le faire mourir, de peur qu'il n'advint pour ſon regard quelque grand inconvenient en la ville : mais la mere, laquelle luy portoit fort grande affection , ne pouvoit endurer d'eſtre privée de ſon enfant , nonobſtant qu'il fuſt Porc. Et ayant fait appeller la ſuſdite pauvre femme , avec ſa ſeconde fille , devisâ longuement avec elle touchant le mariage ; tellement que après longs propos , la ſeconde fille conſentit à ce mariage , mais ſon intention ne vint pas en ſi bon terme comme elle penſoit : car le Porc la tua , comme il avoit fait la première , puis ſe partit incontinent de la maiſon. Eſtant de retour à l'heure accouſtumée avec ſon orde & ſi grande puantueur , qu'on ne ſe pouvoit approcher de luy , fut aigrement injurié du Roy & de la Royne pour les excez commis , ce neantmoins il leur reſpondit franchement , qu'il luy avoit fait comme elle luy vouloit faire. Et devant qu'il fuſt peu de temps , Monſieur le Porc aſſailit de rechef la Royne

pour se remarier, & prendre la troisiéme qui estoit encore plus belle que les autres deux. Mais pour autant que sa demande luy fut refusée, il sollicita tant plus fort de l'avoir, menassant la Royne avec les plus espouvantables paroles du monde, de la faire mourir, s'il ne l'espousoit. La Royne oyant les vilaines & deshonneſtes paroles, en sentoit en son cœur si grand tourment, qu'elle en devint quasi folle : & laissant aller toutes autres fantasies, fit venir la pauvre femme avec la troisiéme fille, nommée Meldine, & luy dit : Meldine, ma fille, je veux que tu prennes ce mien fils pour ton mary, & n'ayes point esgard à luy, mais à son pere & à moy ; car quand tu pourras temporiser avec luy, tu seras la plus heureuse & la plus contente fille de ce monde. Alors Meldine luy respondit d'un visage riant & gracieux, qu'elle en estoit fort contente, la remerciant humblement de ce que c'estoit son plaisir la prendre pour sa fille. Et quand elle n'auroit jamais autre chose, ce luy sembloit une grande faveur, que d'une pauvre fille qu'elle estoit, devenir en si peu de temps belle-fille d'un si puissant Roy. La Royne entendant une si gracieuse & amiable réponse, ne se peut tenir de plorer de la douleur qu'elle sentoit. Toutesfois elle craignoit qu'il ne luy en print autant comme aux deux autres. Or s'estant vestuë la nouvelle es-

pouse de riches accoustremens , attendoit tousjours son cher espoux qu'il retournaist au logis. Si-tost que Monsieur le Porc fut venu , autant puant & souillé qu'il fut jamais , l'espouse le receut humainement , estendant sa precieuse robe par terre , en le priant qu'il se couchast près d'elle. La Royne luy conseilloit de le faire reculer , ce qu'elle refusa , en respondant telles paroles à la Royne :

*J'ay ja vuy trois choses raconter ,
 Royne sacrée en couronne ennoblée :
 L'une trouver ne pourras sans douter ,
 De la chercher c'est aussi grand' folie :
 L'autre est , que soy tu ne dois adjouster
 Ace qui n'a raison ne courtoisie :
 La tierce , fuy que le don precieux
 Lequel tu tiens , n'eschappe de tes yeux.*

Monsieur le Porc qui ne dormoit pas , mais entendoit clairement tout ce qu'on disoit , se levant sur ses pattes , luy léchoit le visage , la gorge , l'estomach & les espauls. Elle pareillement de son costé le caressoit & baisoit , en s'embrassant du tout d'amour. Quant l'heure fut venue de s'aller reposer , l'espouse s'en alla coucher , attendant que son cher espoux y vint , lequel bien-tost ord & puant qu'il estoit , se vint coucher : elle commença à accoustrer la teste sur le chevet , en le couvrant fort bien , & fermant les courtines ,

afin qu'il n'endurast point de froid. Le jour venu, Monsieur le Porc ayant laissé sa place orde & puante, s'en alla paistre comme de coustume. Le matin la Royne s'en alla vers la chambre de l'espouse, & estimant voir ce qu'elle avoit veu des autres par le passé, trouva sa belle-fille toute joyeuse & contente, combien que le lit fust souillé d'ordures & infections, & remercia le bon Dieu d'un tel bien, de ce que son fils avoit trouvé une femme à son plaisir. Il ne passa gueres de temps que Monsieur le Porc étant avec sa femme en propos joyeux, luy dit : Ma femme, m'amie Meldine, si je pensois que tu ne manifestasses point mon secret, je te dirois à grand contentement & plaisir une chose que j'ay tenuë secrette jusques à present ; mais parce que je te cognois sage & discrete, & que tu m'aymes d'amour parfait, je t'en veux faire participante. Declarez-moy hardiment vostre secret, dit Meldine, car je vous promets de n'en dire jamais mot à personne sans vostre consentement. Estant Monsieur le Porc assuré de sa femme, se vint oster sa puante & orde peau, & devint un beau jeune fils, & coucha toute la nuit estroittement entre les bras de sa chere Meldine. Et luy ayant enchargé sur tout de n'en dire mot, esperant d'estre delivré en brief de telle pauvreté, se leva & print sa peau de porc, puis s'en alla selon sa coustume aux immondices

& fumiers. Je laisse à penser à un chacun quel contentement receut Meldine , se voyant accompagnée d'un si beau & honneste fils. A peu de temps de là elle s'engrossit , & venant à son terme , elle enfanta un très-beau fils , dont le Roy & la Royne furent fort joyeux , & mesmement de ce qu'il avoit la forme d'un homme & non point d'une beste. Cependant si faisoit beaucoup à Meldine de tenir secret une chose de tant grande & merveilleuse importance , & de fait s'en alla trouver la belle mere , & luy dist : Madame , je pensois estre accompagnée avec une beste , mais vous m'avez donné pour mary le plus beau , le plus sage , le plus honneste & le plus vertueux jeune fils qui soit en ce monde. Quand il se vient coucher près de moy , vous devez entendre qu'il despoüille sa puante peau , & l'ayant laissée par terre devient un beau fils , & de bonne grace , ce qu'on ne pourroit croire , qui ne le verroit de ses yeux propres. La Royne ne sçavoit si sa fille se moquoit , ou si elle le disoit à bon escient. Et luy ayant demandé comment cela se pouvoit voir ? Vous viendrez ceste nuit sur le premier sommeil à nostre chambre , & vous trouverez l'huy ouvert , & vous verrez ce que je vous dis estre vray. La nuit & l'heure venue , que chacuns'estoit allé reposer , la Royne fit allumer les torches , & s'en alla à la chambre du fils avec le Roy , & estant entré en icelle ,

trouva la peau de Porc qui estoit estendue par terre à costé de la chambre, & la mere s'approchant du liect, apperceut que son fils estoit un fort beau fils, & Meldine le tenoit estroittement embrassé. Ce que voyant le Roy & la Royne, se resjouyrent grandement, & le Roy ordonna que devant qu'on se partist de-là, que la peau fust decoupée. Alors la joye du Roy & de la Royne fut si grande, que peu s'en fallut qu'il n'en mourussent. Le Roy Galiot, voyant d'avoir un tel fils & enfant de luy, s'osta la couronne & les accoustremens royaux, & mit en sa place son fils, qui fut couronné avec grand triomphe, & fut appelé le Roy Porc. Puis au grand contentement de tout le peuple commença à gouverner le Royaume, & vesquit longuement en grande felicité avec sa bien aymée Meldine.

La fable d'Isabelle estoit desja finie, quand toute la compagnie se mit à rire de grand appetit, de Monsieur le Porc tout souillé, qui caressoit sa chere espouse, couchant avec elle tout puant qu'il estoit. Mais laissons maintenant le ris, dit Madame Lucrece, afin que l'Enigme d'Isabelle estant proposé l'ordre soit observé. Alors elle va commencer en telle sorte :

*Je voudrois bien que me donnasses
Ce qu'onques n'eux & jamais tu n'auras,*

*Voire combien icy tu demeurasses
 Encor' mil ans , tousjours t'abuseras :
 Penfer l'avoir , c'est en vain que tracasses ,
 Et à taton sans trouver chercheras ;
 Mais si tu m'aymes ainsi que l'on peut croire ,
 Baille-le moy , car tu le peux bien faire.*

Estant le subtil Enigme d'Isabelle raconté , chacun demeura estonné , ne se pouvans persuader qu'un peust donner une chose qu'il n'a pas , & qu'il n'auroit jamais. Alors la prudente Isabelle voyant leurs esprits en suspens , leur dit : Ne vous esmerveillez point , Messieurs , parce que l'homme peut bailler à sa femme ce qu'il n'a pas , & ce qu'il n'eut onc ; c'est à sçavoir , l'homme n'a point de mary , & n'en peut jamais avoir , & neantmoins il peut donner mary à la femme. L'interpretation de l'Enigme pleut grandement à un chacun , & le silence imposé à tous , Fleurdiane se leva , qui estoit assise près d'Isabelle , & avec un joyeux visage , luy dit : Madame , & vous mes très-honorez Seigneurs , il me sembleroit fort convenable , soubz vostre correction toutesfois , que Monsieur Moulin , qui est icy , resjouyst ceste douce compagnie , avec quelque plaissante facecie. Je dis cela , non pas que je vueille eviter le travail , car j'en ay beaucoup d'autres par les mains ; mais parce que sa fable qu'il vous racontera d'une bonne grace , vous donnera plus

grand contentement & plaisir. Et luy, comme vous sçavez, est de bon esprit, & facecieux, ayant toutes les bonnes parties qui sont requises à une gentile personne : & à nous autres simples filles conviendrait mieux l'esguille en la main, qu'à raconter des fables.

L'opinion de Fleurdiane plut à un chacun, en la louant grandement de telle invention, & Madame se tournant vers Moulin, luy dit : Or sus, Seigneur Antoine, vous nous resjouyrez tous de quelque belle facecie ; & luy commanda qu'il commençast. Alors Moulin, qui ne pensoit pas raconter fables, remercia premièrement Fleurdiane de la louange qu'elle luy avoit donnée ; puis comme obeyssant au vouloir de Madame, commença ainsi sa fable.



FABLE II.

*Philene Sisterne, Escolier estudiant
à Bologne, estant moqué de
trois belles Dames, sous un fe-
stin faux, se vengea de toutes.*



En'eusse jamais estimé (gracieuses Dames) & imaginé que Madame m'eust donné la charge de raconter Fables, veu mesmement que c'estoit au rang de Mademoiselle Fleurdiane, selon le sort escheu : mais puis qu'il plaist à sa seigneurie, & que chacun est content, je m'efforceray de raconter chose qui vous soit agreable. Et si par fortune mon dire (dont Dieu me gard') vous est ennuyeux, ou qu'il passast les bornes de l'honnesteté, vous m'excuserez, s'il vous plaist, & en mettez la faute sur Mademoiselle Fleurdiane, qui a esté cause de tout.

A Bologne, qui a esté la plus noble cité de Lombardie, mere des estudes, & accommodée de toutes les choses qui sont requises en une telle florissante ville, y avoit un jeune escolier, Gentilhomme du pays de Crete, nommé Philene Sisterne, homme de bonne grace & amiable.

Advint

Advint que de son temps il se fit un magnifique festin , auquel furent invitées les plus belles Dames , & les plus apparentes de la ville , & s'y trouverent parcelllement plusieurs Gentilshommes & Escoliers de Bologne , entre lesquels estoit ce Phile-ne : lequel suivant la coustume des jeunes gens , muguetant l'une , tantost l'autre , & les trouvant à son plaisir , delibera de danffer avec l'une d'icelles. Et s'estant approché d'une , qui s'appelloit Emeratiane , femme du Seigneur Lambert Benti-voille , l'invita à danffer. Elle qui estoit gentile , & non moins hardie que belle , ne le refusa pas. Alors Philene menant le bal assez lentement , & luy estreignant la main aucune fois , luy dit tels propos assez bas : Madame, vostre beauté est si grande qu'elle surmonte infailliblement toute autre que je veis oncq , & n'y a femme au monde à qui je porte aussi grande affection qu'à vostre personne , laquelle me correspondant en l'amour , je m'estimeray le plus content homme de ce monde ; autrement vous me verrez en brief privé de vie , & lors vous serez cause de ma mort. En vous ayant donc , Madame, ainsi que je fais , & comme mon devoir le requiert , vous me prendrez pour vostre serviteur , disposant de moy , de mon bien , de si peu qu'il y a , comme du vostre propre ; & vous promets que je ne pourrois recevoir plus grande faveur du Ciel ;

que de me voir subjeſt à une telle Dame ; laquelle m'a prins au filet , tout ainſi qu'un oyſeau. Or Emerentiane , qui attentivement avoit eſcouté les douces & gracieuſes paroles , comme perſonne prudente , fit ſemblant de n'avoir point d'oreilles , & ne luy reſpondit rien. 1

Le bal finy , & Emerentiane s'eſtant aſſiſe en ſa place , ce jeune eſcolier alla prendre une autre honneſte Dame par la main , & commença à danſſer avec elle : mais la danſſe ne fut pas ſi-toſt commencée , qu'il ſe miſt ainſi à parler à elle : Il n'eſt ja beſoin , Madame , que par paroles je vous demonſtre l'ardant amour que je vous porte & porteray tant que ce mien pauvre eſprit gouvernera & conduira mes membres , & m'eſtimerois très-heureux , ſi je vous pouvois avoir pour ma maiſtreſſe ou ſinguliere Dame. En vous aymant donc ainſi comme je fais , eſtant ainſi voſtre du tout , comme facilement pouvez entendre , vous ne me reſuſerez point , s'il vous plaît , pour voſtre humble ſerviteur , veu que ma vie & tout mon ſouverain bien , ne depend d'autre que de vous. La jeune Dame , qui ſe nommoit Panthemie , ayant entendu tous ſes propos , ne luy reſpondit autre choſe pour lors , ainſi pourſuivit honneſtement ſa danſſe , & le bal finy , en ſe ſouſſriant quelque peu , ſ'aſſiſt avec les autres Dames. Cela fait , l'amoureux Philene n'arreſta gueres

qu'il print la troisiéme par la main , qui estoit la plus gentile , la plus belle , & la plus gracieuse Dame de Bologne , & commença à danſſer avec elle , se faiſant faire large à ceux qui s'approchoient pour la contempler : devant que le bal fuſt finy , il luy tint tels propos : Madame , je vous ſembleray , peut-eſtre , trop importun , en vous maniféſtant l'amour ſecret que je vous ay porté , & vous portez encores pour le preſent , en quoy vous ne me devez point blaſmer , mais pluſtoſt voſtre beauté , laquelle vous rend excellente par deſſus toutes les autres , en me tenant comme voſtre eſclave & priſonnier. Je ne parle point de vos loüables mœurs , de vos excellentes & admirables vertus , qui ſont telles & de ſi grande efficace , qu'elles feroient deſcendre en bas les Dieux. Si donc voſtre excellente beauté ſi bien façonnée par nature , & non point par art , eſt agreable aux Dieux immortels ; il ne ſe faut point eſtonner ſi elle me contraint à vous aymer , & vous tenir encloué au cabinet de mon cœur. Je vous ſupplie donc , gentille Dame , qui eſtes le ſeul conſort de ma vie , que vous ayez pitié de celui qui meurt mille fois le jour pour vous. En ce faiſant j'eſtimeray tenir la vie de vous , me recommandant humblement à voſtre bonne grace. La belle Dame qui s'appelloit Simphoroſie , ayant entendu les douces & gracieuſes paroles qui ſortoient du

cœur de Philene , ne peut cacher ses souspirs ; mais considerant son honneur , à cause qu'elle estoit mariée , ne luy donna aucune responce , mais le bal finy se retira en sa place. Or se trouuans de fortune ces trois Dames estre assises l'une près de l'autre , comme un rondeau , & s'entretenans de propos plaisans ; voylà Emerentiane , femme du Seigneur Lambert (non pas par mal) mais en se joüant , dit à ses compagnes : Mesdames , ne vous ay-je pas à raconter un gentil tour qui m'est advenu aujourd'huy ? Et quoy donc ? respondirent les compagnes. J'ay acquis ce soir , dit-elle , en dansant le plus gentil amoureux , le plus beau , & de la meilleure grace de ce monde ; lequel se dit estre tant embrazé de ma beauté , qu'il ne repose ny jour ny nuict : & de point en point leur vint à raconter tout ce qu'il avoit dict. Ce qu'entendant Panthemie & Simphorose , dirent le mesme leur estre advenu , & ne se partirent point de la feste , qu'elles cogneurent estre celuy seul qui avoit fait l'amour avec elles. En quoy elles cogneurent que les paroles de l'amoureux ne procedoient point d'une loyauté amoureuse , mais plustost d'un amour fol & dissimulé : tellement qu'elles y adjousterent autant de foy , comme on fait coustumierement aux paroles des malades. Et ne se partirent point de là , que toutes trois d'accord , se donnerent la foy d'y besongner si bien, que

chacune en son regard luy donneroît quelque trouſſe. Continuant ainſi Philene à faire l'amour, tantôt à l'une, tantôt à l'autre, & voyant que chacune faiſoit ſemblant de l'aymer, ſe mit en deliberation, ſ'il eſtoit point poſſible, de recueillir d'icelles le dernier fruit d'amour; mais il fut bien abuſé en ſon deſir, parce que tout ſon deſſein luy fut rompu. Et de fait Emerentiane qui ne pouvoit plus ſouffrir l'amour diſſimulé du ſot eſcolier, appella une ſienne chambriere aſſez belle & jolie, & luy enchargea qu'elle parlaſt par beau moyen à Philene, luy pourroit, & quand ce ſeroit ſon plaifir qu'elle voudroit bien eſtre une nuit avec luy en ſon logis. Ce qu'entendant Philene, ſe reſjouyt grandement, & dit à la chambriere : Retournez-vous-en, la belle fille, & me recommandez bien à voſtre maiſtreſſe, en luy diſant de ma part qu'elle m'attende ce ſoir, puis que ſon mary n'eſt pas au logis. Cependant Emerentiane fit faire quelque nombre de fagots de piquantes eſpines, & les mit ſous le liſt où elle couchoit, attendant tousjours que le mignon vint. La nuit venuë, Philene print ſon eſpée, & ſ'en alla au logis de ſon ennemie, & ayant donné le mot du guet, l'huis luy fut incontinent ouvert. Et après qu'ils eurent devisé quelque peu enſemble, & ſoupé magnifiquement, ſe retirèrent en la chambre pour repoſer. Or Philene ne fut pas à grand

peine despoüillé pour s'en aller coucher ; que le Seigneur Lambert (le mary) arriva ; ce qu'entendant la Dame , fit semblant d'en estre faschée , & ne sçachant où cacher le mignon , le pria de se retirer sous le liât. Philene voyant le danger où il estoit , & la femme pareillement , sans prendre aucun vestement , mais seulement avec la chemise s'enfuit sous le liât , où il se piqua si asprement , qu'il n'y avoit partie en son corps , commençant depuis les pieds jusques à la teste , d'où le sang ne sortit. Et tant plus il se vouloit defendre en ce lieu obscur , tant plus il se piquoit , & n'osoit crier de peur que le Seigneur Lambert l'entendant , ne le tuast. Je vous laisse à penser en quel estat se trouvoit ce pauvre malheureux , lequel peu s'en faut qu'il ne restast sans queue , tout ainsi qu'il avoit perdu la parole. Le jour venu & le mary party du logis , le pauvre escolier se revestit le mieux qu'il peut , & s'en retourna ainsi tout saigneux au logis , ayant grande crainte de mourir ; mais estant diligemment pensé par les medecins , il revint & recouvra en brief sa premiere santé. Bientost après , Philene commença à poursuivre de rechef ses amours vers les deux autres ; c'est à sçavoir Panthemie & Simphorose , & fit tant qu'il trouva la commodité de parler un soir à Panthemie , à laquelle il raconta tous ses ennuis & continuels tourmens : en la priant d'avoir pitié

de luy. Alors la fine & prudente Panthemie feignant d'avoir pitié de luy, s'excusoit de n'avoir pas le moyen de le pouvoir contenter; mais à la fin vaincuë par ses douces prieres & merveilleux soupirs, le fit venir en sa maison. Et estant desja despouillé pour s'en aller coucher avec la Dame, elle luy commanda qu'il entraist en un petit cabinet, où elle tenoit ses eaux de senteurs & parfums, & qu'il se parfumast bien devant que de se coucher. Le jeune lourdaud ne se doutant aucunement de la ruse de ceste mauvaise femme, entra dedans ce cabinet, & ayant mis le pied sur une table, qui estoit seulement le moins du monde attachée au plancher, il vint à tomber si grand coup dedans ue magasin, où les marchands tenoient le coton & la laine, qu'il cuida se rompre le col & les jambes: toutesfois la fortune voulut qu'il ne se fit aucun mal en tombant. Se trouvant donc ce pauvre escolier en ce lieu obscur, commença à chercher quelque huis ou eschelles pour s'oster de là, & ne pouvant trouver chose à son gré, il maudissoit l'heure & le point qu'il avoit jamais cognu Panthemie. L'aube du jour venue, le pauvre mal-advisé apperceut en une partie du magasin quelques fentes en la muraille qui rendoient quelque peu de clarté, à cause qu'elles estoient desja anciennes & couvertes de mousse, qu'il commença d'une merveilleuse force à arracher

les pierres par le costé mesme où la muraille estoit plus foible , & tant arracha qu'il y fist un pertuis si grand qu'il en sortit , & se trouvant en un endroict qui estoit assez près de la grande rue , ainsi deschaussé & en chemise , s'en alla vers son logis sans estre cogneu de personne. A peu de temps de là , ayant Simphorosie entendu les trouffes que les deux autres Dames avoient données à Philene , tascha de luy donner la troisiéme , qui ne fut pas moindres que les autres deux.

Et pour ce faire elle commença à la longue de luy donner des œillades , quand elle le voyoit , luy donnant à cognoistre qu'elle estoit en grand tourment pour l'amour de luy. Le bon compagnon ayant desja mis en oubly les fortunes passées , commença à se pourmener devant sa maison en faisant le passionné. Alors Simphorosie cognoissant qu'il estoit desja assez embrazé de son amour , luy envoya une lettre par une petite fille , par laquelle elle luy faisoit entendre que sa beauté & bonne grace l'avoient si fort liée & enchainée , qu'elle ne trouvoit de repos ne jour ne nuit , au moyen dequoy elle desiroit bien , si c'estoit son plaisir , de parler un peu à luy. Philene ayans prins la lettre & veu le contenu d'icelle , & ne considerant pas la trouffe qu'elle luy preparoit , ne se souvenant plus pareillement des injures passées , se trouva plus joyeux & consolé que
jamais.

jamais : tellement qu'il print sa plume & du papier, & luy respondit, que si elle souffroit pour luy tourment, que c'estoit bien le contre-change, parce qu'il l'aymoit plus qu'il n'estoit aymé d'elle, & à toutes heures que bon luy sembleroit il estoit à son commandement & service. La réponse leuë & l'opportunité trouvée, Simphorosie le fit venir en sa maison, & après plusieurs faux souspirs, luy dit : Mon amy Philene, je ne cognois en ce monde autre que vous qui m'eut reduicte en ce passage où je suis maintenant, parce que vostre beauté, vostre bonne grace & vostre parler tant gracieux, m'ont si fort embrasé le cœur, que je me sens bruler comme bois sec. Ce qu'entendant Monsieur l'Escolier, tenoit pour certain qu'elle se consommoit pour l'amour de luy. Estant donc ainsi ce pauvre compagnon en ces doux & plaisans propos avec Simphorosie, le temps s'approchoit de s'aller reposer & coucher avec la Dame, laquelle luy va dire : Mon doux amy devant que nous allions au liét, il vaut mieux faire un peu de collation, & l'ayant prins par la main, le mena en un petit cabinet assez près de là, où il y avoit une table appareillée de confitures excellentes & vins exquis. Or ceste bonne Dame avoit mis quelque composition en ce vin pour faire dormir le galand jusques à certain temps. Philene sans y penser en mal, print la tasse

& l'emplit de ce vin, qu'il beut jusques à la dernière goutte. Les esprits resveillez avec ceste collation, & après s'estre fort bien parfumé & lavé en eaux de senteurs, s'en alla coucher, & n'arresta gueres que ceste liqueur commença à faire son operation, & le mignon s'endormit si pesamment, que le grand bruit des plus grosses artilleries de ce monde ne l'eussent pas reveillé. Alors Simphorose voyant qu'il en avoit, & que le breuvage faisoit son operation, se partit & appella une sienne servante puissante & disposée, qui sçavoit bien tout ce mystere. Puis toutes deux prindrent ce mignon par les pieds & par les mains, & ayant ouvert l'huis tout doucement le mirent au milieu de la rue à un bon get de pierre de la maison, & fut ainsi toute la nuit. Mais quand ce vint sur l'aube du jour, ou une heure devant, le breuvage perdit sa vertu, & le pauvre misérable se vint à esveiller, & pensant estre couché avec la Dame, se trouva tout deschauffé & en chemise, & plus mort que vif du froid qu'il avoit enduré, ayant couché sur la terre nue. Le pauvre malheureux ne se pouvoit quasi ayder des bras & des jambes, & à grande peine se pouvoit-il soustenir sur les pieds : toutesfois il fit tant en se traînant & degourdisant, qu'il se sauva en son logis sans estre veu de personne, & se fit traicter le mieux qu'il peut pour recouvrer sa santé. Et si n'eust

esté la jeunesse qui l'ayda en cela , les nerfs luy fussent retirez. Finalement estant-retourné en sa premiere santé , & en l'estat où il estoit auparavant , retint tousjours en son cœur les injures passées, & sans se montrer aucunement courroucé & leur porter aucune haine , fit semblant qu'il estoit plus amoureux de toutes trois qu'il ne fut jamais , & faisoit maintenant l'amour à l'une & l'autre. Cependant elles qui ne se doutoient pas du mauvais vouloir qu'il avoit contre elles , luy monstroient bon visage , comme à un vray amoureux ; mais elles en prenoient leur passe-temps. Le jeune homme qui estoit quelque peu dépitueux , eut souventesfois fantasie de faire un tour de sa main , & les marquer au visage ; mais comme sage , il considéra la condition des Dames , & que ce luy seroit grande honte de frapper trois femmelettes , & de fait il s'en abstint. En pensant donc , & repensant quel moyen il devoit tenir pour se venger , il estoit en grande perplexité. Bien-tost après , il advint que l'Escolier s'imagina de faire chose par laquelle il peut facilement contenter son desir , & tout ainsi qu'il eut pensé , la fortune aussi luy fut favorable. Il avoit prins à loüage en la ville de Boulogne un fort beau palais , qui estoit garni d'une sale spacieuse & chambres commodes. Là il delibera de faire un magnifique & honorable festin , & inviter beaucoup de Dames , eu-

tre lesquelles ces trois devoient estre les premieres invitées, ce qui fut fait : & quand le jour du festin fut venu, cestrois Dames, qui ne furent gueres sages pour lors, s'y en allerent sans penser plus outre. Or afin de faire un peu rafraischir les Dames, & leur donner la collation en attendant le souper, le bon galand alla prendre ces trois amoureuses par la main, & les mena gracieusement en la chambre pour les faire un peu rafraischir. Estans venuës ces trois mal-advisées Dames en la chambre de l'escolier, il ferma estroittement l'huis de la chambre, & s'en alla vers elles, & leur dit : Or sus meschantes & malheureuses que vous estes, voicy le temps que je me vengeray de vous, & vous feray porter la penitence du tort que m'avez fait, pour mon trop grand amour. Les Dames oyans ces rigoureuses paroles demurerent plus mortes que vives, & commencerent à se repentir de l'avoir jamais offensé. Outre cela, elles se maudissoient soy-mesmes, de s'estre trop fiées en celuy qu'elles devoient hayr. L'escolier d'un visage farouche & colere, leur commanda que sous peine de la vie, elles se despoüillassent toutes trois nuës. Ce qu'entendans ces bonnes deesses, commencerent à s'entre regarder l'une l'autre en pleurant, & le priant, non point pour l'amour d'elles, mais pour sa courtoisie & naturelle humanité, que leur honneur fust gardé sur tout,

Le galand qui se resjoüissoit en luy-mesmes, leur fut courtois en cela: vray est, qu'il ne voulut pas qu'elles demeurassent vestuës en sa presence. Les Dames se jetans aux pieds de l'escolier, pleuroient amèrement, en le priant qu'il eust pitié d'elles, & qu'il ne fust point cause d'un si grand scandale. Mais luy qui avoit desjà fait un cœur de diamant, leur dit, que cela n'estoit pas digne de reproche, mais plustost de vengeance. S'estans ces femmes despoüillées & demeurées nuës comme elles nasquirent, estoient aussi belles nuës que vestuës: tellement que le jeune escolier, en les contemplant depuis les pieds jusques à la teste: les voyant si belles & si delicates, que leur blancheur surpassoit la neige, commença d'en avoir pitié; mais reduisant en sa memoire les injures passées, & le danger de mort où il avoit esté, chassa toute pitié & demeura en sa dure & obstinée deliberation. Outre plus, il print tous leurs vestemens, & autres accoustremens qu'elles portoient, & les mit dedans un petit cabinet, & avec paroles assez rudes leur commanda qu'elles se couchassent toutes trois dedans un liët. Les femmes toutes espouventées, commencerent à dire en elles-mesmes: Helas! pauvres insensées que nous sommes, que diront nos maris? que diront nos parens quand on sçaura que nous aurons esté trouvées nuës, & miserablement

tuées en ce liêt? Mieux nous eust valû estre morte au berceau, que d'estre ainsi suprinſes en tel ſcandale. L'eſcolier les voyans couchées l'une près de l'autre, comme mary & femme, print un linceulx fort blanc, & non pas trop delié, de peur qu'on ne peult regarder la chair, & qu'elles fuſſent cogneuës; puis les couvrit depuis les pieds juſques à la teſte, & les ayant fort bien cloſes en la chambre, s'en alla trouver leurs maris qui danſſoient en la ſale, & le bal finy, il les mena en la chambre où les trois femmes eſtoient couchées dedans le liêt, & leur dit: Meſſieurs, je vous ay menez en ce lieu icy pour vous donner paſſe-temps, & pour vous monſtrer la plus belle choſe que vous viſtes onc. Alors s'eſtant approché du liêt, & tenant une torche en ſa main, commença à hauſſer legerement le linceul par les pieds, & le renverſer, en deſcouvrant ces Dames juſques aux genoux. Vous euſſiez veu alors les maris contempler leurs blanches jambes avec leurs pieds bien formez. Cela fait, il les deſcouvrit juſques à l'eſtomach, & leur monſtre les cuiſſes plus blanches qu'albaſtre, qui ſembloient quaſi deux colonnes de fin marbre, avec un corps rond autant bien proportionné que rien plus. Il leur monſtra conſequemment en les decouvrant un peu davantage leur eſtomach un peu relevé, avec deux tetrins ronds, fermes & tant mignons, qu'ils

auroient contraint le grand Dieu Jupiter à les embrasser & baiser ; dont les maris en prenoient autant de passe-temps & contentement qu'on sçauroit imaginer. Je vous laisse à penser en quel estat devoient estre les pauvres Dames, oyans leurs maris se moquer d'elles. Cependant elles se tenoient quoyes, & n'osoient pas seulement toussir, de peur d'estre cogneuës. Les maris pressoient l'escolier de leur descouvrir le visage ; mais luy plus prudent au mal d'autruy, que au sien, n'y voulut jamais consentir. Non content de ce, le jeune escolier prit leurs accoustremens, & les monstra à leurs maris, lesquels en furent tous estonnez en les voyant, & en les contemplant par grandes merveilles, disoient en eux-mêmes : N'est-ce pas icy la robe que je fis faire une fois à ma femme ? N'est-ce pas la coiffë que je luy achetay ? N'est-ce pas le pendant qu'elle porte à son col ? Ne sont-ce pas là les anneaux qu'elle portoit en ses doigts ? Estans issus de la chambre, de peur de troubler la feste ils ne se partirent point, mais demeurèrent à souper. Le bon escolier qui avoit desja entendu que le souper estoit cuit, & que le sage maistre d'hostel avoit tout fait appareiller, donna ordre que chacun s'assit à table. Et cependant que chacun remuoit les maschoires, il retourna en la chambre où les trois Dames estoient couchées, & les ayant descouvertes, leur

dit : Bon jour , Mesdames , avez-vous point entendu vos maris ? ils sont icy près , & vous attendent d'un grand desir. Que voulez-vous faire ? Sus , levez-vous dormeuses , ne baillez plus , ne vous frottez plus les yeux , prenez vos accoustremens , & vous les vestez sans plus attendre ; car il est tantost temps d'aller en la sale , où les autres Dames vous attendent. Voylà comment il se railloit d'elles en les entretenant de tels propos. Les pauvres desolées craignant que leur cas n'eust quelque piteuse issue , & pleuroient en se desespérant de leur salut ; & ainsi troublées & desconfortées se leverent , attendans plus la mort qu'autre chose. Et se tournans vers l'escolier , luy dirent : Seigneur Philene , vous estes fort bien vengé de nous , il ne reste plus , sinon que vous preniez vostre tranchante espée , & que vous nous ostiez la vie , laquelle nous est plus ennuyeuse que plaisante. Et si vous ne nous voulez faire ceste grace , laissez-nous aller pour le moins en nos maisons sans estre cogneuës , afin que nostre honneur soit sauve. Alors Philene estimant avoir assez bien joié son personnage , leur bailla leurs accoustremens , & si-tost qu'elles furent vëstües les envoya hors du logis par un petit huis secret , sans estre cogneuës de personne quelconque , & s'en retournerent en leurs maisons. Si-tost qu'elles eurent despoüillé leurs beaux accoustremens ,

elles les mirent fort bien en leurs coffres, & se mirent finement à travailler sans s'aller coucher. Le souper finy, les maris remercièrent l'escolier du bon recueil qu'il leur avoit fait, aussi du passe-temps qu'ils avoient eu en voyant les beaux corps qui en beauté passaient le Soleil : & ayans prins congé de luy, se partirent & se retirèrent chacun à son logis. Estans de retour à leurs maisons, ils trouverent leurs femmes qui cousoient près du feu en leurs chambres : & pour autant que les habits, & les anneaux & bagues qu'ils avoient veu en la chambre de l'escolier, leur donnoient quelque soupçon, chacun d'eux demanda à sa femme où elle avoit esté ce soir là, & où estoit leur accoustrement. Elles assurées en leur fait, respondirent fort bien qu'elles ne s'estoient point parties du logis de tout le soir : & ayans prins les clefs des coffres, leurs monstre-
rent leurs habits, anneaux & autres choses que leurs maris leur avoient fait faire. Ce que voyans les maris, & ne sçachans que dire, osterent tout le soupçon qu'ils pouvoient avoir conçu contre elles, en leur racontant de point en point tout ce qui leur estoit advenu en icelle nuit. Les femmes entendans ces propos firent semblant de n'en sçavoir aucune chose. Et après avoir ris quelque peu ensemble, se despoillèrent & s'en allerent coucher. Bien-tost après Philene rencontra

souventesfois par les ruës les Damoiselles, & leur dit : Qui est celle d'entre vous qui eut la plus belle crainte , ou qui fut la plus maltraittée ? mais elles baïssoient la teste , & passoient outre sans dire mot. En ceste sorte l'escolier se vengea le mieux qu'il peut des trouffes qu'on luy avoit donné , sans coups ruer.

La nouvelle de Moulin racontée , la Dame estima & toutes les Damoiselles , que la vengeance faite par l'escolier contre les trois Dames , fut non moins desplaisante que deshonneſte ; mais quand elles vindrent à considérer l'aspre punition que souffrit le pauvre escolier entre les espines , & le grand danger où il avoit esté en tombant dedans le magasin , & le grand froid qu'il endura , en se trouvant au milieu de la ruë tout en chemise , arrestèrent que la vengeance estoit très-juste. Mais puis que Fleurdiane s'estoit deschargée de raconter sa Fable , Madame luy enchargea de dire à tout le moins son Enigme , qui fut correspondant à la matiere de l'escolier. Icelle pour obeyr au commandement de Madame , dit :

Combien que l'Enigme que je vous raconteray , ne soit pas de grieve & ennuyeuse vengeance , comme a esté la Fable racontée par l'ingenieux Seigneur Anthoine , si est-ce qu'elle s'adresse à tous jeunes gens studieux : & sans plus retarder & attendre autre responce , proposa

ainſi ſon Enigme, ſe tournant vers la noble aſſiſtance :

*Si par un viſ, deux morts, un viſ on fait
Duquel un mort, depuis a prins la vie,
Lequel eſteint fut après tout refait,
Tant qu'en vivant, veux tu que te le die ?
Deux ont eſté qui ſe ſont ſatisfaits,
Et chacun d'eux a prins ſa fantaſie :
Le premier viſ, par ces viſ & ces morts,
A puis parlé avec deux autres morts.*

Le ſubtil Enigme de Fleurdiane fut interprété en diverſes manieres, & n'y eut aucun qui touchaſt jamais au but. Or la compagnie voyant que Fleurdiane branloit la teſte, voyla le Bembe qui va dire en ſe ſouſſiant : Mademoiſelle Fleurdiane, il me ſemble ſimpleſſe grande de perdre le temps en cecy, dites ce qu'il vous plaiſt; car nous nous contenterons de voſtre dire. Puis qu'il plaiſt à ceſte notable compagnie, reſpondit Fleurdiane, que j'interprete mon dire, je le feray très-volontiers; non pas que je ſois ſuffiſante à ce faire; mais pour ſatisfaire à tous vous autres, auſquels je ſuis tenuë pour beaucoup de raiſons.

Mon Enigme, Meſdames, ne ſignifie autre choſe, ſinon que l'eſcolier qui ſe leve de grand matin pour eſtudier, lequel eſtant viſ, rend vive l'emorce avec deux morts; c'eſt à ſçavoir, avec l'a-cier & la pierre : duquel viſ, c'eſt à ſça-

voir l'emorce vivifiée, un mort après qui est la lumière, en reçoit la vie. Après le premier vif, qui est l'escolier par la vertu des deux vifs & morts susdits, se met à deviser avec les morts, qui sont les livres composez long-temps a, par les gens sçavans qui sont morts. L'exposition du très-subtil Enigme raconté d'un grand esprit, par la discrète Fleurdiane, pleut grandement à tous. Mais pour autant que la minuiet s'approchoit, Madame ordonna que Alienor commençast sa Fable, ce qu'elle fit d'une contenance joyeuse & assurée, en disant ainsi :



FABLE III.

Charles de Rimini estant amoureux de Theodosie , sans estre aymé d'elle , à cause qu'elle avoit promis sa virginité à Dieu ; & Charles cuidant l'embrasser par force , en lieu d'elle il embrassa des pots , des chauderons , broches & autres utensilles de cuisine : & estant ainsi barboüillé de noir , fut fort bien battu par ses serviteurs.



ESTE Fable ingenieusement racontée par le Moulin, mes très-cheres Dames, m'a distrait de raconter celle que j'avois déterminé de dire, & vous en veux raconter une autre qui ne donnera pas moins de plaisir aux Dames que la sienne a fait aux hommes. Et d'autant plus que la sienne a esté longue & impertinente, tant plus la mienne sera briefve & honnelle.

Je vous dis donc, mes très-cheres Dames, que Charles de Rimini (comme je

penſe que vous ſçavez) fut homme contentieux , meſpriſant Dieu , blaſphemateur des ſaincts , meurtrier , beſtial , & addonné à toutes eſpeces de luxure débordée. Brief, ſa meſchanceté fut ſi grande , & tels eſtoient ſes vices , qu'il n'avoit pas ſon pareil. Or eſtant jeune , diſpos & mettable , fut grandement amoureux d'une jeune fille d'une pauvre femme veuve , laquelle nonobſtant qu'elle fuſt en neceſſité avec ſa fille , ſi eſtoit - elle de telle condition , qu'elle ſe ſeroit laiſſée mourir pluſtoſt de faim , que de conſentir que ſa fille fiſt mal. Or la jeune fille qui s'appelloit Theodoſie , outre ſa beauté & bonne grace , eſtoit ſi honneſte , & ſi bien douée de bonnes mœurs & de penſées aagées , ayant ſur tout en recommandation le ſervice divin , qu'elle deſpriſoit en ſon cœur toutes choſe temporelles. Charles eſtant de ſon coſté embrasé d'un amour laſcif , la ſollicitoit de jour en jour ; le jour qu'il ne la pouvoit voir , il ſe ſentoit mourir. Souventesfois il eſſaya par douces paroles , dons & embaſſades , de la reduire à ſon plaſir ; mais tout cela eſtoit en vain , parce qu'elle , comme fille prudente & ſage , refuſoit tout , priant Dieu continuellement de la diſtraire de telles deſhonneſtes penſées. Ne pouvant plus ce jeune homme faire reſiſtance à l'ardant amour ou beſtiale fureur , eſtant fort deſplaſant d'eſtre refusé de celle qu'il

aymoit plus que sa vie propre, delibera, quoy qu'il en advint, de la ravir, & contenter son desordonné appetit. Toutes-fois il craignoit de faire quelque tumulte, de peur que le peuple qui ne l'aymoit gueres ne le tuaist. Finalement estant vaincu de son vouloir effrené, & devenu comme un chien enragé, conclud & arresta de la ravir avec deux serviteurs hardis qu'il menoit avec soy : tellement qu'un jour sur l'obscur du soir il print ses armes, & s'en alla avec ses deux rustres au logis de la jeune fille, & trouva l'huy ouvert; mais devant que d'entrer, il commanda à ses serviteurs qu'ils fissent bon guet, que & sur peine de la vie ils ne laissassent entrer homme vivant, n'y faillir du logis jusques à tant qu'il fust de retour vers eux. Les serviteurs qui ne demandoient autre chose que de complaire à leur maistre, respondirent qu'ils feroient tout ce qu'il leur seroit enchargé. Ayant Theodosie pressenty la venue de Charles (je ne sçay pas par quel moyen) s'en alla enclorre incontinent toute seule en une pauvre cuisine. Estant Charles monté par les degrez de ce petit logis trouva la mere, que sans aucun soupçon d'estre ainsi assaillie, s'estoit mise à filer, & luy demanda incontinent où estoit sa fille de luy tant désirée. Si-tost que la bonne femme eut apperceu ce jeune rustre, plustost armé à mal faire qu'à bien faire, ne sçeut

qu'elle devint , estant palle par visage comme un personne morte , & fut quasi sur le poinct de vouloir crier ; mais considerant qu'elle ne feroit rien pour cela , delibera de se taire & mettre son honneur entre les mains de Dieu , en qui elle se fioit grandement. Et ayans prins un peu de hardiesse , tourna le visage contre Charles , & luy dit : Charles , je ne sçay de quel courage & de quelle arrogance tu es venu icy contaminer l'esprit de celle qui desire vivre honnestement. Si tu es venu à bonne intention , Dieu , qui remunerer tout , te vueille donner tout juste & honneste contentement : autrement ja à Dieu ne plaise , tu ferois un grand mal de vouloir poursuivre en grand vitupere ce que tu n'auras jamais. Oste donc ce vouloir desordonné que tu as , & ne cherche point d'oster à ma fille ce qui n'est pas en ta puilliance de luy rendre ; c'est à sçavoir , l'honneur de son corps. Et tant plus que tu és amoureux d'elle , d'autant plus elle te porte haine , estant du tout addonnée à la Virginité. Charles oyant les piteuses paroles de la bonne femme , se troubla grandement , toutesfois ne laissa pas de poursuivre sa malheureuse deliberation , & comme fol & enragé , se mit à chercher par tous les coings du logis , & ne la trouvant , s'en alla tout droit vers la petite cuyfine , & la trouvant close , pensa (comme il estoit
yray)

vray) qu'elle fust dedans , & regardant par une fente de l'huys , apperceut Theodosie qui estoit en oraison , & avec douces paroles la commença à prier qu'elle luy ouvrift l'huys , en luy disant tels propos : Theodosie ma mie , & lumiere de mes yeux , sçaches que je ne suis point venu icy pour violer ton honneur , que j'ayme plus que moy-mesme , & le reputé pour mien , mais pour t'avoir en mariage ; pourveu qu'il te soit agreable , & à ta mere pareillement. Et de ma part je voudrois moy-mesme faire la justice de celuy qui te voudroit oster ton honneur. Theodosie , qui attentivement escoutoit les paroles de Charles , luy respondit sur le champ tels propos : Charles , deporté-toy de ton méchant vouloir , parce que tu ne m'espouseras jamais , à cause que j'ay offert & dédié ma virginité à celuy qui voit & gouverne tout. Et combien que contre mon gré tu vinsses à souiller mon corps par force , si ne pourrois tu jamais contaminer mon esprit , que j'ay donné à mon Createur dès ma naissance. Dieu t'a donné le liberal arbitre , afin que tu cogneusses le bien & le mal , & que tu fisses ce qui te seroit plus agreable. Fay donc bien , & tu seras appelé vertueux en laissant le contraire , qui est nommé vitieux. Charles voyant que ses flatteries ne luy servoient de rien , & qu'elle le refusoit tout à plat , ne pouvant plus faire resistance à l'ardeur qui luy brusloit le

cœur, comme jeune homme plus furieux que jamais, laissant toutes paroles arriere, commença à user de force : tellement qu'il ouvrit l'huy qui n'estoit pas des plus forts & seurs. Estant Charles entré en la petite cuyfine, & voyant la jeune pucelle pleine de grace & de beauté non pareille, fut embrasé plus furieusement de son amour, & pensa alors de accomplir son desordonné appetit, & se jetta sur elle tout ainsi qu'un levrier affamé sur un pauvre lievre. Mais la pauvre Theodosie, ayant ses blonds cheveux espandus sur les espauls, estant tenue estroittement par le col, devint passe & si foible, qu'elle ne pouvoit plus quasi remuer : tellement qu'elle dressa son esprit au ciel, en demandant secours à Dieu. A peine estoit finie la devote oraison, que Theodosie disparut, & Dieu esbloüit si fort la lumiere de l'entendement de Charles, qu'il ne cognoissoit plus rien : car en lieu de toucher la pucelle, & l'embrasser & baiser, il n'empongnoit & baisoit autre chose que pots, broches, & chauderons, & autres utensilles qui estoient en la cuyfine. Après que Charles eut contenté son desordonné appetit, s'en alla aussi embrasser les chaudieres, tout ainsi que les membres de Theodosie. En ce faisant il se noircit si bien le visage & les mains, qu'il ne sembloit pas Charles, mais plustost le Diable. Cela fait, pensans avoir bien contenté son vouloir, &

qu'il estoit temps de se retirer, se devala ainsi teint par les degrez. Mais les deux serviteurs qui faisoient le guet à la porte, afin que personne ne se partist ou entraist, le voyans ainsi contrefait, & d'un visage si horrible, qu'il ressembloit plus à une beste qu'à une creature humaine, estimans que ce fust le diable, ou quelque fantosme, se voulurent mettre à fuir. Mais ayant prins un peu de courage contre luy, en le voyant si laid & sale par le visage, commencerent à le charger de coups de baston & de poing, qui sembloient quasi de fer, tellement qu'ils luy rompirent le visage & les espauls, & ne luy laisserent poil sur la teste qui ne fust arraché.

Non contens de ce, le jetterent en terre, luy deschirans ses vestemens, & en le foulant si bien de coups de pied, qu'il ne peut jamais ouvrir la bouche, & entendre la cause pourquoy ils le battoient si asprement.

Toutesfois, il fit tant à la fin qu'il eschappa de leurs mains, & s'enfuit, pensant tousjours les avoir à ses talons. Estant donc Charles si bien testonné sans peigne, ayant les yeux tous enflez & meurdris, s'en courut vers la place, en criant & se plaignant de ses serviteurs qui l'avoient si bien accoustré. Le guet de la place oyant les plaintes de Charles, s'en alla au devant de luy, & en le voyant si laid & defiguré, pensa que ce fust quel-

que fol, & n'estant recogneu de personne pour Charles, chacun se commença à moquer de luy, & crier, sus, sus, frappe, frappe, c'est un fol.

Puis aucuns le pouffoient, les autres luy crachoient au visage, encore y en avoit-il qui luy jettoient de la poussiere aux yeux, & le tindrent ainsi jusques à ce que les nouvelles en vindrent aux oreilles du Prevost, lequel (regardant par la fenestre qui respondoit sur la place) demanda la cause d'un si grand tumulte. L'un des sergens du guet respondit, que c'estoit un fol qui avoit esmeu tout cela. Ce que entendant le Prevost, commanda qu'on le menast pardevant luy pieds & poings liez; ce qui fut fait. Or Charles qui auparavant estoit redouté d'un chacun, se voyant ainsi lié, moqué, & si rudement traicté, ne pensant estre mescogneu, s'esmerveilla grandement, & tomba en si grande rage, qu'il rompit quasi le cordeau qui le tenoit lié.

Estant ainsi Charles conduit devant le Prevost, fut incontinent recogneu, & ne peut imaginer autre chose, sinon que ceste ordure procedoit pour raison de Theodosie, laquelle il aymoient grandement, comme il avoit peu entendre : tellement qu'il commença à le caresser & appaiser, luy promettant de punir ceux qui estoient cause de tel outrage. Charles qui ne pensoit pas estre noir comme un Ethiopien,

estoit tout estonné ; mais cognoissant à la fin d'estre ainsi souillé , qu'il ne sembloit pas estre un homme , mais plustost une beste brute , pensa en luy-mesme ce que le Prevost avoit desja imaginé , & montant en colere , fit serment de se venger d'un tel outrage , si le Prevost ne luy en faisoit raison , lequel le matin ensuivant envoya querir Theodosie , estimant qu'elle avoit fait cela par art Magique. Mais elle qui fut sage & discrete , considerant le grand danger qui en pouvoit advenir , s'enfuit en un Monastere de saintes Religieuses , où elle demeura secrettement , servant Dieu devotement tout le temps de sa vie. Depuis Charles fut envoyé à un siege de quelque ville , où voulant faire plus grandes bravades que son pouvoir ne pourroit , fut prins comme le rat à la trappe : car en voulant escheller les murailles de la ville pour planter l'enseigne du Pape sur les creneaux , fut frappé d'une grosse pierre , qui le froissa d'une telle sorte , qu'à grand peine eut-il loysir de dire , *Mea culpa*. Voilà donc comment le malheureux Charles fit miserablement sa vie , comme il avoit fort bien merité , sans recueillir le fruit de son amour.

Desja la belle Alienor estoit arrivée à la conclusion de sa Fable assez briefvement racontée , quand les honnestes Dames commencerent à rire de la sottise de Charles : lequel cuidant embrasser sa bien ay-

142 L A II. N U I C T ;
mée Theodosie , baiſoit & embraiſſoit les
chauderonſ , poiles & broches ; encore
non moins ſe moquerent des coups & af-
ſaux que luy baillerent ſes ſerviteurs meſ-
mes , & les gens du guet. Mais après avoir
quelque peu ry , Alienor ſans autre com-
mandement commença ainſi ſon Enigme :

*Choe je ſuis aſſez plaiſante & belle ,
Et de blancheur ne ſuis pas moins ornée :
Ores la mere & ſa fille avec elle ,
Souvent me bat , bien que de moy parée :
Iſſüe ſuis de celle qu'on appelle
Des meres mere , & qui n'eſt point laiſſée ,
Chacun ſe ſert de moy puis envieillie ,
L'homme me broye & rudement manie.*

Ce docte & ſubtil Enigme fut grande-
ment loüé d'un chacun , mais parce que
nul ſe trouva qui peuſt entendre le ſujet ,
elle fut priée d'en donner le reſolution.
Alors en ſouſſriant , elle dit : Il n'eſt pas
convenable qu'une femme de ſi peu d'eſ-
prit comme moy , enſeigne à vous autres ,
qui eſtes beaucoup plus experimentez que
moy. Mais puis que voſtre deſir eſt tel ,
& que voſtre parole m'eſt un ſpecial com-
mandement , je vous en diray mon advis.
Mon Enigme ne ſignifie autre choſe , ſi-
non la belle toile & blanche , qui par les
ciſeaux & eſguilles des femmes eſt tour-
mentée & pilée. Et nonobſtant qu'elle
couvre les membres d'un chacun , & qu'elle

viennne de la mere ancienne, qui est la terre, si ne laisse-t-on pas quand elle est devenuë vieille de l'envoyer au foulon pour en faire du papier, après estre bien decoupée. L'interpretation de cest Enigme pleut grandement à tous, dont elle en reçoit grandes louanges. Cependant Madame ayant esté advertie que Loyse qui venoit en son rang pour deviser, avoit mal à la teste, se tourna vers le Trevisan, & luy dit : Or sus, Seigneur Benoist, j'avoit que nous autres Dames devions raconter, si est-ce que je vous voudrois bien supplier de faire l'office ce soir pour Loyse, à cause qu'elle se trouve assez mal disposée de la teste. En ce faisant je vous donne ample matiere & champ spacieux de dire tout ce qu'il vous semblera plus agreable. Alors le Seigneur Benoist respondit : Madame, combien que je ne sois pas trop bien versé en telles matieres; toutesfois puis que vostre vouloir m'est un commandement, je tascheray à vous contenter, en vous priant tous vous autres, que vous m'ayez pour excusé, si vous ne demeurez satisfaits comme est vostre desir & mon vouloir. Ayant donc fait une grande reverence, commença ainsi la Fable :

FABLE IV.

Le Diable entendant que les maris se plaignoient de leurs femmes, espousa Silvie, & print pour compere Gasparin Boucy; & ne pouvant plus durer avec sa femme, entra au corps du Duc de Melfe, puis son compere Gasparin l'en jetta dehors.



A legereté & peu d'entendement qui se trouve pour le jourd'huy en la pluspart des femmes (je parle de celles, qui sans aucune consideration se laissent aveugler les yeux de l'entendement, taschans d'accomplir leurs desirs effrenez) me donne occasion de raconter à la noble assistance une Fable, non point par cy devant entenduë. Et jaçoit que vous la trouviez assez briefve & mal façonnée, si est-ce qu'elle donnera à vous autres femmes quelque instruction, comme j'espere, n'estre point si fascheuses d'oresnavant à vos maris, comme vous avez esté jusques à present. Et si je vous semble un peu trop piquant, ne m'en accusez point, car

car je suis humble serviteur de toutes vous autres ; mais adressez-vous à Madame , qui m'a lasché la bride de pouvoir raconter (comme vous avez aussi entendu) ce qui me sera plus agreable. Il y a donc assez long-temps , gracieuses Dames , que le Diable ayant esté abreuvé des grosses noises , & questions que faisoient journellement des maris contre leurs femmes , delibera de se marier. Et pour ce faire , il print la forme d'un beau jeune fils , & de bonne grace , garny de deniers & possessions , & se fit nommer Pancrace Stornel. Estant desja semé le bruit d'iceluy par toute la ville , beaucoup de courratiers le vindrent trouver , luy presentant en mariage de fort belles femmes , avec gros deniers , & entre autres luy fut présentée une fort belle Damoiselle , nommée Silvie Balastre , laquelle estant en la grace du Diable , la print pour sa bien aymée espouse. On ne pourroit estimer les magnifiques noces , avec les triomphes & parens , tant d'un costé que d'autre , qui furent invitez à ce festin. Le jour des espousailles venu , il print pour son compere de l'anneau , Gasparin Boncy ; & les pompes des nopces finies , il mena sa chere espouse en sa maison. Peu de jours après le Diable luy dit : Escoutez , ma femme Silvie , que j'aime plus que moy-mesmes , vous pouvez assez facilement cognoistre de quelle affection je vous ayme, comme vous

en avez peu faire l'experience en beaucoup de manieres. Puis qu'ainsi est donc, vous me ferez une grace, qui sera facile à vous, & à moy très-aggreable. La grace que je veux de vous est, que vous me demandiez à present ce que vous pouvez imaginer, soit des vestemens, comme perles, bagues, & autres choses qui appartiennent aux femmes, car j'ay delibere (pour l'amour que je vous porte) de vous contenter de tout ce que vous me demanderez, voire valust-il un Royaume sous ceste condition, que pour l'advenir vous ne me molesterez plus pour telle occasion, mais que tout cela vous suffise pour tout le temps de vostre vie, & donnez-vous bien garde de m'en demander plus; car vous n'aurez jamais autre chose de moy. Silvie ayant demandé temps de respondre à cela, s'en alla trouver sa mere, qui s'appelloit Anastasie; laquelle estant desja assez aagée, estoit pareillement bien fine & rusée, & luy raconta tout ce que son mary luy avoit dit, en luy demandant conseil sur cela. La mere qui sçavoit fort bien joier son personnage en telles matieres, ayant entendu sa demande, print la plume & du papier, & commença à escrire tout ce qu'une langue n'eust peu raconter en deux jours; puis dit à sa fille: Tien, retourne-t'en à ta maison, & dy à ton mary qu'il te fournisse de tout ce qui est escrit en ce papier: en ce faisant tu seras

contente de luy. Silvie s'estant partie d'avec la mere , s'en alla vers son logis , où elle se presenta devant son mary , & luy requit tout ce qui estoit contenu en son memoire. Pancrace ayant leu , & diligemment consideré le contenu de sa demande , luy dit tels propos : Sçavez-vous bien ce qu'il y a , m'amie Silvie , regardez bien qu'il n'y defaille rien de ce que me demandez , afin que vous ne vous plaigniez pas après de moy : car je vous advertis que si vous me demandez après aucune chose , elle vous sera refusée , & ne vous serviront de rien vos prieres , ny larmes & souspirs. Pensez bien donc en vostre cas & regardez bien qu'il ne vous faille rien. Silvie ne sçachant autre chose que demander , dit qu'elle se contentoit de ce qui estoit escrit au papier , & qu'elle ne luy demanderoit plus rien. Tant y a que le Diable fit faire de beaux vestemens garnis de grosses perles , bagues & autres richesses les plus belles & les plus triomphantes qui furent oncques veuës. Outre plus il luy bailla les belles coiffes semées de perles , les anneaux , ceintures & autres choses , & en plus grand nombre qu'il n'y avoit au memoire , ce qui seroit impossible de raconter. Or Silvie se voyant ainsi bien vestuë , & tellement accoustrée , qu'il n'y avoit point d'autre femmes en toute la cité qui luy ressemblassent en cela , s'en tenoit toute glorieuse ; & ne se pouvoit

imaginer de demander aucune chose au mary, veu qu'elle se sentoît garnie de tout ce qui luy estoit nécessaire. Advint qu'il se prepara en ce mesme temps un magnifique & triomphant festin, où furent invitées toutes les plus fameuses & honorables Dames qui se trouvaient, & entre autres Madame Silvie ne fut pas oubliée, estant des plus belles, nobles, & plus apparentes de toute la cité. Alors les Dames changerent toutes les façons d'habillemens en d'autres, non point encore accoustumez; tellement que leurs accoustremens estoient si differens des premiers, qu'on ne les cognoissoit aucunement. Celle n'estoit pas fille de bonne mere (comme on fait encore pour le jourd'huy) qui ne trouvoit quelque nouvelle façon pour mieux honorer le festin. Chacune femme falloit de tout son pouvoir de surmonter les autres en nouvelles pompes & magnificences. Cependant les nouvelles vindrent aux oreilles de Madame Silvie, que les bourgeois de la ville trouvoient nouvelles façons d'habits pour honorer la feste triomphante: tellement qu'elle se vint à imaginer que les vestemens qu'elle avoit fait faire n'estoient plus bons ny convenables pour le temps; parce qu'ils estoient faits à l'antique, & lors s'usoient accoustremens d'autre maniere. Au moyen de quoy elle tomba en si grande melancolie & despit, qu'elle ne

pouvoit manger ny dormir, & n'entendoit-on autre chose par la maison que souspirs & plaintes qui se partoient du plus profond de son cœur. Le Diable qui sçavoit tout ce que la femme avoit au cœur, fit semblant de n'en sçavoir rien, & s'approchant d'elle, luy dit : Qu'avez-vous Silvie ? que veut dire que vous estes ainsi faschée ? Ne voulez-vous pas aller à ce festin ? Silvie voyant l'occasion de répondre print un peu de hardiesse, & luy dit : Comment voulez-vous, mon mary, que j'y voise ? mes habits sont tous faits à l'antique, & ne sont pas comme ceux que les autres Dames portent. Voulez-vous qu'on se moque de moy ? vraiment je ne le croy pas. Alors le Diable luy répondit : Ne vous ay-je pas fait faire tout ce qui vous estoit nécessaire pour tout le temps de vostre vie ? comment me demandez-vous quelque chose maintenant ? Mais elle répondit de n'avoir aucuns vestemens de telle façon, se plaignant grandement de son malheur ; tellement que le Diable luy dit : Or sus, que ce soit pour jamais, demandez-moy ce que vous voulez, & il vous sera octroyé pour ceste fois, & si vous me demandez aucune chose pour l'advenir soyez assurée qu'il vous adviendra chose dont vous serez mal contente. Silvie toute joyeuse, luy demanda tant de choses qu'il seroit impossible à raconter. Le Diable sans gueres retarder, contenta

pour lors sa femme en ce que elle luy demanda. Bien-toft après les Dames commencerent à trouver nouvelles façons d'habits que Silvie n'avoit point ; & pour autant qu'elle ne pouvoit comparoistre entre les autres Dames , qui avoient façons sur façons , nonobstant qu'elle fust richement accoustrée , & garnie de toutes sortes de bagues , s'en faschoit grandement & n'osoit le manifester à son mary , à cause qu'il l'avoit desja contentée par deux fois , de ce qui se pouvoit souhaitter en ce monde. A la fin le Diable la voyant ainsi triste , & sçachant bien la cause , toutesfois feignant de n'en sçavoir rien , luy dit : Qu'y a-t-il , m'amie Silvie , qu'avez-vous à estre triste ? Alors elle print un peu de hardiesse , & luy dit : N'ay-je pas occasion d'estre fâchée , veu que je suis sans habits à la nouvelle façon ? tellement que je n'oserois comparoistre entre les autres femmes , que je ne sois moquée & monstrée au doigt , ce qui retourne à grand reproche de vous & de moy ; joint que la subjection là où je suis estant avec vous , mesmement la fidelité que j'ay envers vous , ne merite point une telle honte & scandale. Alors le Diable esmeu d'un despit qu'il avoit , luy dit : dequoy avez-vous eu faute estant avec moy ? Ne vous ay-je pas desja contentée par deux fois de ce que m'avez demandé ? Dequoy vous plaignez-vous donc ? Quant à moy , je

ne ſçay plus que vous faire. Je vous veux encore contenter de voſtre deſordonné deſir. Toutefois je m'en iray ſi loin, que vous n'aurez jamais nouvelles de moy. Et de fait, après luy avoir donné de toutes les ſortes d'habits de ſoye, ſelon le temps, & l'ayant du tout contentée, ſe partit ſans prendre congé d'elle, & s'en alla à Melphe, où il entra au corps du Duc, le tourmentant aſprement. Le pauvre Duc ſe trouvant ainſi maltraité en eſtoit merveilleuſement faſché, & n'y avoit en Melphe homme de ſi bonne & ſi ſaincte vie, qui luy peut chaffer du corps. Or advint que Gaſparin Boncy, compere de Monſieur le Diable, fut banny de la cité pour quelques excez par luy commis: tellement qu'aſin d'éviter qu'il ne fuſt prins & puni par juſtice, il ſe partit de là & s'en alla à Melphe, pour autant qu'il ne ſçavoit aucun meſtier, ſinon joüer & tromper un chacun. Incontinent le bruit fut ſemé par la ville de Melphe, que c'eſtoit un homme expert, & mettable à toute entrepriſe honorable, encore qu'il fuſt du tout inutile. Or ainſi que Gaſparin joüoit un jour avec quelques gentilshommes de Melphe, & les avoit attrapez avec ſes pipe-ries, ils ſe faſcherent grandement, & ſi la crainte de la juſtice ne les euſt divertis, ils l'euffent facilement tué. Toutesfois ne pouvant plus l'un d'iceux endurer tel outrage, dit en luy-meſme : Je t'en puni-

ray d'une telle sorte qu'il te souviendra de moy tant que tu vivras ; & sans plus retarder laissa ses compagnons & s'en alla trouver le Duc , auquel ayant fait une grande reverence , dit ainsi : Très-excellent Duc & Seigneur , il y a en ceste ville un nommé Gasparin , qui se vante par tout de sçavoir chasser du corps des hommes les esprits , de quelque qualité qu'ils soient , ou terrestres , ou aërez : au moyen dequoy , il me semble qu'il seroit bon que vous en füssiez l'experience , afin que fussiez delivré d'un tel tourment. Le Duc ayant entendu ces propos envoya incontinent querir Gasparin lequel entendant le vouloir du Duc , s'en alla par devers luy. Si-tost qu'il l'eut regardé en la face , il luy dit : Seigneur Gasparin , j'entens que vous faictes profession , & vous vantez de sçavoir chasser les esprits. Quant à moy (comme vous voyez) j'en ay un au corps , & si vous m'en delivrez , je vous promets, Seigneur Gasparin , de vous faire un tel present , que vous serez heureux tout le temps de vostre vie. Gasparin qui n'avoit jamais ouy parler de telles choses , fut tout estonné , niant fort & ferme de s'en estre jamais vanté. Le gentilhomme qui n'estoit gueres loing de là , s'approcha & luy dit : Ne vous souvient-il pas , maître , que vous me dites telles paroles & telles ? Et Gasparin asseuroit qu'il n'en estoit rien. Estant ainsi tous deux en ce

debat, l'un niant & l'autre affirmant, le Duc leur dit : Or sus, faictes un peu de silence : quant à moy, maistre Gasparin, je vous donne trois jours de terme pour penser à vostre cas, & si vous me delivrez de telle misere, je vous promets de vous donner le plus beau chasteau qui soit en mon pays, & pourrez disposer de moy à vostre vouloir, comme de vostre personne propre : autrement soyez assuré que d'aujourd'huy en huit jours, vous serez pendu & estranglé entre les deux colonnes de mon Palais. Gasparin ayant entendu le vouloir du Duc, fut merveilleusement fasché, & s'estant party de sa compagnie, commença à penser jour & nuit comment il pourroit chasser cest esprit. Le jour de l'assignation venu, Gasparin retourne vers le Duc, & l'ayant fait estendre sur un tapis en terre, commença à conjurer le mauvais esprit qu'il eust à sortir de ce corps, & qu'il ne le tourmentast plus : Le Diable qui se reposoit alors en ce corps à son plaisir, ne luy respondit autre chose ; mais enfla si fort la gorge au Duc, qu'il se sentit quasi mourir. Gasparin reiterant encore sa conjuration, le Diable va répondre : Mon compere, vous avez si bon temps, & je suis bien à mon aise, & vous voulez que je me parte d'icy ? vous me tourmentez en vain. Et ainsi se moquoit du compere. Estant venu Gasparin pour la troisième fois à le conjurer,

en luy demandant beaucoup de choses, & l'appellant tousjours compere, ne pouvant imaginer qui c'estoit; à la fin il le contraignit de dire quel il estoit. Alors le Diable va répondre: Puisque je suis contraint de dire la verité, & vous manifester qui je suis; sçachez que je suis Pancrace Stornel, mary de Silvie Balastre. Ne le sçavez-vous pas bien? Pensez-vous que je ne vous cognoisse? N'estes-vous pas Gasparin Boncy, mon très-cher compere? Ne sçavez-vous pas bien, combien de triomphes nous avons fait ensemble? Helas! mon compere, répondit Gasparin, que faictes-vous icy à tourmenter ce pauvre homme? Je ne le vous veux pas dire (répondit le Diable) allez-vous-en, je vous prie, & ne me fâchez plus, car je ne me trouveray jamais mieux que je fais à present. Alors Gasparin luy fit tant de conjurations, qu'il fut contrainct de raconter par le menu la cause pourquoy il s'estoit party d'avec sa femme, & entré au corps du Duc; tellement que Gasparin luy dit: Comment, mon compere, mon amy! ne me voulez-vous pas faire un plaisir? Quel plaisir? dit le Diable. Ostez-vous de ce corps icy, répondit Gasparin, & ne le tourmentez plus. Mon compere, dit le Diable, vous me semblez un grand fol de me demander telles choses; car je trouve un si grand plaisir icy dedans, que je ne sçauois imaginer

d'avantage. Alors Gasparin dit : Je vous prie par la foy de compere qui est entre nous deux , que me fassiez ce plaisir pour le present ; car si vous ne partez d'icy , je perdray la vie , en ce faisant vous serez cause de ma mort. Le Diable respondit : Il n'y a point pour le jourd'huy de plus meschante & abominable foy que celle d'un compere : & si vous en mourez , sera vostre domage , & non pas le mien. Je ne desire autre chose que de vous voir abismé au plus profond d'Enfer. Vous deviez estre un peu plus sage & tenir vostre langue entre les dents ; car un bon taire ne fut jamais escrit. Dictes-moy à tout le moins (respondit Gasparin) qui fut celuy qui vous mit en si grand travail ? Ayez patience , dit le Diable , car je ne puis , & si ne le vous veux pas dire. Ostez-vous seulement d'icy , & n'attendez point d'autre response de moy. Et ainsi tout despité , laissa le pauvre Duc plus mort que vif. Mais après qu'il fut un peu revenu , Gasparin luy dit : Seigneur Duc , prenez courage , car vous serez bien-tost delivré. Je ne veux autre chose de vous pour le present , sinon que demain au matin vous fassiez venir au Palais tous les musiciens , & joueurs d'instrumens , & que toutes les cloches de la ville sonnent , & qu'on tire toute l'artillerie des boulevards , en signe de joye & triomphe : & tant plus il y aura grand bruit , tant plus j'en seray con-

tent ; puis laissez faire à moy. Le matin ensuivant Gasparin s'en alla vers le Palais , & commença à conjurer l'esprit du Duc , & cependant qu'il le conjuroit , commença à ouyr trompettes , timbres , tabourins , bassins , cloches , artilleries , & tant de sortes d'instrumens de musique , lesquels sonnoient en un mesme temps , qu'il sembloit quasi que le monde deust abîsiner. Or ainsi que Gasparin poursuivoit sa conjuration , le Diable luy demanda que signifioit telle diversité d'instrumens , & si grand' confusion de sons , que jamais il n'avoit ouy. Ne le sçavez-vous pas bien ? respondit Gasparin. Non , dit le Diable. Est-il possible ? respondit Gasparin. Ouy parce qu'enveloppez en ces corps humains , nous ne pouvons sçavoir ny entendre tout , à cause que ceste matiere terrienne est trop grosse. Je le vous diray en peu de paroles , dit Gasparin , si vous m'escoutez sans molester ce pauvre Duc. Dites-le moy , je vous prie , dit le Diable , & je vous escouteray volontiers , vous promettant de ne luy donner point de fascherie. Alors Gasparin luy va dire : Sçachez , mon compere , mon amy , que le Duc voyant que vous ne le voulez pas laisser , & que ne cessez de le tourmenter ; ayant entendu que vous avez laissé vostre femme pour le grand tourment qu'elle vous donnoit , il l'a envoyée querir : tellement que toute la cité fait feste & triomphe pour

sa venue. Ce qu'entendant le Diable, luy va dire : O meſchant compere ! vous eſtes plus fin & plus ruié que moy : ne vous diſje pas hier qu'on ne trouva jamais compere qui fut loyal à l'autre ? Vous avez eſté l'inventeur, & celuy qui l'a fait venir : j'en ay ſi grande horreur, & ay en ſi grande haine le nom de ma femme, que j'ayme mieux demeurer au plus profond d'Enfer, que de la voir près de moy : au moyen dequoy je me veux partir d'icy, & m'en aller ſi loin, que vous n'aurez jamais nouvelles de moy. Et ayant dit cela avec une enſeigne de gorge, & tournant les yeux en la teſte, & faiſant autres ſignes eſpouventables, il ſe partit du corps du Duc : tellement qu'ayant laiſſé une grande puanteur ; le Duc fut du tout delivré de ceſt eſprit. Bien-toſt après le pauvre Duc revint en ſon premier eſtat, & recouvra ſes forces accouſtumées : & ne voulant pas eſtre ingrat, fit appeller Gaſparin, & le fit ſeigneur d'un fort beau chaſteau, en luy donnant grande quantité de deniers & ſerviteurs pour le ſervir : & en depit des envieux le bon Gaſparin veſquit longuement en felicité. Et Madame Silvie voyant ſes beaux veſtemens, bagues & anneaux eſtre convertis en cendre & fumée, mourut bien-toſt après miſerablement & comme deſeſpérée.

Ceſte Fable fut racontée par le Treviſan avec grandes merveilles, & fut gran-

158 L A II. N U I C T,
dement louée , mesmement par les hommes , avec ris excessifs. Vray est qu'elle despleut quelque peu aux Dames : tellement que Madame oyant les Damoiselles murmurer assez bas , & les continuels ris des hommes , commanda que chacun mit fin à ces propos , & que le Trevisan commençast son Enigme : lequel sans prendre autre excuse envers les Dames de ce qu'il les avoit si vivement piquées , commença ainsi son Enigme :

*Entre nous est un très-noble sujet ,
Parlant , tastant , allant , voyant , oyant ;
Sans avoir sens il est plein d'intellect :
Sans teste , mains , langue , ny pieds froyant ;
Logeant chez nous , entendant nostre object ,
Une fois naist , selon mon jugement ,
Et où il est , vit eternellement.*

L'obscur Enigme raconté par le Trevisan , donna bien à resver aux assistans , & chacun mettoit peine en vain de luy bail-
ler la vraye interpretation : tellement que le Trevisan voyant que leurs operations estoient bien esloignées de la verité , dit :
Messeigneurs , il ne me semble pas convenable de tenir longuement en suspend ceste honorable compagnie. Si vous trouvez bon que je vous en die mon opinion , je vous la diray volontiers , ou bien j'attendray la resolution de quelque gentil esprit. Tous d'une voix le prierent de

l'interpréter. Alors le Treviſan va dire que ſon Enigme ne ſignifioit autre choſe, ſi non l'ame immortelle, laquelle eſt l'eſprit, & n'a ne teſte, ni pieds, ni mains, & fait toute operation : & où elle eſt jugée, ſoit au ciel, ou à l'enfer, elle vit éternellement. Ceſte docte expoſition de l'obſcur Enigme pleut merveilleuſement à toute la notable compagnie. Et pour autant qu'il eſtoit deſja paſſé une grande partie de la nuit, & que les coqs commençoient à annoncer le jour enſuiuant, Madame fit ſigne à Vincende, qui eſtoit la dernière en ſon rang pour deviser en ceſte ſeconde nuit, qu'elle euſt à faire finir la nuitée, avec quelque plaiſante Fable. Mais elle qui eſtoit devenuë toute vermeille au viſage, par couleur naturelle qu'elle avoit, non point par une honte, mais pluſtoſt par le courroux & deſpit qu'elle avoit conceu de la Fable auparavant racontée, dit telles paroles au Treviſan : Seigneur Benoïſt, j'eſtimois que fuſſiez plus paifible, & que tinſiez plus le party des Dames que vous ne faites ; mais comme je puis comprendre par la Fable par vous recitée, vous leur eſtes fort contraire : ce qui me fait penſer que vous vous ſentez outragé de quelqu'une, qui eſtoit poſſible trop indiscrette en ſa demande. Toutefois encore ne devriez-vous pas ſi aſprement blaſmer les autres ; car combien que nous ſoyons forgées d'une

mesme matiere , si est-ce qu'on en voit tous les jours une plus gentille & de meilleur esprit que l'autre. Deportez-vous donc de plus les blasmer en telle maniere ; car si elles vous mettent une fois la dent dessus , vos sons & chants ne vous serviront de rien. Quant à moy , dit le Treviſan , je n'ay point fait cela pour faire tort à la moindre , ny pour me venger de ses paroles ; mais pour instruire les autres qui se marieront après moy , d'estre plus modestes vers leurs maris. Or bien , quoy qu'il en soit (dit Mademoiselle Vincende) je ne m'en soucie gueres , & moins ces autres Dames y pensent : mais afin qu'il ne semble point que par mon silence je vueille tenir le party des hommes , & estre contraire aux Dames , j'en veux raconter une qui vous donnera grande instruction. Et ayant fait la reverence , commença à dire ce qui s'ensuit :



F A B L E V.

*Simplice Rossi estant amoureux de
Giliole , femme de Guirot païsant ;
& estant trouvé par le mary ,
fut battu & frotté qu'il n'y man-
quoit rien ; puis s'en retourna en
son logis.*



N ne peut nier , courtoises Dames , que amour ne soit gentil par nature ; mais peu souvent il nous donne bonne yssue en nos entreprinſes , comme il advint à Simplicie Rossi , amoureux ; lequel eſperant jouïr de la perſonne de luy tant aymée , ſe partit de ſa compagnie , chargé de plus de horions qu'il ne pouvoit porter , ce qui vous ſera appertement notoire , ſi vous me donnez audience (ſuivant voſtre couſtume) à raconter la Fable qui ſ'enſuit.

Œſachez donc qu'au village de ſaincte Euphemie , aſſis au deſſous du champ S. Pierre , au territoire de la fameuſe cité de Padouë , habitoit (y a aſſez long-temps) Guirot Scanferle , homme aſſez riche & d'apparence pour un laboureur ; vray.

est qu'il estoit assez seditieux & partial, & avoit espousé une jeune fille, nommée Giliole, laquelle, pour une villageoise, estoit estimée fort belle. Or d'icelle devint excessivement amoureux un nommé Simplicite Rossi, bourgeois de Padouë. Et pour autant qu'il avoit son logis assez près de celuy de Guirot, s'en alloit souventesfois passer le temps aux champs avec sa femme, qui estoit gentille, belle & d'assez bonne grace, ne se souciant d'elle, jàçoit qu'elle eust beaucoup de bonnes conditions en soy, pour estre estimée : car il estoit si embrasé de l'amour de Giliole, qu'il n'en reposoit ny jour ny nuit. Ce neanmoins il tenoit son amour secret en son cœur, & ne l'osoit manifester, tant pour la crainte du mary, & pour la bonne vie & integrité de Giliole, que pour ne donner scandale à sa prudente femme. Or ce bon compagnon Simplicite avoit près de sa maison une fort belle fontaine, qui jettoit une source d'eau si claire & si savoureuse, que non seulement les vifs, mais aussi les morts (s'il faut ainsi dire) auroient désiré d'en boire : tellement que Giliole s'en alloit soir & matin, & selon le besoin, avec une seille de cuivre pour puiser de l'eau à ceste fontaine. Cependant le cauteleux amour, qui ne pardonne à personne, stimuloit Simplicite : toutesfois cognoissant sa bonne vie & le bon bruit qui estoit d'elle par tout le pays, n'en osoit

dire mot à personne : mais aucunesfois en se pourmenant tout seul, se nourrissoit de la voir, & consoloit son cœur le mieux qu'il pouvoit. De son costé elle n'en sçavoit rien, & ne s'en estoit jamais apperceuë ; car comme femme de bon bruit & de bonne vie, se mesloit seulement de son mari & de son mesnage. Un jour entre les autres, ainsi que Giliole s'en alloit à la fontaine pour puiser de l'eau, selon sa coustume, elle vint à rencontrer Simplicé, auquel elle vint à dire purement & simplement (comme eust fait une autre femme de bien) Bon-jour, Monsieur : & il luy respondit Tic, pensant bien l'entretenir avec telle parole, & l'apprivoiser quelque peu ; mais elle n'y pensant rien en mal, ne disoit autre chose, ains passoit son chemin, & s'en alloit à ses affaires. Ce gentil amoureux avoit desja par plusieurs fois donné telle response à Giliole, toutes fois & quantes qu'elle le saluoit, mais sans penser aucune malice en luy, elle s'en alloit la teste baissée. Après que ceste response eut assez longuement continué, Giliole delibera d'en advertir son mari. Et de fait, estant un jour avec luy en joyeux propos, elle luy dit : Mon mari, je vous veux dire une chose qui vous fera possible rire. Qu'y a-t-il ? dit Guirot. Vous devez entendre, dit-elle, que toutes-fois & quantes que je vais puiser de l'eau à la fontaine, je rencontre le si-

re Simplicie, & quand je luy donne le bon jour, il me respond, Tic. Et toy, dit Guirot, que luy as tu respondu sur cela ? Rien qui soit, dit-elle. S'il te dit plus Tic, dist Guirot, respond-luy Tac, & prend bien garde à ce qu'il te dira, sans luy respondre autre chose, mais passe ton chemin. Ce qui advint en la mesme sorte : car elle estant allée à la fontaine pour querir de l'eau à l'heure accoustumée, elle trouva Simplicie, & luy donna le bon-jour : & luy, selon sa coustume, luy respondit, Tic : à quoy elle repliqua (comme son mari l'avoit embouchée) Tac. Alors Simplicie se tenant tout glorieux, & pensant qu'elle se fust apperceuë de son amour, & de l'avoir desja gagnée, print un peu de hardiesse, & luy dit : Quand viendray-je ? La bonne Dame, selon que luy avoit enchargé son mary, ne respondit autre chose, mais s'en retourna au logis, où le mary luy demanda incontinent comment tout le cas se portoit : & elle luy dit avoir fait ce qu'il luy avoit enchargé, & que Simplicie luy avoit dit : Quand viendray-je ? & qu'elle ne luy avoit respondu autre chose. Guirot, qui estoit assez ruzé, nonobstant qu'il fust payfan, & entendoit l'intention du muguet, se troubla grandement, cognoissant que ces paroles signifioient quelque chose qui ne valoit rien ; tellement qu'il dit à sa femme : Si tu y retournes plus, & qu'il te die, Quand

viendray-je ? respond-luy , Ce soir : & puis laisse faire à moy. Le jour ensuivant , Giliole s'en alla (suivant sa coustume) à la fontaine , & trouva Simplicie qui l'attendoit d'une grande affection , & luy dit : Bon-jour , Monsieur , & Simplicie respondit , Tic , & elle dist Tac. Puis il repliqua : Quand viendray-je ? Ce soir , dit Giliole : Soit , dit-il. Et estant de retour au logis , elle dit à son mary : J'ay fait ce que vous m'aviez enchargé. Que t'a-t'il respondu , dit le mary : Soit , dit-elle. Or Guirot qui avoit l'estomach chargé d'autre chose que de souper , dit : Or sus Giliole , allons mesurer douze sacs de bled ; car je veux faire semblant d'aller au moulin , & si le galand vient , fay-luy caresses , & le reçoÿ honorablement : & fay que tu m'apprestes un sac vuyde contre ceux qui sont pleins de bled ; & quand tu entendras que j'arriveray , fay le entrer dedans ce sac vuide , & qu'il se cache , puis laisse faire à moy. Nous n'avons pas tant de sacs , dit-elle , que nous puissions parfaire le nombre que vous dites. Envoÿe , dit Guirot , la tante , nostre voisine , vers Simplicie , & fay qu'il t'en preste deux , & fay qu'elle die sur tout que j'en ay affaire ce soir pour aller au moulin. Ce qui fut fait en toute diligence. Le bon Simplicie qui avoit bien noté les paroles de la Giliole , & comment elle luy avoit envoyé demander à prester deux sacs , estimant

pour tout vray que le mari deust aller au moulin , se trouvoit le plus heureux & le plus content homme de ce monde , pensant qu'elle fust autant amoureuse de luy , comme il estoit d'elle : mais le pauvre malheureux ne se doutoit pas de la trouffe qui luy estoit preparée , parce qu'il y auroit procedé plus finement qu'il ne fit pas. Tant y a que le bon Simplicie qui avoit force bons chapons en sa cour , en fit tuer deux des meilleurs , & les envoya par un sien valet à Giliole , luy donnant charge de les faire cuire , & qu'il ne faudroit point de venir ce soir à l'assignation. La nuit venue , Simplicie se partit secrettement de son logis , & s'en alla au logis de Guirot , où Giliole le reçut assez gracieusement ; & en voyant les sacs pleins de bled , & croyant que le mary fust allé au moulin , dit à Giliole : Où est Guirot ? Je pensois qu'il fust au moulin ; mais voyant que les sacs sont encore icy , je ne sçay qu'en dire. Alors Giliole respondit : Ne doutez en rien , Seigneur Simplicie , & n'ayez point de crainte , car tout ira bien. Il faut que vous entendiez que sur l'heure de vespres il est venu icy un sien beau-frere , qui luy a dit , que sa sœur est en grande extremité de maladie , & qu'à grand' peine sera elle vive demain : tellement qu'il est monté à cheval , & s'est party pour l'aller voir devant qu'elle meure. Simplicie , qui estoit bien simple de nom & de fait , pensant

que tout cela estoit vray , ne dit mot. Cependant que Giliole estoit après pour faire cuire les chapons & appareiller le souper , voicy le mary Guirot qui arriva en la cour : & si-tost que Giliole l'eut entendu , feignant d'estre bien faschée , dit : Helas ! nous sommes perdus , nous sommes morts : & sans plus retarder , elle joua si bien son personnage , qu'elle fit cacher le mignon dedans le sac qui estoit vuide , combien qu'il y entraist assez mal volontiers ; puis approcha le sac où estoit le galand contre les autres qui estoient pleins de bled , & attendit que le mary vint au logis. Quand Guirot fut venu , & qu'il veit la table appareillée avec les chapons qui bouilloient dedans le pot , il dit à sa femme : Que veut dire ce magnifique banquet que tu m'as appresté ? Je pensois , dit-elle , que vous deussiez retourner bien las au logis , encore qu'il fust la minuiet : tellement que pour vous rafraischir & vous maintenir aux labeurs que vous avez continuellement , je vous ay voulu apprester quelque chose de bon ce soir pour vous donner substance. Par ma foy , dit Guirot , c'est très-bien fait à toy ; va , je t'en sçay bon gré , car je me trouve assez mal disposé , & me fasche que l'heure de souper & m'aller reposer n'est venue , afin que je m'en puisse aller demain de grand matin au moulin. Mais devant que nous soupi-
ons , il vaut mieux voir si nos sacs , qui

doivent estre portez au moulin, sont justes & de bon poids. Et s'estant approché des sacs, il en trouva treize, & feignant de ne les avoir pas bien contez, les tourna de rechef à raconter, & voyant qu'il y en avoit treize, il dit à sa femme: Que veut dire cecy, Giliole, qu'il y a icy treize sacs, & nous n'en avons appresté que douze? d'où vient cela? A quoy elle respondit: Je suis bien asseurée qu'il n'y en avoit que douze quand nous ensachasmes le bled, mais je ne vous sçaurois pas dire qui a adjousté le treizième. Simplicie qui estoit en ce sac, & qui sçavoit bien qu'il y en avoit treize, se tenoit quoy, & disoit en soy-mesme la pastenostre de singe, maudissant la femme, & son amour, & soy-mesmes, de s'estre jamais fié en elle, & s'il eust peu eschaper de ses mains, il s'en seroit volontiers fuy, & craignoit plus la honte que le dommage. Mais Guirot qui cognoissoit bien le sac, le print & le traina hors de l'huis qu'il avoit laissé ouvert tout exprès, afin qu'en luy donnant de bons coups, il eust loisir de sortir du sac & s'enfuir. Et pour ce faire, il avoit prins un baston nouëux appresté pour faire un tel effect, & le commença à frotter si bien & si beau, qu'il ne luy demeura membre sur luy, qui ne fust rompu ou meurtry, & peu s'en fallust qu'il n'en mourust. Et si ce n'eust esté sa femme, qui par pitié ou par crainte que

que le mary n'en fust banny, le luy osta d'entre les mains, il l'eust facilement tué. Si-toft que Guirot fut party, & qu'il eut abandonné l'entreprinse, Simplicie sortit du sac, & ainsi maltraicté s'en alla au logis, pensant avoir tousjours Guirot derriere soy avec le baston. Puis se mit dedans le liét, où il fust assez long-temps devant qu'il peust jamais revenir. Cependant Guirot après avoir fort bien souppé avec sa Giliole aux despens de Simplicie, s'en alla reposer. A quelques jours de là Giliole estant allée à la fontaine, trouva Simplicie, qui se promenoit en une sienne gallerie, & d'un visage riant le salua, en disant, Tic : mais Simplicie qui sentoit encore les coups receus pour telles paroles, ne respondit autre chose, sinon ce qui s'ensuit :

*Pour un bon-jour, ou pour Tic & pour Tac,
Vous ne m'aurez plus dedans vostre sac.*

Ce qu'entendant Giliole, se teut, & s'en retourna au logis toute honteuse : & Simplicie ainsi bestialement traicté, changea de fantasie, & commença à avoir plus grand soin, & porter plus grande amitié à sa femme, laquelle il avoit en haine pour autrui, de peur qu'il ne luy en print autant comme à la premiere fois.

La Fable de Vincende estoit desja ra-
Tome I. P.

170 LA II. NUICT,
contée , quand les Dames dirent tout
d'une voix : Si le Trevifan a maltraité
les Dames avec la Fable , Vincende n'en
a pas moins fait aux hommes avec la sien-
ne , laiffant fon Simplice rompu & froiffé
de coups. Et pour autant qu'un chacun
rioit , l'un d'une chofe , & l'autre de l'au-
tre , Madame commanda qu'on mift fin à
ces ris , & que Vincende pourfuivift l'or-
dre commencé avec fon Enigme. Alors
fe voyant victorieufe de l'injure commife
par le Trevifan vers les Dames , commen-
ça ainfi fon Enigme :

*Honte me prent de mon nom reciter ;
Aspre à toucher , & rude fuis à voir ,
Grand' bouchè ayant fans nulles dents porter :
La levre rouge , & près d'où me vient feoir ,
L'ardeur me vient fi fort à agiter ,
Que j'en escume , & n'y puis rien pourvoir :
C'est tout mon cas d'avoir une chambriere ,
Chacun y pefche , & me met on arriere.*

Les hommes ne fe pouvoient tenir de
rire , voyans que les Dames baiffioient la
tefte en leur fein en fousfiant. Mais Ma-
dame , à qui estoit beaucoup plus agrea-
ble l'honnesteté que la vilenie , regarda
d'un œil farouche Vincende , & luy dit :
Si je n'avois refpect à ces Gentilshommes,
je te donneroïs à cognoiftre que c'est que
de parler ainfi falement : mais pour ce

coup je te pardonne , & fais qu'il ne t'avienne plus ; autrement tu sentirois que vaut , & peut ma seigneurie. Alors Vincende estant devenue rouge comme la rose du matin , & se voyant ainsi brusquement reprise , print quelque peu de hardiesse , & luy respondit en telle maniere : Madame , si j'ay dit aucune parole qui offense vos oreilles , & de vous autres Dames , je ne meritois pas seulement d'en estre reprise , mais une aspre punition. Mais pour autant que mes paroles ont esté simples & pures , elles ne meritent point de punition , ny ceste aigre reprehension. Et qu'ainsi soit , l'interpretation de l'Enigme est mal entendue de vous ; car quand vous l'aurez bien examiné , vous cognoistrez mon innocence.

Cest Enigme ne signifie autre chose que le pot qui est noir à l'entour , & estant rechauffé de feu il boult & jette de l'escume de toutes parts. Il a bouche grande , & n'a point de dents , embrassant tout ce qu'on y met dedans : aussi toute chambriere mechanique y pesche dedans quand elle dresse le potage à dîner ou à souper. Les hommes & les Dames entendant l'honneste interpretation de l'Enigme , louerent grandement Vincende , disans qu'elle avoit esté reprise à tort. Et pour autant qu'il estoit desja tard , & que le

point du jour commençoit à apparoitre , Madame , sans faire autre excuse de son admonestement , donna congé à toute la compagnie : commandant à tous , que sous peine de son indignation chacun se trouvast d'oresnavant plustost au consistoire.





L A

TROISIEME NUICT

DES FABLES ET ENIGMES

du Seigneur Jean-François
Straparole.

ES JA la sœur du Soleil puissante au ciel, aux forests & abîmes obscurs, tenoit avec sa rotondité la moitié du ciel, & desja l'occidental horizon avoit couvert le chariot de Phœbus, & les estoiles errantes flamboyent de toutes parts : aussi les gentils oyselets laissant leurs harmonieux chants, se reposoient doucement en leurs beaux nids sur les branches verdes, quand les jeunes Dames & Gentilshommes se trouverent au lieu accoustumé pour deviser. Et quand chacun se fut assis selon son ordre, Madame Lucrece commanda que le vaisseau d'or fut derechef apporté, & y ayant mis le nom des cinq Damoiselles, lesquelles devoient ce soir là (selon que le sort luy,

P iij

seroit escheu) raconter leurs Fables par ordre. La premiere d'entre elles fut Catherine : la seconde Ariane : la troisième Laurette : la quatrième Alterie : & la cinquième Eritrée. Cela fait, Madame commanda que le Trevisan print son luth, & le Moulin une viole, & que tous les autres dansassent cependant que le Bembe meneroit la danse. Le bal finy, & le silence mis à la douce lire, & l'harmonieux luth ayant appaisé ses divines cordes, Madame commanda à Laurette qu'elle chantast une chanson. Elle convoiteuse d'obeyr & satisfaire à Madame print par la main les autres compagnes, & ayant fait une grande reverence, se mirent à chanter la chanson suivante :

*En regardant vostre excellent visage ,
Et de vos yeux une telle splendeur ,
Ravir me sens par une belle ardeur ,
De vostre cœur cognoissans la rondeur :
De pleurs je suis en une mer si large ,
Et de souspirs en telle profondeur ,
Que je ne puis en ce mortel decours ,
Trouver ailleurs sinon en vous , secours.*

Après que Laurette eut avec ses compagnes montré par son silence la chanson estre finie, Madame regardant au clair visage de Catherine, commanda qu'elle commençast les Fables de la presente nuit ; laquelle estant un peu rougie, & se soufriaient commença à dire ce qui s'ensuit :

F A B L E I.

*Un nommé Pierre, estant insensé,
retourna en son bon sens par le
moyen d'un poisson nommé Ton,
qu'il print ; & delivré de mort,
print en mariage la fille du
Roy Lucian, laquelle il avoit
engrossie par enchantemens.*



N lit (vertueuses Dames)
tant aux histoires anciennes,
que modernes, que les operations d'un fol (soient naturelles ou accidentales) luy
donne bien souvent bonne yssue. Au
moyen dequoy j'ay deliberé vous racon-
ter la Fable d'un fol, qui devint sage, &
eut en mariage la fille d'un Roy, comme
vous entendrez par ce present discours.

En l'Isle de Caprare, assise en la mer
Ligustique, laquelle tenoit autresfois le
Roy Lucian, y eut autresfois une pauvre
femme vefve, nommée Isotte, laquel-
le avoit un fils pescheur ; mais de mal-
heur il estoit insensé, tellement que
tous ceux qui le cognoissoient l'appelloient
Pierre le fol. Il s'en alloit tous les jours

pescher, mais fortune luy estoit tant contraire, qu'il ne prenoit jamais rien en ses filets: toutesfois & quantes qu'il retournoit au logis estant encore assez esloigné, il se mettoit si fort à crier, que tous ceux qui estoient en l'Isle pouvoient facilement entendre son cry, qui estoit tel: *Conches & Conchettes, Seches & Sechettes, Mastelles & Mastellettes; car Pierre est chargé de poisson.*

La pauvre mere adjoustant foy aux paroles de son fils, & croyant que ce qu'il disoit estoit vray, apprestoit tout son cas pour le mettre. Mais quand il estoit arrivé, il se moquoit de sa mere, & tiroit un grand demy pied de langue hors de la bouche pour se moquer. Or le logis de ceste pauvre vefve estoit vis-à-vis du palais du Roy Lucian, qui avoit une fille de l'aage de dix ans, belle & de bonne grace; & pour autant qu'il n'avoit point d'autre enfant, il luy bailla son nom, & l'appella Luciane. Toutesfois & quantes que ce fol faisoit ce cry de poisson, elle se mettoit à la fenestre, & y prenoit si grand passe-temps, qu'elle se sentoit mourir de ris. Le fol qui la voyoit ainsi desordonnément rire, s'en faschoit grandement, en la blasmant avec paroles assez rudes. Mais tant plus ce fol l'outrageoit, d'autant plus elle s'en rioit, & le prenoit en jeu comme font les enfans. Continuant ainsi Pierre de jour en jour sa pescherie, & reite-

rant sottement à sa mere les susdites paroles , advint que ce pauvre lourdaud print un jour un de ces trois poissons , que nous appellons un Ton , dont il sentit si grande joye qu'il s'en alloit sautant & criant par le rivage : *Dea , Dea , Je souperay avec ma mere , j'y souperay à la fin* , en repliquant par beaucoup de fois ces paroles. Le pauvre Ton se voyant prins , & ne pouvant fuir en aucune maniere , dit à Pierre le fol : Helas ! frere , je te prie par courtoisie , qu'il te plaise me delivrer de prison , & me donner la vie. Que veux tu faire de moy ? Quand tu m'auras mangé , quel profit auras-tu de moy ? Si tu me veux sauver la vie , je te pourrois bien un jour faire quelque plaisir. Mais le bon Pierre qui avoit plus de besoin de manger que de paroles , le vouloit à toutes forces charger sur ses espaules , & le porter en sa maison pour le manger joyeusement avec sa mere. Cependant le Ton ne cessoit de le prier très-affectueusement , luy promettant de luy donner autant de poissons qu'il en pourroit porter. Outre cela il luy promit luy octroyer ce qu'il luy demanderoit. Pierre qui n'avoit pas le cœur de diamant , nonobstant qu'il fut fol & insensé , fut esmeu à pitié , & luy promit de luy sauver la vie , & tant fit avec les pieds & les mains , qu'il le leva en la mer. Alors le Ton voyant avoir reçu si grand benefice , ne se voulant pas monstrier in-

grat, dit à Pierre : Monte en ton bateau, & fay tant avec la rame & ton corps, en le versant d'un costé, que l'eau y puisse entrer. Si-tost que Pierre eut fait pancher la barque d'un costé, & que l'eau de la mer y fut entrée, il y vint si grande abondance de poissons, que le bateau fut en grand danger de se perdre. Ce que voyant Pierre, & n'estimant aucunement le danger, se commença à resjouir, & en print tant qu'il peut charger sur son col, puis s'en alla vers son logis, & quand il commença à s'approcher, il se mit à crier comme il avoit de coustume : *Conches & Conchettes, Seches & Sechettes, Mastelles & Mastelletes ; car Pierre a prins beaucoup de poissons.*

La mere qui pensoit estre moquée comme les autres fois, ne s'en esineut point. Ce neantmoins le fol continuoit de crier tant plus fort ; tellement que la mere craignant qu'il n'y eust plus grande folie, s'il ne trouvoit les vaisseaux preparez, appresta tout son cas. Quand Pierre fut arrivé, & que la mere eut veu si grande abondance de poissons, elle se commença à resjouir, remerciant Dieu de luy avoir donné si bonne fortune. La fille du Roy ayant entendu Pierre crier à haute voix, s'en courut à la fenestre, & se moquoit de luy riant à pleine gorge de ses paroles : tellement que le pauvre fol ne sçachant faire autre chose, embrasé de couroux & de

fureur, s'en alla au rivage de la mer, & commença à appeller à haute voix le Ton pour le secourir. Le Ton entendant bien la voix du compagnon, se presenta au rivage de la mer, & mit la teste hors de l'eau en luy demandant qu'il avoit à se plaindre. Je ne demande autre chose pour le present (dit le fol) sinon que Luciane, fille du Roy Lucian, se trouve grosse : ce qui fut fait. Peu de jours après le ventre virginal commença à enfler à la pucelle, qui n'avoit pas encore douze ans accomplis, & autres signes evidens d'une femme grosse luy advindrent. La mere de la fille voyant cela en fut fort faschée, ne se pouvant persuader qu'une fille d'onze ans, qui ne monstroït point encore aucun signe de femme grosse, se peut engrossir. Et pensant qu'elle fust tombée (comme il advient le plus souvent) en quelque maladie incurable, la fit visiter par les sages-femmes; lesquelles rapporterent qu'elle estoit grosse pour le certain. La Roïne ne pouvant endurer un tel excez, le voulut communiquer au Roy Lucian son mary. Tant y a qu'après avoir fait bonne inquisition le plus secrettement qu'il fut possible, pour trouver celuy qui avoit violé la fille, on n'en peut sçavoir aucune chose : tellement que pour fuir un grand deshonneur, il la vouloit faire mourir secrettement. Mais la mere qui aymoït sa fille d'une grande affection, pria le Roy de la garder jus-

ques à tant qu'elle eust enfanté, & qu'il en fist après ce que bon luy sembleroit. Le Roy qui estoit tousjours pere, ayant pitié de ceste fille qui luy estoit unique, se renga au vouloir maternel. Le temps de l'enfantement venu, la fille enfanta un fort beau fils, & pour autant qu'il estoit d'une si merveilleuse beauté, le Roy n'eut pas le cœur de le faire mourir, mais commanda à la Roine qu'il fut alaieté & nourry jusques au bout de l'an. Estant desja le petit enfant parvenu au terme de l'an, & croissant de jour en jour en si grande beauté qu'on n'en eust peu trouver un semblable au monde, le Roy voulut faire experience s'il pouvoit point trouver celui qui estoit pere de cest enfant. Et pour ce faire, il fit crier à son de trompe par toute la ville, que quiconque passoit l'aage de quatorze ans, eust à se presenter devant sa Majesté, sous peine d'avoir la teste tranchée; & que chacun portast un fruit ou quelque autre chose qui peust esmouvoir l'enfant. Suivant le commandement du Roy chacun se presenta au palais portant fruit ou fleur, & passoient devant le Roy, qui les fit asseoir selon leur ordre. Advint qu'un jeune fils allant au palais, vint à rencontrer Pierre le fol, & luy dit : Où vas tu Pierre ? que ne vas tu au palais comme les autres, afin d'obeyr au commandement du Roy ? Et Pierre respondit : Que ferois-je en une si grande

multitude ? ne vois tu pas que je suis pauvre , nud , & n'ay pas seulement une robe pour me couvrir, & tu veux que je me mette au rang de tant de Seigneurs & Courtisans ? Je n'ay garde. Alors le jeune fils luy dit, en se jouant : Vien-t'en avec moy , & je te bailleray une robe. Que fais tu si l'enfant pourroit estre tien ? Tant y a qu'il s'en alla avec ce jeune fils qui luy vestit quelques habits, puis s'en alla avec luy au palais , & se mit derriere l'huys : tellement qu'à grande peine le pouvoit-on voir. Après que chacun se fut présenté & assis , le Roy commanda que l'enfant fust apporté , pensant que si le pere estoit en ceste compagnie la naturelle affection s'inclinerait ou d'un costé ou d'autre.

La nourrisse print l'enfant entre ses bras , & le porta en la sale , où chacun luy faisoit feste , l'un luy presentoit un fruit , l'autre une fleur , ce que refusa l'enfant. La nourrisse qui se pourmenoit çà & là par la sale , se vint à approcher de la porte d'icelle , & deslors le petit enfant commença à rire , & se voulut quasi jeter d'entre les bras de la nourrisse ; estant de rechef retournée vers la porte , le petit enfant menoit la plus grande joye de ce monde , monstrant l'huys avec le doigt. Le Roy voyant la contenance de cest enfant , appella la nourrisse , & luy demanda qui estoit derriere cest huis. C'est un belistre , respondit la nourrisse. Après l'a-

voir fait venir en sa presence, il cogneut que c'estoit Pierre le fol. Cependant l'enfant qui estoit près de là, en ouvrant les bras se jetta à son col, & l'embrassa estroitement. Le Roy considerant cela augmenta de plus en plus sa douleur, & ayant donné congé à toute la compagnie, delibera de faire mourir sa fille avec Pierre, & le petit enfant. Mais la Roynes qui estoit fort prudente, considera sagement que si on les faisoit decapiter & brusler en la presence du Roy, ce seroit un grand deshonneur; elle conseilla au Roy de les mettre dedans un grand tonneau, & les jeter en la mer, les laissant aller à leur bonne fortune, sans leur faire endurer si grand tourment, & sans en avoir de leur costé si grand regret. Ce conseil pleut au Roy, lequel après qu'il eut fait apprester le tonneau, les fit mettre tous trois dedans, avec un panier de pain, un flacon de bon vin, & un baril de figues pour le petit enfant. Puis les fit jeter en haute mer, pensant que tout cela se romproit au premier rocher qu'il rencontreroit, & que par ce moyen tous trois periroient. Mais il advint autrement qu'ils ne pensoient. La pauvre mere de Pierre entendant le cas estrange de son fils, en mourut de dueil, en brief. Estant la pauvre Luciane en ce bateau combattu par les vagues, ne voyant ny Lune ny Soleil, pleuroit & regretoit amerement sa piteuse fortune; & n'ayant

point de laiçt pour faire taire son fils , qui ne cefloit de pleurer , luy donnoit aucunesfois des figues , & ainfi l'endormoit. Mais Pierre n'ayant aucune paſſion , ne ſe ſoucioit ſinon de ce pain & de ce bon vin : tellement que Luciane luy dit : Helas ! Pierre , tu vois que je ſouffre innocemment cefte peine pour toy ; & tu ris , manges & bois , ſans penſer aucunement au danger où nous ſommes. Ce n'eſt pas par ma faute (dit-il) mais pluſtoſt par la tienne , pour autant que tu te moquois continuellement de moy ; mais ne te ſoucie point , car nous ſerons bien-toſt hors de ce danger. Tu diſ bien vray (reſpondit Luciane) que nous ſortirons bien-toſt de ce tourment ; car le tonneau ne mettra gueres à ſe rompre , & nous perirons. Alors Pierre dit , tais-toy , car j'ay un ſecret , que ſi tu le ſçavois tu t'en eſbahirois & poſſible t'en reſjoüirois. Quel ſecret aſ-tu (dit Luciane) qui nous peut ſoulager , & nous oſter de ſi grand travail ? J'ay un poiſſon (reſpondit Pierre) qui fait tout ce que je luy commande , & n'en paſſeroit pas un point , voire deuſt-il perdre la vie. C'eſt celuy meſme qui t'engroſſit. Ce ſeroit une bonne choſe (dit Luciane) ſi ainſi eſtoit : mais comment s'appelle-t-il ? C'eſt un Ton , dit Pierre. Alors Luciane luy dit , fay que j'aye autant de credit envers luy comme toy , pour luy faire mettre en execution ce que je luy diray. Il

fera fait, dit Pierre. Cela fait, il appella le Ton, & luy commanda de faire tout ce qu'elle luy commanderoit. La jeune fille après avoir reçu la puissance de luy commander, luy fit commandement de jeter le tonneau sur l'un des plus beaux & plus asseurez rochers qui se trouva au Royaume de son pere. Puis qu'il fit tant que Pierre devint le plus beau & le plus sage homme du monde. Et non contente de ce, luy commanda qu'il leur bastist sur ce rocher un riche palais, avec loges, sales, & chambres bien garnies, ayant un jardin derriere, plaissant & en belle veüe, remply d'arbres produisans perles & pierres precieuses, au milieu duquel y eust une fontaine qui fust quelquesfois d'eau fresche, & l'autrefois de vin exquis. Ce qui fut fait incontinent. Cependant le Roy & la Royne se souvenans d'estre si miserablement privez de leur fille, & son petit fils, estimans qu'ils fussent desja devorez par les poissons, se tourmentoient, ne se trouvant point joyeux ny contens. Estans ainsi en ceste tristesse & ennuy, delibere-
rent pour soulager un peu leurs cœurs passionnez, de s'en aller en Hierusalem, & visiter la terre sainte, ce qu'ils accomplirent: car ayans fait equiper une navire, & garnie de ce qui estoit necessaire, monterent sur mer, où ils eurent le vent assez favorable à leur departement. Mais devant qu'ils fussent à cinquante lieues de
l'Isle,

l'Isle, ils apperceurent de loing un riche, & superbe palais, eslevé quelque peu sur la plaine, & assis sur une petite Isle. Et pour autant qu'il leur sembloit plaisant (estant sous leur puissance) ils le voulurent un peu visiter. S'estans approchez de l'Isle, ils descendirent de la navire. Ils n'estoient pas encore arrivez au palais, que Pierre & Luciane les recogneurent; & estans allez au devant d'eux, les receurent amiablement avec grandes caresses, & accollades; mais pour autant qu'ils estoient tous transformez, le Roy ny la Royne ne les cogneurent point. Estans entrez en ce magnifique palais, ils le visiterent par le menu, en le loüant merveilleusement. De là en descendant par un petit degré, ils arriverent dedans le jardin, que le Roy & la Royne trouverent si beau à leur gré, qu'ils confesserent n'en avoir jamais veu un parcil en ce monde. Entre les autres choses singulieres de ce jardin, y avoit un arbre au milieu qui soustenoit sur une branche trois pommes d'or; tellement qu'il y avoit un gardien exprès commis à garder seulement que ce fruiet ne fust desrobé. Mais je ne sçay comment cela se fit, la plus belle d'icelles fut mise dedans le sein du Roy sans s'en appercevoir: tellement que quand il se voulut partir, le gardien dit à Luciane: Madame, la plus belle des trois pommes n'y est pas, & ne puis sçavoir ny imaginer qui la peut avoir.

186 LA III. N U I C T,
emportée. Alors Luciane luy commanda
de les fouiller tous les uns après les au-
tres , veu que ce n'estoit pas chose pour
en faire si peu d'estime. Après que le gar-
dien eut cherché & recherché , il retour-
na à elle , & luy dit , qu'il ne la trouvoit
point. Ce qu'entendant Luciane , fit sem-
blant d'en estre bien fâchée , & se tour-
nant vers le Roy , luy dit : Sire, vous
me pardonnerez s'il vous plaît , si je prens
la hardiesse de vous fouiller ; car la pom-
me que je cherche est de valeur inestima-
ble , & la prise plus que chose que je
sçache en ce monde. Le Roy qui ne se
doutoit point de telle menée , pensant que
tel erreur ne venoit point de luy , deslia
franchement ses habits , & tout soudain
la pomme tomba en terre. Le Roy voyant
ce cas estrange fut estonné , ne sçachant
d'où cela procedoit. Alors Luciane luy dit :
Monseigneur , nous vous avons fait le plus
grand honneur & la meilleure chere qu'il
nous a esté possible , selon que vous me-
ritez ; & vous en recompense de tels biens,
vous nous desrobez le fruit de nostre jar-
din sans nostre sçeu. Il me semble que
vous montrez en cela une grande ingra-
titude envers nous. Le Roy qui se sentoit
innocent en sa conscience , taschoit de
leur donner à entendre par tous les
moyens qu'il n'avoit point desrobé la pom-
me. Luciane voyant qu'il estoit temps
de se manifester , & donner à connoistre

son innocence à son pere , luy dit en pleurant : Sçachez , Monseigneur , que je suis la miserable Luciane que vous engendrades en la malheure , & condamnastes cruellement à mort , avec Pierre & l'enfant. Je suis vostre fille unique Luciane , qui sans -avoir eu jamais cognoissance d'homme fus engrossie. Voilà le fils innocent que j'ay conçu sanspeché : cest autre que vous voyez , est Pierre le fol , qui est devenu le plus sage du monde , par le moyen d'un poisson nommé Ton , & a basti ce haut & magnifique palais. C'est celuy qui vous a mis la pomme d'or en vostre sein , sans que vous en soyiez aperceu. Ce fut celuy qui me fit devenir grosse par enchantement , & non point par compagnie d'homme quelconque : & tout ainsi que vous estes innocent de la pomme desrobée , aussi suis-je innocente du crime à moy imposé. Alors tous pleurans de joye s'embrasserent l'un l'autre en se faisant grand' feste. Tost après ils monterent sur mer , & s'en allerent à Caprare , où on fit grand' feste & triomphe , & Pierre espousa Luciane , lequel comme gendre du Roy vesquit encore assez longuement avec luy , en grande consolation. Et quand le Roy vint à mourir il le fit son heritier.

La Fable de Catherine avoit desja esmeu les autres Dames à pleurer ; mais entendans qu'elle avoit fort bonne issue ,

Q ij

188 L A III. N U I C T ,
se commencerent à resjouir , remerciant
Dieu grandement. Cependant, Madame
voyant que la Fable estoit finie , comman-
da à Catherine de poursuivre l'ordre com-
mencé ; tellement que sans plus prolon-
ger & tenir en suspends les auditeurs , elle
commença d'un visage joyeux à proposer
son Enigme comme s'ensuit :

*Derriere un tronc est un vestu de rouge ,
Lequel se cache , & puis monstre un baston ,
Un gros & grand quatre portent : il bouge
Et deux poignant au tronc plante à taston.
Voicy venir un , qui de son grand donge
Le vient frapper & heurter au menton :
Dix autres vont le renverser par terre.
Or devinez que ce propos enferme.*

Ce subtil Enigme fut escouté , non pas
sans grand contentement de toute la com-
pagnie : & combien que les Dames l'in-
terpretassent en diverses sortes , si ne s'en
trouva-t'il point qui frappast mieux au
but que Laurette , laquelle dit en se souf-
riant : L'Enigme proposé par nostre gra-
cieuse sœur , ne signifie autre chose que
le bœuf sauvage qui a quatre pieds , le-
quel voyant du drap rouge , se met à cou-
rir d'une grande impetuosité pour le frap-
per , & cuidant le blesser vient à ficher
deux piquons dedans l'arbre , qui sont les
deux cornes : tellement qu'il ne les peut
après retirer. Cela fait , le chasseur qui

est caché derriere le fossé vient à l'atterrer avec dix , qui sont les dix doigts des deux mains. Pour telle resolution Catharine devint rouge par le visage , estimant que nul n'en donneroit l'interpretation ; en quoy elle fut abusée , parce que Laurette n'en sçavoit pas moins qu'elle. Madame voyant que les paroles multiplioient , imposa silence , & commanda à Ariane de commencer sa Fable , laquelle toute honteuse commença ainsi :

F A B L E I I.

Dalphrene Roy de Tunis , ayant deux enfans , l'un nommé Listic, & l'autre Livoret ; depuis surnommé Porcarol ; à la fin print en mariage Bellissandre , fille du Roy de Damas.



E n'est pas peu de cas au sage Pilote, quand estant tourmenté de l'ennuyeuse & bestiale tempeste , & poussé entre durs & pointus rochers , il vient à conduire sa pauvre barque à bon port. Ce qui advint à Livoret, fils du grand Roy, de Tunis , lequel après avoir passé par beaucoup de dangers & longs travaux ,

190 LA III. NUIT,
ayant la magnanimité de son cœur dompté le malheur de sa fortune parvint en meilleure condition, & le fit jouissant au Royaume du grand Caire, comme vous entendrez par le discours de la presente Fable.

En la Royale cité de Tunis, assise au rivage d'Afrique, fut n'y a pas long-temps un fameux & puissant Roy, nommé Dalphrene, qui ayant espousé une belle & gracieuse Dame, eut d'elle deux beaux enfans, sages, vertueux & obeissans au pere : l'ainé desquels s'appelloit Listic, & le plus jeune Livoret; lesquels suivant l'ordonnance Royale & coustume approuvée, ne pouvoient succeder au Royaume paternel, pour ce que la succession appartenoit seulement aux filles. Tellement que le Roy voyant par son desastre n'avoir point de filles, & qu'il n'estoit plus en aage d'en avoir, s'en faschoit grandement ayant tousjours une grande passion sur son cœur : & mesinement quand il venoit à considerer que ses enfans après sa mort feroient maltraitez & chassiez miserablement du Royaume paternel, à leur grande confusion & deshonneur. Estant le Roy en ce piteux & douloureux discours, ne pouvant trouver aucun remède qui le peust soulager, se tourna vers la Royne, laquelle il aymoit grandement, & luy dit : Madame que ferons-nous de ces enfans, puis que toute puissance nous est ostée, tant

par la loy , que par l'ancienne coustume , de les laisser nos heritiers au Royaume ? A cela respondit sur le champ la prudente & discrete Royne : Sire , dit-elle , il me semble , veu que vous estes le plus puissant homme de ce monde en tresors & richesses , qu'il seroit bon les envoyer en pays estrange , où ils ne soient pas cogneus , en leur donnant bonne quantité de bagues & deniers ; en ce faisant ils pourront entrer en la grace de quelque bon Seigneur , qui ne les laissera point endurer : & combien qu'ils endurent (dont Dieu les vueille garder) à tout le moins on ne sçaura pas qui sont leurs parens. Ils sont jeunes , d'un visage gracieux , d'une belle apparence , & metables à toute grande & haute entreprinse. Il n'y a Roy ny Prince , ny Seigneur (à cause des dons & privileges que nature leur a octroyé) qui ne les ayme & en face grand conte. La response de la sage Royne pleut merueilleusement à Dalphrene : lequel ayant fait appeller Listic & Livoret, leur dit : Mes enfans tant ayez de vostre pere , pour autant que l'esperance de succeder au Royaume vous est totalement ostée après nostre mort , non pas pour aucun forfait que vous ayez commis , ny par mœurs corrompuës qui soient en vous ; mais parce qu'il a esté ainsi determiné par la loy & ancienne coustume (que vous n'estes pas filles , mais masles , ainsi produits par nature) vostre

mere & moy avons deliberé pour vostre profit & commodité de l'un & de l'autre, vous envoyer ailleurs avec bagues, deniers & richesses : afin que si vous trouvez quelque party honorable, vous puissiez survenir à vos necessitez, & vous faire honneur. Parquoy il faut que vous soyez en cela obeissans à nostre desir. Ceste deliberation leur fut merueilleusement agreable, & ne leur donna pas moins de contentement qu'au Roy & à la Royne, parce que l'un & l'autre avoit grand desir de voir choses nouvelles, & gouter les plaisirs du monde. La Royne (comme est la coustume generale des femmes) qui aymoît plus le petit que le grand, l'appella à part, & luy donna un cheval bel-liqueux, pommelé, ayant une petite teste, un regard fier & courageux, & outre les bonnes conditions qui estoient en luy, il estoit fée, ce que Livoret ne sçavoit pas. Après que les enfans eurent reçu la benediction du pere & de la mere, & ayans prins leurs tresors, se partirent secretement. Quand ils eurent chevauché par beaucoup de journées, ne trouvant aucun lieu qui fust à leur gré, ils se commencerent à fascher : tellement que Livoret dit à son frere Listic : Nous avons tousjours cherché le pays jusques à present, sans avoir trouvé chose qui vaille : parquoy il me semble (si vous le trouviez bon) que l'un se separe d'avec l'autre, & que

que chacun s'en aille chercher sa bonne fortune. En cela ils furent tous deux d'accord : & de fait après s'estre embrassez & amiablement baisez l'un l'autre, prirent congé , & chacun print son chemin. Listic , duquel on n'entendit rien depuis, print son chemin vers l'Occident, & Livoret s'en alla vers l'Orient : lequel après avoir chevauché par longue espace de temps , & veu sans aucun profit la plus grand' partie du monde , ayant desja despensé les bagues , deniers & tresors que luy avoit donné son bon pere , hors mis le cheval ; finalement arriva au grand Caire, qui est la Royale & Metropolitaine cité d'Egypte , de laquelle pour lors jouissoit le Soldan Danebrun , homme de grand esprit , & puissant en richesses & fort aagé. Mais nonobstant qu'il fust desja si avancé en vieillesse , si estoit-il merveilleusement amoureux de Bellissandre , fille d'Attarant , Roy de Damas ; & avoit desja assiegé la ville pour la conquister , afin de l'avoir en mariage , ou par amour , ou par force. La fille qui avoit esté desja advertie de la vieillesse & laide condition du Soldan , avoit desja du tout déterminé de se laisser plustost tuer , que de le prendre pour mary. Si-tost que Livoret fut entré en la cité du Caire , il s'en alla tout à l'entour en la contemplant de toutes parts , la vint à louer grandement , & voyant avoir desja despensé tout son bien pour satisfaire

& contenter ses plaisirs, delibera de ne se partir point de là qu'il n'eust trouvé quelque maistre. Et de fait, estant allé vers le palais, il vid beaucoup de Sanjaques, Mammelus, Esclaves, ausquels il demanda s'il y avoit faute de serviteur en la court du Seigneur, & qu'il serviroit volontiers; & on luy respondit que non: toutesfois il y en eut un qui se vint à souvenir qu'il y avoit faute en la court d'un qui gardast les pourceaux: tellement qu'il l'appella, & luy demanda s'il garderoit bien les pourceaux, & il luy respondit que ouy. Après l'avoir fait descendre de son cheval, il le mena vers l'estable des pourceaux, en luy demandant son nom. J'ay nom Livoret, respondit-il. Toutesfois chacun luy donna depuis le nom de Porcarol. Et se mit à servir en la court du Soldan, ne faisant autre chose, sinon que d'engraisier les pourceaux, & y faisoit en telle sorte son devoir, que ce que faisoient les autres en six mois, il en faisoit plus en deux: tellement que les Mammelus & Esclaves, considerans sa maniere de faire, donnerent à entendre au Seigneur qu'il seroit bon de luy donner un autre office, parce que sa diligence ne meritoit point d'estre en si bas office. Alors le Soldan luy bailla charge des chevaux, en luy augmentant ses gages, dont il fut fort content; parce qu'en gouvernant les autres, il avoit l'œil au sien. Estant venu à telle

entreprinſe , il les eſtrilloit ſi bien & les frottoit de ſi bonne grace , que leur poil ſembloit beau velours , tant ils eſtoient beaux & en bon point. Et entre autres , il y avoit un rouſſin ſi beau , jeune & courageux , pour la beauté duquel entretenir il uſoit de toute diligence pour le bien façonner , & l'apprent ſi bien que outre qu'il ſe manioit de tous coſtez , il s'inclinoit , il danſſoit & ſe levoit de terre de toute ſa hauteur , en ruant ſi vivement que ſes coups ſembloient traits d'arbaleſtre. Les Mammelus & Eſclaves voyans les vaillantises du cheval , eſtoient tous eſtonnez , & leur ſembloit choſe contre nature : tellement qu'ils delibererent d'en faire le recit au Soldan , afin qu'il print plaifir aux prouèſſes de Porcarol. Le Soldan qui ſembloit eſtre perſonne melancolique , tant pour l'exceſſif amour qui le conſommoit , comme pour l'extreme vieillesſe , ne ſe ſoucioit gueres de tous paſſe-temps ; car eſtant chargé de penſées amoureuses , ne penſoit jamais à autre choſe qu'à ſ'amie. Si eſt-ce que les Eſclaves & Mammelus firent tant envers luy qu'il ſe mit à la fenestre , & vit toutes les prouèſſes que faisoit Porcarol avec ſon cheval. Et le voyant d'une ſi belle apparence & ſi bien façonné , trouvant encore plus de bonnes conditions qu'il n'avoit entendu , penſa en luy-mefme que c'eſtoit un grand domnage qu'il fuſt à un ſi vil exercice ,

estant député au gouvernement des bestes : tellement que pensant & repensant à la vertu de ce jeune homme , & que rien ne luy defailloit pour estre parfait en toutes bonnes qualitez , delibera de l'oster d'un tel office pour le pousser à plus grand estat. Et de fait , le fit appeller , & luy dit : Vien ça , Porcarol , je ne veux plus que tu sois à l'estable , mais plustost au service de ma table , estant mon escuyer tranchant , & me faisant la credence de tout ce qui sera présenté devant moy. Estant donc ce jeune fils establi à tel office , il l'exerçoit si bien , que non seulement le Soldan , mais aussi tous les assistans en estoient esmerveillez. De ceste bien vueillance sourdit une si grande envie entre les Esclaves & Mammelus , qu'ils ne le pouvoient regarder de bon courage , & si ce n'eust esté la crainte du Seigneur , ils luy eussent osté la vie. Mais pour le faire tomber en la male grace d'iceluy , ou qu'il fust mis à mort , ou banny perpetuellement , ils se vont imaginer une cautelle : c'est qu'estant un esclave nommé Chebur , député un matin au service du Seigneur , luy dit telles paroles : J'ay une bonne nouvelle à vous dire. Et quoy ? dit le Soldan. C'est (dit-il) Porcarol , qui par son propre nom s'appelle Livoret , lequel ne se vante d'autre chose , sinon qu'il entreprend sur sa vie de vous rendre jouissant de la fille d'Attarant , Roy de Da-

mas. Est-il possible ? dit le Soldan. Ouy certes , respondit Chebur : & si vous ne m'en voulez croire , demandez-le aux Mammelus & autres Esclaves , en la presence desquels il s'en est souventesfois vanté , & vous cognoistrez si je vous trompe. Le Soldan ayant esté deuëment informé que cela estoit vray , fit venir Livoret , & luy demanda s'il estoit vray ce qu'on disoit de luy. Alors le jeune fils qui ne sçavoit rien de tout cela , nia tout : tellement que le Soldan plein de courroux & de despit , luy dit : Va sans plus tarder , & si tu ne fais dedans trente jours , que j'aye en ma puissance Bellissandre , fille d'Attarant , Roy de Damas , je te feray oster la teste de dessus les espaules. Le jeune fils oyant un si aspre & rigoureux commandement fut tout troublé , & s'estant osté de sa presence , s'en alla en l'estable. Si-tost que le cheval fée eut veu son maistre si dolent , & que les larmes luy tomboient continuellement des yeux , il se tourna vers luy , & luy dit : Dea qu'avez-vous mon maistre , pourquoy estes si passionné ? Livoret continuant ses plaintes , luy raconta par le menu tout ce que luy avoit commandé le Soldan : mais le cheval en secoüant la teste , & montrant signe de vouloir rire , le consola quelque peu , en luy disant qu'il ne se doutast de rien , & que tout son cas'iroit bien. Puis luy dit : Retournez-vous-en vers le Sol-

dan, & luy dites qu'il vous fasse une lettre patente qui s'adresse au Capitaine general de l'armée, qui tenoit la ville de Damas assiégée, en luy faisant exprès commandement, que si-tost qu'il aura leu la lettre scellée du grand sceau, qu'il oste le siege qui est devant Damas, & qu'il vous baille deniers, accoustremens & armes, afin que vous puissiez aller courageusement à ceste entreprinse. Et s'il advient par cas de fortune, que quelque personne de quelque condition que ce soit, ou autre animal vous requiere en ce voyage quelque service, servez-le, & sur la vie gardez-vous de luy refuser sa demande. Et si quelqu'un me vouloit acheter, dites-luy que vous me vendrez; mais demandez-luy un prix si excessif qu'il soit contraint se deporter de l'achat: si ce sont quelques femmes qui me veulent acheter, faites leur tous les plus grands plaisirs qu'il sera possible, leur donnant liberté de me toucher la teste, le front, les yeux, les oreilles, la croupe & tout ce que bon leur semblera; car sans leur faire aucun desplaisir & fascherie, je me laisseray manier. Le jeune Livoret tout joyeux s'en retourna par devers le Soldan, & luy demanda une lettre patente, avec tout ce que luy avoit baillé par memoire le cheval fée. Après avoir obtenu tout ce qu'il demandoit, il monta sur ce cheval, & prit son chemin vers Damas, au grand contente-

ment & resjouïssance de tout les susdits Mammelus & Esclaves, qui par l'extreme envie & haine qu'ils luy portoient, tenoient pour certain qu'il ne retourneroit jamais au Caire. Bref, après avoir chevauché beaucoup de journées, il arriva à une certaine eau, sur le bord de laquelle il y avoit une puanteur si terrible, qui sortoit de je ne sçay quoy, qu'à grand' peine en pouvoit-il approcher, & y avoit un poisson demy mort. Si-tost que ce poisson l'eut veu, il luy dit : Helas ! gentil Chevalier, je vous prie par courtoisie me delivrer de ceste bourbe ; car comme vous voyez, je suis quasi desja demy mort. Le jeune compagnon se souvenant de ce que luy avoit dit son Cheval, descendit au lieu où il y avoit une si grande puanteur, & le tira de ceste bourbe, & en le levant de ses propres mains, le nettoya. En quoy le poisson le remercia grandement, & luy dit : Prenez sur mon dos les trois plus grandes escailles, & les tenez tousjours près de vous, & quand vous aurez besoin de quelque secours, mettez-les sur la rive du fleuve, & je viendray incontinent vers vous pour vous donner secours. Livoret print les escailles, & après avoir jetté le poisson en l'eau courant, remonta à cheval, & chevaucha tant qu'il trouva un beau faucon qui avoit la moitié du corps gelé en l'eau, & ne se pouvoit remuer en façon quelconque. Si-tost qu'il eut apper-

Ceu ce jeune fils , il luy dit telles paroles :
 Je te prie le beau fils , aye pitié de
 moy , & m'oste de ceste glace où je suis
 empestre ; & si tu me delivre de telle cala-
 mité , je promets t'ayder en quelque autre
 lieu que tu ayes besoin de mon secours.
 Ce que fit incontinent Livoret , de la pitié
 qu'il en eut ; car ayant prins un petit cou-
 steau qu'il portoit au fourreau de son espée ,
 il fit tant en piquant de tous costez la gla-
 ce , qu'il la rompit , & print le faucon qu'il
 mit en son sein pour le rechauffer , puis
 le laissa aller. Le faucon ayant reprins ses
 premieres forces , remercia grandement
 le jeune fils , & en recompense d'un si
 grand benefice qu'il avoit receu de luy ,
 il tira deux plumes qu'il avoit deffous
 l'aïsse gauche , & les luy bailla , en le priant
 qu'il les gardast pour l'amour de luy , &
 quand il auroit besoin de quelque chose ,
 en prenant les deux plumes , & les fichant
 sur la rive du fleuve , il viendroit inconti-
 nent à son secours. Ces propos finis , il
 print incontinent sa volée , & s'en alla.

Le jeune Livoret continuant son voya-
 ge , fit tant par ses journées qu'il arriva au
 camp du Soldan , où ayant trouvé le Capi-
 taine qui barroit & assailloit la cité de tous
 costez fort & ferme , s'approcha de luy ,
 & presenta sa patente. Le Capitaine ayant
 veu le contenu d'icelle , fit lever inconti-
 nent le siege , & s'en retourna au Caire
 avec tout son camp. Le matin ensuivant ,

Livoret entra tout seul en la cité de Damas, & s'en alla loger en une hôtellerie ; & ayant vestu un beau & riche accoustrement tout semé de pierreries, qui faisoit envie au soleil, monta sur son cheval fée, & s'en alla tout droit au palais, où il commença à le faire voltiger d'une si bonne grace, que chacun s'estonnoit à le voir. Belissandre fille du Roy, qui s'estoit esveillée par le bruit du peuple, se leva, & vint regarder sur une galerie qui descouvroit toute la place, ce beau jeune fils avec son gentil cheval, duquel elle fut autant amoureuse, comme seroit un jeune fils d'une belle pucelle : tellement qu'elle s'en alla vers son pere, en le priant grandement de l'acheter pour elle, veu qu'en le voyant si vif & gentil, elle estoit ravie. Alors le pere pour contenter sa fille, qu'il aimoit merveilleusement, envoya un de ses Barons pour demander à ce jeune fils s'il vouloit vendre son cheval, avec prix raisonnable, à cause que la fille du Roy en estoit amoureuse. Le jeune fils respondit qu'il n'y avoit prix, & chose si digne qui peust acheter son cheval ; & pour ceste cause il luy demanda une si grande quantité de deniers, que le Royaume de son pere n'estoit pas suffisant pour le payer. Le Roy entendant un prix tant excessif, appella sa fille, & luy dit : Escoute, ma fille, je ne me veux pas priver de mon Royaume pour un cheval, & pour

te complaire. Parquoy il faut que tu aye maintenant patience, & ne te chaille, nous en recouvrerons un autre plus beau & meilleur. Bellissandre estant tousjours de plus en plus ravie, prioit incessamment son pere de la contenter en cela, quoy que coustast le cheval. Après maintes prieres, la fille voyant ne pouvoir gagner son pere, se partit d'avec luy, & s'en alla trouver sa mere comme desesperée, & comme demy morte, se laissa tomber entre ses bras. La pitoyable mere voyant sa fille si dolente, la conforta le plus doucement qu'elle peut, en la priant qu'elle ne se tourmentast plus : & si-tost que le Roy se seroit party, elles s'en iroient toutes deux trouver ce jeune fils pour marchander le cheval, & qu'elles en auroient (peust-estre) meilleur marché que n'en auroit un homme. La fille oyant les douces paroles de sa bonne mere, se rapaisa quelque peu ; & si-tost que le Roy se fut party, la mere envoya dire au jeune fils qu'il s'en vint au palais, & qu'il amenaist son cheval. Le jeune homme entendant ce message, commença à se resjoüir, & s'en alla à la court, où la mere luy demanda combien il estimoit bien son cheval, à cause que sa fille avoit grand desir de l'avoir. Madame (respondit-il) si vous me donniez tout ce que vous avez en ce monde, jamais vostre fille ne pourroit avoir mon cheval par vendition, mais ouy.

bien en don, quand son plaisir seroit de l'accepter. Mais devant qu'elle accepte le don, je veux qu'elle le taste & manie, à cause qu'il est paisible & adroit, & se laisse monter sur soy paisiblement. En disant cela, il descendit de son cheval, & mit la fille sur la selle qui le manioit, & gouvernoit à son plaisir. Mais elle ne fut pas esloignée de sa mere d'un jet de pierre, que le jeune homme se mit sur la croupe de son cheval, & le commença à piquer si fort de ses esperons, qu'il sembloit un oiseau qui vole par l'air. La jeune Dame toute troublée, commença à crier : O meschant, desloyal & traistre, où me meines tu chien renié ? Toutesfois son cry ne luy servoit de rien, car il n'y avoit personne là qui luy peut donner secours, ny la conforter de paroles. Quand elle vint à passer sur la rive d'un fleuve, elle print le plus bel anneau qu'elle portast en ses doigts & le jetta secrettement en l'eau. Finalement après avoir chevauché beaucoup de journées, ils arriverent au Caire, & si-tost qu'il fut entré au Palais, il la vint presenter au Soldan, lequel la voyant si belle & d'une si bonne grace, se resjoüit grandement, & la receut avec les plus belles caresses de ce monde. Quand se vint sur l'heure de s'aller reposer, estans tous deux en une chambre richement parée, la Damoiselle dit au Soldan, Seigneur, ne pensez point que j'accouplisse vos desirs,

amoureux , si vous ne faites premièrement que ce meschant traître qui m'a amenée ne me trouve mon anneau qui m'est tombé dedans un fleuve ; & quand il me l'aura trouvé & rendu , je feray après ce qu'il vous plaira. Le Soldan qui estoit embrasé de l'amour de ceste Damoiselle , ne la voulut point molester pour lors ; mais commanda incontinent à Livoret qu'il eust à recouvrer l'anneau , autrement il le menaçoit de le faire mourir. Livoret voyant estre contraint par le rigoureux commandement du Soldan , & qu'il ne falloit point contredire à son vouloir , se partit tout fâché , & s'estant retiré en l'estable se mit à pleurer merveilleusement , estant hors de toute esperance de le pouvoir jamais trouver. Le cheval voyant son maître en si grande perplexité , & pleurer si chaudement , luy demanda qu'il avoit à pleurer , & à se tourmenter si fort ; & ayant entendu la cause , luy dit : Taisez-vous pauvre homme , ne vous souvient-il plus de ce que vous dit le poisson ? Prestez donc les oreilles à mes paroles , & faites ce que je vous diray. Retournez-vous-*en* vers le Soldan , & luy demandez tout ce qui vous fait de besoin , & ne vous souciez point d'autre chose. Le jeune compagnon fit tout ainsi que luy avoit ordonné son cheval , & fit tant par ses journées qu'il arriva sur le fleuve qu'il avoit traversé avec la Damoiselle , & mit les trois es-

cailles du poisson sur la rive verdoyante. Vous eussiez veu alors le poisson coulant çà & là , tout joyeux par dedans l'eau , & se presenta devant luy , en tirant de sa bouche le precieux anneau , en le luy baillant entre ses mains , & print les trois escailles , & se plongea en l'eau. Si-tost qu'il eut recouvré l'anneau , sa tristesse se convertit en joye , & sans plus scjourner s'en retourna vers le Soldan , auquel ayant fait une grande reverence , monstra l'anneau qu'il avoit trouvé , & le presenta à la Damoiselle. Le Soldan voyant que la Damoiselle avoit son precieux anneau comme elle desiroit , & suivant son vouloir , luy commença à faire les plus belles caresses du monde & la flatter , afin qu'elle couchast icelle nuit avec luy. Mais il se travailloit en vain ; car la Damoiselle luy dit : Ne me pensez point abuser avec vos douces paroles & flatteries ; car je vous jure par mon serment que vous ne prendrez jamais aucun plaisir avec moy , si premierement ce rustre cy qui m'a ainsi vilainement seduite , ne m'apporte de l'eau de vie. Le Soldan qui ne vouloit aucunement contraindre sa bien aimée , ains taschoit de luy complaire par tous les moyens , appella Livoret , & luy commanda que sous peine de perdre la vie il luy apportast de l'eau de vie. Le jeune fils fut très-dolent de ceste impossible demande , ayant eu un grand despit en son cœur , & se plai-

gnoit grandement de son maistre , disant , que c'estoit mal reconnu à luy son service , & ses grands labeurs qu'il n'avoit pas souffert sans encourir un grand danger de sa personne. Mais le Soldan qui estoit excessivement ravy de l'amour de sa Dame , ne voulut jamais changer de vouloir , afin de luy complaire en tout ce qu'elle demandoit : tellement qu'il trouva de l'eau de vie. Au moyen dequoy s'estant party de là , s'en alla vers l'estable faire ses regrets , maudissant la cruelle fortune , en pleurant continuellement. Le cheval voyant les plaintes ameres de son cher maistre , luy dit : Qu'y a-t'il mon maistre ? pourquoy vous tourmentez-vous si fort ? vous est-il survenu quelque chose de nouveau ? Taisez-vous , car on trouve remede à toutes choses , excepté à mort. Ayant entendu la cause de ses malheurs , le vint à consoler le plus doucement qu'il fut possible , en luy reduisant à memoire ce que luy avoit dit autresfois le faucon , qu'il avoit delivré de la glace , & le precieux don des deux plumes. S'estant souvenu de tout cela , il monta à cheval , & prit une fiole de verre bien couverte & renforcée , & l'attacha à sa ceinture , & chevaucha tant qu'il arriva au lieu où il avoit sauvé le faucon : & ayant planté les deux plumes sur la rive du fleuve comme il avoit esté instruit , incontinent apparut le faucon , & luy demanda ce qu'il luy falloit :

auquel respondit Livoret , qu'il avoit fau-
te d'un petit d'eau de vie. Alors le faucon
luy : Helas ! gentil chevalier , il est im-
possibles que tu en puisses jamais avoir ,
pour autant qu'elle est diligemment gar-
dée par deux fiers Lyons , & deux horri-
bles Dragons , qui continuellement hur-
lent & devorent miserablement tous ceux
qui s'approchent pour en prendre. Tou-
tesfois en recompense du plaisir que je
receus une fois de toy , prens ta phiole ,
& l'attache sous mon aille dextre , & ne te
parts point d'icy jusques à tant que je
sois de retour. Ayant fait tout ce qui luy
avoit esté enchargé , le faucon print sa
volée avec la phiole , & vola tant qu'il
arriva à la fontaine , où il print secrette-
ment de l'eau de vie ; avec laquelle il re-
tourna en toute diligence , & la presenta
à ce jeune compagnon. Puis ayant prins
ses deux plumes , il print congé de luy ,
& s'envola. Livoret ayant reçu ceste li-
queur , sans plus retarder s'en retourna au
Caire ; & s'estant présenté devant le Sol-
dan , qui devoit amoureusement avec
s'amie , luy bailla l'eau de vie , qu'il re-
çeut en grande resjoüissance , & la donna
à Belissandre , afin de jouir d'elle à son
plaisir. Mais elle qui estoit constante &
ferme comme une tour assaillie & battüe
des vents , ne voulut jamais par aucun
moyen consentir , si premierement de ses
propres mains elle ne trenchoit la teste à

Livoret, qui avoit esté cause de tout ce mal. Le Soldan entendant la bestialité & inhumaine deliberation de ceste cruelle Damoiselle, ne luy voulut en cela aucunement complaire; estimant que c'estoit une chose fort estrange, qu'il fust ainsi miserablement decapité, en recompense de ses labours & ennuis. Mais la cruelle & execrable Damoiselle perseverant en son mauvais & detestable vouloir, print un cousteau nud, & d'un courage fier & asseuré, frappa le jeune fils en la gorge en la presence du Soldan; & pour autant qu'il n'y avoit personne en ce lieu qui eust la hardiesse de le secourir, il tomba mort en terre. Non contente de ce, la meschante femme luy osta la teste de dessus les espaules, & ayant coupé & haché sa chair menu, & rompu les nerfs avec ses os, & mis en poudre tout cela; elle print un bassin de cuivre assez grand, puis y jetta dedans petit à petit ceste chair hachée, en la broyant avec les os & les nerfs, tout ainsi que font les femmes quand elles paitrissent la paste. Après que cela fut bien paistry, & que la chair fut bien unie avec les nerfs & os, elle fit une superbe image, qu'elle arroûsa avec l'eau de la phiole; & incontinent le jeune fils resuscita de mort à vie, estant plus beau & de meilleure grace qu'il n'estoit auparavant. Le Soldan qui se sentoît desja fort âgé, voyant la merveilleuse experience

&

& le miracle evident, fut tout estonné, & ayant desir de se faire devenir jeune, pria la Damoiselle de luy faire le tour qu'elle avoit fait au jeune homme. Alors elle, qui ne fut pas lente à obeyr au commandement du Soldan, print le cousteau qui estoit encore tout sanglant de la mort du jeune homme, & luy ayant mis la main gauche sur le col, en le tenant estroitement, luy donna un coup mortel en l'estomach; puis le jetta par les fenestres dedans les fossez profonds du palais, & en lieu de le faire devenir jeune comme l'autre, le fit viande pour les chiens : ainsi le miserable vieillard finit sa vie assez pauvrement. La noble Damoiselle redoutée d'un chacun pour l'experience merveilleuse qu'elle avoit faite, ayant aussi entendu que ce jeune compagnon estoit fils de Dalphrene Roy de Tunis, & qu'il s'appelloit en son vray nom Livoret, escrivit une lettre au pere, en l'advertissant du cas advenu en sa personne propre, & le priant affectueusement qu'il se trouvast aux nopces. Dalphrene entendant les bonnes nouvelles de son fils, s'en alla au Caire, où il fut receu honorablement; & bien-tost après Livoret espousa Belissandre, au grand contentement d'un chacun. Puis fut establi seigneur du Caire avec grand triomphe, où il gouverna longuement la seigneurie en grande tranquillité. Cela fait, Dalphre-

ne ayant prins congé de son fils & de sa
bruz , s'en retourna sain & sauve à Tu-
nis.

Après que Ariane eust finy sa pitoyable
nouvelle , afin que l'ordre commencé fust
observé , elle vint à commencer son Enig-
me en la maniere qui s'ensuit :

Un petit corps , d'un grand feu vient de nai-
stre ,

Ayant la peau d'un fort gros marescage :
Or l'ame en lieu auquel pas ne doit estre ,
Comme liqueur est close en une cage.
Icy ne veux de fables vous repaistre ,
Car verité consiste en mon langage :
Sa belle robe est de très-fin coton ,
Rendant odeur à toute la maison.

Toute la compagnie escouta attentive-
ment le subtil Enigme d'Ariane , en le
luy faisant repliquer par plusieurs fois.
Pour ce qu'il ne se trouva personne qui le
peut entendre ; lors la gracieuse Ariane
le va ainsi resoudre , en disant : Messei-
gneurs , mon Enigme ne signifie autre
chose , sinon la bouteille de l'eau rose qui
a le corps de verre , & vient de l'ardente
fournaise. Vous luy voyez la peau de ma-
rais ; c'est à sçavoir , la couverture de pail-
le ou de jonc , & l'ame qui est dedans est
l'eau rose. La cotte , c'est à sçavoir , la
robbe dont elle est environnée est le cot-
ton , & quiconques la voit , la prent en-

tre ses mains , & la met sous le nez pour la sentir. Ariane avoit desja mis fin à son Enigme , quand Laurette , qui estoit assise près d'elle , cogneut que c'estoit en son rang de dire sa Fable , laquelle sans attendre autre commandement de la Dame , commença ainsi à parler :

F A B L E III.

Blanchebelle , fille de Lamberic , Marquis de Montferrat , est envoyée par la Marastre de Ferrandin Roy de Naples , pour estre tuée ; mais les serviteurs luy couperent les mains , & luy creverent les yeux ; & depuis fut guerrie par une couleuvre , & s'en retourna joyeuse vers Ferrandin.



'EST une chose fort loüable & nécessaire que la femme (de quelque condition qu'elle soit) use de prudence en ses operations, sans laquelle nulle chose ne peut estre jamais bien gouvernée. Et si une marastre , de laquelle je vous veux maintenant parler , en eust usé avec modestie , elle n'eust point esté occise par

le jugement divin, pensant tuer autrui, comme vous entendrez.

Il a desja assez long-temps que regnoit à Montferrat un Marquis, puissant en seigneurie & en richesses ; mais il n'avoit point d'enfans, & s'appelloit Lamberic. Or avoit-il merveilleux desir d'en avoir, mais la grace luy en fut refusée. Advint un jour entre les autres que la Marquise s'en alla passer le temps en son jardin, & estant vaincuë du sommeil se vint à endormir au pied d'un arbre ; & ainsi qu'elle dormoit doucement, voicy une petite couleuvre qui s'approcha d'elle, & s'estant coulée sous ses vestemens, luy entre secrettement en la nature, sans qu'elle s'en peust jamais appercevoir : & en montant subtilement par le ventre de ceste Dame, se vint à arrester joliment en ce lieu. Bientost après la Marquise devint grosse, au grand contentement & resjouissance de toute la cité ; quand elle fut au terme, elle enfanta une fille avec une couleuvre qui luy environnoit trois fois le col. Les sages femmes voyant telles choses s'espouventerent grandement : mais sans faire aucun desplaisir, elle s'osta petit à petit du col de la petite pouponne, & en se laissant couler & trainer par terre, se retira dedans le jardin. Après que la petite fille eust esté bien lavée & nettoyée dedans le baing, & enveloppée dedans les blancs drappets, on commença à appercevoir à l'en-

tour du col une chaine d'or ouvrée d'un grand artifice : & estoit si belle & de si bonne grace , qu'elle apparoissoit entre cuir & chair , tout ainsi qu'on voit quelque precieuse bague au travers d'un fin cristall ; & environnoit autant de fois le col , comme la couleuvre faisoit de tours. Or ceste fille , qui par beauté excellente fut nommée Blanchebelle , croissoit en si grande vertu & gentillesse , qu'elle ne sembloit pas humaine , mais plustost divine. Estant Blanchebelle parvenue à l'age de dix ans , s'en vint un jour sur une galerie , & ayant veu le jardin remply de roses & de violettes , se tourna vers sa mere nourrisse qui la gardoit , & luy demanda que signifioit cela qu'elle n'avoit point veu auparavant. C'est un lieu (dit la nourrisse) que vostre mere appelle jardin , où aucunesfois elle prend son passe-temps. La fille luy dit : je n'ay point encore veu de si belle chose au monde , & entrerois volontiers dedans. La nourrisse l'ayant prise par la main , la mena dedans ce jardin , & s'estant un peu esloignée d'elle , s'en alla reposer sous un fouteau bien fueillu , laissant la jeune fille passer son temps par le jardin. Blanchebelle estant toute ravie de ce plaisant lieu , alloit çà & là recueillant des fleurs ; & quand elle fut un peu lasse s'en alla seoir à l'ombre d'un arbre. Mais elle ne fut pas si-tost assise , qu'une couleuvre se vint appro-

cher d'elle , dont elle eut grande frayeur & se voulant mettre à crier , la couleuvre luy dit : Tais-toy , ne te bouge , & n'ayes point peur , car je suis ta sœur , & nasquis avec toy en un mesme jour , & ay nom Samaritaine : au moyen dequoy si tu es obeyssante à mes commandemens je te feray heureuse ; autrement tu deviendras la plus malheureuse & mal contente fille qui fust jamais en ce monde. Va donc sans aucune crainte , & demain fais toy porter en ce jardin deux vaisseaux , l'un desquels soit plein de lait pur , & l'autre de fine eau rose. Puis viens-t'en vers moy sans aucune compagnie. Si-tost que la couleuvre se fut partie , la fille se leva , & s'en alla trouver la nourrice qui se reposoit encore à l'ombre ; & l'ayant esveillée , s'en alla avec elle au logis sans luy tenir aucun propos. Le jour ensuivant venu , Blanchebelle estant toute seule en la chambre avec sa mere , luy sembla estre assez triste & melancolique de visage : tellement que la mere luy dit : Qu'as-tu Blanchebelle ? tu me sembles toute fâchée , tu estois toute joyeuse , & maintenant tu me sembles si triste & desconfortée. La fille respondit : Je n'ay autre chose , sinon que je voudrois qu'on m'apportast deux vaisseaux dedans le jardin , l'un desquels fust plein de lait , & l'autre d'eau rose. Tu te fâches pour peu de chose , ma fille (dit la mere) ne sçais tu pas

bien que tout ce que nous avons est à ton commandement ? Puis luy fit envoyer deux fort beaux vaisseaux au jardin, l'un plain de lait, & l'autre d'eau rose. L'heure de l'assignation donnée, elle s'en alla toute seule au jardin, & ayant ouvert l'huis, se vint enclore leans, & s'assit au lieu où estoient ces vaisseaux. Mais elle ne fut pas si-tost assise, que voicy venir la couleuvre qui s'approcha d'elle, & la fit incontinent despouiller & entrer toute nuë dedans ce lait, en la lavant depuis les pieds jusques à la teste, & la léschant avec la langue, la nettoya par tout où elle pensa y avoir quelque infection. Puis l'ayant tirée hors de ce lait, la plongea dedans l'eau rose, en luy donnant si bonne odeur, qu'elle fut incontinent reconfortée. Cela fait, l'ayant revestue, luy commanda expressement qu'elle se teust, & qu'elle se donnast bien de garde de le manifester à personne, voire fust-ce le pere ou la mere; pour autant qu'elle vouloit qu'il n'y eust femme ny fille en ce monde, qui peust estre parangonnée à sa beauté & gentillesse : & finalement l'ayant douée de beaucoup d'autres vertus, se partit de là. Si-tost que Blanchebelle se fut absentée du jardin, elle s'en retourna au logis vers sa mere, qui la trouva si belle & de si bonne grace, qu'elle surmontoit toute autre beauté & gentillesse, en quoy elle ne sceut que dire. Toutes-

216 LA III. NUIT;

fois elle luy demanda comment elle avoit fait à devenir si belle : Je n'en sçay rien , respondit-elle. Alors la mere print un peigne pour la peigner , & en luy accoustrant ses blonds cheveux , les perles & bagues precieuses luy tomberent de la teste , & en luy lavant les mains , les roses en sortoient avec les violettes , & fleurs de diverses couleurs , avec une si bonne odeur , qu'il sembloit bien qu'il y eust en ce lieu un petit paradis terrestre. La mere voyant un tel spectacle , s'en alla trouver incontinent son mary Lamberic , & d'une joye maternelle , luy dit : Monsieur , mon amy , nous avons une fille la plus belle , la plus gentille & de meilleure grace que nature fit oncques : car outre l'excellente beauté qui manifestement se voit en elle , les perles & pierres precieuses luy tombent de ses cheveux ; & de ses blanches mains (qui est chose merveilleuse) sortent roses , violettes & toute espece de fleurs , qui rendent à ceux qui la regardent une plaisante odeur : ce que je n'eusse jamais creu , si de mes propres mains je ne l'eusse touchée & veüe de mes propres yeux. Le mary qui naturellement estoit assez incrédule , & n'adjoustoit coustumierement foy aux paroles de sa femme commença à rire , & se gaudir d'elle : toutesfois estant d'elle de plus en plus stimulé , voulut voir ce qui en estoit. Et de fait , ayant appelé sa fille en sa presence , trouva encore plus

plus grande merveille qu'il n'avoit fait auparavant. Au moyen dequoy il en fut si joyeux & fier, qu'il n'estimoit personne en ce monde estre digne de l'avoir en mariage. Estant desja le bruit semé par tout de l'excellente & immortelle beauté de Blanchebelle, plusieurs Roys, Princes & Marquis accouroient de toutes parts pour acquiesir son amitié & l'avoir en mariage : mais il ne se trouva aucun d'entre eux de telle vertu qu'il la peust avoir ; pour autant que chacun d'eux avoit quelque imperfection, ou à redire. Finalement arriva Ferrandin, Roy de Naples, la vertu duquel & noblesse reluisoit comme le Soleil entre les petites estoilles : & estant allé trouver le Marquis luy demanda sa fille en mariage. Le Marquis le voyant si beau, si bien façonné & si puissant en seigneurie & en richesses, arresta les nopces ; & ayant fait appeller sa fille, sans plus tarder les fit toucher la main & s'entre-baiser. Les espousailles ne furent pas si-tost accordées, que Blanchebelle se souvint des propos que luy avoit tenu sa sœur Samaritaine, & s'estant esloignée de son espoux, & feignant de vouloir faire quelques services se retira en sa chambre, & s'estant enclose par dedans, s'en alla toute seule secrettement dedans le jardin par un petit huis de derriere, & d'une voix assez basse commença à appeller sa sœur Samaritaine. Mais elle ne comparoissoit plus comme de

cōſtume. Ce que voyant Blanchebelle fut fort eſtonnée, & ne la trouvant en aucun lieu du jardin, devint toute triſte & faſchée; cognoiſſant que cela luy eſtoit advenu, pour n'avoir pas eſté obeyſſante à ſes commandemens. Cela fait, elle ſ'en alla ſecrettement en ſa chambre, & ſ'asſit près de ſon eſpoux, qui l'avoit longuement attenduë. Les nopces finies, Ferrandin mena ſon eſpouſe à Naples, où avec grand triomphe & honneur il fut receu joyeuſement de toute la cité. Or Ferrandin avoit une maraſtre & deux ſœurs (qu'elle avoit eu d'un autre mariage) & luy en avoit voulu faire eſpouſer l'une d'icelles : mais pour autant que toute eſperance luy en eſtoit oſtée par le moyen de Blanchebelle, elle conceut une ſi grande colere & deſpit à l'encontre de ceſte pauvre jeune Dame, qu'elle ne la pouvoit ſouffrir devant ſes yeux, faiſant neantmoins ſemblant de l'aymer. La fortune voulut que le Roy de Tunis fit un grand appareil, tant par mer que par terre, pour faire la guerre à Ferrandin. Je ne ſçay ſi ce fut pour ce mariage, ou pour quelqu'autre occaſion : mais tant y a qu'il avoit deſja traversé juſques aux frontieres de ſon Royaume; tellement que Ferrandin fut contraint de prendre les armes pour defendre ſon pays, & aller trouver ſon ennemy. Et de fait, ayant préparé tout ce qui luy eſtoit neceſſaire, & ayant re-

commandé Blanchebelle (qui estoit enceinte) à sa belle-mere , se partit avec son armée. Bien-tost après ceste meschante & malheureuse marastre delibera de faire mourir Blanchebelle ; & pour ce faire elle fit venir deux de ses serviteurs qu'elle estimoit luy estre fort fidelles , & leur commanda qu'ils la menassent passer le temps en quelque lieu à l'escart , & qu'ils ne s'en retournaissent jamais de là sur peine de perdre la teste , qu'ils ne la tuassent en luy portant certains indices de sa mort. Les serviteurs plus prompts à mal faire , que d'entreprendre quelque bonne œuvre , furent obeyssans à leur maistresse ; & feignans de la mener à l'esbat en quelque lieu , firent tant qu'ils la conduisirent dedans un bois , où ils avoient desja fait leur dessein de la mettre à mort ; mais la voyant si belle & si gracieuse , ils en eurent pitié , & ne la voulurent point tuer , & seulement luy coupperent les mains , & luy arracherent les yeux , afin de les porter à la marastre , pour l'indice certain qu'ils l'avoient tuée. La meschante & detestable femme voyant ces indices , fut fort contente , & pour mettre en execution sa merveilleuse deliberation & entreprise , sema par tout le Royaume que ses deux filles estoient mortes , l'une de fièvre continuë , & l'autre d'une aposteme qui l'avoit estouffée ; & que Blanchebelle , pour la douleur du departement du Roy :

estoit avortée d'un fils , & qu'il luy estoit survenu une fièvre tierce qui la tourmentoit merveilleusement , & qu'il y avoit moins d'esperance de vie , que de crainte de mort. Mais la mauvaise & cruelle femme , en lieu de Blanchebelle , tenoit couchée dedans le liât du Roy une de ses filles , feignant que c'estoit Blanchebelle qui avoit la fièvre. Cependant Ferrandin qui avoit obtenu victoire contre son ennemy , s'en retourna vers sa maison en grand triomphe : & pensant trouver sa bien aymée Blanchebelle toute joyeuse & contente , la trouva maigre , défigurée & couchée dedans le liât. Et s'estant approché d'elle , en la regardant de près au visage , fut fort estonné de la voir si horrible , ne se pouvant persuader que ce fut Blanchebelle : tellement que l'ayant fait peigner , en lieu de perles & pierres précieuses qui souloient tomber de ses blonds cheveux , sortoient de gros poux qui la devoient à toutes heures ; & en lieu que de ses mains sortoient roses & fleurs odoriferantes , il en venoit une ordure , une graisse & une puanteur qui faisoit charger l'estomach de ceux qui la regardoient. Mais la malheureuse marastre luy donnoit à entendre que cela venoit de la longue maladie , qui produit coustumièremment tels effets.

Or la pauvre Blanchebelle ayant les mains coupées & les yeux crevez , estoit

en ce lieu solitaire en grande tribulation, appellant incessamment à son secours sa sœur Samaritaine; mais il n'y eut jamais personne qui luy donnast réponse, sinon Echo qui retentissoit de tous costez. Cependant que ceste pauvre Dame estoit en ceste passion, se voyant privée de toute consolation, voicy venir un homme assez aagé qui entra dedans le bois, avec un visage benin & piteux. Et ayant entendu une voix plaintive s'approcha petit à petit, & trouva ceste jeune Dame ayant les yeux crevez & les mains coupées, qui regrettoit ses malheurs. Le bon vieillard la voyant en si piteux estat, ne peut souffrir qu'elle demeurast ainsi seulette entre ces buissons & espines; mais vaincu d'une paternelle affection la mena en son logis, & la recomanda à sa femme, luy enchargeant expressement de la traiter bien; & commanda à trois filles qu'il avoit, plus luisantes qu'estoilles, de luy faire bonne compagnie, en la caressant à toutes heures, sans luy laisser avoir faute de chose quelconque. Mais sa femme, qui estoit plus cruelle que pitoyable, piquée d'une rage vers le mary, luy dit tels propos assez rudement: Mon mary, que voulez-vous que nous fassions de ceste femme aveugle & manchotte, non point par ses vertus, mais plus plustost pour recompense de ses forfaits? Alors le bon vieillard luy respondit; Fais seulement ce que je te dis, & fit

tu fais autrement ne m'attens pas au logis. Or demeurant ainsi la pauvre Blanchebelle avec sa femme & les trois filles, devisant de diverses matieres, & pensant à ses malheurs, pria une des filles que ce fust son plaisir de la peigner, ce que la mere print en mauvaise part, pour autant qu'elle ne vouloit en façon quelconque permettre que sa fille devint sa servante. Mais la fille qui'estoit d'un plus franc courage & debonnaire que la mere, se souvenant de ce que luy avoit enchargé le pere, & voyant que Blanchebelle monstroît en son visage avoir je ne sçay quoy de bon, & qu'elle sentoît bien sa bonne maison, vint à estendre son tablier blanc, qu'elle tenoit devant soy, & la commença à peigner amiablement. Mais elle ne luy eut pas à grand peine donné un tour de peigne, que de sa teste tomboient perles, rubis, diamans & autres pierreries de valeur inestimable. La mere voyant cela fut toute estonnée (non pas sans grande crainte) tellement que toute la haine qu'elle luy portoit auparavant, fut toute convertie en amitié. Et quand le bon vieillard fut de retour au logis, elles s'en coururent l'embrasser, se resjouïssans avec luy d'une telle fortune qui leur estoit survenue en si grande pauvreté. Blanchebelle se fit apporter une pleine seille d'eau fraîche, & se fit laver le visage & les bras coupez, d'où sortoient roses, violettes & fleurs en grande abon-

Blanche, en la présence de tous les assistans; en quoy tous l'estimoient plustost divine que humaine. Advint que Blanchebelle s'en voulut retourner au lieu où elle fut trouvée par le bon vieillard. Mais luy, sa femme & ses enfans voyans la grande utilité qu'ils recevoient d'elle, luy faisoient la meilleure chere du monde, & la prioient qu'elle ne se departist en façon quelconque, luy amenant beaucoup de raisons pour l'en divertir; mais elle qui persistoit fermement en son vouloir, se voulut partir, en leur promettant tousjours de retourner. Ce que le vieillard luy octroya, & sans plus retarder la ramena au lieu où il l'avoit autrefois trouvée. Puis elle en chargea au vieillard qu'il se partist de là, & qu'il retournaist vers elle sur le soir, afin de la ramener avec luy. Si-tost que le vieillard s'en fut allé, la pauvre Blanchebelle commença à aller çà & là par la forest, appellant continuellement à son secours Samaritaine: tellement que les cris & les plaintes montoient jusques au ciel. Mais Samaritaine (nonobstant qu'elle fust assez près d'elle, sans jamais l'avoir abandonnée) ne luy vouloit point respondre. Alors la pauvre desolée voyant que ses paroles estoient semées en vain, disoit en pleurant: Que feray-je plus en ce monde, puis que je suis privée de mes yeux & de mes mains, & me defaut tout secours humain? Au moyen dequoy estant

la guerit. Cela fait, Samaritaine ayant despoüillé la laide peau de couleuvre, devint une fort belle jeune fille. Or quand ce vint sur le soir, que le Soleil cachoit desja ses luisans rayons, & que les tenebres de la nuit commençoient à apparoitre, le bon vieillard s'en vint assez hastivement en la forest, & trouva Blanchebelle qui estoit assise avec une autre Nimphe; & l'ayant contemplée au visage, demeura tout estonné, pensans quasi que ce ne fust pas elle. Toutesfois l'ayant à la fin reconnuë: luy dit: Comment, ma fille, vous estiez ce matin aveugle & manchotte, & vous estes maintenant si-tost guerie! Alors Blanchebelle respondit: Ce n'est pas par moy, mais par la vertu & courtoisie de ceste-cy, qui est assise près de moy, laquelle est ma sœur. Et s'estans levées, s'en allerent d'une grande joye avec le vieillard en sa maison, où elles furent receuës honorablement de la femme & des filles. A quelque temps de là, Samaritaine, Blanchebelle & le vieillard s'en allerent avec les trois filles demeurer en la ville de Naples, & ayant espié un lieu vague, qui estoit vis-à-vis du palais du Roy, s'affirent en ce lieu; & quand la nuit fut venuë, Samaritaine print une verge de laurier en sa main, & frappa par trois fois la terre, en disant certaines paroles; & tout incontinent voilà le plus beau & le plus magnifique palais du monde, qui se

dressa en ceste place vague. Le matin ensuiuant le Roy Ferrandin se mit à la fenestre, & voyant un si riche & superbe palais, fut tout estonné. Et ayant appelé sa femme & sa marastre, le vindrent voir. Toutesfois elles ne s'en contenterent gueres, doutant qu'il ne leur en advint quelque malencontre. Estant ainsi Ferrandin à contempler ce palais, & l'ayant considéré de toutes parts, haussa les yeux, & apperceut par la fenestre d'une chambre deux matrones, qui en beauté faisoient envie au Soleil. Et si-tost qu'il les eut apperceuës, il luy vint une grande rage au cœur, parce qu'il luy sembla qu'une d'icelles avoit la semblance de Blanchebelle. Et leur ayant demandé leur nom & d'où elles venoient, il luy fut respondu que c'estoient femmes bannies, qui venoient du pays de Perse avec leurs biens, pour habiter en ce lieu. Leur ayant demandé si c'estoit leur plaisir qu'il les allast un peu visiter avec les Dames de sa maison, elles luy respondirent qu'il leur seroit très-agreable; mais qu'il estoit beaucoup plus convenable & honnestes qu'elles, comme sujettes, les allassent trouver, que luy, comme Seigneur, leur fist cest honneur avec Dames, & qu'il ne leur appartenoit pas tant d'honneur. Ferrandin ayant fait appeller la Royne avec les autres Dames (nonobstant qu'elles y allassent mal volontiers, craignans leur prochaine rui-

ne) s'en allerent au palais des deux matrones, qui les receurent honorablement, avec grandes caresses; leur monstrans les belles galeries, les spacieuses sales, & les chambres bien garnies, les murailles, lesquelles estoient de fin albastre & riche porphyre, où il y avoit des figures qui sembloient estre vives. Après avoir suffisamment visité ce triomphant palais, la jeune Damoiselle s'estant approchée du Roy, le pria humblement que ce fust son plaisir de prendre la patience de venir un jour dîner avec elles. Le Roy qui n'avoit pas le cœur de pierre, & qui estoit de nature magnanime & liberal, accepta gracieusement l'offre, & les ayant remercié du bon accueil qu'elles luy avoient fait, se partit avec la Royne, & retourna vers son palais. Le jour du convy venu, le Roy, la Royne & la marastre avec leurs riches accoustremens, & en compagnie de diverses matrones, s'en allerent au banquet magnifiquement appareillé. Si-tost qu'ils se furent lavez, le maistre d'hostel fit asseoir le Roy & la Royne à une table un peu plus eminente que les autres: vray est qu'elle joignoit contre. Puis fit asseoir tous les autres selon leur degré, & chacun dîna joyeusement & à son aise. Le superbe festin & les tables ostées, Samaritaine se va lever, & se tournant vers le Roy & la Royne, leur va ainsi dire: Sire, afin que nous ne soyons point oisifs, il

faut que chacun de nous propose quelque chose qui soit de plaisir & de contentement, ce que chacun confirma estre bien fait. Toutesfois il ne s'en trouva point qui eust la hardiesse de proposer quelque chose. Au moyen dequoy Samaritaine voyant que chacun se taisoit, dit ainsi : Puis qu'on n'en veut rien dire, il ne desplaira point à vostre majesté, si je fais venir une de nos Damoiselles pour nous donner quelque passe-temps. Et ayant fait appeler une Damoiselle quis'appelloit Silverie, luy commanda qu'elle print sa Cithare pour chanter dessus quelque chanson à la louange du Roy. Icelle très-obeyssante à sa maistresse, print sa Cithare, & s'estant mise vis-à-vis du Roy, commença à jouer harmonieusement, en chantant l'histoire de Blanchebelle, depuis le commencement jusques à la fin, sans toutesfois la nommer. Et quand l'histoire fut finie, Samaritaine se leva, & demanda au Roy quelle punition meritoit celuy qui auroit commis un si grief excez. La marastre qui pensoit par sa prompte réponse, couvrir sa meschanceté, sans attendre que le Roy respondist, dit audacieusement : Une fournaise ardente conviendrait à celuy. Alors Samaritaine plus embrasée de despit qu'un charbon de feu ardent, luy va dire : Tu es celle (maistresse) par qui est venu un tel scandale. Et toy meschante & maudite femme que tu

Es, tu te condamnes de ta bouche propre. Puis se tourna vers le Roy, & luy dit d'un visage riant : Sire, voilà vostre Blanchebelle ; voilà vostre chere espouse que vous aimiez tant : voilà celle sans laquelle vous ne pouviez vivre. Et en signe de ce, elle cominanda aux trois filles du vieillard de luy peigner en la presence du Roy ses blonds cheveux, desquels tomboient perles, bagues precieuses ; & de ses mains violettes & roses. Et pour plus grande assurance, elle monstra au Roy son col, environné d'une petite chaine de fin or, qui apparoissoit entre chair & peau, comme en un cristal. Le Roy ayant cogneu par vrais indices & signes evidens, que c'estoit sa Blanchebelle, commença tendrement à plorer & l'embrasser : & devant que de se partir de là, il fit allumer une fournaise ardente, & fit brusler la marastre avec sa fille. Voilà comment justement elles porterent la punition de leur peché. Cela fait, les trois filles du vieillard furent honorablement mariées : & depuis Ferrandin vesquit longuement avec sa belle Blanchebelle & Samaritaine, laissant après luy des heritiers legitimes pour succeder au Royaume.

La Fable de Laurette avoit desja fait plorer les compagnes ; mais si-tost qu'elle fut finie, Madame commanda qu'on poursuivist l'ordre commencé, & qu'elle proposast son Enigme ; ce qu'elle fit gracieusement, en disant ainsi ;

*Tout au milieu d'un beau pré florissant
 Vint à passer une Dame cruelle,
 Trainant la queue & son chef surhaussant,
 Courant soudain, se montrant fort rebelle.
 L'œil est aigu, le toucher fort puissant,
 La langue branle, & ne parle, ne beelle.
 En longueur mince, & vient à grisonner.
 Sage est celui qui pourra deviner.*

Chacun escouta attentivement le subtil Enigme de la gracieuse Laurette ; laquelle voyant qu'il ne se pouvoit résoudre , dit : Mesdames honorées , afin de ne vous tenir en doute , & ennuyer vos esprits troublez de la piteuse Fable par moy racontée , je vous en diray , s'il vous plaist , brièvement la resolution. La Damoiselle n'est autre chose que la couleuvre ; laquelle allant par les prez , tenant la teste haute & la queue basse , espouvante de ses yeux tous ceux qui la regardent. Chacun s'esmerveilla qu'il ne se trouva aucun en la compagnie qui peut interpreter l'Enigme de Laurette : mais s'estant retirée en sa place , Madame fit signe à Alterie qu'elle commençast à dire : ce qu'elle fit , en faisant premierement une grande reverence , puis commença ainsi :

FABLE IV.

Fortunio ayant receu une injure du pere & de la mere, s'en alla vagabond par le monde ; & par cas d'aventure, se trouva en un bois, où il trouva trois animaux qui le recompenserent. Puis estant en Pologne pour une jousté, il obtint en mariage Doralice, fille du Roy.



ON dit en commun proverbe ; qu'il ne se faut jamais jouer à faire mal, ny se railler de la verité : car celuy qui voit, oit & se tait, il ne nuict point à autrui, & vit tousjours en paix.

Ily eut donc aux frontieres de Lombardie, un homme appelé Bernio, lequel nonobstant qu'il fust abundant aux biens de la fortune, si ne s'estimoit-il point inferieur aux autres de cœur & d'esprit. Il print en mariage une notable femme nommée Alquie ; laquelle combien qu'elle fust d'assez basse condition, si estoit-elle de bon esprit & loüables mœurs, & aymoît autant son mary que quelque autre qui se

232 LA III. N U I C T ;

trouva oncques. Ils desiroient grandement avoir enfans , mais Dieu ne leur en faisoit point la grace ; parce que l'homme ne sçait pas le plus souvent , en demandant , ce que plus luy convient. Estans ainsi en ce desir , & voyans que fortune leur estoit du tout contraire , estans contrains d'un long desir , delibererent d'en prendre un pour leur propre fils & legitime , & iceluy nourrir & entretenir. Et de fait, s'en allerent un jour de grand matin au lieu deputé pour les enfans qui sont abandonnez de leurs peres : ils en apperceurent un quileur sembla plus beau & plus mignard à leur gré que tous les autres ; tellement qu'ils le prindrent & le nourrirent le plus soigneusement qu'il leur fut possible , en l'instruisant & façonnant en toutes bonnes mœurs. Advint , comme il pleut à celuy qui gouverne & amollit toutes choses à son gré , que sa femme Alquie se vint à engrossir ; & le terme venu , elle enfanta un fils , qui ressembloit du tout au pere , dont ils furent merueilleusement joyeux , & le nommerent Valentin. Estant bien & delicatement nourry & entretenu , il croissoit en vertus & bonnes mœurs , & aymoit tant son frere Fortunio , qu'il ne pouvoit vivre aucunement sans luy. Mais discord qui est ennemy de tout bien , voyant une telle amitié entre eux , & ne pouvant plus souffrir une si grande tranquillité , un jour s'y entre-mesla , & fit
tant

rant qu'ils commencerent à gouter les fruits aspres & amers : car un jour entre les autres , en jouant ensemble (comme est la coustume des enfans) s'estans quelque peu rechauffez , & ne pouvant Valentin souffrir que Fortunio le surmonta en jeu , il entra en si grande rage & fureur , qu'il l'appella bastard , & fils d'une simple femme. Ce que entendant Fortunio , & s'esbaissant grandement de cela , se troubla grandement , en disant à Valentin : Comment ! suis-je bastard ? Et Valentin en grondant entre ses dents le confirmoit assez evidemment : tellement que Fortunio estant de cest outrage grandement fasché , se partit du jeu , & s'en alla trouver sa mere putative , en luy demandant doucement s'il estoit son fils & de Bernio. Alquie respondit que ouy. Et ayant apperceu que Valentin l'avoit outragé , le menassa fort & ferme , jurant de l'en chastier. Or Fortunio par les paroles d'Alquie eut grand soupçon , & qui plus est , tenoit pour certain qu'il n'estoit pas son fils. Ce neantmoins il la voulut souventesfois taster s'il estoit son vray fils , & delibera de le sçavoir à toutes forces : tellement que Alquie voyant que Fortunio perséveroit en son obstiné vouloir , ne le pouvant plus divertir de telle importunité , luy confirma qu'il n'estoit pas son vray fils ; mais qu'il avoit esté nourry en leur maison pour l'honneur de Dieu , & pour

remission de ses pechez & de son mary. Ces paroles furent autant de coups de couteau au cœur de ce jeune fils, & luy augmentèrent douleur sur douleur. Estant ainsi outre mesure dolent, ne pouvant avoir le cœur de se tuer luy-mesme par aucune violence, delibera de se departir de la maison de Bernio, & aller vagabond par le monde, jusques à tant qu'il eust trouvé quelque bonne fortune. Alquie voyant le vouloir de Fortunio estre plus prompt que jamais, & ne voyant aucun moyen de le divertir de telle entreprinse, luy va donner (par un despit qu'elle avoit) sa malediction, priant Dieu, que s'il advenoit qu'il montast jamais sur mer, qu'il fust englouti par les Sereines, tout ainsi que sont les navires par les vagues & tourmentes de la mer. Alors Fortunio poussé de l'impetueux vent de despit & de fureur, sans avoir toutesfois entendu la malediction maternelle, se partit sans prendre congé de ses parens, & print son chemin vers l'Occident. Après avoir passé estangs, valées, montagnes & autre lieux sauvages & aspres, finalement un matin entre sexte & none, il arriva en une forest espaisse & fascheuse, où de prime face il rencontra un Loup, un Aigle & une Fourmy, qui pour la prinse d'un Cerf estoient en grande dissention pour le departir, & ne se pouvoient aucunement accorder. Estans ainsi en ce debat furieux,

& se voulant battre l'un l'autre à toutes forces ; enfin ils appointerent que ce jeune Fortunio , qui estoit alors survenu , vuideroit leur procez , donnant à chacun sa part , selon qu'il luy sembleroit plus convenable. Et ainsi demeurèrent contens , promettans l'un à l'autre de se taire , & ne contrevenir aucunement à la sentence definitive , en quelque forme qu'il la donnast , voire fust-elle injuste. Fortunio accepta volontiers ceste charge & commission , & ayant d'un meur jugement considéré la condition d'un chacun , divisa ainsi la proye. Premièrement , il donna au Loup , comme un animal gourmand & bien garny de dents , tous les os avec la chair maigre en recompense de ses labeurs. A l'Aigle , qui estoit oiseau ravissant & sans dents , pour recompense de ses labeurs , il luy offrit pour sa part les parties interieures , avec la graisse qui est à l'entour de la chair & des os. Puis à la grenetiere & soigneuse Fourmy , à qui nature n'avoit pas baillé la puissance que pouvoit avoir le Loup & l'Aigle , pour recompense de son travail , il luy assigna le cerveau tendre. Chacun acquiesça à ceste grave & juste sentence , qui estoit la mieux fondée du monde : tellement que tous furent contens , en le remerciant le plus gracieusement qu'il leur fut possible , de la courtoisie & humanité dont il avoit usé envers eux. Et pour autant que l'in-

gratitude est à blâmer sur tous vices, ils s'accorderent tous trois ensemble, que ce jeune fils ne se partiroit point d'avec eux, sans estre très-bien recompensé du plaisir qu'ils avoient receu de luy. Voilà donc le Loup, qui en recognoissance de ceste notable sentence, luy va dire : Frere, je te donne ceste vertu, que toutesfois & quantes que tu auras desir de devenir Loup, & que tu diras, je voudrois estre un Loup, tu le deviennes, en reprenant toutesfois tousjours ta premiere forme, quand bon te semblera. Par un mesme moyen fut guerdonné de l'Aigle & de la Fourmy. Alors Fortunio estant tout joyeux de ce don receu, les ayant remerciez le mieux que faire se peut, print congé d'eux & se partit, & chemina tant qu'il arriva à la noble & peuplée cité de Pologne (que tenoit pour lors le puissant Roy Odescalque) qui avoit une fille nommée Doralice; & en la voulant marier honorablement, avoit fait publier un tournoy par tout son Royaume, ayant deliberé de ne la marier point, sinon à celuy qui auroit la victoire & le prix du tournoy. Au moyen dequoy plusieurs Ducs, Marquis & autres puissans Seigneurs, estoient venus de toutes parts pour conquister ce precieux prix : & y avoit desja un jour expiré de ce triomphant tournoy, quand un laid Sarrazin, contrefait de visage, de forme estrange & noir comme poix,

estoit d'icelle superieur. La fille du Roy considerant la laide contenance du Sarrazin, avoit une grande douleur en son cœur, de ce qu'un tel monstre & babouin emportoit le prix d'une telle jouste : & ayant appuyé son vermeil visage sur sa tendre & delicate main, se faschoit grandement, maudissant sa mauvaise fortune, souhaitant plustost mourir que de tomber entre les mains d'un si laid quinaut pour estre sa femme. Fortunio estant entré en la cité, & ayant veu ce triomphe, & l'assemblée de ceux qui joustoient, & ayant entendu la cause d'un si magnifique tournoy, fut embrasé d'un merveilleux desir de montrer sa vaillantise en ce triomphe. Mais pour autant qu'il estoit degarny de tout ce qui appartenoit en tel exercice, il s'en faschoit grandement. Et estant en ces regrets, & haussant sa veuë en haut, il apperceut Doralice fille du Roy, qui estoit appuyée sur une riche fenestre, estant environnée de plusieurs gracieuses Damoiselles & honorables matrones, apparoissant tout ainsi que le clair Soleil entre les petites estoilles. Quand la nuit obscure fut venue, & que chacun se fut retiré en son logis, Doralice se retira toute seule & bien faschée en une petite chambre, non moins belle que bien parée. Et estant ainsi seulette, & la fenestre ouverte, voilà Fortunio, lequel n'eut pas si tost apperceu Doralice, qu'il commença

à dire : Que ne suis-je maintenant un Aigle ! Il n'eut pas si-tost finy ces propos qu'il devint un Aigle , & estant volé en la fenestre , après s'estre derechef transformé en homme , se presenta tout joyeux devant elle. Or la pucelle eut frayeur en le voyant & commença à crier à haute voix , comme si les chiens eussent esté après pour la devorer. Le Roy qui n'estoit pas trop loing de sa fille , oyant le cry , s'en courut vers elle : & ayant entendu qu'il y avoit un jeune fils en la chambre , se mit à chercher par tout , & ne trouvant rien s'en retourna reposer ; parce que le jeune Fortunio s'estant transformé en Aigle , avoit prins sa volée par la fenestre. Le pere ne se fut pas si-tost retiré , que derechef la pucelle se mit à crier , à cause que le jeune fils s'estoit représenté à elle comme la premiere fois ; mais Fortunio oyant le cry , & craignant le danger se changea en Fourmy , & se cacha dans les blonds cheveux de la belle pucelle. Odescalque courut entendre la cause du cry de sa fille : & ne voyant aucune chose , se commença à fascher contre elle , & la menassa assez rudement de luy faire un tour qui ne luy plairoit gueres , si elle se mettoit plus à crier ; & se partit tout courroucé , pensant qu'elle eust veu en imagination un de ceux qui avoient esté tuez au tournoy pour l'amour d'elle.

Le jeune fils ayant entendu les propos

du pere, & qu'il estoit party, print la premiere forme d'homme. Et si-tost que Doralice l'eust apperceu, elle se voulut jeter incontinent hors du liſt & crier, mais elle n'eut pas loisir; car le jeune homme luy vint à clore la bouche de l'une de ses mains, & luy dit: Ma très-honorée Dame, je ne suis point icy venu pour vous oster vostre honneur, mais plustost pour vous reconforter, & estre vostre humble serviteur. Si vous criez plus, de deux inconveniens l'un adviendra; ou que vostre bonne renommée sera blessée, ou que vous ferez cause de vostre mort & de la mienne. Parquoy Madame, ma maistresse & de mon cœur joüissante, ne vueillez point en un mesme temps souiller vostre honneur, & mettre en danger la vie de l'un & de l'autre. Cependant que Fortunio disoit ces paroles, Doralice ploroit, & en se plaignant ne pouvoit souffrir aucunement l'espouvantable assaut. Mais Fortunio, voyant le courage de la jeune Dame ainsi troublée, tant fit & dit avec ses paroles sucrées, qui eussent fait fendre des pierres, qu'il adoucit le vouloir obstiné d'icelle; laquelle estant vaincüe de la bonne grace du jeune fils, commença à s'appivoiser avec luy. Et voyant ce jeune fils de belle apparence, & robuste & bien formé de ses membres, considerant aussi en soy-mesme la laide contenance du Sarrazin, estoit grandement faschée en son

cœur de ce qu'il devoit emporter le prix de la jousté, & conséquemment jouir de sa personne. Estant ainsi en ces discours, le jouvenceau luy dit : Mademoiselle, si j'avois le moyen, je jousterois volontiers, & entrepris sur ma vie d'emporter le prix. La Damoiselle respondit : Si ainsi estoit, autre personne que vous ne seroit jouissant de ma personne. Et le voyant chaud, dispos à telle entreprise, l'accommoda de deniers & de bagues infinies. Ce jeune fils print joyeusement ces deniers, & luy demanda quel habit il prendroit qui luy fust plus agreable. Et elle luy respondit, de satin blanc. Et tout ainsi qu'elle ordonna, il fit. Le jour ensuivant, Fortunio estant garny de riches harnois, armes luisantes, couvert d'une casaque de satin blanc, brodée de fin or, avec ouvrages exquis, monta sur un puissant & courageux cheval couvert de la couleur du chevalier, & sans estre aucunement cogneu, s'en alla presenter en la place. Le peuple qui estoit desja assemblé au magnifique spectacle, voyant ce preux chevalier incogneu tenant la lance sur sa cuisse pour joster commença à le regarder par grandes merveilles : tellement que chacun disoit : Mon Dieu, qui est celuy là qui est si magnifique, lequel on ne cognoit point. Estant Fortunio entré en la lice, somma son competitor d'entrer, & ayans tous deux baillé là les lances, se vindrent à rencontrer

trer comme deux Lyons deschainez. Et
 sur ce point le jeune chevalier donna si
 grand coup en la teste du Sarrazin qu'il
 toucha la croupe du cheval, & demeura
 mort en terre, tout ainsi qu'un verre jetté
 contre une muraille. Et autant qu'il en
 rencontra ce jour là en la lice, autant y
 en eut-il d'abbatus. Cependant la Da-
 moiselle le regardoit d'un visage guay &
 joyeux, remerciant Dieu en soy-mesme de
 l'avoir delivrée des mains du laid Sarra-
 zin, & priant incessamment luy donner
 la victoire. La nuit venue, on fit appel-
 ler Doralice pour souper, ce qu'elle re-
 fusa; mais se fit apporter quelques vian-
 des delicates, avec vins exquis, feignant
 de n'avoir point encore d'appetit de man-
 ger; & si elle en avoit besoin, elle man-
 geroit sur le tard. Et s'estant enfermée
 seule en la chambre, & ayant laissé la fe-
 nestre ouverte, attendit d'un grand desir
 son amy: & estant retourné comme la
 nuit precedente, ils souperent tous deux
 ensemble joyeusement. Puis Fortunio luy
 demanda comment il se devoit vestir le
 lendemain. Elle luy respondit, de satin
 verd, brodé de fin or & argent, & son
 cheval garny de mesme, ce qu'il mit en
 execution. S'estant le jouvenceau présenté
 en la place à l'assignation donnée, il en-
 tra dedans le tournoy, & s'il avoit le jour
 precedent montré sa prouesse, encore la
 monstra-t'il davantage ce jour là: telle-

ment que chacun disoit & affermoit d'une voix que la pucelle estoit sienne. Le soir venu, la Damoiselle toute joyeuse usa de la mesme fiction du soir precedent, attendant son amoureux qui vint souper gracieusement avec elle. Et luy ayant demandé de quelle couleur il se devoit vestir le jour ensuivant, elle respondit de satin cramois, tout brodé d'or & de perles, avec la garniture du cheval d'une mesme façon, parce que je seray (dit-elle) vestuë d'une mesme couleur. Madame, dit Fortunio, ne vous esmerveillez point si je viens demain plus tard au tournoy que les autres fois, car ce ne sera pas sans cause que je retarderay ma venue. Le troisieme jour venu, & l'heure du tournoy, tout le peuple attendoit d'un grand desir l'honorable triomphe; mais il ne se trouva aucun qui osast comparoistre pour l'invincible force du chevalier incogneu. Or le trop long sejour du gentil chevalier, non seulement donna grand soupçon au peuple, mais aussi à la Damoiselle, nonobstant qu'il l'en eust auparavant advertie; & vaincuë d'une douleur extreme, sans que nul s'en aperceust, se laissa tomber evanoüye. Mais si tost qu'elle entendit que Fortunio s'approchoit de la place, les esprits elgarez commencerent à retourner à leur premiere place. Vous eussiez veu Fortunio vestu d'un riche accoustrement, & la garniture de son cheval d'or fin, toute semée de beaux

rubis , esmeraudes , saphirs & grosses perles , qui (selon le jugement universel) valaient plus qu'un Royaume. Si-tost qu'il fut arrivé en place , tout le peuple se mit à crier à haute voix : Vive , vive le Chevalier incogneu ; en sifflant & frappant de ses mains. Estant entré en la lice , il se porta si vaillamment , que les ayant tous renversez par terre , il obtint la victoire. Et estant descendu de son puissant cheval , il fut enlevé sur les espaules des plus apparans de la cité , & porté incontinent en la presence du Roy , avec trompettes & instrumens de musique , accompagnez de cris & voix qui alloient jusques au ciel. Après qu'on luy eut osté le heaume & le harnoy luisant , le Roy apperceut ce beau fils , & ayant fait appeller sa fille , en la presence de tout le peuple la fit espouser avec grand triomphe , tenant table ouverte à tous venans , par l'espace d'un mois. Ayant Fortunio demeuré quelque temps avec sa bien aymée , estimant qu'il n'estoit pas convenable de demeurer ainsi oisif , & conter les heures , comme font ceux qui sont sots & privez de bon sens , delibera de se partir , & s'en aller en lieu où sa proüesse fust cogneüe ; & ayant fait apprester une galere , avec grands tresors que son beau pere luy avoit donnez , ayant prins congé de luy & de sa femme , il monta sur lamer , où il eut le vent assez favorable , tant qu'il entra en la mer Atlan-

rique ; & ayant desja fait environ cinq ou six lieues en icelle , voilà la plus grande Sereine qu'on veit oncques qui s'approcha de la galere , & commença à chanter doucement. Or Fortunio qui tenoit la teste sur le bord de la galere pour escouter ce doux chant , se vint à endormir , & cependant il fust par la Sereine englouty ; laquelle se cacha incontinent dedans la mer. Les mariniers ne le pouvans secourir , crevoient de douleur , & estans ainsi tous desolez , & quasi comme desesperes , couvrirent la galere de noir , & s'en retournerent vers Odescalque , luy racontans le cas horrible & estrange qui leur estoit survenu en mer. Dont le Roy & Doralice , & toute la cité sentans grande douleur , se vestirent de noir pour faire le dueil d'un tel personnage. A quelque temps de là Doralice enfanta un beau fils , lequel estant nourry mignardement , vint jusques à l'aage de deux ans. Et la pauvre desolée Doralice considerant d'estre privée de son cher espoux , & que toute esperance estoit perduë de le pouvoir jamais recouvrer ; delibera d'un haut & magnanime courage , de se mettre à la fortune de la mer , & essayer son aventure , nonobstant que son pere ne le voulust consentir. Et de fait , ayant fait preparer une galere bien armée , & equipée d'un grand avantage , elle print avec soy trois pommes fort bien ouvrees , l'une

desquelles estoit de laitton, l'autre d'argent, & la troisiéme de fin or. Cela fait, ayant prins congé de son pere, monta sur mer avec son petit fils, & ayant fait hauser les voiles, elle entra en haute mer. La pauvre Dame navigeant ainsi, ayant la mer assez favorable, pria les mariniers de la mener au lieu propre où la Sereine engloutit son mary. Ce qui fut fait : estant arrivée en ce lieu, le petit fils commença à plorer & crier à pleine gorge, & ne le pouvant appaiser, le mere print la pomme de cuivre & la bailla à ce petit enfant; & cependant qu'il s'en jouïoit, la Sereine l'apperceut & s'approcha de la galere, & en levant la teste hors de l'eau, dit à la femme : Dame, donnez-moy ceste pomme, car j'en suis grandement amoureuse; & la Dame luy respondit, qu'elle ne la luy bailleroit point, à cause que c'estoit le passe-temps de son petit enfant. Si tu me la veux bailler, dit la Sereine, je te monstreray ton espoux jusques à l'estomach. La Dame entendant ces propos, & desirant grandement de voir son espoux, la luy donna courtoisement : & la Sereine en recompense d'un tel don luy monstra, suivant sa promesse, son mary jusques à l'estomach. Puis l'ayant plongé dedans la mer, ne le laissa plus voir pour lors. Or la Dame, qui avoit diligemment considéré tout ce fait, eut plus grand desir de le voir tout, & ne sçachant que

faire ny que dire , se confortoit avec son petit enfant ; & afin de le faire taire , elle luy bailla la pomme d'argent ; mais si-tost que la Sereine l'eut apperceuë , la demanda en don : elle toutesfois se frottant les espaules , & voyant que c'estoit le passe-temps de son petit enfant , refusoit de la luy bailler ; tellement que la Sereine luy dit : Si tu me la veux donner , je te monstraray ton espoux jusques aux genoux. La pauvre , Doralice qui avoit plus grand desir que jamais de voir son cher espoux , prefera l'amour du mary à celuy de son petit fils ; & la luy donna joyeusement , & la Sereine ayant tenu sa promesse , se plongea derechef en l'eau. Cependant la pauvre Dame ne sçavoit que dire & quel party prendre pour delivrer son mary de mort ; & ayant prins son petit fils entre ses bras , qui pleuroit incessamment , se consoloit avec luy. Le petit fils se souvenant de la pomme de laquelle il se souloit jouer , se mit si fort à pleurer , que la mere fut contrainte de luy bailler la pomme d'or. Mais incontinent que ce gourmand poisson l'eut apperceuë , & ayant considéré qu'elle estoit plus belle que les autres , la requit en don , & sceut si bien faire & dire , que la mere la luy bailla , contre le vouloir de son petit enfant. Et pour autant que la Sereine luy avoit promis de luy faire voir son mary tout entier , afin de ne rompre sa promesse , s'appro-

cha de la galere , & ayant un peu levé le dos , le luy monstra apertement. Alors Fortunio se voyant hors de l'eau , assis sur le dos de la Sereine , estant en liberté , sans plus retarder , s'en va proferer ces paroles : Je voudrois estre un Aigle , & tout soudain il devint Aigle ; & ayant prins sa volée , s'en va aborder sur le mas de la galere , & descendit à bas en la presence de tous les mariniers , en la propre forme qu'il estoit auparavant. Puis commença à baïser & embrasser premierement sa femme , avec son petit enfant , & toute la troupe de mariniers. Iceux très-joyeux d'avoir recouvré l'espoux , s'en retournerent au Royaume paternel ; & si-tost qu'ils furent arrivez au port , vous eussiez ouy trompettes , tabourins, fiffres , hauts-bois & autres instrumens sonner de toutes parts. Le Roy voyant cela s'esmerveilla , ne sçachant que cela signifioit. Tout incontinent après, voicy arriver un messager qui luy porta les nouvelles comme son gendre Fortunio estoit arrivé avec sa fille. Estans descendus de la galere , ils s'en allerent tout droit au palais , où ils furent receus en grand triompher. A quelque temps de là Fortunio s'en alla vers sa maison , & s'estant fait devenir Loup , devora sa marastre & son frere Valentin , pour le tort qu'ils luy avoient fait. Puis monta à cheval , & s'en retourna au Royaume de son beau pere , où il vesquit longuement en

grande fecilité avec s'amie Doralice , au grand contentement des deux parties.

Si-toft que Alterie eut finy fa piteufe Fable , la Royne luy commanda de reciter fon Enigme , ce qu'elle fit , en difant ainfi :

*Bien loin d'icy un animal fe treuve ;
De foy cruel , gentil en apparence ,
En deux partis la nature l'efpreuve ,
Et d'inhumaine & feminine effence ,
Affez plaifant , & de t'aimer contreuve ;
Son chant fort doux , meine commencement
Les gens à mort avec un grand tourment.*

Le notable Enigme recitée par Alterie fut interpreté en diverfes manieres , & ne s'en trouva point qui frappast au but ; tellement que la belle Alterie voyant qu'on ne le pouvoit refoudre , dift humainement : Mefseigneurs , le vray fens de mon Enigme n'est autre chofe que la Sereine , qui fe tient dedans l'eau de la mer , & est une beſte fort plaifante à voir , parce qu'elle a le viſage , l'eſtomach , le corps & les bras d'une belle Damoiſelle , & tout le reſte est poiſſon plein d'eſcailles , affez cruel. Elle chante doucement , & de fon chant elle vient à endormir les mariniers pour les faire precipiter en l'eau. Chacun loüa ceſte gracieuſe & ſubtile reſolution : mais elle remercia toute l'aſſiſtance de l'avoir ainſi eſcoutée. Cela fait Madame com-

manda à Eritrée qu'elle poursuivist l'ordre commencé, ce qu'elle fit, en disant :

F A B L E V.

Isotte femme de Lucafer Albani de Bergame, cuidant par finesse decevoir Travaillin, vacher de son frere Emilian, pour le trouver menteur, perdit la metairie de son mary, & s'en retourna au logis avec la teste d'un taureau, ayant les cornes dorées, & toute honteuse.



A force de l'infailible verité est si grande, que selon le tesmoignage de la sainte Escriture, il seroit plus facile que le ciel & la terre print fin, que la verité vint à defaillir: joint que la verité a si grand privilege (selon le dit des sages du monde) qu'elle surmonte le temps. Et tout ainsi que l'huile estant mise en quelque vaisseau, demeure tousjours au dessus; aussi la verité vient au dessus du mensonge. Au moyen dequoy on ne se doit point esmerveiller de mien com-

menacement ; car je l'ay fait estant esmeuë de la meschanceté d'une mauvaise femme , laquelle cuidant par ruses & paroles feintes porter un pauvre jeune fils simple , à dire le mensonge , il dit la verité , dont elle fut à la fin confuse & infame , comme femme malheureuse ; comme je vous raconteray avec la presente Fable , laquelle vous sera en temps & lieu plustost profitable que dommageable , si vous en goûtez bien le sujet.

Vous devez donc sçavoir , notables Dames , que à Bergame cité ancienne de Lombardie , y avoit une fois un homme riche & puissant , nommé Pierre Marie Albani , qui avoit deux enfans , l'un desquels se nommoit Emilian & l'autre Lucafer. Avec ce il avoit deux metairies , l'une s'appelloit Gorem & l'autre Pedren. Or les deux freres , c'est à sçavoir Emilian & Lucafer , après la mort de Pierre Marie leur pere , divisèrent entr'eux les metairies ; tellement que Pedren escheut à Emilian , & Gorem à Lucafer. Emilian avoit un fort beau troupeau de brebis , avec un grand nombre de jeunes taureaux & une bergerie de vaches ; & de tout cela estoit gardien un nommé Travaillin , homme autant fidele & loyal que rien plus , & avoit ceste bonne grace en luy , que pour mourir il n'eust point dit un mensonge , gardant ses bestes en si grande diligence , qu'il n'avoit point de pareil en

ce monde. Or tenoit-il avec ces vaches quelque quantité de taureaux, entre lesquels y en avoit un si beau & tant agreable à Emilian, qu'il lui avoit fait dorer les cornes d'or fin, & jamais Travaillin n'alloit à Bergame, qu'Emilian ne lui demandast nouvelles de son taureau aux cornes d'or. Or advint que se trouvant Emilian à deviser avec son frere Lucafer, & autres siens domestiques, survint Travailin, lequel fit signe à Emilian de luy vouloir un peu parler : & luy, ayant laissé la compagnie de son frere & d'autres amis, s'y en alla, & fut assez long-temps à luy tenir propos. Et pour autant qu'Emilian luy avoit fait desja souventesfois ce tour, de laisser ses parens & amis, pour aller parler à un vacher, Lucafer ne le pouvoit aucunement endurer; tellement qu'un jour estant embrasé d'un despit, il monta en colere, & dit à Emilian : Je suis bien scandalisé de vous mon frere, de ce que vous faites plus de conte d'un vacher & d'un coquin, que de vostre frere propre & autres bons amis ; car non seulement une fois, mais mille (s'il faut ainsi dire) vous nous avez laissé en pleine rue & au milieu du jeu, comme bestes qui vont à la boucherie ; & vous accointez de ce gros lourdaut de Travaillin vostre vacher, pour deviser avec luy, & semble que vous ayez les plus grandes affaires de ce monde ensemble, & tout n'en vaut pas un festu. A quoy,

respondit Emilian : Mon frere Lucafer ; il ne faut point que vous me reprochiez ainsi mon vacher Travaillin , en vous courroussant si fort contre moy ; parce qu'il est bon jeune homme & me plaist , tant pour sa capacité , que pour la grande fidelité qu'il use envers moy : joint qu'il a une singuliere & loüable vertu en luy , de ce qu'il ne diroit jamais un mensonge pour tout l'or de ce monde. Outre cela , il a beaucoup d'autres bonnes conditions , pour lesquelles je suis contraint de l'aimer : parquoy ne vous esmerveillez point si je le caresse. Ces propos envenimerent davantage Lucafer ; tellement qu'en multipliant grosses paroles l'un contre l'autre , peu s'en fallut qu'ils ne missent la main aux armes. Et pour autant qu'Emilian louoit si fort son Travaillin , Lucafer luy va dire : Vous loïez si fort ce vacher pour la capacité , loyauté & verité ; & je vous dis que c'est le plus desloyal , le plus impropre & le plus grand menteur de ce monde : & entreprenez de le vous faire voir & ouyr qu'il dira en vostre presence mesme quelque mensonge. Après beaucoup d'autres paroles , ils vindrent à gager sur cela leurs metairies. Ayans ainsi appointé entr'eux , que si Travaillin seroit trouvé en mensonge , la metairie d'Emilian seroit à Lucafer ; au contraire , s'il ne se trouvoit en mensonge , Lucafer perdrait la sienne. Et de fait , ayans fait venir un Notaire , en fi-

rent passer contract, avec toutes les solemnitez qui sont requises en telles-matieres. Aprés que chacun fut party, & que leur colere fut un peu passée, Lucafer commença à se repentir de son marché, & du contract qui en estoit passé par main de Notaire, se faschant grandement de telle gageure, & craignant de perdre sa metairie, de laquelle il se nourrissoit avec toute sa famille. Estant Lucafer de retour à son logis, sa femme, qui se nommoit Isotte, le voyant si dolent, sans sçavoir la cause, luy dit : Dea, mon mary, qu'avez-vous à estre si triste ? Et Lucafer luy respondit : Tais-toy, je te prie, & ne m'augmente point la fâcherie que j'ay. Mais Isotte desirant le sçavoir, tant sçeut faire & dire, que le mary luy conta tout. Alors elle luy dit d'un visage joyeux : Est-ce la cause pourquoy vous estes en si grand esmoy ? Ne vous souciez point de cela, car j'entreprends sur ma vie, que Travailin dira, non seulement un mensonge à son maistre, mais plus de mille. Lucafer entendant cela resta tout content. Et pour autant qu'Isotte sçavoit fort bien que son beau-frere Emilian aymoit grandement le taureau aux cornes d'or, elle mit son dessein de l'attraper. Et de fait, s'estant accoustrée d'habits fort lascifs & fardée, qu'il n'y manquoit rien, se parut de Bergame & s'en alla à Pedren, où estoit la metairie d'Emilian; & si-tost qu'elle

le fut entrée au logis, elle trouva Travaillin qui faisoit du fromage, & l'ayant salué, luy dit : Travaillin, je suis venue icy pour te visiter, & pour boire du lait & manger du fromage avec toy. Vous soyez la très-bien venue, maistresse, respondit Travaillin : & l'ayant fait asseoir, commença à preparer la table, avec bon fromage de brebis & autres choses, pour l'honorer. Et pour autant qu'il la voyoit ainsi belle & seulette, & qu'elle n'avoit pas de coustume venir vers luy, il fut tout estonné, & ne se pouvoit persuader que ce fust Isotte, femme du frere de son maistre. Mais pour autant qu'il l'avoit veüe autresfois, il taschoit de la caresser & honorer selon son estat. La table desservie, Isotte voyant que Travaillin estoit après pour faire le fromage, luy dit : Escoute mon amy Travaillin, je te veux aider à faire ton fromage. Ce qu'il vous plaira, Madame, respondit-il. Et sans dire autre chose, retroussa ses manches jusques au coude, en montrant ses bras blancs comme neige, & se travailloit après ce fromage, montrant aucunesfois son gentil estomach, où il y avoit deux petits tetins, qui sembloient deux pommes. Outre cela, elle venoit à approcher de si près son vermeil visage à celuy de Travaillin, que l'un touchoit quasi l'autre. Or Travaillin, nonobstant qu'il fust vacher & nourry aux champs, si ne laissoit-il pas à

estre assez fin : & voyant les manieres de faire de la Dame, qui demonstroient en elle un amour lascif, l'alloit entretenant de paroles & d'œillades, feignant de n'entendre rien en matiere d'amour. Mais la Dame qui pensoit qu'il fust embrasé de son amour, devint si fort amoureuse de luy, qu'elle ne sçavoit de quelque costé se tourner. Et combien que Travaillin cogneust bien l'amour lascif de ceste femme, si n'en oloit-il rien dire, craignant de la fascher ; mais elle qui estoit desja touchée au vif, cognoissant la non-chalance de Travaillin, luy dit : Dea, Travaillin, qui est la cause que vous estes ainsi resveur, & que ne daignez parler à moy ? te seroit-il point venu quelque appetit de moy ? ne cache point ton vouloir, car tu m'offenserois plustost, veu que je suis à ton plaisir & commandement. Travaillin oyant ces propos, se resjouit grandement, & faisoit semblant de l'aymer.

La sotte femme le voyant embrasé de son amour, estimant qu'il estoit temps qu'elle vint à ce qu'elle desiroit, luy dit ces propos : Mon amy Travaillin, je voudrois bien que tu me fisses un grand plaisir, & quand tu me le refuserois, je dirois bien que tu fais peu de conte de l'amour que je te porte, & serois peut-estre cause de ma ruine, ou de ma mort. Et Travaillin luy respondit : Madame je suis content d'exposer ma propre vie, non pas

seulement mon bien, pour l'amour de vous ; & combien que vous me commandiez chose difficile, toutesfois l'amour que je vous porte, & que vous me monstrez, me la rendroit facile. Alors Isotte ayant un peu prins de hardiesse, luy dit : Si tu m'aymes, comme je croy, je le cognoistray maintenant. Commandez-moy, Madame, respondit Travaillin, & vous le cognoistrez. Je ne veux autre chose de toy, dit Isotte, sinon la teste du taureau qui a les cornes d'or, & puis fais de moy ce qu'il te plaira. Travaillin oyant ces propos là, fut tout estonné ; mais vaincu d'un amour charnel, & des mignardises de ceste femme impudique, respondit : Ne me demandez-vous autre chose, Madame ? je vous donne non seulement la teste, mais tout le corps, & ma personne propre. Ayant dit cela, il print un peu de hardiesse, & embrassa la Dame, recueillant avec elle les derniers fruiçts d'amour. Cela fait, Travaillin ayant tranché la teste au taureau, la mit en un sac, & la presenta à la Dame, laquelle se trouvant contente, tant pour le desir accompli, que pour le plaisir receu, s'en retourna en son logis avec plus de cornes que de metairies. Si-tost qu'elle se fut partie, Travaillin fut tout estonné, & commença à penser comment il devoit faire pour s'excuser de la perte du taureau aux cornes d'or, que son maistre

Emilian

Emilian aymoît tant. Estant ainfi en ce tourment d'efprit, & ne fçachant que faire ou que dire, à la fin s'imagina de prendre une branche d'arbre, & la veftit de quelques fiens pauvres habits, & feindre que ce fust fon maiftre, & experimenter comment il devoit faire quand il feroit devant fon maiftre Emilian. Après avoir accouftré ce fantofme en fa chambre, il s'abfenta quelque peu, & puis il retourna & falua cefte branche veftuë, en difant: Bon-jour, mon maiftre: & en respondant à foy-mefme, difoit: Tu fois le bien venu Travaillin, comment te portes-tu? Comment vont nos affaires? Il y a long-temps que tu ne t'es laiffé voir. Je me porte fort bien, respondoit-il. J'ay eſté tant empesché que je n'ay peu venir vers vous. Comment fe porte le taureau aux cornes dorées? difoit Emilian. Et il respondoit: Par mon ferment, Monsieur, les Loups l'ont devoré dedans le bois. Et demeueroit fur ce point, ne fçachant plus que dire, mais s'en retournoit tout fâché. Puis s'en retournoit en la chambre & commençoit fa harangue, en difant: Dieu vous gard', maiftre: & toy auffi Travaillin, comment vont nos affaires? que fait noſtre taureau aux cornes dorées? Je me porte bien, Monsieur, Dieu mercy & vous; mais le taureau ſe partit un jour de la bergerie en la malheure. Et combattant avec les autres taureaux,

fut si asprement navré qu'il en est mort. Mais où est donc la peau & les cornes ? & lors il ne sçavoit plus que répondre. Bref, ayant fait cela par plusieurs fois, il ne sçavoit plus quelle excuse trouver, qui fust au moins pertinente. Isotte qui s'en estoit desja retournée vers son logis, dit à son mary : Comment fera le pauvre Travaillin, quand il se voudra excuser vers son maistre Emilian, de la mort du taureau aux cornes d'or, qu'il aymoit tant ? il ne se pourra pas tenir de luy dire quelque mensonge. Voilà la teste que j'ay apportée avec moy en tesmoignage de ce à l'encontre de luy, quand il dira le mensonge. Mais elle ne luy raconta pas comment elle luy avoit fait deux cornes plus grandes que celles d'un grand cerf. Lucafer voyant la teste du taureau, fut fort joyeux, esperant infailliblement de gagner sa cause ; mais il luy advint bien au contraire, comme vous entendrez cy-après. Travaillin ayant fait diverses harangues, & autant de réponses avec l'homme de bois, tout ainsi que s'il eust parlé à son maistre propre, & n'en voyant aucune se conformer à son desir, determina sans autre pensément, s'en aller trouver son maistre, quoy qu'il en advint. Et de fait, estant allé à Bergame, il trouva son maistre, qu'il salua joyeusement. Et le maistre luy rendit le salut, en disant : Que dit le cœur Travail-

lin ? Il y si long-temps que tu ne fus icy , & que je n'ay eu aucunes nouvelles de toy. Monsieur, respondit Travaillin , les grandes occupations en ont esté cause. Comment se porte le taureau aux cornes dorées ? dit Emilian. Alors Travaillin estant tout confus & devenu par le visage rouge comme feu, se vouloit quasi excuser & deguïser la verité. Mais parce qu'il craignoit de souïller son honneur, il print un peu de hardiesse, & commença l'histoire d'Isotte, en racontant par le menu tout ce qu'il avoit fait avec elle, & l'ysuë de la mort du taureau, dont Emilian fut tout estonné; tellement que Travaillin fut estimé homme veritable, & tenu en bonne reputation, de ce qu'il n'avoit point caché la verité. Au reste, Emilian gagna la metairie; & Lucafer demeura cornu avec sa truande de femme Isotte; qui pensoit tromper autrui, se trouva soy-mesme, deceuë & infame.

La nouvelle finie, chacun de l'honneur de la compagnie blasma grandement la débordée Isotte, en loüant & exaltant Travaillin, non pas sans se moquer de la sotte femme, qui s'estoit ainsi vilainement assujettie à un pauvre vacher, pour son insatiable avarice. Et pour autant que l'Enigme d'Eritrée restoit à dire, Madame lay fit signe qu'elle ne rompiſt point l'ordre commencé. Alors sans plus retarder, elle dit ainsi :

*Au cul je voy une teste eslevée,
 Et à son aise un cul assis en terre
 Une puissante après s'y est trouvée,
 Qui ne dit mot, & le chef fort luy serre;
 Deux la voyant sans trop grande courvée;
 Et de plus fort son chef alors enferme,
 Dix outre plus la viennent à mouvoir:
 Si bien que c'est chose assez belle à voir.*

Si les Dames avoient ry de la Fable; elles ne prendrent pas moins de passe-temps de l'Enigme. Et pour autant qu'il ne se trouva aucun en la compagnie qui le sceut interpreter, Eritrée dit: Messieurs, mon Enigme ne signifie autre chose, sinon celuy qui est couché derriere une vache en luy tirant le lait; car il tient la teste près du cul de la vache, & le cul de celuy qui tire la vache se repose à son aise. Elle est patiente & retenue par un qui la tire, & estant regardée de deux yeux; & maniée de deux mains & dix doigts qui luy tirent le lait.

Cest ingenieux Enigme avec son interpretation, pleut merveilleusement à toute la compagnie. Mais pour autant que toutes les estoilles estoient desja cachées, hors mis celle qui luit au point du jour, Madame commanda que chacun s'allast reposer; & qu'on retournast le soir ensuyvant, sous peine d'amende arbitraire.



L A

QUATRIÈME NUICT

DES FABLES ET ENIGMES

du Seigneur Jean-François
Straparole.

DESJA le bon Apollo avec son flamboyant chariot avoit laissé nostre hemisphere, & s'estant plongé en la mer s'en estoit allé aux Antipodes, & ceux qui labouroient la terre, se trouvant lassez par le long travail, ostées toutes concupiscences, se reposoient doucement en leur liét, quand l'honneste & notable compagnie comparut joyeusement au lieu accoustumé. Et après que les hommes & les Dames eurent un peu ry & devisé, Madame Lucrece ayant imposé silence à tous, commanda que le vaisseau d'or fust apporté, escrivant de sa propre main les noms de cinq Damoiselles; & les ayant mis dedans le vaisseau, appella le seigneur Evangeliste, luy commandant de les tirer

P'un après l'autre , afin qu'on peust cognoistre ceux qui devoient raconter & fabloyer icelle nuit. Alors le seigneur Evangeliste laissant les propos qu'il tenoit avec Loyse (comme obeissant) s'en alla mettre à genoux devant Madame , & tira premiere-ment le nom de Fleurdiane , puis de Vincende & de Loyse , avec Isabelle & Alienor , qui vindrent après consecutivement. Et devant qu'on commençast à deviser, Madame commanda que Moulin & le Trevi-
san missent la main à leurs luths , & qu'on chantast quelque chanson , qui fut telle :

*Comme au milieu le Soleil reluisant ,
De tout autre astre esteint bien la clarté :
Icelle aussi de ces yeux produisant
Les beaux rayons remplis d'aménité,
Vient accroissant , & toujours produisant
Ses gentils faicts avec propriété :
Heureux celuy qui de sa gentil' bouche ,
Oyt le doux son , & ses habits attonche.*

La chanson fut diligemment escoutée & louée d'un chacun. Mais Madame Lucrece voyant qu'elle estoit finie , commanda à Fleurdiane , à qui estoit escheu le premier lieu de commencer les Fables de la quatrième nuit , qu'elle se despeschast de dire la sienne , afin de poursuivre l'ordre du passe-temps desja commencé. Icelle non moins convoiteuse de dire que d'escouter , com-
mença ainsi :

F A B L E I.

Richard Roy de Thebes avoit quatre filles, l'une desquelles s'en alla vagabonde par le monde ; & de Constance, se fit appeller Constantin, & arriva en la Cour de Cacus Roy de Bitinie, lequel par ses prouesses & bonnes conditions, la print en mariage.



ES cheres & gracieuses Dames, la Fable racontée le soir precedent par nostre sœur Eritrée, m'a rendu le courage si honteux, qu'elle m'a quasi diverty de fabloyer ce soir icy : toutesfois l'honneur & obeissance que je dois à Madame, & la reverence que je suis tenuë avoir vers ceste honorable & agreable compagnie, me contraint & donne courage d'en raconter une, laquelle n'est pas si belle & plaisante comme celle qui a esté racontée d'elle ; si est-ce que je vous en feray le discours, & vous entendrez comment une pucelle, d'un cœur noble, à qui fortune fut assez plus favorable en ses faicts que la raison, ayma

mieux devenir servante, que d'abbaïffer sa condition ; & après grande servitude, devint femme du Roy Cacus, comme vous entendrez par le présent discours.

En la noble cité de Thebes en Egypte garnie de beaux edifices, tant particuliers que publics, abondante en bleds, d'eaux fresches, & generalement de toutes les choses qui appartiennent à une triomphante cité, regnoit au temps passé un Roy nommé Richard, homme sçavant & magnanime en toutes choses. Iceluy desirant laisser après soy des hertiers, espousa Valeriane, fille de Marlian Roy d'Escoffe, belle & gracieuse à merveilles ; & d'icelle engendra trois filles, belles & fresches comme la rose du matin : l'une desquelles se nommoit Valence, l'autre Dorothée, & la troisième Spinelle. Richard voyant que sa femme Valeriane n'estoit plus en terme d'avoir enfans, & les trois filles estre en aage pour estre mariées, delibera de les loger toutes trois honorablement, & diviser son Royaume en trois parties pour ses trois filles, retenant seulement ce qui estoit suffisant pour l'entretienement de soy & de sa famille & de toute sa cour ; & tout ainsi qu'il avoit deliberé, il mit en execution. Les trois filles mariées à trois puissans Roys, l'une au Roy de Sardone, l'autre au Roy des Goths, & la troisième au Roy de Scythie ; ayant chacune d'icelles le tiers du Royaume paternel,

ternel , au nom & en faveur de mariage. Et le bon Roy ayant une petite partie pour luy ayder à survenir à ses necessitez, ne laissoit de vivre assez honnestement avec sa femme Valeriane, & en grande tranquillité. Advint que à quelque temps de là, la Royne, de laquelle le Roy n'esperoit plus avoir lignée, enfanta une belle petite fille, laquelle fut autant bien reçeüe & caressée du Roy, que les trois premieres, & non pas de la Royne : ce qu'elle ne faisoit pas par haine qu'elle luy portast; mais parce le Royaume estoit desja divisé en trois parties; & ne voyant aucun moyen de la pouvoir assez suffisamment marier, & toutesfois ne luy vouloit pas faire moins d'avantage qu'à sa fille; mais ayant trouvé une suffisante nourrisse, luy enchargea expressement d'employer tout son pouvoir envers elle, en la façonnant aux plus gentilles mœurs que peust avoir une fille de sa qualité. La jeune fille qui s'appelloit Constance, étant parvenue à l'âge de douze ans, avoir desja appris à broder, chanter, sonner, danser & toutes les bonnes qualitez qui appartiennent à une fille d'une bonne maison. Non contente de ce, elle s'addonna aux lettres, qu'elle apprenoit de si grande affection, que non seulement elle y employoit le jour, mais aussi la pluspart de la nuit; pour tousjours trouver choses exquises. Outre cela, non pas comme femme, mais

comme vaillant guerrier, s'addonna à l'art militaire, en domptant chevaux, maniant les armes, & en courant la lance bien souvent demeuroid victorieuse, & emportoit le triomphe, tout ainsi que font les gentils chevaliers dignes d'honneur. Pour lesquelles choses Constance estoit tant aymée du Roy & de la Royne, que rien plus. Estant Constance en aage parfaict, & son pere n'ayant pas biens ny tresors suffisans pour la marier à quelque puissant Roy, s'en faschoit grandement, & en tenoit souvent propos à la Royne : qui considerant que les vertus de la fille estoient telles, qu'il n'y avoit fille en ce monde qui fust sa pareille, se venoit à contenter, & avec douces paroles confortoit le Roy qu'il deust prendre patience en cela, parce qu'il se pourroit trouver quelque puissant Seigneur qui seroit tant amoureux de ses vertus, qu'il ne refuseroit de la prendre en mariage sans dot. Il ne passa gueres de temps que la fille fut requise en mariage par plusieurs grands Seigneurs, entre lesquels se trouva Brunel, fils du grand Marquis de Vivian : tellement que le Roy & la Royne firent appeller leur fille, & luy dirent : Nostre très-chere fille Constance, maintenant le temps est venu de te marier, au moyen de quoy nous avons trouvé un jeune fils qui sera selon ton contentement. Il est fils du grand Marquis de Vivian nostre amy domestique,

& se nomme Brunel , qui est un jeune
fils galant & de bonne grace , & ses proïef-
ses sont desja semées par tout le monde.
Il ne nous requiert autre chose , sinon
nostre bonne grace & ta delicate person-
ne , laquelle il estime plus que tous les
tresors de ce monde. Tu sçais bien , ma
fille , m'amie , que nous ne te pouvons
donner aucun mariage , à cause de nostre
pauvreté , au moins pour te loger en haut.
Il faut donc que tu te contentes selon no-
stre vouloir. La fille qui estoit sage , & se
sentoit yssüe de grande lignée , escouta
attentivement les paroles du pere , & sans
plus retarder luy respondit ainsi : Sire , il
n'est ja besoin que j'use de ceremonies
maintenant par mes paroles , pour don-
ner réponse à ce que vous m'avez icy tant
prudemment proposé ; mais je vous diray
seulement ce que la matiere requiert. Pre-
mierement je vous remercie du bon vou-
loir & de la grande affection que vous
avez envers moy , cherchant de me don-
ner un mary que je n'ay point requis.
Outre cela , sous correction de vostre
majesté , je n'ay point deliberé de dege-
nerer à la race de mes predecesseurs , qui
ont esté de tout temps nobles & fort re-
nommez , & ne veux point abaisser vo-
stre couronne , en prenant un qui est in-
ferieur à nous. Mon très-cher pere , vous
avez engendré quatre filles , desquelles
vous en avez marié trois richement à trois

puissans Roys , en leur donnant grands tre-sors & seigneuries ; & moy qui vous ay esté tant obeyssante, vous me voulez loger en si bas lieu : parquoy pour abreger je vous dis que jamais je ne prendray mary si je n'ay un Roy comme mes autres trois sœurs , & qui soit convenable à ma personne. Et ayant prins congé du Roy & de la Royne (non pas sans espandre beaucoup de larmes) & estant montée sur un puissant cheval , se partit toute seule de Thebes , prenant son chemin où fortune la conduisoit.

Chevauchant ainsi à l'aventure , changea premierement son nom , & de Constance , se fit appeller Constantin. Et ayant passé monts & vaux , bois & rivières , voyant beaucoup de pays , & oyant divers langages , elle considéra leurs manieres de faire les coustumes des peuples , qui vivoient , non pas comme hommes , mais comme bestes. Finalement un jour sur le Soleil couchant elle arriva en une notable & magnifique cité , nommée Constance , de laquelle estoit pour lors Seigneur Cacus Roy de Bitinie , & estoit la ville Metropolitaine de toute ceste contrée. Estant entrée en icelle , elle commença à contempler les superbes & triomphans palais , les droictes & spacieuses rues , les courans & larges fleuves , les claires & vives fontaines ; & s'estant approchée de la belle place , elle apperçeut

le haut & magnifique palais du Roy , les colonnes duquel estoient de fin marbre , de porphyre & autres pierres exquisés ; & en haussant sa veüe elle appercent le Roy appuyé sur une galerie , qui descouvroit toute la place , & ayant osté son chapeau luy fit une grande reverence. Le Roy voyant ce jeune fils si gracieux & beau , le fit appeller. Si-tost qu'il fut arrivé , le Roy luy demanda d'où il venoit , & comment il avoit nom ; & il respondit qu'il venoit de Thebes , estant persecuté de l'envieuse & muable fortune , & qu'il se nommoit Constantin ; & qu'il serviroit volontiers quelque honneste gentilhomme autant fidèlement & amiablement qu'il seroit possible. Le Roy qui se contentoit desja de l'apparence de ce jeune fils , luy va dire : Puis que tu portes le nom de la cité , je veux que tu demeures icy en ma court , ne faisant autre chose que de servir ma personne. Le jeune fils qui ne demandoit autre chose , le remercia non seulement , mais l'accepta pour son Seigneur , en luy offrant d'estre appareillé de faire tout ce qu'il luy seroit possible. Estant ainsi Constantin au service du Roy en habit d'homme , le servoit de si bonne grace , que chacun qui le regardoit en estoit tout estonné : la Roïne , qui venoit à considerer les belles manieres de faire , & la bonne grace de Constantin , en devint si fort amoureuse , que jour

& nuit elle ne pensoit jamais qu'en luy ; en luy donnant telles œillades qui auroient fait fendre les pierres : estant donc la Roynne en cest estat , ne desiroit autre chose que se trouver un jour à deviser avec luy. Et de fait , ayant un jour trouvé l'occasion & le temps commode de parler à luy , le commença à interroger & demander s'il la vouloit servir : & en la servant, outre la recompense qu'il en recevroit ; non seulement il seroit le bien venu en la court , mais prisé & honoré.

Constantin cognoissant que ces propos icy ne venoient point d'un bon zele qu'elle eust , mais d'une affection amoureuse , considerant aussi qu'elle ne pouvoit pas contenter son desordonné appetit , estant fille , luy respondit assez humblement : Madame le devoir de servitude que je tiens à Monseigneur vostre mary est si grand , qu'il me sembleroit bien luy faire une grand injure , si je me partoys de son obeyssance & vouloir. Parquoy (ma très-honorée Dame) il vous plaira m'avoir pour excusé , si vous ne me trouvez prompt & appareillé à vostre service ; car mon intention est de servir mondit Seigneur jusques à la mort , pourveu que mon service luy soit agreable. Et ayant prins congé d'elle se partit. La Roynne qui sçavoit très-bien que le dur chesne ne se coupe pas du premier coup , tascha souventesfois par ruses & subtilsmoyens d'at-

tirer ce jeune fils à son service : mais luy constant & ferme comme la tour battue par les vents , ne se peut onc esbranfler. Au moyen dequoy la Royne convertit son chaud & puissant amour en si aspre & mortelle haine , qu'elle ne le pouvoit plus regarder de bon cœur. Et en desirant incessamment sa mort , pensoit jour & nuict comment elle pourroit trouver quelque moyen pour l'oster de devant ses yeux ; mais elle craignoit grandement le Roy , à cause qu'il l'aymoit & en faisoit estime. Or en ceste province de la Bitinie se trouvoit une espece d'hommes qui avoient la moitié du corps , c'est à sçavoir le dessus en forme humaine ; vray est qu'ils avoient les cornes & les oreilles comme les bestes brutes. Au reste ils avoient les pieds pelus comme ceux d'une chevre , avec un petit de queue entortillée comme celle d'un porc , & s'appelloient Satires , qui endommageoient grandement les villages & metairies circonvoisines , avec les hommes du pays. Et le Roy avoit grand desir d'en avoir un vif entre les mains ; mais il ne se trouvoit celuy qui eust la hardiesse d'en prendre un & le presenter au Roy. Tellement que la Royne par le moyen d'iceux se va imaginer de faire mourir Constantin , mais elle n'en peut pas bonnement venir à bout , parce que le trompeur le plus souvent se trouve luy-mesme trompé , par permission divine & justice

eternelle. La fausse Royne qui sçavoit bien le desir du Roy, en devisant avec luy de diverses matieres, entre autres luy vint à dire : Monseigneur, ne sçavez-vous pas bien que Constantin, vostre fidelle serviteur, est si puissant & gentil chevalier qu'il pourra bien prendre un de ces Satires sans avoir secours de personne, & le presenter vif devant vos yeux ? & qu'il soit ainsi (comme je pense) vous le pourrez facilement experimenter & accomplir en une heure à vostre vouloir ; & luy comme puissant & vaillant chevalier en recevra l'honneur & triomphe pour memoire perpetuelle. Le propos de de la fine Royne & son conseil, pleut merveilleusement au Roy, lequel fit incontinent appeller Constantin, & luy tint tels propos : Escoute, Constantin, si tu m'aymes, comme tu monstre & comme chacun croit, tu accompliras entierement mon vouloir, & de ton costé tu en recevras honneur à jamais. Tu dois sçavoir qu'il n'y a chose en ce monde que plus je desire que d'avoir un Satire vif entre mes mains ; & pour autant que tu es puissant & adroit, je ne cognois homme en ce Royaume qui me puisse mieùx contenter en cela que toy : parquoy si tu m'aymes, tu ne me refuses point ceste demande. Le jeune fils, qui ne pensoit point que cela vint d'autre que du Roy, ne luy voulut point tenir pour lors propos qui le peussent fâcher,

mais luy dis gracieusement : Monseigneur, vous me pouvez commander cela & autres choses : & combien que la force soit assez foible , si ne laisseray-je pas de satisfaire à vostre vouloir & desir , voire y deusse-je laisser la vie. Mais devant que je m'expose à ceste dangereuse entreprinse , je vous prie , Monseigneur , donner charge qu'il soit porté au bois , où sont les Satires , un grand vaisseau , ayant la bouche large , & qui ne soit point moindre que celui où les servantes font la lessive pour nettoyer les chemises & autres draps de lin. Outre cela je voudrois qu'on y portast un tonneau de bon vin , je dis du meilleur & du plus puissant qu'on puisse trouver , avec deux pleins sacs de miche blanche. Le Roy fit incontinent preparer tout ce que Constantin luy avoit enchargé. Cela fait , Constantin s'en alla au bois , & print une seille de cuivre , & commença à puiser de ce bon vin qui estoit dedans le tonneau , & le verser dedans le vaisseau qui estoit près de là , puis print le pain , & le rompant par morceaux , le jettoit dedans le vin ; & tout incontinent il monta sur un arbre assez près de là pour voir l'ysuë de ceste affaire. Il ne fut pas si-tost monté , que les Satires qui avoient desja evanté l'odeur de ce vin , commencerent à s'approcher du poinçon , en firent une bonne ventrée , tout ainsi que les Loups affamez quand ils arrivent en une

troupe de brebis. Après qu'ils se furent bien saoulez, ils se mirent à dormir si fort que tout le bruit du monde ne les auroit point éveillez. Alors Constantin voyant l'occasion venue descendit de l'arbre, & s'estant approché d'un le lia par les mains & par les pieds, avec une corde qu'il avoit apportée avec luy, & sans faire aucun bruit le chargea sur son cheval & l'emporta. Chevauchant ainsi avec ce Satire lié estroictement, il arriva sur l'heure de vespres en un village assez près de la cité, & quand ce bestial (ayant desja digéré son vin) s'éveilla, & comme s'il se fust levé du lit commença à bailler, & en regardant à l'entour de luy, il apperçut un pere de famille, qui avec grande multitude accompagnoit à la sepulture un enfant mort en pleurant, & de l'autre costé le Prestre chantoit, dont le Satire se print si fort à rire qu'il en perdoit toute contenance. Si tost qu'il fut entré en la cité, & estant arrivé en la place, il apperçut tout le peuple qui attentivement regardoit un pauvre jeune compagnon pendu freschement au gibet, dont il se mit plus à rire qu'au paravant. Quand il fut arrivé au palais, chacun se mit à crier voicy Constantin: le Satire entendant cela, se mit encore plus à rire. Estant venu Constantin en la présence du Roy & de la Royne, & de toutes ses Damoiselles, il luy presenta le Satire, lequel se mit encore plus fort à

rire qu'auparavant, dont tous les assistans furent estonnez. Le Roy voyant que Constantin avoit accompli son commandement, luy porta aussi grande affection que fit oncques maistre à serviteur; mais il augmenta bien 'douleur sur douleur à la Roynes, laquelle pensant le ruiner du tout, le mit encore en plus grand estat & credit qu'il n'estoit auparavant. Et ne pouvant ceste malheureuse femme souffrir un si grand bien venir de luy, s'imagina une autre ruse, qui fut telle. Pour autant qu'elle sçavoit bien que le Roy estoit accoustumé d'aller tous les jours à la prison où estoit le Satire, & pour son passe-temps, il taschoit tousjours de le faire parler; mais le Roy n'eut jamais le pouvoir de le faire parler, tellement qu'elle s'en alla trouver le Roy, & luy dit: Sire, vous estes desja allé par plusieurs fois au cabinet du Satire pour le faire parler à vous, & ceste grosse beste n'a jamais voulu dire mot. Pourquoi vous rompez-vous plus la teste après? Sçachez que si Constantin veut, qu'il est suffisant pour le faire parler & respondre ce qu'il pourra. Le Roy entendant ces propos; fit incontinent venir Constantin, & luy dit: Je suis aisé, Constantin, que tu n'es point ignorant du plaisir que je prens après le Satire que tu as prins; mais je suis fort desplaisant de ce qu'il est ainsi muet, & qu'il ne veut aucunement donner sa res-

ponse à mes demandes. Si tu veux donc faire ton devoir, je ne doute point que tu ne le fasses parler. Monseigneur, répondit Constantin, si le Satire est muet, ce n'est pas ma faute. Ce n'est pas un office humain de donner la parole, mais divin. Mais si l'empeschement de la langue ne vient point d'un vice naturel ou accidentel, mais d'une obstination de ne vouloir répondre, je m'efforceray par tous les moyens de ce monde qu'il parle. Et de fait, ayant prins son chemin vers le logis du Satire, avec le Roy, luy fit apporter fort bien à manger, & mieux à boire, & luy dit : Mange Robin; car ainsi l'avoit-il nommé, & il le regardoit sans répondre. Or sus Robin, mon amy, parle je te prie, & me dis si ce chapon est bon & si le vin est à ton goust : ny pour cela il ne voulut point parler. Constantin voyant son vouloir obstiné, luy va dire : Tu ne me veux donc pas répondre, Robin ? je te promets que tu te fais dommage : car je te feray mourir en prison de faim & de soif. Et il le regardoit d'un œil de travers. Alors Constantin luy dit : Or sus Robin, mon mignon, responds-moy, & si tu parles (comme j'espere) je te promets de te delivrer de ce lieu icy. Robin ayant attentivement entendu tout ce discours, oyant parler de delivrance, dit : Que me veux tu ? As tu bien beu & mangé à ton appetit ? dit Constantin.

Ouy, respondit-il. Mais dis moy par courtoisie (dit Constantin) que tu avois à rire par les chemins en voyant porter un enfant mort à la sepulture? Je me prins à rire (respondit Robin) non pas du trespas, mais du pere qui pleuroit celuy qui n'estoit pas son fils, comme il pensoit, & me riois du Prestre qui chantoit sur cest enfant, qui estoit son fils. Il vouloit donner à entendre par cela, que la mere de l'enfant decedé estoit adultere du Prestre. Je voudrois aussi entendre de toy, mon petit Robin, qui est la cause pourquoy tu riois quand nous arrivames en la place. Je me mis à rire, respondit Robin, de ce que mille larrons qui ont desrobé & desrobent tous les jours les millions d'escus au public, & meritent mille gibets, regardoient en la place ce pauvre malautru, qui avoit esté mené au gibet pour avoir desrobé seulement dix florins, pour substantier possible sa vie & de ses pauvres enfans. Voilà pourquoy je m'en moquois. Dis moy aussi, je te prie (dit Constantin) quand nous arrivames au palais tu te mis encore à rire plus fort beaucoup qu'auparavant, qui te faisoit faire cela? Je te prie (dit Robin) ne me tourmente plus pour le present; mais va t'en seulement, & retourne icy demain au matin, & je te respondray, en disant peut estre telles paroles, que tu n'y penses aucunement. Constantin oyant ces paroles, dit

au Roy : Allons-nous-en , & retournons demain , afin que nous entendions ce qu'il veut dire. Le Roy & Constantin s'estans retirez, commanderent expressement qu'on donnast fort bien à boire & à manger à Robin , afin qu'il peust mieux caqueter à son aise. Le jour ensuivant venu , il s'en retournerent trouver leur Robin , qui souffloit & ronfloit comme un gros porc. Constantin s'estant approché de luy , l'appella par plusieurs fois à haute voix ; mais Robin qui estoit bien pancé dormoit & ne respondoit non plus qu'une pierre. Constantin ayant estendu un dard qu'il tenoit en sa main , le piqua si fort qu'il le fit esveiller , & luy demanda : Or sus Robin (suivant ce que tu nous respondis hier) pourquoy te mis tu si fort à rire quand nous arrivâmes au palais ? Alors Robin va respondre , en disant : Tu le sçais mieux que moy ; c'est parce que tout le monde croit Constantin , Constantin , & neantmoins tu es Constance. Le Roy qui estoit là present ne peut pas entendre ce que Robin vouloit inferer par tels propos. Mais Constantin qui avoit bien compris son dire , afin qu'il ne passast point plus outre , luy vint à couper le chemin , en disant : Or sus , quand tu fus en la presence du Roy & de la Royne , qui t'esmeut à rire ainsi outre mesure ? Je me mis à rire (respondit Robin) parce que le Roy croit & toy pareillement , que les Damoiselles qui

servent la Royne soient Damoiselles, & neantmoins la pluspart d'icelles sont damoiseaux; puis se teut. Le Roy entendant ces propos ne sceut que dire, & en revant en son esprit, se partit du lieu où estoit ce sauvage Satire, & se retira à l'escart avec son Constantin, pour entendre d'où venoit & que signifioit cela. Et ayant fait l'experience, trouva que Constantin estoit femme & non pas homme, & les Damoiselles beaux jeunes fils, tout ainsi que Robin avoit raconté. Et tout sur le champ le Roy fit allumer un grand feu au milieu de la place, & en la presence de tout le peuple fit rostir la Royne avec ses Damoiselles; & considerant la loyauté de sa fidelle Constance, & la voyant belle à merveille, l'espousa devant tous les Barons & Chevaliers. Et entendant de qui elle estoit fille se resjoüit grandement: & ayant expédié deux Ambassadeurs vers le Roy Richard & Valeriane sa femme & aux trois sœurs, comment Constance estoit aussi mariée à un Roy, chacune d'icelles en fut fort contente. Voilà donc comment la noble & honneste Constance, en recompense de son service, devint à la fin Royne, & vesquit longuement avec Cacus.

Si-tost que Fleurdiane eut raconté sa Fable, Madame luy fit signe qu'elle deüst proposer son Enigme. Et elle qui estoit un peu depiteuse, plustost par accident que par nature, commença ainsi :

*L'esprit gentil deux fort fiers Lyons dompte ,
 Et sur leurs dos son siege met & pose ,
 Et à costé sont quatre de grand conte ,
 Foy , Force , Amour & Prudence repose ,
 L'espée au poing , dont les malins surmonte ,
 Et douce aux bons plus que nulle autre chose ,
 Discord n'y regne , & mal point ne s'y range :
 Qu'icelle ensuit digne est de grand loüange.*

Ce docte Enigme fut grandement loué d'un chacun , avec diverses interpretations ; mais il ne se trouva personne qui le peust bonnement entendre. Ce que voyant la gentille Fleurdiane , dit hardiment : Messieurs , vous travaillez en vain ; car mon Enigme ne signifie autre chose , que l'infinie & droite justice , qui comme esprit gentil vient à dompter & refrener les fiers affamez Lyons ; c'est à sçavoir , les arrogans & incorrigibles personages , arrestant & establisant sa foy sur eux , tenant en main dextre son espée tranchante , & accompagnée des quatre vertus ; c'est à sçavoir , Prudence , Charité , Force & Foy : étant douce & paisible aux bons , aspre & cruelle aux mauvais. Si-tost que la vraye interpretation fut donnée par Fleurdiane , non pas sans grandes loüanges , Madame commanda à Vincende qu'elle continuast l'ordre commencé avec sa Fable , ce qu'elle fit , en disant :

FABLE

F A B L E II.

*Hermion Glauce d'Athenes , print
en mariage Philene Centurionne ;
& estant devenu jaloux d'elle ,
l'accusa en plein jugement ; & par
le moyen de son amy Hypolite fut
delivrée , & Hermion condamné.*



L n'y auroit en ce monde (gracieuses Dames) plus douce , plus plaisante & plus heureuse chose , ny condition plus triomphante , que servir Amour ; si ce n'étoit le fruit amer de la soudaine jalousie , ennemie des assauts de Cupido , contraire aux Dames amoureuses , & qui cherche incessamment leur mort. Au moyen dequoy il se presente maintenant une Fable , par laquelle vous pourrez facilement comprendre la mauvaise & piteuse fin que fit un Gentilhomme d'Athenes , qui pensa bien faire executer sa femme par justice , à cause de sa froide jalousie , & luy-mesme fut condamné : ce qui vous sera très-agreable , veu que vous estes (si je ne suis deceuë) pareillement amoureuses.

En Athenes , très-ancienne cité de Gre-

ce, qui estoit au temps passé le vray nid & receptacle des sciences, & pour le present reduite en pauvre & piteux estat, voire du tout demolie & rasée par son excessif orgueil, se tenoit autresfois un Gentilhomme, nommé le Seigneur Hermion Glauce, grand personnage, certes & fort estimé en la cité; vray est qu'il avoit assez pauvre esprit. Car se trouvant desja assez aagé & sans enfans, delibera de se marier, & print en mariage une belle jeune fille, nommée Philene, fille de Cesarin Centurion, yssue de noble race, & de merveilleuse beauté, avec ce qu'elle estoit garnie de beaucoup de vertus: tellement qu'il n'y en avoit point en la cité qui fust sa semblable. Et pour autant qu'il craignoit qu'à cause de sa singuliere beauté elle ne fust subornée de plusieurs, & qu'en ce faisant il ne tombast en quelque gros scandale, dont il fust après monstre au doigt, delibera de la mettre en une haute tour de son palais, ne permettant qu'elle fust veüe de personne. Bien-tost après le pauvre vieillard en devint si jaloux, sans en sçavoir la cause, qu'il se desioit quasi de soy-mesme.

Or advint qu'en ce mesme temps y avoit en la cité un escolier de Candie, jeune d'aagé, au reste sage & discret, & aymé d'un chacun pour gentillesse & bonne grace, & se nommoit Hypolite; lequel luy avoit fait la court long-temps devant

qu'elle fust mariée : d'autre part il estoit grand amy du Seigneur Hermion , tellement qu'il l'aymoit comme son fils propre. Ce jeune escolier estant un peu las d'estudier , & desirant se recréer , se partit d'Athenes , & s'en alla en Candie , où il demeura quelque espace de temps , & estant retourné en Athenes trouva Philene qui estoit mariée , dont il fut fort desplaisant , & mesmement se voyant privé de la pouvoir jamais voir à son gré ; & ne pouvoit souffrir qu'une si belle & gracieuse fille fust mariée à un si lourd & rechiné vieillard. Ne pouvant donc plus l'amoureux Hypolite endurer les ardans aiguillons & traits d'amour , se va imaginer quelque secret moyen pour accomplir ses desirs. Et de plusieurs qui luy vindrent en la fantasie , il en esleut un qui luy sembloit le plus convenable & facile , qui fut tel : Il s'en alla en la boutique d'un menuisier sien voisin , & luy commanda de faire deux coffres assez longs & larges , & d'une mesme hauteur & mesure , tellement que l'un ne se peut bonnement cognoistre d'avec l'autre. Cela fait , il s'en alla trouver Hermion , feignant avoir besoin de luy , & d'une grande ruse , luy dit tels propos : Seigneur Hermion , que j'ayme & honore autant que mon propre pere , si l'amitié que me portez ne m'estoit notoire , je ne prendrois jamais la hardiessé de vous-requerir de si grande affection de

me faire quelque service ; mais parce que je vous ay tousjours trouvé par experience mon très-grand amy , j'ay tousjours eu ceste fiance en vous que j'obtiendrois de vous tout ce que mon cœur desire. Vous devez sçavoir que je suis contraint de m'en aller jusques à Fregne , pour quelques affaires d'importance , où il me faudra demeurer jusques à l'expedition d'iceux. Et pour autant que je n'ay personne en la maison de qui je me puisse bonnement fier , à cause que je suis à la discretion des serviteurs & chambrières , desquelles je ne suis gueres asseuré ; je voudrois , si c'estoit vostre plaisir , que me gardissiez chez vous un mien coffre , où je tiens les plus cheres choses que j'aye. Hermion , qui ne se doutoit pas de la malice de l'escolier , luy respondit qu'il en estoit content , & qu'il le mettroit en sa chambre , afin qu'il fust plus seurement : dont l'escolier le remercia grandement , en luy promettant avoir memoire perpetuelle de tel service ; & sur ce point , il le pria très-affectueusement de prendre la patience de venir jusques à son logis , pour luy monstrier tout ce qui estoit contenu au coffre. Estant donc allé au logis de l'escolier , il luy monstra un coffre plein de vestemens , de bagues & de chaines d'or de grand prix. Puis appella un de ses serviteurs , & dit à Hermion , en luy monstrant : Je vous supplie Seigneur Hermion , que quand ce

mien serviteur icy voudra aller querir mon coffre , baillez le luy autant seurement qu'à moy-mesme. Si-tost que le vieillard se fut party , Hypolite se cacha dedans le coffre , qui estoit semblable à celuy des accoustremens & bagues , & s'estant fort bien enclos par dedans , commanda au serviteur de le porter où il sçavoit. Le serviteur obeyssant à son maistre , & qui sçavoit bien tout ce mystere , appella un porte-fais , & le luy ayant chargé sur ses espaules , le fit porter tout droit en la tour, où estoit la chambre où couchoit Hermion avec sa femme toutes les nuits. Or estoit-il un des plus apparens de la cité , & pour autant qu'il estoit assez riche & puissant en biens , advint que pour l'autorité qu'il tenoit , il fut pressé d'aller pour quelques jours jusques à un certain lieu nommé Portpire , qui est à deux lieuës ou environ de la cité d'Athenes , pour appointer quelques procès & differens qui estoient pendans entre les bourgeois & les paysans. S'estant donc party Hermion assez mal content , pour la jalousie qui le tourmentoit jour & nuit ; & le jeune escolier qui estoit enfermé dedans ce coffre , ayant souventesfois entendu la jeune Dame se plaindre & plorer , maudissant son defastre qui l'avoit conduite & menée en si piteux estat , & l'heure & le poinct qu'elle fust jamais mariée à ce vieillard mal gracieux , attendit le temps & l'heure qu'elle fust en-

dormie ; & entendant qu'elle estoit sur son premier sommeil, il s'osta de ce coffre, & en s'approchant du liſt, luy commença à dire : Or ſus, m'amie, eſveillez-vous, car je ſuis voſtre bon amy Hypolite ? Quand elle ſe fut eſveillée, & qu'elle l'eut cogneu, à cauſe que la lumiere eſtoit allumée, elle ſe voulut mettre à crier ; mais le jeune ſils luy mit la main à la bouche, & ne la laiſſa pas crier, mais luy dit quaſi en pleurant : Helas ! mon petit cœur doux, taſſez-vous, je vous prie, ne voyez-vous pas bien que je ſuis voſtre fidele amy Hypolite, qui ne puis vivre ſans vous ? S'eſtant la jeune Dame appaiſée, & conſiderant la qualité du vieillard Hermion & du jeune Hypolite, ne ſe meſcontenta point à la fin de tel acte, mais coucha toute la nuit avec luy, avec propos amoureux, blaſmant & maudifſant les manieres de faire de ſon lourdaud mary, & donnant aſſignation de ſe pouvoir trouver aucunes fois enſemble. Le jour venu l'eſcolier ſe cachoit en ſon coffre, & en ſortoit la nuit à ſon plaſir, & couchoit toute la nuit avec elle. A quelque temps de là Hermion, tant pour l'incommodité qu'il enduroit, que pour l'extreme jalouſie, qui le tourmentoit inceſſamment, appointa tous les differens de ce lieu, & ſ'en retourna en ſon logis. Le ſerviteur de l'eſcolier ayant eſté adverty de la venue d'Hermion, ſ'en alla bien-toſt après vers luy, en luy de-

mandant de la part de son maistre son coffre, lequel luy fut rendu fort gracieusement, suivant la charge que luy en avoit donnée l'escolier; & ayant prins un portefaïs le fit derechef porter au logis de son maistre.

Si-tost que l'escolier fut dehors de ce coffre, il s'en alla par la ville, & par fortune il vint à rencontrer Hermion, & l'ayant gracieusement embrassé & caressé, le remercia tant qu'il fut possible, du plaisir qu'il avoit receu de luy, en luy offrant sa personne & ses biens estre à son commandement. Or advint qu'un matin estant Hermion couché avec sa femme, un peu plus tard que de coustume, il apperceut devant ses yeux en la muraille certains crachats, qui estoient assez hauts & esloignez de luy. Alors estant embrasé de la jalousie, qu'il avoit desja enracinée de longue main en son cœur, s'estonna grandement, & commença à prendre garde de près, si ces crachats estoient siens, ou d'autrui, & après y avoir bien pensé & repensé, il ne se peut onc imaginer de les avoir faits; tellement qu'ayant soupçon de ce qui luy estoit advenu, se tourna contre sa femme, & luy dit assez brusquement: A qui sont ces crachats si hauts? ils ne sont pas venus de moy, & ne les crachay onc, je pense que tu m'as trahy. Alors Philene luy respondit ainsi en souffrant: N'avez-vous point maintenant d'au-

tre pensement ? Hermion la voyant ainsi rire se colera encore plus fort qu'auparavant , & luy dit : Comment tu t'en ris , meschante femme que tu es ? Dequoy ris-tu ? Je me ris , dit-elle , de vostre sottise. Cependant il ne laissoit pas de ronger son frein entre ses dents , & en voulant essayer s'il pouvoit cracher si haut , ores toussant , ores ronflant , s'efforçoit d'arriver avec son crachat jusques à la marque de l'autre ; mais c'estoit en vain , car le crachat retournoit en arriere , & luy tomboit sur le visage , en le souillant tout. Ayant ce pauvre vieillard essayé par plusieurs fois cela , son intention alloit tousjours en empirant , & voyant ceste experience , il tint pour certain que sa femme luy avoit donné quelque trouffe ; & en se tournant vers elle , luy dit les plus grandes injures de ce monde. Et si n'eust esté la crainte qu'il avoit de soy mesme , il l'eust tuée alors de ses propres mains. Toutesfois il s'en abstint , deliberant de recourir plustost à la justice , que de souiller ses mains de sang : tellement que non content de ce , & rempli de courroux & desdain , s'en alla tout droit poser son accusation de adultere à l'encontre de sa femme. Mais parce que le juge ne la pouvoit pas condamner , si premierement il n'observoit le statut du pays ; il l'envoya querir sur le champ pour l'examiner promptement. Or le statut & coustume d'Athenes estoit ,
que

que toute femme accusée par son mary d'adultere, devoit estre mise au pied de la colonne rouge, sur laquelle il y avoit un serpent, & en ce mesme lieu, on luy faisoit faire serment de dire la verité, si l'adultere proposé estoit veritable. Et si tost qu'elle avoit juré, on luy faisoit mettre la main en la gueule du Serpent; & si telle femme s'estoit parjurée, incontinent le Serpent luy avaloit la main; autrement elle ne recevoit aucun desplaisir. Hypolite qui avoit desja ouy parler de ceste plainte & accusation faite en jugement, à l'encontre de s'amie, par son cruel & bestial mary; & que le juge l'avoit desja envoyée querir pour dire ses defenes, de peur qu'elle n'encourust en une mort ignominieuse, incontinent comme homme de bon esprit, & qui desiroit luy sauver la vie, se despoüilla tous ses accoustremens, & vestit quelques pauvres habits de fol; & sans estre veu de personne, il se partit secrettement de son logis, & s'en courut tout droit au palais, comme un fol, faisant incessamment les plus grandes folies de ce monde. Sur ce poinct que les Sergens menotent ceste pauvre Dame au palais, toute la cité estoit accouruë pour voir l'issuë de cest affaire, & le fol poussant l'un, tantost l'autre, s'approcha tant, qu'il vint accoler ceste pauvre desolée, laquelle ayant les mains liées par derriere, ne peut eviter le bai-

fer. Si-tost qu'elle fut arrivée devant le juge il luy tint tels propos : Or sus , Philene , voilà le Seigneur Hermion , vostre mary , qui se plaint grandement de vous , de ce que vous avez commis adultere , & conclud que je vous punisse suivant le statut : parquoy vous jurerez icy , si le péché que met vostre mary à l'encontre de vous est veritable. La jeune Dame , qui estoit assez prudente , jura fermement que jamais homme ne luy avoit touché , sinon son mary & ce fol qui estoit là present. Après que Philene eut juré , les ministres de justice la menerent vers le Serpent , & luy ayans présenté la main de Philene , ne luy fit aucun desplaisir , parce qu'elle avoit confessé la verité ; c'est à sçavoir que homme du monde ne luy avoit jamais touché , sinon son mary & ce fol. Cela fait , le peuple & les parens qui estoient venus voir ce piteux spectacle , voyans l'experience certaine , la declaration innocente , crioient à haute voix que son mary meritoit la mort qu'elle mesme devoit souffrir. Mais parce qu'il estoit noble & de grande lignée , & des plus apparens de toute la cité , le Prevost ne le voulut pas faire brusler , comme la justice permettoit ; mais pour s'acquitter de son devoir , le condamna en prison perpetuelle , où il mourut bien-tost après. Voilà donc comment Hermion finit miserablement sa jalousie enragée , & la jeune

Dame fut delivrée de la mort. Peu de temps après Hypolite l'espousa, & depuis vesquit longuement avec elle en grande tranquillité.

La Fable de Vincende finie, Madame luy commanda de poursuivre son Enigme, ce qu'elle fit joyeusement en lieu d'une chanson, en disant ainsi :

*D'un grand amour , desir & esperance ,
Naist un bestial maigre & decoloré ,
En beau visage , & remply de clemence ,
Comme lierre en son tronc egaré :
Se paist de duëil , ennuy & esperance ,
Et de drap brun se voit tousjours paré ,
Il veit d'ennuy & croist en grand' douleur :
Et malheureux qui veit en telle erreur .*

Ayant Vincende recité son Enigme chacun l'interpreta à sa fantaisie , si ne s'en trouva-t'il point de si bon esprit qui le peust entendre. Ce que voyant la belle Vincende jetta premierement un soufpir , puis d'un visage riant , dit : Mon Enigme n'est autre chose que la froide jalousie , laquelle estant maigre & passe , nasquit avec amour en un mesme jour , & embrasse les hommes & les femmes , tout ainsi que le lierre le tronc des arbres. Icelle se paist de fâcherie , parce que le jaloux vit tousjours en tristesse. Elle est vestuë de noir , à cause que le jaloux est tousjours melancolique.

Ceste interpretation pleut grandement à tous, & meſmement à Madame Claire, parce que ſon mary eſtoit jaloux d'elle : mais afin que nul ſ'apperceuſt que cela eſtoit dit pour luy, Madame commanda à Loyſe de raconter ſa Fable, qui fut telle :

F A B L E I I I.

Lancelot Roy de Provins, eſpouſa la fille d'un Boulenger, de laquelle il eut trois enfans maſles ; qui eſtans perſecutez par la mere du Roy, finalement par le moyen d'une eau, d'une pomme & d'un oyſeau, ils vindrent à la cognoiſſance du pere.



'A Y tousjours ouy dire (mes gracieuſes Dames) que l'homme eſt le plus noble & le plus vaillant animal que nature creait ; veu que Dieu le fit à ſon image & ſemblance, le rendant dominateur ſur toutes autres creatures, & non point qu'il fuſt maiſtriſé. Au moyen dequoy, on dit très-bien que l'homme eſt le plus parfait animal de tous les autres :

parce que tous (voire sans en excepter la femme) sont sujets à l'homme. De là vient, que ceux qui par finesse ou art, procurent la mort d'un si excellent animal, font un très-grand mal. Et ne se faut point esbahir, si telles gens, cependant qu'ils s'efforcent de donner la mort à autrui, y tombent eux-mêmes dedans sans y penser, comme firent une fois quatre femmes, lesquelles cuidans tromper autrui, se trouverent à la fin elles-mêmes deceuës, & finirent misérablement leur vie, comme vous pourrez entendre par le discours de la présente Fable.

En Provins, qui est une cité Royale, & assez fameuse, y avoit anciennement trois sœurs belles à merveilles, gentilles & de bonne grace; au reste de basse maison, parce qu'elles estoient filles d'un nommé maistre Henry Boulenger, qui cuisoit ordinairement en son four le pain d'autrui. L'une d'icelles s'appelloit Brunore, l'autre Lionelle, & la troisième Clarette. Estans un jour ces trois jeunes pucelles en leur jardin, où elles prenoient un plaisir merveilleux, un Roy Lancelot y vient à passer, avec belle compagnie, & s'en alloit à la chasse. Brunore, qui estoit la plus grande des sœurs, voyant si belle & honorable compagnie, commença à dire à ses deux autres sœurs: Si j'avois le maistre d'hostel du Roy pour mon mari, je me voudrois bien vanter de nourrir

toute sa Cour d'un seul verre de vin. Et moy (dit Lionelle) je me veux bien donner ceste louange, que si j'avois le valet de chambre secret du Roy pour mon mary, je ferois tant de toile d'une fusée de mon fil, que je fournirois toute sa Cour de belles chemises fort deliées. Et moy (dit Clarette) je me veux bien vanter, que si j'estois marié au Roy, je ferois trois enfans d'une seule portée; c'est à sçavoir deux fils & une fille, & ferois que chacun d'eux auroit les cheveux nouez par derriere, & meslez de fin or, avec une chaine d'or au col, & une estoille au front. Ces propos furent entendus par un des courtisans, qui s'en alla incontinent vers le Roy, & luy raconta de point en point tout ce que les filles avoient dit. Le Roy entendant ces nouvelles, les fit incontinent venir vers luy, & demanda à l'une d'icelles, quels propos elles tenoient ensemble au jardin. Alors toutes trois d'une grande reverence repliquerent par ordre tout ce qu'elles avoient dit. Ce qui pleust grandement au Roy Lancelot, & ne se partit point de là, que le maistre d'hôtel n'espousa Brunore, & le valet de chambre print Lionelle, & luy-mesmes espousa Clarette. Et laissant aller les autres à la chasse, ils s'en retournerent au logis, où les triomphantes noces furent celebrées, desquelles ne se contenta gueres la mere du Roy, parce

que nonobstant que la fille fust autant belle qu'il estoit possible, avec un parler gracieux, si n'estoit-elle pas convenable à la puissance d'un tel Roy, estant yllué de si pauvre lieu : & ne pouvoit souffrir que le maistre d'hostel & le valet de chambre fussent appelez beaux freres du Roy : tellement que la belle-mere conceut une si grande haine contre sa bru, qu'elle ne la pouvoit souffrir, toutesfois afin de ne fascher son fils, elle dissimuloit son courroux. Advint que la Royne fut enceinte, comme il pleut à Dieu, ce qui fut très-agreable au Roy, lequel attendoit d'un grand desir de voir la belle lignée d'enfans qu'elle luy avoit promis. Cependant il survint quelque affaire au Roy pour aller en quelque pays, tellement qu'il re-commanda très-affectueusement à sa mere la femme & les enfans qui naistroient d'elle, ce qu'elle promit faire de bon cœur. Si-tost que le Roy se fut party pour aller à son voyage, la Royne enfanta trois enfans ; c'est à sçavoir deux fils & une fille, & tous trois (comme la Royne avoit promis estant pucelle) avoient les cheveux nouez sur les espaules, avec une belle chaine d'or & une estoille au front. La mauvaise mere privée de toute charité, & embrasée d'une cruelle & mortelle haine, delibera, sans changer sa mauvaise intention, de faire mourir ses petits enfans, si-tost qu'ils seroient naiz, afin qu'on

ne sceust jamais nouvelles d'eux , & que la Royne tombast en la malle grace du Roy. Outre cela les sœurs de Clarette avoient conceu si grande haine à l'encontre d'elle (parce qu'elle estoit devenue Royne & gouvernoit tout) qu'elles n'en dormoient ny jour ny nuit ; & avec leurs fineses & ruses , taschoient continuellement d'enflamber plus fort la mere à l'encontre d'elle. Advint que sur le point que la Royne accoucha , il vint à naistre trois chiens ; c'est à sçavoir deux masles & une femelle , & avoient une forme d'estoille au front , avec un signe de collier au col. Ces deux diables de sœurs esincuës d'un esprit diabolique , prindrent ces trois petits chiens que la mere allaitoit , & les porterent à la meschante mere du Roy , & luy ayans fait la reverence , luy dirent ainsi : Madame , nous sçavons bien que vous n'aimez gueres nostre sœur , & non sans cause , parce qu'elle est de basse condition , & ne convient pas à vostre fils nostre Roy , qu'une si pauvre femme soit son espouse. Parquoy , sçachans une partie de vostre vouloir , nous sommes icy venuës , & vous avons apporté trois petits chiens qui nasquirent , ayans une forme d'estoille au front , afin que nous en sçachions vostre vouloir. Ceste deliberation fut agreable à la vieille , laquelle se delibera de les presenter à sa bruze , qui ne sçavoit pas encore ce qu'elle

avoit enfanté, & luy donner à entendre que c'estoient ces petits enfans. Et afin que telle malheureuse entreprinse ne se manifestast, la maudite vieille ordonna à la commere, de dire à la Royne que les petits enfans qu'elle avoit enfanté, estoient trois petits chiens. La belle-mere & les sœurs de la Royne, avec la commere, s'en allerent trouver la Royne, & luy dirent : Regarde un peu, gentille Royne, le beau chef-d'œuvre de ton enfantement ; garde-le bien, afin que le Roy cognoisse ton beau fruit, quand il sera venu. Ayant dit ces propos, la commere mit les trois petits chiens contre elle, en la consolant & ad-vertissant de prendre patience, à l'exemple de ceux ausquels tels cas estoient ad-venus. Chacune de ces maudites femmes avoit desja accomply son meschant & abominable vouloir, & ne restoit plus que de mettre à mort les pauvres petits enfans innocens. Mais Dieu tout juste & protecteur du sang innocent, ne permit qu'elles souillassent leurs mains de leur propre sang (comme elles avoient projeté) ayans resolu entre elles de faire une petite caisse bien close de poix, où elles enfermeroient les enfans, qu'elles jetteroient dedans le prochain fleuve, les laissant aller à la discretion de l'eau, qui ja commençoit à les suffoquer, quand Dieu envoya sur la rive du fleuve un Meusnier, nommé Marmiat ; lequel ayant veu la caisse, la print, &

L'ayant ouverte, trouva dedans ces trois petits enfans qui rioient : & pour autant qu'ils estoient si beaux, il pensa incontinent qu'ils estoient fils de quelque grosse Dame, qui par crainte du monde avoit commis un tel excez ; tellement qu'ayant un peu resserré la caisse, se la chargea sur les espaules, & la porta tout droict en son logis, en disant tels propos à sa femme, qui se nommoit Gordiane : Regarde un peu, je te prie, ma femme, ce que j'ay trouvé à la rive du fleuve, tien je t'en fais un present. Gordiane voyant ces beaux petits enfans, les receut gracieusement, & les nourrit autant amiablement comme s'ils fussent saillis de son corps. L'un d'eux fut nommé Aquirin, l'autre Fluvius, à cause qu'il avoit esté trouvé dedans le fleuve, & la petite fille Sereine. Cependant le Roy Lancelot se resjouissoit en son cœur, pensant trouver à son retour trois beaux enfans ; mais son intention ne fut pas telle qu'il pensoit, car si-tost que la malicieuse mere fut advertie que son fils s'approchoit du palais, elle s'en alla au devant de luy, & luy dit, que sa chere femme avoit enfanté trois petits chiens en lieu de trois enfans. Et l'ayant mené en la chambre, où la pauvre accouchée estoit en assez mauvaise disposition, luy monstra les trois petits chiens qui estoient à son costé. Et combien que la Roynne pleuraist incessamment à chaudes larmes, niant

fort & ferme de les point avoir enfantez ; toutefois les mauvaises sœurs confirmoient, que tout ce que la meschante mere avoit dit , estoit veritable. Le Roy entendant ces propos , fut grandement troublé , & tomba quasi en terre de douleur ; mais à la fin estant retourné en son bons sens , adjousta foy entierement aux paroles de sa mere. Et pour autant que la pauvre Royne estoit patiente , supportant constamment les assaux de l'envie courtisane , le Roy ne peut avoir le cœur de la faire mourir ; mais commanda qu'on la mit dessous le lieu où on lave les escolles , & qu'elle vesquist des immondices & charognes qui tomboient incessamment de ce puant lieu. Cependant que la pauvre Royne estoit en ceste infection, en se nourrissant ordinairement de ces ordures , advint que Gordiane (femme de Marmiat Meusnier) entanta un fils qui fut nommé Borguin , & le nourrit amiablement avec les trois autres. Or Gordiane avoit de coustume de rongner tous les mois les cheveux aux petits enfans, desquels tomboient bagues precieuses & grosses perles ; ce qui fut cause que Marmiat quitta son mestier de moudre , devenant incontinent riche , & faisant ordinairement bonne chere avec sa femme , & tous ses petits enfans. Quand les trois enfans commencerent à se cognoistre , ils entendirent qu'ils n'estoient pas fils de Marmiat Meusnier ,

ny de sa Gordiane, mais qu'ils avoient esté trouvez par le fleuve; tellement qu'ils se fascherent grandement, & desirans de chercher leur bonne fortune, demanderent leur congé, & s'en allerent, dont Marmiat & sa femme ne furent gueres contens, se voyans privez du grand tresor qu'ils recevoient ordinairement de leurs blonds cheveux, & du front estoillé. S'estans donc ainsi partis ces trois jeunes enfans d'avec Marmiat, firent tant qu'ils arriverent à Provins, qui estoit la cité de leur pere; & ayans prins une maison à louage, demeurerent ensemble, se nourrissans des bagues & pierres precieuses qui leur tomboient de la teste.

Advint que le Roy s'allant un jour pourmener avec quelques autres courtisans vint par fortune à passer devant le logis des jeunes enfans, lesquels n'ayans point encore cogneu, ny veu aucunement le Roy, descendirent incontinent à la porte, & ostans leurs bonnets & flechissant les genoux & la teste, luy firent une grande reverence. Le Roy qui avoit l'œil d'un faucon, dressa sa veüe sur eux, & cogneut qu'ils avoient une estoille au front, & soudainement il eut une apprehension que c'estoient ses enfans; & s'estant arresté, leur dit: Qui estes-vous? d'où venez-vous? L'un dit, j'ay nom Aquirin, & moy Fluvius, dit l'autre, aussi moy, respondit la fille, je suis nommée Sereine.

Or sus , dit le Roy , je vous semons à dîner demain avec moy. Les jeunes gens qui estoient devenus tous honteux , ne pouvant refuser l'honneste demande du Roy , acceptèrent l'offre.

Si-tost que le Roy fut de retour au Palais , il dit à sa mere : Madame , en m' allant aujourd'huy esbattre , j'ay veu deux fort beaux jeunes fils , avec une fille de bonne grace , & ont tous trois une estoille dorée au front , & (si je ne suis decu) il m'est advis que ce sont ceux que la Royné Clarete me promit une fois. La mastine de mere oyans ces propos , fut autant fâchée que si on luy eut donné un coup de cousteau au travers du cœur ; & ayant fait appeller la sage femme qui avoit recu les enfans , luy dit secrettement : Que diriez-vous , ma commere , m'amie , que les enfans du Roy sont vivans & plus beaux qu'ils ne furent onc ? Est-il possible , respondit la commere ? ne sont-ils pas peris dedans le fleuve ? Comment le sçavez-vous ? A ce que j'ay peu comprendre (dit-elle) par les paroles du Roy , ils sont vivans , tellement que nous avons bien maintenant besoin de vostre conseil , autrement nous sommes en danger de mort. Ne vous souciez point , Madame (respondit la commere) j'espere de jouir si bien mon personnage qu'ils periront tous trois. Et de fait , se partit sur le champ , & s'en alla tout droit au logis de ces jeunes gens ,

& ayant trouvé Sereine toute seule la salua, en devisant longuement avec elle. Puis luy dit : Auriez-vous point la belle fille un peu d'eau qui danſſe ? Non, dit la fille. Mon Dieu, ma fille, que vous verriez de belles choses, ſi vous en aviez ! car ſi vous en frottiez une fois voſtre viſage, vous deviendriez encore plus belle mille fois que vous n'eſtes. Comment pourrois-je donc faire (reſpondit la fille) pour en avoir ? Il faut (dit-elle) que vous envoyez vos freres pour en chercher, & aſſeurément ils en trouveront ; car elle n'eſt gueres loin d'icy. Ayant dit cela, elle ſe partit. Si-toſt que Fluvius & Aquirin furent de retour au logis, Sereine courut au devant d'eux, en les priant de luy faire ce bien d'aller chercher en toute diligence de l'eau qui danſſe. Alors les freres ſe mocquans de tels propos, n'y voulurent pas aller, ne ſçachans où on pourroit trouver telle choſe. Mais à la fin, quaſi comme contraints par les humbles prieres de leur ſœur, prindrent une phiole, & ſe partirent enſemble. Or avoient-ils deſja chevauché plus de deux lieuës par un chemin, quand ils arriverent à une fontaine vive & claire à merveilles, où il y avoit un beau pigeon blanc, qui ſe rafraiſchiſſoit, & ayant oſté toute crainte, leur dit : Que cherchez-vous, jeunes enfans ? Nous cherchons (reſpondit Fluvius) d'une eau precieuſe qui danſſe, comme on dit.

Helas ! pauvres enfans , dit le pigeon , qui vous a envoyé querir de telle eau ? C'est une sœur que nous avons , répondit Fluvius.

Alors le pigeon leur dit : Certes , mes amis , vous cherchez vostre mort , car vous y trouverez des bestes venimeuses qui vous devoreront incontinent ; mais laissez-m'en la charge , & je vous en porteray ?

Et ayant prins la phiole que les jeunes gens portoient , & se l'ayant liée sous l'aissle dextre , print sa volée , & s'en alla où estoit ceste eau delicate , de laquelle ayant remply la phiole , s'en retourna vers ces jeunes gens , qui l'attendoient d'un grand desir.

Ayans receu ceste eau , & rendu les graces qu'il appartenoit , s'en retournent à leur logis , & la presenterent à leur sœur Sereine , luy commandans expressement de ne leur donner plus telles charges , parce qu'ils avoient esté en danger de mort. A quelque temps de là , le Roy rencontra ces jeunes gens , & leur dit : Pourquoi ne vintes-vous l'autre jour dîner avec moy ; veu mesmement que vous m'aviez promis ? Ils respondirent : Les affaires urgentes (Sire) en furent cause. Alors le Roy leur dit : Je vous attendray donc demain à dîner & ne faillez pas. Les jeunes gens s'excuserent. Quand le Roy fut retourné au palais , il dit à la mere , qu'il avoit veu

les jeunes enfans qui avoient l'estoille au front, dont elle fut fort troublée, & fit derechef venir sa commere, & luy raconta tout secrettement, en la priant de faire tant qu'on obviait à ce danger.

La commere la conforta, & luy dist qu'elle ne se souciait de rien, & qu'elle feroit tant qu'on n'entendrait jamais plus nouvelles d'eux. Et s'estant partis du palais, s'en alla au logis de la pucelle, & l'ayant trouvée seule, luy demanda si elle avoit encore eu de ceste eau. La fille respondit qu'ouy, mais que ce n'estoit pas sans avoir mis en grand danger ses freres. Je voudrois bien (ma fille) dit la commere, que vous eussiez une pomme qui chante, car vous n'en vistes onc de si belle, & n'entendites jamais un si doux chant. Je ne sçay comment l'avoir (dit la fille) parce que mes freres n'y voudront pas aller, à cause qu'ils se sont desja trouvez en plus grand danger de mort, qu'en esperance de vie. Ils vous ont deja apporté l'eau qui danse, respondit la fausse vieille, & n'en sont pas morts pour cela; tout ainsi qu'ils vous ont apporté de l'eau ils vous pourront bien apporter la pomme. Et sur ce point, ayant prins congé d'elle se partit. La commere ne fut pas si tost partie que les freres survindrent, & Sereine leur dit: Mes freres, je voudrois bien voir & gouter de ceste pomme qui chante si doucement; & si vous ne me faites

Faites ce que je vous dis , estimez que vous me verrez bien-toſt morte.

A ces propos les freres la reprindrent grandement , en luy remonſtrant qu'ils ne vouloient pas mettre leur vie en danger à ſon appetit , comme ils avoient deſjá fait. Mais les prieres de Sereine furent ſi grandes , eſtans meſlées de pleurs & gemiſſemens , que les freres ſe deliberent de la contenter , quoy qu'il en advint : tellement qu'eſtant montez à cheval ils ſe par-tirent , & tant chevaucherent qu'ils arri-verent en une hoſtellerie , où eſtans en-trez , demanderent à l'hoſte ſ'il leur ſçau-roit point enſeigner le lieu où ſe trouvoit la pomme qui chante ſi doucement. Il leur reſpondit qu'ouy ; mais qu'ils n'y pour-roient pas aller , à cauſe que ceſte pom-me eſtoit en un plaiſant jardin , & eſtoit gardée par une cruelle beſte , qui met-toit à mort tous ceux qui ſ'en appro-choient.

Que devons-nous donc faire , dirent les jeunes freres , veu qu'il nous la faut avoir , quoy qu'il en ſoit ? Alors l'hoſte reſpondit : Si vous faites ce que je vous diray , vous aurez la pomme , & ne ſerez point en danger de la beſte. Il faut , dit-il , que vous preniez ceſte robe toute gar-nie de miroirs , & que l'un de vous le met-te ſur ſoy , & qu'il entre ainſi tout ſeul dedans le jardin qu'il trouvera ouvert , & l'autre demeurera hors du jardin , ſans

se laisser voir aucunement. Et si-tost qu'il fera entré dedans le jardin , la beste viendra contre luy , & en se voyant soy-mesme dedans le miroir , tombera incontinent morte par terre. Cela fait , il s'en ira vers l'arbre , & prendra facilement la pomme , & qu'il se donne bien garde sur tout de regarder après soy en sortant du jardin. Ces jeunes gens firent tout ainsi que l'hoste leur avoit enchargé , en le remerciant grandement , & firent tant qu'ils porterent la pomme à leur sœur , en luy remonstrant que ce fust la derniere fois qu'elle leur donnast telles commissions dangereuses. A quelques jours de-là , le Roy trouva ces deux jeunes freres , & les ayant fait appeller , leur dit : Qui est la cause , que selon l'assignation donnée , vous n'estes venus dîner avec moy ? Ce sont (dit l'un) les divers affaires & occupations qui nous en ont osté l'opportunité. Or ce sera pour demain , dit le Roy , & donnez-vous bien de garde de faillir. Aquirin respondit , que s'ils pouvoient demesler quelques affaires d'importances , ils y viendroient fort volontiers. Le Roy estant retourné au palais , dit à sa mere , qu'il avoit encore veu les jeunes enfans qu'il avoit tousjours au cœur , pensant tousjours à ceux que Clarette luy avoit autrestois promis ; & ne pouvoit avoir repos en son esprit , jusques à ce qu'ils fussent venus une fois dîner avec luy. La

traistresse de mere entendant ces propos, fut plus fâchée que jamais, craignant que son malheur ne fust descouvert. Et estant ainsi dolente, envoya querir la commere, & luy dit : Ma commere, je pensois desja que ces enfans fussent morts, & qu'on ne deust plus ouïr nouvelles d'eux, mais ils sont encore vivans, & sommes en danger de mort. Il faut donc que vous y mettiez ordre, autrement nous sommes toutes perduës. Alors la commere respondit : Ne vous chaille, Madame, car je feray tant que jamais vous n'entendrez ny vent ny fumée d'eux. Et ainsi toute courroucée & remplie de despit, s'en alla vers la fille, & luy ayant donné le bon jour, luy demanda si elle avoit la pomme qui chante. Ouy, dit-elle. Alors la ribaude vieille luy dit : Ce n'est rien de ce que vous avez, si vous ne tâchez d'avoir une chose qui est mille fois plus belle, sans comparaison, & de meilleure grace que les deux premieres. Dites-moy donc que c'est, ma mere. C'est un bel oyseau, dit-elle, qui caquette jour & nuict, & dit choses merveilleuses. Si vous l'aviez à vostre commandement, vous seriez la plus heureuse fille de ce monde. Ayant dit ces propos, elle se partit. Les freres ne furent pas si-tost arrivez au logis, que Sercine les affronta, & les pria de luy octroyer encore une seule grace ; & luy ayant demandé quelle grace c'estoit, elle respondit que c'estoit le bel

oyseau verd. Or Fluvius qui s'estoit trouvé au combat de la venimeuse beste, se souvenant d'un si extreme danger, refusa fort bien d'y aller : mais Aquirin, nonobstant qu'il eust desja par beaucoup de fois refusé, finalement esmeu d'une fraternelle amitié, & les larmes continuelles que Sereine espandoit, delibererent tous deux de compagnie de la contenter. Et estans montez à cheval, firent tant par leurs journées qu'ils arriverent en un beau pré verdoyant, au milieu duquel y avoit un fort bel arbre, haut à merveille & bien fucillu, estant environné de diverses figures de marbre, qui sembloient estre vives ; tout joignant passoit un petit ruisseau, qui arrousoit tout le pré. Et sur cest arbre le bel oyseau se desgorgeoit, sautant de branche en branche, & en proferant paroles qui sembloient estre plustost divines qu'humaines. Estans descendus de leurs chevaux, & les ayans laissé paistre par la belle prairie, s'approcherent de ces figures de marbre ; & si-tost qu'ils les eurent touchées, ils devindrent comme elles. Or Sereine qui avoit long-temps attendu ses freres, pensoit bien de les avoir perdus, & toute esperance estoit perdue de les pouvoir jamais recouvrer. Estant ainsi en ces regrets, & pleurant incessamment leur piteuse & miserable mort, montra à cheval, deliberant en soy-mesme d'aller chercher sa bonne fortune ; & tant

chevaucha jour & nuit, qu'elle arriva au lieu où cest oyseau verd chantoit & parloit gracieusement sur l'arbre. Et si-tost qu'elle fut entrée en la prairie, elle cogneut les chevaux de ses freres qui païssoient : & en tournant sa veüe çà & là, elle apperceut ses freres, qui estoient devenus en figures de pierre, & avoient leur semblance, dont elle fut toute estonnée. Et estant descenduë de son cheval, & s'approchant de l'arbre, estendit la main, & empoigna le bel oyseau verd ; lequel se voyant privé de sa liberté, la pria que ce fust son plaisir de le laisser aller, & qu'il s'en souviendrait en temps & lieu. Sereine luy respondit, qu'elle n'en feroit rien, s'il ne remettoit ses freres en leur premier estat. Alors l'oyseau luy dit : Regarde sous mon aïlle dextre, & tu trouveras une plume beaucoup plus verde que les autres, tu y verras quelques marques jaunes par dedans ; prens là, & t'en va vers les images, & si-tost que tu leur auras touché les yeux avec la plume, tu verras tes freres retourner en leur premier estat. La jeune fille luy ayant haussé l'aïlle, trouva la plume, comme l'oyseau luy avoit dit : & ayant touché les yeux des images l'un après l'autre avec ceste plume, ils retournerent comme auparavant. Voyant ainsi ses freres en bonne disposition, commença à les baiser & embrasser. Après que Sereine eut obtenu son

intention , l'oyseau la pria derèchef que fut son plaisir de le laisser en liberté , luy promettant que s'il obtenoit ceste grace de luy rendre un jour la pareille , s'il se trouvoit à l'endroit. Sereine , non contente de ce , luy respondit qu'elle n'en feroit rien , si premierement ils ne trouvoient qui estoit leur perc & leur mere , qui eussent pour le moins le moyen de supporter une telle charge. Or y avoit-il un grand debat entr'eux pour cest oyseau ; mais finalement il fut arresté entre-eux , que la fille le tiendrait près de soy : tellement qu'elle le gardoit fort soigneusement , & le mignardoit tousjours. Après que l'oyseau fut escheu à Sereine , les freres monterent à cheval , & s'en retournerent fort contens à leur logis. Le Roy , qui passoit souvent par devant le logis de ces jeunes gens , ne les voyant plus comme il souloit , s'esmerveilla grandement ; & ayant demandé aux voisins qu'ils estoient devenus , on luy respondit qu'on n'en sçavoit plus de nouvelles , & qu'il y avoit desja long-temps qu'on ne les avoit point veüs. Si-tost qu'ils furent de retour , ils ne demurerent pas deux jours , que le Roy les trouva , & leur demanda où ils avoient esté si long-temps , qu'on ne les avoit point veus. Aquirin luy respondit qu'il leur estoit survenu d'estranges accidens , & s'ils n'estoient venus vers sa majesté , suivant leur promesse , ils luy de-

F A B L E III. 311

mandoient pardon , & qu'ils estoient prests à recompenser ceste faute. Le Roy entendant leur infortune , & ayant pitié d'eux , ne se partit point de là qu'il ne les menast dîner avec luy au palais. Aquirin ayant prins secrettement l'eau qui danſſe , & Fluvius la pomme qui chante , & Sereine le bel oyseau verd , entrerent joyeuſement au palais avec le Roy , & s'assirent à table. La mauvaise mere & les envieuses sœurs , voyant une si belle jeune fille , & les deux jeunes fils de si bonne grace , qui avoient les yeux luisans comme estoilles , eurent grand soupçon & tristesse en leur cœur. Après qu'on eut desservy la table , voilà Aquirin qui va dire : Sire , nous voulons icy monſtrer choses qui vous plairont ; & ayant prins une tasse d'argent , y mit dedans l'eau qui danſſe , & l'assit sur une table. Cela fait , son frere Fluvius mit la main en son sein , & tira la pomme qui chante , & la mit près de l'eau. Sereine qui tenoit en son giron le bel oyseau verd , le mit incontinent sur la table. Vous eussiez alors entendu un chant fort doux , qui donnoit un plaisir merveillex aux assistans. De l'autre costé la truande mere & les sœurs en conceurent grande fascherie , doutans grandement de leur vie. Le chant finy & le bal , l'oyseau commença à parler , en disant : O Roy sacré , que meriteroit celuy qui a procuré la mort de deux freres & d'une

sœur ? La mere va respondre incontinent : Il ne meriteroit autre chose que le feu. Toutes les autres respondirent le semblable. Alors l'eau qui danse & la pomme qui chantent haussèrent la voix, en disant : Ah ! fausse mere, remplie d'iniquité, tu te condamnes de ta bouche propre. Et vous malheureuses sœurs que vous estes, vous serez pareillement condamnées avec la commere. Le Roy entendant ces propos, fut fort estonné : mais l'oyseau verd poursuivant son discours, dit : Sire, voilà vos trois enfans que vous avez tant désiré ; ce sont ceux qui portent l'estoille au front. Leur mere, très-innocente, est celle qui jusques à present a tousjours demeuré dedans les ordures & infections. Et l'ayant fait tirer de ce lieu puant, la fit vestir honorablement : si-tost qu'elle fut vestue on la fit venir en la presence du Roy ; & nonobstant qu'elle fust ainsi maltraitée en ceste puante prison, par longue espace de temps, si est-ce que sa premiere beauté fut tousjours preservée : & en la presence de tous le bel oyseau verd raconta depuis le commencement jusques à la fin, comment tout estoit allé. Alors le Roy cognoissant tout le discours de la matiere, commença à baïser & embrasser estroittement sa femme & ses chers enfans, non pas sans grande abondance de larmes & gemissemens. Cela fait, l'eau qui danse & la pomme qui chante, avec le bel oyseau verd,

verd, estans laissez en liberté, s'en allerent. Le jour ensuivant, le Roy commanda qu'on allumast un grand feu au milieu de la place, & que la mere, avec les deux sœurs & la commere fussent bruslées devant le peuple, sans aucune misericorde. Et depuis, le Roy vesquit longuement avec la Royné & ses gentils enfans; & ayant marié honorablement la fille, laissa ses enfans heritiers de son Royaume.

La Fable de Loyse parachevée, Madame luy commanda de proposer son Egnigme, qui fut tel :

*Sur le haut mont de Chiralde superbe,
De forte haye entour environné;
Un apperceus à tout son œil acerbe,
Du Soleil aspre estant enluminé;
Ses beaux habits, fine esmeraude en herbe;
Il rit, il parle, & n'est point estonné,
Le voilà tout, plus que son nom ne reste,
Dites-le donc, & qu'il soit manifeste.*

Les interpretations furent données en diverses manieres, & n'y eut celuy qui en tiraist la vraye substance, sinon la gracieuse Isabelle; qui dit d'un cœur gay : L'Enigme de Mademoiselle Loyse ne signifie autre chose que le Papegay, qui est en la cage close de fer, qui est la haye, & verd comme l'esmeraude, & caquette tout le jour. Ceste subtile exposition fut grandement louée d'un chacun : tellement

314 LA IV. NUIT;
que Loyse, qui pensoit bien que nul autre ne le pourroit interpreter, ne sceut que dire, sinon qu'ayant prins un peu de hardiesse, elle dist tels propos à Isabelle, qui devoit après elle proposer : Je me plains de vous, dit-elle, non pas que je me mescontente de vostre honneur; mais parce que toutes les autres ont interpreté leurs Enigmes sans estre aidées; mais soyez asseurée que je vous rendray la pareille. Vous ferez bien, Madame Loyse, répondit Isabelle : laquelle par le commandement de Madame, commença ainsi sa Fable :



FABLE IV.

Nerin, fils de Galois Roy de Portugal, amoureux de Janeton, femme de maistre Raimond Brunel Physicien, joïit de ses amours, & la mena avec soy en Portugal; & maistre Raimond en mourut de desplaisance.



L'y a beaucoup de gens (très-honorées Dames) qui s'estans adonnez par longue espace de temps aux études des bonnes lettres, pensent sçavoir beaucoup de choses, mais ils ne sçavent rien, ou bien peu; car se cuidant telles gens signer par le front, se viennent eux-mesmes à arracher les yeux; comme il advint à un Medecin fort sçavant en son art, lequel pensant se moquer d'autrui, fut luy-mesme moqué, à son grand deshonneur & reproche, comme vous entendrez par le discours de la Fable que je vous raconteray presentement.

Galois Roy de Portugal eut un fils nommé Nerin, & le fit nourrir en telle sorte qu'il ne vid jamais aucune femme, sinon

sa mere & la nourrice qui l'allaiſtoit ; & continua ceſte maniere de vivre juſques à l'aage de dix-huit ans , & au bout du terme le Roy delibera de l'envoyer aux eſtudes à Padouë , pour luy faire apprendre les lettres Latines , avec la langue & les mœurs des Italiens : ce qui fut mis incontinent en execution. Or eſtant ce jeune fils Nerin à Padouë , & ayant deſja prins accointance de beaucoup d'eſcoliers qui luy faiſoient ordinairement la cour , entre autres il y avoit un Medecin nommé maître Raimond Brunel Phyſicien ; & en devisant de diverſes matieres , ſe mirent à parler , comme eſt la couſtume des jeunes gens , & tenir propos des belles femmes : puis d'une choſe , tantost de l'autre. Mais Nerin qui n'avoit encore point veu d'autres femmes que ſa mere & ſa nourriſſe , diſoit franchement qu'il ne trouvoit en ce monde aucune femme qui fuſt plus belle à ſon jugement , que ſa mere & ſa nourriſſe ; & après qu'on luy en eut monſtré de toutes ſortes , il les eſtimoit charongnes au regard de ſa mere. Or maître Raimond qui avoit l'une des plus belles femmes que nature fit oncques , commença à entrer en ſes gogues , en diſant : Seigneur Nerin , je ſçay bien une femme qui eſt de telle beauté , que quand vous la verriez , poſſible vous ne la jugeriez pas moins , mais plus belle que voſtre mere. Nerin reſpondit qu'il ne pouvoit croire

qu'elle fust plus belle que sa mere; mais qu'il la verroit volontiers pour en dire son opinion. Puis qu'il vous plaist de la voir, dit maistre Raimond, venez demain au matin en la grande Eglise, je vous promets que vous la verrez. Et quand il fut de retour au logis, il dit à sa femme: Levez-vous demain de grand matin, & vous accoustrez le plus bravement que vous pourrez, en vous faisant belle; car je veux que vous alliez à l'heure de la grand' Messe à la grande Eglise au service. Janeton, qui estoit le nom de la femme de maistre Raimond, qui n'estoit pas accoustumée d'aller çà & là, mais demouroit la plus part du temps au logis à coudre & à broder, s'estonna grandement de ceste nouvelle entreprise; mais parce qu'il le vouloit ainsi, elle se prepara comme il luy avoit dit, & s'accoustra si proprement, qu'elle ne sembloit pas une femme, mais plustost une déesse: de-là s'estant partie pour aller à la grande Eglise, suivant le vouloir de son mary; Nerin fils du Roy arriva, & ayant veu Janeton, la jugea très-belle. Si-tost qu'elle se fut partie, maistre Raimond arriva, & s'estant approché de Nerin, luy dit: Or sus, Scigneur Nerin, que vous semble de ceste femme qui s'est maintenant partie de l'Eglise? Vous semble-t'il qu'il y ait rien à redire? Est-elle plus belle que vostre mere? Vrayement elle est belle, dit Ne-

rin, & pense que nature n'en pourroit faire une plus belle. Mais dites-moy, je vous prie, à qui elle est mariée, & où elle se tient. Maistre Raimond ne luy respondit pas à propos, parce qu'il ne luy vouloit pas dire. Je vous supplie donc, mon amy maistre Raimond, me faire ce bien, que si vous ne me voulez dire à qui elle est mariée, ny où elle se tient, contentez-moy à tout le moins en cela, que je la voye encore une fois. Très-volontiers, respondit maistre Raimond : ne faillez pas à venir au matin à l'Eglise, & je feray tant que vous la verrez. Cela fait, maistre Raimond s'en alla en son logis, & dit à sa femme : Janeton, accoustrez-vous demain au matin, car je veux que vous alliez à l'Eglise ; & si jamais vous fustes bien parée & belle, mettez-y tout vostre pouvoir pour demain. Janeton s'esbahissoit de tout ce mistere icy ; mais parce que le commandement du mary la pressoit, elle fit tout ce qu'il luy avoit enchargé. Le jour venu, Janeton estant richement vestuë & mieux parée que de coustume, s'en alla à l'Eglise. Bien-tost après Nerin arriva, qui la voyant si belle, en fut tant amoureux que fut jamais homme de femme. Et quand maistre Raymond fut arrivé, Nerin le pria de luy dire qui estoit celle qui luy sembloit si belle. Mais maistre Raymond qui feignoit d'estre pressé, à cause de ses pratiques, ne respon-

Dit rien pour lors ; mais laissant le jeune homme ronger son frein , se partit joyeusement , tellement que Nerin se vint fâcher de ce que maistre Raymond avoit monsté de faire peu de conte de luy, disant en soy-mesme : Or bien tu ne veux pas que je sçache qui elle est & où elle se tient, & je te promets que je le sçauray en despit que tu en ayes. Et de fait , s'estant party de l'Eglise , il attendit tant que ceste belle Dame vint à sortir , & luy ayant fait la reverence , d'un visage riant & affable , l'accompagna jusques à son logis. Or quand Nerin eut cogneu la maison où elle se tenoit , il commença à faire l'amour avec elle , & n'eust laissé jamais passer un jour qu'il n'eust passé plus de dix fois devant son logis. Et desirant grandement quel moyen il devoit tenir pour obtenir son desir, & que l'honneur de la Dame fust gardé ; & ayant pensé & repensé , & ne trouvant aucun remede , qui luy fust profitable : finalement il fit tant qu'il print accointance d'une vieille qui se tenoit vis-à-vis de Janeton ; tellement que luy ayant fait quelques presens, en confirmant l'estroite amitié qui estoit entr'eux , s'en alla secrettement en son logis. Or y avoit-il une fenestre au logis de ceste vieille , qui regardoit tout droit en la sale de Janeton, par laquelle il la pouvoit voir facilement aller haut & bas , mais il ne se vouloit monstrier à elle, de peur de luy donner occasion de

ne se laisser plus voir. Estant ainsi Nerin tout le jour en ces amoureuses œillades, ne pouvant plus résister aux aiguillons ardens, qui incessamment le piquoient & brusloient le cœur, delibera de luy escrire une lettre, & la jeter en son logis par ceste fenestre quand il pourroit penser que son mary n'y seroit pas. Et de fait, il la jetta par plusieurs fois : mais Janeton, autant qu'elle en trouvoit, les jettoit dedans le feu, sans les lire aucunement; joint qu'elle n'y pensoit pas. Et après avoir fait par plusieurs fois tel acte, à la fin il luy vint en la fantasie d'en ouvrir une, & lire ce qui estoit escrit dedans. L'ayant leüe, & voyant que la souscription estoit, Nerin fils du Roy de Portugal, qui estoit grandement amoureux d'elle, ne sceut que dire du commencement, mais à la fin considerant le mauvais temps qu'elle avoit avec son mary, print un peu de courage, & commença à monstrier bon visage à Nerin, & luy ayant donné assignation le fit venir en sa maison, où il luy manifesta son amour, & les grands tourmens qu'il souffroit jour & nuit pour elle, & le moyen comment il estoit devenu amoureux d'elle : tellement que la Dame qui estoit belle, paisible & pitoyable ne luy refusa point son amour. Estans ainsi ces deux amants conjoints d'un amour reciproque, cependant qu'ils estoient en ces propos amoureux, voicy venir maistre

Raymond qui frappa à la porte. Janeton entendant que c'estoit son mary, fit coucher Nerin sur le liét, & ayant abbatu les courtines, le fit demeurer jùsques à tant que son mary fust departy. Si-toft que maistre Raymond fut arrivé, il print quelques petites drogues qui luy estoient pour lors nécessaires, puis s'en alla sans appercevoir aucune chose. Autant en fit Nerin, car il ne se douta oncques que maistre Raymond fust mary de ceste Dame. Le jour ensuivant, ainsi que Nerin se pourmenoit par la place, par fortune maistre Raymond vint à passer, & Nerin luy fit signe qu'il vouloit un peu parler à luy, & s'estant approché de luy : Monseigneur, dit-il, il y a bien des nouvelles. Et quoy, respondit maistre Raymond ? Que diriez vous, dit Nerin, que je sçay bien où se tient ceste belle Dame ? Et qu'ainsi soit, j'ay devisé longuement avec elle ; mais parce que son mary arriva, elle me cacha dedans le liét, & tira les courtines, de peur qu'il ne me vist, & tout incontinent après il se partit. Est-il possible ? respondit maistre Raymond. S'il est possible, dit Nerin : Je vous dis qu'il n'y a rien plus vray, & ne vis onc la plus gracieuse, ny la plus plaifante Dame qu'elle. Je vous supplie, Monsieur mon amy, me faire ce bien que vous me recommandiez à elle si vous la voyez, en la priant de ma part qu'elle me maintienne tousjours

en sa bonne grace : ce que maistre Raymond luy promit de faire , & se partir bien fasché d'avec luy. Toutesfois devant que prendre congé de luy , il luy dit : Monsieur , y retournerez-vous plus ? En doutez-vous ? dit Nerin. Alors maistre Raymond s'en alla au logis , & ne voulut dire mot à sa femme , mais espier le temps qu'ils fussent ensemble. Le jour ensuivant venu , Nerin retourna vers Janeton : cependant qu'ils estoient en plaisirs amoureux & propres gracieux , le mary arriva. Au moyen dequoy elle cacha incontinent Nerin dedans un coffre & mit au devant plusieurs robes qu'elle avoit secoüé , de peur que les tignes ne les gassent. Le mary feignant de chercher quelques besongnes , renversa quasi toute la maison , & regarda jusques dedans le liât ; mais voyant qu'il n'y avoit rien , se partit un peu plus content qu'il n'estoit venu , & s'en alla en pratique. Nerin pareillement se partit bien-tost après , & ayant trouvé maistre Raymond , luy dit : Escoutez , Monsieur le Docteur , que diriez-vous que je suis retourné vers ceste Dame ? mais la mauvaise & envieuse fortune m'a rompu tous mes plaisirs , parce que le mary est survenu , & a gasté tout nostre mystere. Comme donc avez-vous fait à vous sauver ? répondit maistre Raymond. Je me suis , dit-il , caché dedans un coffre , & de peur que le mary ne me trouvast ,

elle mit au devant du coffre beaucoup de vestemens qu'elle avoit tiré hors des coffres, de peur qu'ils ne fussent mangez de la vermine; tellement que le mary ayant renversé tout ce qui estoit en la maison, jusques au liét, & ne trouvant aucune chose, se partit. Vous pouvez penser, mesmement ceux qui ont expérimenté amour, combien tout ce discours estoit agreable à maistre Raymond. Or Nerin avoit donné à Janeton un beau & riche diamant, où sa teste & son nom estoit gravé à l'entour de l'enchasseure. Si-tost que maistre Raymond fut allé en pratique, Nerin fut mandé par la Dame. Comme ils passioient leur temps en plaisirs & propos amoureux, le mary retourna au logis, tellement que Janeton se voyant ainsi surprinse, ouvrit incontinent un garde-robe assez grand, qui estoit en sa chambre, & cacha dedans Nerin. Maistre Raymond ne fut pas si-tost entré au logis, feignant de chercher je ne sçay quoy, qu'il remua & broüilla quasi tout ce qui estoit en la chambre; & ne trouvant aucune chose, ny au liét, ny aux coffres, comme estourdy & hors du sens, print du feu, & le mit aux quatre coings de la chambre, delibérant de brusler la chambre, & tout ce qui estoit dedans. Le menage de bois commençoit desja à brusler, quand Janeton se tourna vers le mary, & luy dit: Que voulez-vous faire mon ma-

ry ? estes-vous hors du sens ? Puis que vous voulez brusler la maison , faites ce qu'il vous plaira ; mais je ne veux pas que vous brusliez ce garde-robe , où sont les escritures & instrumens de mon mariage ; & ayant fait appeller quatre porte-faits puissans , leur fit sauver ce garde-robe , & le fit mettre au logis de la vieille maquerelle ; & l'ayant secrettement ouvert sans que nul s'en apperceust , s'en retourna à son logis. Le fol maistre Raymond attendoit cependant s'il sortiroit point quelqu'un , mais il ne peut jamais voir , sinon la fumée & le feu ardent qui brusloit sa maison. Tous les voisins estoient desja accourus pour esteindre le feu , & firent tant qu'ils y donnerent ordre. Le jour ensuivant , ainsi que Nerin s'en alloit aux champs , il vint par fortune à rencontrer maistre Raymond , & luy dit en le saluant : Bon-jour , maistre Raymond , je vous veux raconter une chose qui vous plaira grandement. Et quoy ? respondit maistre Raymond. J'ay eschappé , dit Nerin , le plus extreme danger que fit jamais homme vivant. Je m'en allay au logis de la Dame que vous sçavez , & ainsi que j'estois en propos amoureux avec elle , le mary survint , lequel après avoir cherché & trassé par toute la maison , a mis le feu aux quatre coings de la chambre , & a bruslé tout ce qui estoit là dedans. Et vous , dit maistre Raymond , où estiez-

Vous cependant ? J'estois caché, dit Nerin, dedans un garde-robe, que la Dame jetta dehors du logis. Maistre Raymond entendant ces propos, & cognoissant que ce qu'il disoit estoit vray, tomba quasi mort en terre ; mais il ne s'osoit descouvrir, à cause qu'il desiroit de les trouver sur le fait : tellement qu'il luy dit : Seigneur Nerin, pensez-vous plus y retourner ? Et quoy donc ? respondit Nerin. Puis que je suis eschappé du feu, que dois-je plus craindre ? Ayant laissé tous ces propos, maistre Raymond pria Nerin de venir dîner le lendemain en son logis ; ce que accepta Nerin de bon cœur. Le jour ensuivant venu, maistre Raymond invita tous les parens de son costé, & tous ceux du costé de sa femme, & fit apprester un somptueux & magnifique festin, non pas en la maison qui estoit desja demy bruslée, mais en un autre lieu, & commanda à la femme qu'elle y vint, & qu'elle ne se deust point asseoir, mais qu'elle fust cachée, & qu'elle preparast tout ce qui estoit de besoin. Quand tous les parens furent assemblez, & le jeune Nerin, chacun se mit à table : & durant le dîner ; maistre Raymond tascha (avec sa lourde & bestiale science) d'enyvrer Nerin, & pour en pouvoir jouir à son gré ; tellement que luy ayant fait donner par plusieurs fois un plein verre de malvoisie, & l'ayant beu, maistre Raymond luy va

dire : Or sus, Seigneur Nerin, racontez un peu à ceste notable compagnie quelque petite nouvelle par maniere de passe-temps. Le pauvre Nerin (qui ne sçavoit pas que Janeton fust femme de maistre Raymond) commença à raconter toute ceste histoire, sans nommer toutesfois personne. Cependant un serviteur s'en alla de fortune en la chambre où estoit Janeton, & luy dit : Madame, si vous estiez maintenant cachée en un coin, vous entendriez le plus beau conte & la plus joyeuse nouvelle qu'entendites oncques, venez y, je vous prie. Quand elle se fut approchée, elle cogneut Nerin à la voix, & que l'histoire qu'il racontoit s'adressoit à elle. Alors comme femme prudente & discrète, print le diamant que Nerin luy avoit donné, & le mit en une tasse d'argent, pleine de breuvage delicat, & dit au serviteur : Prends ceste tasse, & la porte à Nerin, & luy dis qu'il boive tout cela, & qu'il caquettera après micux. Le serviteur print la tasse, & la porta à la table, & ainsi que Nerin vouloit boire, le serviteur luy dit : Prenez ceste tasse, Seigneur, & puis vous parlerez mieux à vostre aise. Ayant prins la tasse, il beut tout le vin : & ayant recogneu le diamant qui estoit dedans, le laissa couler en sa bouche, & feignant de se nettoyer la bouche, le tira hors & le mit en son doigt. Et quand il eut cogneu que la femme de laquelle il

parloit, estoit femme de maistre Raymond, il ne voulut point passer outre. Et pour autant que maistre Raymond & ses parens le pressoient de finir la farce qu'il avoit commencée, il respondit : Sur ce point le coq chanta, & incontinent après il fut jour, & estant reveillé de mon sommeil, je ne vis plus rien. Les parens de maistre Raymond entendans ceste conclusion, & croyans auparavant que tout ce que Nerin avoit dit de la femme estoit veritable, commencerent à traicter l'un & l'autre comme yvrongnes. A quelques jours de là maistre Raymond fut rencontré par fortune par Nerin, lequel feignant de ne sçavoir pas qu'il fust mary de Janeton, luy dit, que dans deux ou trois jours il se partiroit, parce que son pere luy avoit rescrit, qu'il s'en deust retourner en son Royaume. Dieu vous vueille conduire, respondit Raymond. Nerin ayant donné ordre à tout son cas, s'accorda si bien avec Janeton, qu'il s'enfuit avec elle, & s'en alla en Portugal : où ils vesquirent longuement en grande liesse. Et maistre Raymond estant de retour au logis, & ne trouvant pas sa femme, en mourut de dueil & fâcherie.

Voilà donc comment le pauvre maistre Raymond apprint à ses despens, à louer sa femme.

Ceste Fable gracieusement racontée par Isabelle, fut très-agreable aux hommes.

& pareillement à toutes les Dames, mesmement que maistre Raymond avoit esté cause de tout son malheur, & luy estoit advenu ce qu'il alloit cherchant. Mais la Dame ayant entendu la fin d'icelle, fit signe à Isabelle de continuer l'ordre commencé, avec son Enigme, ce qu'elle fit, en disant :

*Sur la minuiet un se vient à lever ,
Du tout barbu , & barbe ne fait croistre ,
Notant le temps sans astres observer ,
Portant couronne , & n'est ne Roy ne Prestre ;
Les heures chante & se sent resonner ,
Esperonné ains que chevalier estre ;
Il paist enfans sans femme rien avoir :
Bien est subtil qui le pourra sçavoir.*

De tous les assistans, il n'y eut celuy qui peust donner la vraye interpretation du subtil Enigme recité par Isabelle, sinon la petite rechinée de Loyse; laquelle se souvenant de la honte qu'on luy avoit fait le jour precedent, se leva & dit : L'Enigme proposé par nostre sœur Isabelle, ne signifie autre chose, sinon le coq qui se leve la nuit à chanter, & porte barbe, cognoissant le changement du temps, sans estre Astrologien. Il porte la crete en lieu de couronne, & n'est pas Roy : il chante à toutes les heures, & n'est pas prestre : il porte esperons aux pieds, & n'est pas chevalier : nourrissant les enfans d'autrui, qui

qui sont les petits poulets.

Chacun de la compagnie trouva bonne ceste interpretation , & mesmeiment le Seigneur Capel qui dit : Certes Madame Loyse , je voy bien que Mademoiselle Isabelle vous a bien rendu vostre change , car vous luy aviez déclaré son Enigme , & elle vous a déclaré le vostre : au moyen de quoy vous n'aurez point envie l'une sur l'autre. Loyse respondit promptement , quand il sera temps je luy rendray pain pour farine. Mais afin que les paroles ne multipliasent , Madame ordonna que chacun se teust , & s'estant tournée vers Alienor , à qui estoit escheu le dernier lieu de ceste nuit , luy commanda de commencer bravement sa nouvelle , ce qui fut fait en la maniere qui s'ensuit , & d'une bonne grace.



FABLE V.

*Flamine Veralde se partit d'Hostie, & va cherchant la mort :
& ne la trouvant pas, vint à
rencontrer la vie, qui luy fit voir
la crainte & essayer la mort.*



ON trouve beaucoup de gens ; qui de tout leur effort & diligence , cherchent soigneusement aucunes choses ; & les ayans trouvées , ils ne voudroient pas les avoir seulement rencontrées , ains les fuyent à plus grande puissance que ne fait pas le diable l'eau benite : ce qui advint à Flamine ; lequel cherchant la mort , & ayant trouvé la vie luy fit voir la crainte & essayer la mort , comme vous entendrez par la presente Fable , que je vous raconteray maintenant.

En Hostie , cité très-ancienne (assez près de Rome) y eut autresfois un jeune homme , comme est le bruit commun , plustost simple & vagabond , que fin & arresté , & se nommoit Flamine Veralde. Iceluy avoit souventesfois ouy dire qu'il

n'y avoit point en ce monde la plus hideuse , ny la plus espouvantable chose que la mort ; car sans avoir respect ny à riches , ny à pauvres , ou de quelque condition que ce soit , tant y a qu'elle ne pardonne à personne. De quoy estant tout estonné , delibera en soy-mesme , de voir & trouver , quoy qu'il en advint , celle que les hommes appellent mort : & après s'estre vestu de gros accoustremens , print un gros baston de cormier bien ferré , & se partit d'Hostie.

Après avoir deja fait beaucoup de chemin , il arriva en une rue , au milieu de laquelle y avoit un Cordonnier qui faisoit des souliers en sa boutique ; & combien qu'il en eust grande quantité de faits , si estoit-il tous-jours après à en faire d'autres. Flamine s'approchant de sa boutique , luy va dire : Dieu vous gard' , maistre. Vous soyez le très-bien venu , mon fils , respondit le Cordonnier. Et puis que faites-vous de bon ? repliqua Flamine. Je travaille , respondit le Cordonnier , & endure de peur d'endurer ; & comme vous voyez je travaille après mes souliers. Et pourquoy faire ? dit Flamine , vous en avez desja tant , qu'en ferez-vous de tant ? A quoy respondit le Cordonnier , pour les porter , pour en vendre , pour m'ayder à nourrir avec mon petit mesnage , & afin que je me puisse survenir en ma vieillesse , de ce que je gagne maintenant. Et puis après ,

E e ij

dit Flamine, qu'en sera-t'il ? Il faudra mourir, répondit le Cordonnier. Mourir dea ! dit Flamine. Ouy certes, répondit le Cordonnier. Venez-ça, maistre (dit Flamine) me sçauriez-vous point enseigner que c'est que de la mort ? Nenny par mon serment, répondit le Cordonnier. Ne la vistes-vous jamais, dit Flamine ? Je ne la vis onc & ne la voudrois voir, ny essayer; car on dit que c'est la plus estrange, & la plus terrible beste de ce monde. Alors Flamine luy dit : Me la sçauriez-vous point enseigner, maistre, ou me dire où elle se pourroit trouver ? car je la vais cherchant jour & nuict, par monts & vaux, par estangs & rivières, & si n'en puis trouver aucunes nouvelles. Le Cordonnier luy répondit : Quant à moy je ne sçay où elle se tient, ny comment elle est faite; mais allez-vous-en un peu plus outre, & peut-estre que vous la trouverez.

Ces propos finis, Flamine print congé du Cordonnier, & s'en alla un peu plus outre, où il trouva une forest fort espoisse & ombrageuse, & estant entré dedans, il trouva un payfan qui avoit coupé grande quantité de bois, & en alloit tousjours coupant. Et après s'estre saluez l'un l'autre, Flamine luy va dire : Frere que veux-tu faire de tant de bois ? Je les appreste (répondit le payfan) pour faire du feu cest hyver, quand les neiges, la glace & les

froidures seront par le pays, afin de me pouvoir chauffer avec mes petits enfans : le reste pour vendre, pour acheter du pain, du vin, des habits & autres choses necessaires pour substanter nostre vie ; & la passer ainsi jusques à la mort. Mais dis-moy par courtoisie (dit Flamine) si tu me pourrois enseigner où se tient ceste mort ? Nenny asseurement, respondit le paysan, je ne la veis oncques, & ne sçay où elle se tient. Je me tiens ordinairement en ce bois, & suis après mon mestier ; joint qu'il ne passe gueres de gens par icy, & qui plus est, je n'en cognois gueres. Comment feray-je donc à la trouver ? dit Flamine. Le paysan respondit : Quant à moy je ne le vous sçaurois dire, ny moins enseigner ; mais cheminez plus outre, & peut-estre que vous la rencontrerez. Et ayant prins congé du paysan se partit, & chemina tant qu'il arriva au lieu où il y avoit un Couturier, qui avoit force habillemens sur les perches, avec un plein magasin de beaux & riches accoustremens. Alors Flamine luy dit : Dieu vous gard', maistre. Et vous aussi, respondit le Cousturier. Que voulez-vous faire, dit Flamine, de tant de beaux accoustremens ? sont-ils tous à vous ? Le maistre respondit : Il y en a une partie à moy, & les autres aux marchands, aux gentilshommes, & diverses personnes. Qu'en veulent-ils faire de tant ? dit Fla-

mine. Ils les portent en divers temps ;
 repondit le Cousturier ; & les luy mon-
 strant l'un après l'autre , voilà (dit-il)
 ceux de l'esté , voilà ceux de l'hyver ,
 voilà aussi ceux des autres saisons , & ainsi
 les vestent tantost l'un & tantost l'autre.
 Et puis que font-ils ? dit Flamine. Ils con-
 tinuent ainsi jusques à la mort. Flamine
 voyant parler de la mort : Helas ! mon mai-
 stre , mon amy (dit-il) me sçauriez-vous
 dire où est ceste mort ? Le Cousturier luy
 respondit quasi tout courroucé : Or mon
 fils , mon amy , vous cherchez choses es-
 tranges , je ne le vous sçaurois dire ny
 enseigner , & qui plus est , je n'y pense
 jamais ; & quiconque me parle d'elle m'of-
 fense grandement. Je vous prie donc que
 nous parlions d'autre chose , ou bien ostez-
 vous d'icy ; car je suis ennemy de tels pro-
 pos , & ayant prins congé de luy se partit.
 Ayant desja Flamine couru beaucoup de
 pays , il arriva en un lieu desert & solitaire
 où il trouva un pauvre Hermite , avec une
 barbe toute crasseuse , & tout extenué de
 l'aage qu'il avoit & du jeusne ; ayant seu-
 lement son esprit ravy en contemplation ,
 tellement qu'il pensoit bien que ce fust la
 mort pour certain. Alors Flamine luy dit :
 Vous soyez le très-bien trouvé pere saint.
 Vous soyez aussi le bien venu mon fils ,
 respondit l'Hermite. Que faites-vous icy
 pere (dit Flamine) en ces lieux cham-
 pestres & inhabitables , privé de tout plai-

fir & de toute accointance humaine ? Je suis icy (respondit le bon Hermite) en oraisons, jeusnes & contemplations. Pourquoy faire ? dit Flamine. Me demandez-vous pourquoy mon fils ? Pour servir à Dieu & macerer ceste chair, & faire penitence de nos offenses, à Dieu immortel & au vray fils de Marie : & finalement pour sauver ceste ame pecheresse, afin que quand l'heure de la mort viendra je la luy puisse rendre nette & lavée de toute ordure, qu'au grand jour du jugement, par la grace de mon redempteur, & non point par mes merites, elle me puisse rendre digne du triomphant Paradis pour jouir de la vie eternelle, à laquelle Dieu nous puisse conduire. Helas ! mon pere, dites-moy, je vous prie, s'il ne vous fâche, que c'est que la mort, comment elle est faite. A quoy respondit le saint pere : Mon fils ne sois en esmoy de le sçavoir, car c'est une chose terrible & espouvantable, & est appellée par les Sages, le dernier terme des douleurs, tristesse des heureux, desir des miserables, & la fin des choses mondaines. Elle separe l'amy d'avec l'amy, le pere d'avec l'enfant, l'enfant d'avec le pere, la mere d'avec la fille & la fille d'avec la mere ; elle rompt le lien du mariage, & à la fin elle separe l'ame d'avec le corps, & le corps estant separe d'avec l'ame ne peut plus ouvrer, ains devient si pourry & puant, que chacun le

fuit & abandonne, comme chose abominable. La vistes-vous jamais pere ? dit Flamine. Nenny vraiment, respondit l'Hermite. Comment feray-je donc pour la voir ? dit Flamine. Si vous avez desir de la trouver, mon fils (dit l'Hermite) allez-vous-en plus outre, & vous la trouverez; car tant plus l'homme chemine en ce monde, d'autant plus s'approche-t'il de la mort. Le jeune homme l'ayant remercié, & ayant receu sa benediction se partit. Continuant son voyage, il vint à passer par profondes vallées, montagnes pierreuses, forests inhabitables & lieux fort estranges; en voyant diverses bestes espouvantables, & demandant à chacune si c'estoit point la mort, mais toutes luy respondoient que non. Après avoir couru beaucoup de pays, & veu choses estranges, il arriva finalement à une montagne assez haute, & l'ayant passée, il descendit en une obscure & profonde vallée, environnée de cavernes, où il veit une terrible & hideuse beste, laquelle avec ses cris faisoit retentir toute la vallée. Alors Flamine luy dit: Qui es-tu, hola? Es-tu point la mort? la beste farouche luy respondit, je ne suis pas la mort, mais poursuis ton chemin, tu la trouveras bien-tost. Ayant Flamine entendu ceste agreable response, commença à se resjouir. Estant desja quasi demy mort, par le long travail & ennuy qu'il avoit enduré; il arriva
en

en une grande & spacieuse campagne, & ayant trouvé une plaisante & verdoyante coline, florie de tous costez, & en la contemplant bien de toutes parts, apperceut les murailles d'une haute & belle cité, qui n'estoit pas trop loin de là. Alors en hastant ses pas, il fit tant qu'il arriva à l'une des portes, toute garnie de beaux & fins marbres. Si-tost qu'il fut entré dedans, par congé toutesfois du portier, la premiere personne qu'il rencontra, ce fut une vieille fort aagée, ayant le visage crasseux & si maigre & defaite, qu'on luy eust peu facilement conter les os un à un. Vous luy eussiez veu un front ridé, les yeux de travers, pleurans & si rouges, qu'ils ressembloient escarlate; les jouës crespues & les levres renversées, les mains aspres & endurcies, la teste & toute sa personne tremblante, estant aussi toute voutée, & vestuë de gros habillemens. Outre cela elle portoit à son costé une espée tranchante, & en sa main droicte un gros baston, au bout duquel y avoit une pointe de fer fort aiguë, laquelle estoit faite en forme de triangle. Derriere ses espauls elle portoit une grosse malette pleine de phioles, boites & autres petits vaisseaux, remplis de diverses liqueurs, oignemens & emplastres pour appliquer à divers accidens.

Si-tost que Flamine eut veu ceste vieille edentée & laide, imagina incontinent que

commença à preparer & incorporer quelques emplâstres , puis luy dit : Mon fils , baïlle-toy & ferme les yeux ; ce qu'il fit de poinct en poinct. Elle n'eust pas si-toſt finy ces propos , qu'elle deſgaigna le couſteau qu'elle tenoit à ſon coſté , & d'un ſeul coup luy trancha la teſte , & la print incontinent , en la remettant ſur le corps , après l'avoir frotté de ces oignemens qu'elle tenoit , & le guerir par ce moyen. Mais je ne pourrois pas dire bonnement comment tout alla , ſoit pour l'habileté d'une ſi bonne maiſtreſſe , en remettant la teſte ſur le corps , ou pour ce qu'elle beſongna finement. Tanty a qu'elle luy mit la partie de devant la teſte derriere : tellement que Flaminc en ſe regardant les eſpaules , les reins & ſes groſſes ſeſſes (ce qu'il n'avoit point veu auparavant) entra en ſi grande frayeur & fremiſſement , qu'il ne trouvoit aucun lieu où bonnement ſe cacher : tellement qu'il ſe print à luy dire d'une voix tremblante & plaintive : Hélas ! ma bonne mere , m'amie , remettez-moy , je vous ſupplie , en mon premier eſtat , je vous en prie pour l'amour de Dieu ; car je ne vis onc la plus hideuſe & eſpouvantable choſe que ceſte-cy. Oſtez-moy toſt de ceſte miſere , en laquelle je me voy empeſtré : ſecourez-moy , car vous le pouvez faire. La vieille qui eſtoit ruſée ne diſoit mot , feignant ne s'eſtre point apperceuë de ceſte faute , & le laiſſa

soit plaindre & ronger son frein. Finalement après l'avoir tenu en cest estat par l'espace de deux heures, en le voulant remettre en sa premiere forme, le fit de-rechef baisser, & empoigna son espée tranchante, & luy coupa la teste toute nette; puis print la teste entre ses mains, & s'approchant du corps, le commença à engraisser & oindre comme auparavant avec les oignemens, & le fit revenir en son premier estat. Flamine se voyant ainsi revenu, se revestit incontinent, & ayant veu la crainte, & par experience essayé combien la mort est hideuse & espouventable, sans prendre autre congé de la vieille, s'en retourna à Hostie le plus hastivement & par le plus bref chemin qu'il fut possible de choisir; cherchant d'oresnavant la vie & fuyant la mort, & s'addonnant à meilleurs exercices qu'il n'avoit fait auparavant.

Il ne restoit plus sinon qu'Alienor proposast son Enigme, ce qu'elle fit en la maniere qui s'ensuit:

*Parmy un pré superbe & spacieux,
Tout verdoyant, de fleurs orné & beau;
Trois Nymphes vont sous un destin des cieux,
Sans sejourner font ouvrage nouveau:
L'une à costé tient sa quenouille au mieux,
Et l'autre autour de ses pied, le fuseau;
La tierce porte un glaive bien tranchant,
Et va souvent le foible fil hashant,*

Ce present Enigme fut facilement entendu d'un chacun, pour autant que ce spacieux & superbe pré est ce monde, où nous demeurons tous. Les trois Nimphes, sont les trois sœurs : c'est à sçavoir, Clotho, Lachesis & Atropos, qui (selon la fiction poétique) signifient le commencement, le milieu & la fin de ceste vie; car Clotho, qui tient la quenouïlle, demonstre le commencement de la vie. Lachesis qui file, demonstre le temps que nous vivons. Par Atropos, qui rompt le filet de Lachesis, nous entendons la mort.

Or desja le coq vigilant, dedié à Mercure, avoit, par son haut chant, annoncé le poinct du jour, quand Madame commanda qu'on deust finir les Fables, & que chacun se retirast en son logis, sans oublier de retourner le soir ensuivant au consistoire, sur peine telle que bon luy sembleroit.





L A

CINQUIÈME NUICT

DES FABLES ET ENIGMES

du Seigneur Jean-François
Straparole.

E Soleil qui est l'unique beauté du ciel resplendissant, la mesure du leger temps, le vray œil du monde, duquel la Lune cornuë, & toute estoille recoit sa lumiere, avoit desja caché ses rouges & resplendissans rayons en l'eau salée de la mer; & la froide fille de Latone, environnée de claires & resplendissantes estoilles, illuminoit desja les obscures tenebres de la nuict ombrageuse; & les gentils Pasteurs laissant les amples & spacieuses campagnes, les fraîches herbes, & les froides & claires eaux, s'estoient retirez avec leurs troupeaux à leurs logis accoustumez, & se trouvant lassez du travail du jour, dormoient fermement sur les frais & beaux joncs, quand la belle

& honorable compagnie se vint ranger
 hastivement au noble consistoire ; telle-
 ment que Madame estant advertie que
 chacun estoit assemblé , & qu'il estoit
 temps de commencer les Fables , estant
 accompagnée d'autres Damoiselles , s'en
 vint posément en la chambre où ce triom-
 phe se faisoit ; & ayant salué d'un visage
 riant la belle compagnie , commanda qu'on
 luy apportast le vaisseau d'or , & ayant
 mis dedans le nom des cinq Damoiselles ;
 le premier lieu escheut à Eritrée , l'autre
 à Alterie , le troisiéme à Laurette , le qua-
 triéme à Ariane , & le dernier escheut à
 Catherine. Cela fait , chacun se mit à
 danffer au son des fleutes , avec propos
 plaisans & amoureux. Incontinent après
 il y eut trois Damoiselles , lesquelles par
 le congé de Madame , commencerent à
 chanter ceste chanson :

*Quand vostre beau & très-gentil visage ,
 Nous apparoit d'un noble & beau semblant ,
 Lors qu'à nos yeux vostre gentil corsage .
 Tout mon effort rend tout soudain tremblant ,
 Frapper me sens d'un si très-grand courage ,
 Que tous mes sens se vont quasi troublant ;
 Mais bienheureux le jour , le point & l'heure
 Que rencontray une telle adventure.*

Après que les trois Damoiselles eurent
 finy leur chanson amoureuse , qui par souf-
 pirs tremblans faisoient fendre l'air de

près, Madame fit signe à Eritrée, à qui estoit escheu le premier lieu de la presente nuit, qu'elle ne se pouvant excuser, de peur de troubler l'ordre commencé, laissant arriere toute fascherie, commença ainsi :

FABLE I.

Guerin fils unique de Philippes Marie Roy de Sicile, delivra un homme sauvage de la prison du pere; & la mere, pour la crainte du pere, l'envoya en exil. Et l'homme sauvage estant apprivoisé, delivra Guerin de plusieurs grands inconveniens.



ES gracieuses Dames, j'ay tousjoursouy dire & veu par experience, qu'en bien servant autrui, jacoit que celuy qui est servy soit du tout ingrat & mescognoissant, tout le bien fait retourne à la fin à celuy lequel a fidelement servy. Ce qui semblablement advint au fils d'un Roy, lequel ayant delivré un homme sauvage de dure & estoite prison du pere, eut souventesfois la vie sauve

par son moyen, comme vous entendrez par le discours de la presente Fable, en vous conseillant amiablement, que ne reculiez à bien servir; car si vous n'estes point guerdonnées par celuy à qui vous aurez fait plaisir, à tout le moins le bon Dieu, qui recognoist tout, ne laissera point vos labeurs sans estre remunerez; ains vous fera participantes de sa grace.

Sicile (très-cheres Dames) comme il est notoire à un chacun, est une Isle parfaite & abondante, passant toutes les autres en ancienneté, & y a beaucoup de belles villes, chasteaux & citez, qui la rendent encore plus belle qu'elle ne feroit. De ceste Isle fut autresfois Seigneur le Roy Philippes Marie, homme sage, amiable & singulier; ayant espousé une fort belle & gracieuse Dame, de laquelle il eut un seul fils nommé Guerin. Le Roy prenoit son plaisir à la chasse; autant ou plus que quelconque autre Seigneur: & pour autant qu'il estoit puissant & adroit, tel exercice luy convenoit fort bien. Advint que se trouvant un jour à la chasse avec plusieurs de ses Barons & veneurs, il vit saillir hors du bois un homme sauvage, assez grand & gros, & si laid & contrefaict, que chacun s'en estonnoit. Au reste, quant à la force, il n'estoit point inferieur à un autre. Le Roy s'estant mis en equipage avec deux de ses Barons, des meilleurs qui y fussent, le vint affronter

roidement, & après longues escarmouches il le vainquit, & le print vaillamment de ses propres mains, & l'ayant lié & garrotté le mena vers son palais, où il trouva un lieu commode & seur pour l'enfermer : & de fait l'ayant fort bien enfermé avec bonnes clefs, commanda qu'il fust bien gardé. Et pour autant que le Roy le tenoit si cher, il voulut que la Royne fust gardienne des clefs, & ne passoit aucun jour que le Roy ne l'allast visiter à la prison par maniere de passe-temps. Peu de jours après le Roy se mit derechef en equipage pour aller à la chasse; & ayant préparé tout ce qui luy estoit nécessaire, se partit avec la noble compagnie, après avoir recommandé les clefs de la prison à la Royne. Cependant que le Roy estoit à la chasse, il print fantasie à Guerin, qui estoit encore jeune fils, de voir l'homme sauvage. Et de fait ayant print son arc, auquel il prenoit plaisir, s'en alla tout seul, tenant une fiesche en sa main, aux barreaux de la prison de l'homme sauvage. Et après qu'il l'eut veu, il commença à deviser avec luy assez familièrement : & en devisant ainsi paisiblement, l'homme sauvage qui le caressoit & flattoit, luy osta finement d'entre les mains la fiesche, qui estoit richement ouvrée. Au moyen dequoy le jeune enfant commença à plorer, & se plaindre en luy demandant sa fiesche. Mais l'homme sauvage luy respondit : Si

tu me veux ouvrir , & me delivrer de la prison , je te la rendray , autrement tu ne l'auras jamais. Alors le jeune enfant luy dit : Comment veux-tu que je t'ouvre & que je te delivre , si je n'ay pas le moyen de te delivrer ? L'homme sauvage luy dit : Si c'est ton plaisir de me delivrer de ce lieu , je t'enseigneray bien le moyen comment tu le pourras faire. Et comment ? dit Guerin. Il faut , dit le sauvage , que tu prennes garde quand ta mere sera endormie sur le midy , & que tu regarde sous le chever où elle couche , & que tu luy desrobes secrettement les clefs , sans qu'elle s'en apperçoive , puis les apporte icy & m'ouvre ; & si-tost que tu m'auras ouvert , je te rendray ta fiesche : & peut estre que je le recognoistray en temps & lieu. Guerin , qui ne desiroit autre chose que son dard , ne pensa point plus outre , & sans plus retarder s'en alla vers sa mere , & l'ayant trouvée endormie , luy osta secrettement les clefs , & les alla porter au sauvage , en disant : Voicy les clefs ; mais escoute , si je t'ouvre , va t'en si loin que jamais on ne sente vent ny fumée de ton corps , car si mon pere , qui est le maistre de la chasse , te rencontre & que tu sois prins , il te pourroit bien tuer. Ne te soucie point de cela , dit le sauvage , car si-tost que tu auras ouvert la prison , & que tu me verras deslié , je te rendray ta fiesche : & m'en iray si loing , que jamais ton pere , ny au-

tre ne me pourra attraper. Guerin qui avoit une force terrible, fit tant qu'il ouvrit à la fin la prison, & l'homme sauvage luy ayant rendu sa flesche, après l'avoir grandement remercié, se partit. Or cest homme sauvage estoit un fort beau jeune fils, qui pour un desdain de ne pouvoir accomplir la grace de celle qu'il aymoit à merveille, laissant toutes occupations amoureuses & passe-temps, se mit entre les bestes farouches, faisant son habitation aux forests ombrageuses, mangeant herbes & beuvant de l'eau comme les autres bestes; tellement que le pauvre miserable avoit changé sa peau tendre & delicate en gros poil & cuir dur, la barbe espaisse & longue: joint que par le moyen de l'herbe qu'il mangeoit ordinairement, le poil & les cheveux luy estoient devenus si verts, que c'estoit chose monstrueuse à le voir. Si-tost que la Roïne fut esveillée, elle mit la main sous son chevet pour prendre ses clefs, & ne les trouvant pas s'estonna grandement, & après avoir renversé le liect sans trouver aucune chose, s'en alla comme folle vers la prison, laquelle elle trouva ouverte, & n'y trouvant point l'homme sauvage, peu s'en fallut qu'elle ne mourust de douleur, tellement qu'elle se mit à chercher de tous les costez du palais, & demander à un chacun qui estoit celuy tant temeraire & arrogant qui avoit eu la hardiesse de luy oster les clefs

sans son commandement ; mais elle ne trouva personne qui luy en peust donner des nouvelles. Cependant Guerin ayant rencontré sa mere , & la voyant ainsi troublée , luy dit : Ma mere , ne blasmez personne de ce fait icy , car si quelqu'un en merition punition , je suis celuy qui la doit souffrir , à cause que c'est moy-mesme qui ay ouvert. La Royne entendant ces propos fut encore plus fâchée qu'auparavant , craignant que le Roy étant venu de la chasse , ne tuast son fils par un despit , veu qu'il luy avoit recommandé ses clefs , comme sa personne propre ; tellement que la Royne pensant éviter une petite faute , tomba en une autre beaucoup plus grande : car sans plus retarder elle fit appeller deux de ses fideles serviteurs & son fils , & leur ayant donné or & argent , avec chevaux excellens , l'envoya à son aventure , en priant grandement les serviteurs d'avoir son fils pour recommandé. Ils ne furent pas si-tost partis que le Roy arriva de la chasse , & luy descendu , s'en alla tout droict à la prison pour voir l'homme sauvage , l'ayant trouvée ouverte , & qu'il s'en estoit fuy , se mit si fort en colere , qu'il delibera de tuer celuy qui avoit esté cause d'une telle erreur. Et de ce pas s'en alla trouver la Royne , qui estoit en sa chambre , en luy demandant qui auroit esté celuy si impudent , arrogant & temeraire , qui avoit ouvert la prison , & donné

occasion à l'homme sauvage de s'enfuir. Alors la Roynie d'une voix tremblante luy va respondre : Ne vous en fâchez point, Sire, car vostre fils Guerin en est cause, comme il m'a luy-mesme confessé, & luy raconta de point en point tout ce que Guerin luy avoit confessé : puis luy remonstra que pour la crainte qu'elle pouvoit avoir qu'il ne tuast son fils, elle l'avoit envoyé en lointain pays, accompagné de deux fidels serviteurs, chargez de bagues & deniers, plus qu'il ne leur en falloit pour leur besoin. Le Roy entendant ces propos, adjousta douleur sur douleur, & peu s'en fallut qu'il ne tombast mort en terre, ou qu'il ne sortist hors du sens, & n'eust esté les courtisans qui le retindrent, je ne croy point qu'il n'eust tué la Roynie sur le champ. Quand le pauvre Roy fut un peu retourné en soy, & qu'il eut un peu appaisé sa colere, il dit à la Roynie : Venez ça femme, qui vous a esmeu d'envoyer nostre fils en lieux incognus ? Estimez-vous que je fisse plus de conte d'un homme sauvage que de mon propre sang ? Et sans attendre autre response d'elle, fit monter à cheval plusieurs soldats, en les divisant en quatre parties, pour chercher son fils en toute diligence : mais ils travaillerent en vain, à cause que Guerin s'alloit cachant sans se faire cognoistre à personne. Après avoir longuement chevauché avec ses serviteurs, pas-

fant montagnes, vallées, fleuves & forêts, demeurant maintenant en un lieu, tantost en l'autre, il parvint à l'aage de seize ans, & estoit si beau qu'il sembloit la rose du matin. Il ne passa gueres de temps après, qu'il vint une diabolique fantaisie aux serviteurs de Guerin de le mettre à mort, & prendre les bagues & deniers pour les diviser entr'eux : mais leur entreprinse fut vaine car comme Dieu voulut, ils ne se peurent jamais accorder ensemble. Advint que par la bonne fortune, il vint à passer un fort beau jeune fils, monté sur un gentil cheval richement équipé, & ayant fait une grande reverence à Guerin, le salua gracieusement, en luy disant : Certes, gentil chevalier, si c'estoit vostre plaisir, je m'accompagnerois volontiers avec vous. Et Guerin luy respondit : Vostre gentillesse & bonne grace ne permet que je refuse une telle compagnie. Au moyen dequoy je vous remercie humblement, en vous priant de grace speciale que me fassiez ce bien & honneur de venir avec nous. Nous sommes estrangers & ne sçavons pas les chemins, à ceste cause vous nous les enseignerez par courtoisie, & en chevauchant ensemble nous deviserons de quelque accident qui nous est survenu ; en ce faisant le chemin nous sera moins ennuyeux. Ce jeune fils que Guerin avoit rencontré, estoit l'homme sauvage qu'il avoit delivré

de la prison du Roy Philippes Marie son pere. Iceluy par cas d'aventure après avoir couru divers pays & lieux estranges, fut aperceu d'une belle Fée, qui se portoit assez mal; qui l'ayant considéré si laid & contrefaict, se mit à rire si asprement de sa laide forme, qu'elle vint à rompre une aposteme qu'elle avoit contre le cœur, qui facilement l'eust suffoquée: & sur l'heure mesme elle fut delivrée de tout mal, tout ainsi que si jamais elle n'eust senty aucune douleur: tellement que pour recompense d'un si grand benefice, & ne voulant pas estre veüe ingrate, luy dit: Escoute toy, qui es si laid & contrefaict, & qui as esté cause que j'ay recouvré ma santé tant desirée, je veux que tu deviennes le plus beau, le plus gentil, le plus sage & le plus gracieux fils de ce monde; en te faisant participant de toute l'autorité & puissance qui m'a esté octroyée par nature, & pourras faire & defaire toutes choses à ton plaisir. Cela fait, luy ayant donné un beau cheval fée, luy donna congé d'aller où bon luy sembleroit. Chevauchant ainsi Guerin avec ce jeune fils sans le cognoistre, combien que l'autre le cogneust bien, finalement il arriva à une puissante cité, nommée Irlande, de laquelle estoit pour lors Seigneur le Roy Geofroy, lequel avoit deux filles belles à merveilles, de louïables mœurs, & surmontans quasi Venus en beauté; l'une desquelles s'appelloit Potentiane

tentiane , & l'autre Eleutherie, & estoient tant aymées du Roy , qu'il ne pouvoit vivre sans elles. Quand Guerin fut arrivé en Irlande avec le jeune fils incogneu & serviteurs , il print logis chez un hôte le plus facecieux homme de toute Irlande , qui les traitta fort honorablement. Le jour ensuivant venu , le jeune fils incogneu fit semblant de se vouloir partir , & aller en autre pays , prenant congé de Guerin , & le remerciant de sa bonne compagnie ; mais Guerin , qui luy avoit desja prins grande affection , ne le vouloit point laisser partir en façon quelconque , & luy fit tant de caresses , qu'il consentit de demeurer avec luy. Or y avoit-il en ce pays d'Irlandois , deux espouvantables & cruels animaux ; l'un desquels estoit un cheval sauvage , & l'autre une jument qui estoit pareillement sauvage , & estoient si farouches & terribles , que non seulement ils gastoient & dissipoient les belles campagnes cultivées , mais tuoient & massacroient tous les autres animaux & creatures humaines : tellement que le pays estoit réduit en si piteux estat par leur violence & ferocité , qu'on ne trouvoit plus personne qui y osast habiter , ains chacun abandonnoit son propre pays & domaine , pour aller demeurer en pays estranges. Et n'y avoit homme si puissant & courageux qui s'osast présenter devant eux , tant s'en faut de les tuer. Au moyen

dequoy le Roy voyant tout son pays destitué de vivres , aussi de bestes & creatures humaines , ne sçachant trouver remede à tel inconvenient , se tourmentoit incessamment , maudissant sa mauvaise fortune. Les deux serviteurs de Guerin qui n'avoient pas peu accomplir par le chemin leur mauvaise & pernicieuse intention , par faute de ne s'estre pas accordez ensemble , & pour la venuë du jeune fils incogneu , se vont imaginer de faire mourir Guerin , & demeurer seigneurs de ses bagues & deniers , dont commencerent à dire entr'eux : Voulons-nous voir si nous pouvons donner la mort à nostre maistre , en quelque maniere que ce soit ? Et ne trouvant aucun moyen qui les contentast , se trouvant en danger de mort s'ils le tuoient , mesmes s'imaginèrent de deviser secrettement avec l'hoïte , & luy raconter comment leur maistre Guerin estoit vaillant & belliqueux , & qu'il s'estoit souventesfois vanté en leur compagnie , de pouvoir tuer ce cheval sauvage , sans recevoir aucun dommage. En ce faisant cela pourra venir aux oreilles du Roy , qui desire grandement la mort des deux animaux , & la prosperité de son pays , & en voyra querir Guerin pour entendre le moyen qu'il faut tenir en telle entreprinse , & luy n'y sçachant donner remede , sera cause que le Roy le fera mourir , & nous autres serons heritiers des bagues & de-

niers : suivant leur deliberation ainsi fut-il executé. L'hoste entendant ces nouvelles fut le plus joyeux & le plus content homme de ce monde : & sans plus retarder s'en alla incontinent au palais , & après avoir fait la reverence au Roy les genoux en terre , luy dit secrettement : Sire , il faut que vous entendiez qu'il y a un gentil Chevalier logé en ma maison , qui s'appelle Guerin , & ainsi que je devoisois avec ses serviteurs , ils m'ont dit entre autres choses que leur maistre estoit vaillant & expert aux armes , & qu'il ne s'en trouvoit point de nostre aage un autre pareil à luy , & qu'il s'estoit souventesfois vanté d'estre si puissant , qu'il accableroit le cheval sauvage , qui porte si grand dommage en vostre pays. Le Roy entendant ces propos , commanda qu'on le fit venir. L'hoste obeyssant à son Seigneur , s'en retourna en son logis , & dit à Guerin qu'il s'en allast seul trouver le Roy , qui avoit grand desir de parler à luy. Guerin s'en alla incontinent presenter au Roy , & luy ayant fait la reverence , luy demanda la cause pourquoy il l'avoit fait appeller. Guerin , mon amy , dit le Roy , la cause qui m'a contraint de te faire venir vers moy , est que j'ay entendu que tu es gentil Chevalier , & qu'il n'y a point ton pareil au monde , & que tu t'es vanté souventesfois que ta force est si grande , que sans aucun danger d'autrui , ny de ta personne , tu

vaincras ce cheval, qui ainſi miſerablement gaſte mon Royaume. Si tu veux entreprendre cela, je te promets te faire un don que tu en ſeras content à tout le temps de ta vie. Guerin entendant l'offre du Roy, s'eſtonna grandement, niant toujours d'avoir jamais tenu tels propos, & que tout cela luy eſtoit fauſſement impoſé. Le Roy eſtant troublé de la reſponſe de Guerin, luy dit d'un viſage aſſez troublé : Sçais-tu qu'il y a, Guerin, je veux quoy qu'il en ſoit, que tu ſuive ceſte entreprinſe, ſi tu fais le contraire, il faut que tu te deliberes de mourir. Guerin s'eſtant party de la preſence du Roy, s'en alla vers ſon logis, eſtant triſte à merveilles, & n'oſoit manifefter ſa paſſion: tellement que le jeune ſils incogneu le voyant plus triſte que de couſtume, luy demanda tout doucement qui eſtoit la cauſe de ſa faſcherie. Et luy pour le fraternel amour qu'il luy portoit, ne luy pouvant nier ſa juſte & honneſte demande, luy raconta par ordre tout ce qui eſtoit advenu. Alors le jeune ſils incogneu luy dit : Ne te ſoucie de rien, car je t'enſeigneray tel moyen que tu ne periras point, ains ſeras victorieux, & le Roy obtiendra ſon deſir. Retourne vers le Roy, & luy dis qu'il t'adreſſe un bon mareschal, & luy fais faire quatre fers de cheval, qui ſoient aſſez gros, & qu'ils ſoient plus grands que les autres fers communs, de deux

grands doigts , & qu'ils ayent deux crampons longs d'un grand doigt par derriere. Et quand tu les auras mis à mon cheval, qui est fée, ne te soucie d'autre chose. Quand Guerin fut retourné vers le Roy , il luy dit tout ce que son compagnon luy avoit commandé. Le Roy fit venir un bon mareschal, en luy commandant de faire tout ce que Guerin voudroit. Quand ils furent à la boutique , Guerin luy commanda faire les fers comme dessus : ce qu'entendant le mareschal, ne les voulut pas faire , ains se mocquant de luy le traicta comme un fol , veu que cela luy sembloit une chose estrange & nouvelle. Au moyen dequoy Guerin oyant que le mareschal se mocquoit de luy , & qu'il ne luy vouloit point obeyr , s'en alla vers le Roy pour se plaindre du mareschal qui ne l'avoit pas voulu servir : tellement que le Roy l'ayant fait appeller, luy commanda expressement, & sous peine d'encourir en sa male grace , de faire ce qu'il luy feroit commandé, ou de faire l'entreprinse que Guerin devoit faire. Le mareschal voyant que le commandement du Roy le contraignoit , fit les fers & les attacha aux pieds du cheval , comme on luy avoit commandé. Quand le cheval fut ferré & équipé de tout ce qui luy faisoit de besoin , le jeune fils incogneu dit à Guerin : Tien, monte sur ce cheval , & va en la bonne heure ; & quand tu entendras le hennissement du

cheval sauvage, descens de ton cheval, & luy oste la selle & la bride, en le laissant aller à sa liberté. Puis tu monteras sur quelque grand arbre pour voir l'issue de ceste entreprinse. Guerin estant bien instruit par son compagnon de tout ce qu'il devoit faire, ayant prins congé de luy se partit joyeusement. Desja le bruit estoit semé par toute la cité d'Irlande, qu'un gentil Chevalier avoit entrepris de prendre le cheval sauvage, & le presenter au Roy; tellement que les hommes & les femmes couroient de toutes parts aux fenestres pour le voir passer, & en le voyant si beau, si jeune & de si belle apparence, chacun en avoit pitié, en disant: Helas! comme ce pauvre jeune fils court volontiers à la mort: certes c'est grand dommage qu'il meure si miserablement: pour la pitié qu'ils en avoient, ils ne se pouvoient tenir de pleurer. Mais Guerin hardy & asseuré, s'en alloit joyeusement; & quand il fut arrivé au lieu où estoit le cheval sauvage, & l'ayant ouy hennir il descendit du sien, & luy osta la bride & la selle, puis le laissa en sa liberté, & monta sur un grand arbre pour attendre la cruelle & sanglante bataille. Il ne fut pas si-tost monté sur l'arbre que le cheval sauvage arriva, & affronta celui de Guerin qui estoit fée. Alors commença la plus cruelle bataille qu'on vit jamais au monde, parce qu'ils sembloient deux Lyons deschainez, & es-

tumoient par la bouche comme deux sangliers poursuivis par les chiens enragez ; & après qu'ils eurent longuement combattu , finalement le cheval fée vint à ruer deux coups de pied au cheval sauvage , & luy donna en la machoire si rudement , qu'il l'osta de sa place : au moyen dequoy il perdit la jousté de pouvoir plus combattre ny se deffendre. Guerin voyant cela demeura tout joyeux , & estant descendu de l'arbre , print un licol qu'il avoit porté avec soy , & le lia , puis le mena avec ses machoires rompuës vers la cité , & le presenta au Roy suivant sa promesse devant le peuple , dont le Roy en fit grande feste & triomphe , avec toute la cité. Mais les serviteurs en eurent encore plus grande douleur que jamais , parce que leur mauvaise intention n'avoit pas bonne issue : tellement que pour le despit qu'ils en avoient , ils firent entendre derechef au Roy Geoffroy , que Guerin pourroit tuer facilement la jument , pourveu que son vouloir y fust. Le Roy entendant ces propos fit tout ainsi qu'il avoit fait de son cheval. Et pour autant que Guerin reculoit de ceste entreprinse , qui luy sembloit assez grieve , le Roy le menassa de le faire pendre , les pieds contre mont , comme rebelle de sa couronne.

Et quand Guerin fut retourné en son logis , il raconta tout le fait à son compagnon , lequel luy dit en se soufrian : Frere,

ne te fâche point, va trouver le maître des chevaux, & luy fais faire quatre autres fers de la même grandeur que les premiers, & qu'ils soient bien cramponnez & pointus; & fais le semblable que tu as fait au cheval, & tu retourneras avec plus grand honneur que tu n'as fait auparavant. Après que les fers furent préparés, & que le cheval fée fut ferré, il s'en alla en l'honorable entreprinse. Si-tost qu'il fut arrivé au lieu où estoit la jument, & qu'il l'eut ouy hennir, il fit tout ainsi qu'à la première fois, & ayant laissé aller le cheval fée en liberté, la jument le vint rencontrer, l'affaillant si rudement en le mordant, que le cheval fée ne se peut quasi deffendre. Si se porta-t'il toutesfois si vaillamment, que la jument receut si grand coup de pied, qu'elle demeura boiteuse de la jambe droite: & Guerin estant descendu de l'arbre, la print & la lia estroittement; puis estant monté sur son cheval, s'en retourna au palais avec grand triomphe, au grand contentement de toute la cité, & la presenta au Roy. Vous eussiez veu alors courir un chacun de toutes parts pour voir ceste jument boiteuse, laquelle, pour l'extreme douleur qu'elle sentoit, mourut peu de temps après. Voilà donc comment tout le pays fut delivré d'une si grande pauvreté. Si-tost que Guerin fut retourné au logis, & s'estant mis à reposer, parce qu'il se seroit lassé, ne se
pouvant

pouvant endormir pour le grand bruit qu'il entendit, il se leva, & entendoit je ne sçay quoy se remuer dedans un vaisseau de miel, & n'en pouvoit saillir; tellement que Guerin ouvrit le vaisseau, apperçeut un frelon qui remuoit les aisles & ne se pouvoit lever, & ayant pitié de luy l'osta de leans, & le laissa aller en sa liberté.

Le Roy Geoffroy n'ayant point encore récompensé Guerin du double triomphe qu'il avoit obtenu, & estimant que c'estoit grande vilennie de ne reconnoître un tel bien-faict, l'envoya querir, & luy dit ces paroles: Tu vois Guerin, que par ton moyen mon Royaume est delivré d'une grande pauvreté, & pour autant que j'ay deliberé de te recompenser d'un tel benefice, & ne trouvant aucun don qui soit convenable à tel merite, j'ay déterminé de te donner une de mes filles en mariage. Mais il faut que tu entendes que j'en ay deux, desquelles l'une s'appelle Potentianne, qui a les cheveux entortillez d'un si grand artifice, qu'ils reluisent comme l'or fin. L'autre se nomme Eleutherie, qui a les cheveux reluisans comme fin argent: tellement que si tu devines qui est celle qui porte les tresses d'or, je promets te la bailler en mariage, autrement je te feray trancher la teste. Guerin entendant la terrible commission du Roy, se tourna vers luy, en disant: Comment (Sire) est-ce le guerdon de mes labeurs?

Est-ce le salaire de mes angoisses endurées à la sueur de mon corps ? Est-ce le bénéfice que vous me rendez , pour avoir delivré vostre Royaume qui s'en alloit tout gasté & desolé ? Helas ! je n'avois pas mérité cela envers vous. Ce n'est pas aussi l'estat d'un magnanime Roy , comme vous estes ; mais puis qu'il vous plaist ainsi , je suis à vostre discrétion , faites de moy ce qu'il vous plaira. Or va (dit le Roy) sans plus tarder ; je te donne terme jusques à demain pour penser à ton affaire. Guerin s'estant party de la présence du Roy s'en alla trouver son compagnon , & luy raconta tout ce que le Roy Geoffroy luy avoit dit. Le compagnon ne faisant pas grande estime de cela , luy dit : Ne te soucie , Guerin , car je te delivreray de ce danger icy. Ne te souvient-il pas que tu delivras l'autre jour un freslon d'un vaisseau de miel , & que tu le laissas en liberté ? Il sera cause de ton salut : car il s'en ira demain après dîner au palais , & volera trois tours à l'entour du visage de celle qui a les cheveux d'or , & elle le chassera de sa main blanche : & quand tu auras veu par trois fois tel acte , tu cognoistras que c'est celle qui sera ta femme. Helas ! (dit Guerin à son compagnon) quand auray-je jamais le moyen de recognoistre tant de plaisirs que j'ay receu de toy ? Certainement si je vivois mille ans , je ne te pourrois jamais recom-

penſer en la moindre partie que ce ſoit ; mais celuy qui recognoit tout , ſuppliera pour moy en ce que je ne puis deſaillir. Alors le compagnon reſpondit à Guerin : Eſcoute (frere Guerin) il n'eſt ja beſoin que tu me guerdonnes de ce que j'ay fait pour toy ; mais il eſt tantost temps que je me manifeſte à toy , & que tu cognoiſſes maintenant qui je ſuis. Et tout ainſi que tu m'as delivré de la mort , auſſi je t'ay voulu rendre le merite d'une ſi grande obligation. Sçaches que je ſuis l'homme ſauvage que tu delivras ſi amiablement de la priſon de ton pere , & ſuis nommé Robinet. Puis luy raconta comme la fée l'avoit rendu un ſi beau jeune ſils , dont Guerin fut tout eſtonné ; tellement qu'il ſe print à plorer , en le baiſant & embrasſant comme ſ'il euſt eſté ſon frere. Mais pour autant que le temps s'approchoit de rendre reſolution au Roy Geofroy , s'en allerent tous deux au palais : & le Roy commanda que ſes deux filles fuſſent couvertes de deux voiles blancs , & qu'on les menaſt en la preſence de Guerin , ce qui fut fait. Quand elles furent venues , ne ſe pouvans cognoiſtre l'une d'avec l'autre , le Roy va dire à Guerin : Où eſt celle que tu veux que je te donne en mariage ? Guerin ne ſçavoit que dire à cela. Le Roy qui deſiroit grandement voir l'yſſuë de ceſte affaire , l'importunoit & le preſſoit , en diſant que le temps s'en alloit , &

qu'il estoit temps d'expedier ceste matiere.
Mais Guerin luy respondit doucement :
Sire, si le temps s'en va, le terme que
m'avez donné pour tout aujourd'huy, n'est
pas encore expiré. Ce que chacun confir-
ma estre vray. Estant ainsi le Roy en ceste
longue attente avec Guerin, & tous les
autres, voicy venir le freslon, qui en bruyant
vint à environner le beau visage de Po-
tentianne aux cheveux d'or. Et elle com-
me troublée & ennuyée de ceste beste,
le repoussoit en arriere; & l'ayant chassé
par trois fois se partit à la parfin. Estant
Guerin sur cela un peu douteux, se fiant
tousjours aux bons propos de son fidelle
compagnon Robinet, le Roy luy va dire :
Or sus Guerin, que dis-tu ? Il faut met-
tre fin à cecy. Cela fait, Guerin ayant
diligemment considéré l'une & l'autre pu-
celle, mit la main sur la teste de Poten-
tianne, qui luy avoit esté monstrée par le
freslon, & dit : Sire, voicy vostre fille aux
cheveux d'or. Et s'estant la fille descou-
verte, on cogneut manifestement que c'es-
toit elle. Alors le Roy Geofroy, en la
presence de tous, & au grand contente-
ment de tout le peuple, la luy donna en
mariage, & ne se partit point de là qu'il
n'espousast l'autre fille à son bon amy &
compagnon Robinet. Puis Guerin se ma-
nifesta estre fils de Philippes Marie Roy
de Sicile, dont le Roy Geofroy fut en-
core plus joyeux : tellement que les nop-

tes furent faites avec grand triomphe & magnificence. Et fit-on entendre au pere & à la mere de Guerin, qu'il estoit marié, dont ils receurent une joye incroyable, à cause qu'ils estimoient que leur fils estoit perdu. Estant Guerin retourné en son pays de Sicile, avec sa femme, son frere & sa belle-sœur, fut gracieusement reçu de ses parens, & vesquit longuement en paix, laissant après soy de beaux enfans heritiers du Royaume.

Ceste piteuse Fable fut trouvée bonne, & Eritrée voyant que chacun se taisoit, commença ainsi son Enigme :

*De peu de cas naist une fierre beste ,
Qui hait chacun de sa propre nature ,
De son regard tout occit & arreste ,
Ny de soy-mesme elle n'a ne soin ne cure ,
Autour de soy tout flettrit & tempeste ,
Endommageant de tout la mort procure :
Les arbres seche & va tout infectant ,
Brief , point n'y a qui nuyse au monde tant .*

L'Enigme recité par Eritrée, & loüé generalement d'un chacun, fut par aucuns interpreté en une sorte, & autrement par les autres, mais nul n'en donnoit la vraye interpretation; tellement que Eritrée voyant que son Enigme n'estoit pas entendu, dit : Ce fier animal n'est autre chose sinon le basilique, lequel porte haine à autrui, & le met à mort par sa

veüe aiguë; & en se voyant soy-mesme vient à mourir. L'exposition d'Eritrée finie, le Seigneur Evangeliste, qui estoit à costé d'elle, dit en souffrant: C'est vous mesmes qui estes le basilique; car vous tuez tout doucement avec vos yeux ceux qui vous regardent. Mais Eritrée peinte de couleur naturelle par le visage, ne respondit autre chose: tellement qu'Alterie qui estoit assise près d'elle, sçachant que c'estoit en son rang de fabloyer, commença ainsi une plaisante Fable, suivant le vouloir de Madame:

FABLE II.

Adamantine fille de Bagolane Savonoise, fut espousée à Drusian Roy de Boheme, par le moyen d'une poupée.



L'ENTENDEMENT de l'homme est si haut, si puissant & si subtil, que sans aucun doute il surmonte toutes les forces du monde; tellement que non sans cause, on dit que l'homme sage est par dessus les astres. Sur ce point, il me souvient d'une Fable par laquelle vous pourrez facilement entendre, qu'une

pauvre fille (espousée par fortune) devint femme d'un riche & puissant Roy. Et combien que la Fable soit brefve, si sera-t'elle d'autant plus plaisante & facecieuse. Escoutez moy donc, je vous prie, comme vous avez fait nos bonnes compagnes, qui doivent estre grandement louées.

En Boheme (notables Dames) se trouva, n'y a pas long-temps, une pauvre vieille Savonoise, nommée Bagolane, laquelle estant assez pauvre, & chargée de deux filles, l'une desquelles s'appelloit Cassandre, & l'autre Adamantine, vouloit toutesfois, avec toute sa pauvreté, donner ordre à son cas, & mourir contente. Et n'ayant autre vaillant en tout son bien, dont elle peust tester, hors mis un petit coffre plein d'estoupes, le laissa à ses filles; en les priant de vivre paisiblement ensemble après sa mort. Ces deux sœurs (nonobstant qu'elles fussent pauvres des biens de fortune) ne laissoient pas d'estre riches des biens de l'esprit: tellement qu'en vertus & bonnes mœurs, elles n'estoient pas inferieures aux autres femmes. Cassandre qui estoit la fille aînée, print une livre de ces estoupes, & se mit à filer assez soigneusement; & ayant filé bailla le fil à sa petite sœur Adamantine, luy enchargeant de le porter en place pour le vendre & acheter du pain, afin de subster leur vie par leurs labours. Adamantine ayant prins le fil s'en alla en pla-

ce pour le vendre , suivant le commandement de Cassandre ; mais l'occasion & l'opportunité luy fit faire contre son vouloir & de sa-sœur ; parce qu'elle vint à rencontrer au milieu de la place une vieille qui avoit une poupée la plus belle & la mieux formée que jamais fut veüe : tellement qu'Adamantine l'ayant veüe & considérée , en devint si fort amoureuse , qu'elle pensoit plus à l'avoir qu'à vendre son fil.

Après qu'Adamantine eut longuement pensée & repensé sur cela , ne sçachant quel moyen tenir pour l'avoir , delibera de tenter sa fortune , pour voir si elle la pourroit changer avec son fil. Et s'estant approchée de la vieille , luy dit : Madame , si c'estoit vostre plaisir je changerois volontiers mon fil avec vostre poupée. La vieille voyant ceste belle jeune fille qui avoit grand desir de changer son fil pour avoir la poupée , ne luy voulut pas contredire ; mais ayant prins son fil luy presenta sa poupée. Si-tost qu'Adamantine eut la poupée , elle ne se vit jamais si contente & joyeuse ; puis s'en retourna au logis , & sa sœur Cassandre luy dit : Astu vendu le fil ? Ouy , respondit Adamantine. Où est le pain que tu as acheté ? dit Cassandre. Alors Adamantine ouvrit sa robe , & luy monstra la poupée qu'elle avoit changée. Cependant Cassandre qui se sentoît mourir de faim , voyant la pou-

pée, monta si fort en colere, qu'elle print Adamantine par les cheveux, & luy donna tant de coups, qu'elle ne pouvoit quasi remuer. Adamantine ayant patiemment receu ces coups, sans faire aucune deffense, se sauva le mieux qu'elle peust en une chambre avec sa poupée. Quand se vint sur le soir, Adamantine print sa poupée entre ses bras, comme font ordinairement les enfans, & s'en alla vers le feu, & ayant prins un peu d'huile de lampe, luy frotta l'estomach & les reins, puis l'enveloppa en quelques drapeaux, & la mit dedans le liêt, & se coucha près d'elle. Adamantine ne fut pas si-tost sur son premier sommeil que la poupée commença à crier & dire: Mamme, mamme, je veux faire la caque. Et Adamantine s'estant esveillée, luy dit: Qu'as-tu, ma fille? Je voudrois faire la caque, mamme, respondit la poupée. Attens un peu, ma fille, dit Adamantine; & s'estant levée, elle print son devantier qu'elle portoit le jour precedent, & le mit dessous elle, en disant: Fais bien la caque, ma fille. Et la poupée en s'efforçant remplit le devantier de deniers. Ce que voyant Adamantine esveilla sa sœur Cassandre, & luy monstra les deniers que la poupée avoit fait. Cassandre voyant le grand nombre de deniers, fut toute estonnée, remerciant Dieu qui ne l'avoit pas abandonnée en ses afflictions: & en se tournant vers sa sœur, luy

demanda pardon des coups qu'elle avoit reçu à tort & sans cause, & commença à faire caresse à la poupée, en la baisant doucement, & la tenant estroittement entre ses bras. Quand le jour fut venu, les sœurs commencerent à garnir leur maison de ce qui leur faisoit de besoing, de pain, de vin, d'huile, bois & toutes choses qui appartiennent à un bon mesnage. Et tous les soirs elles frottoient l'estomach & les reins à la poupée, en l'enveloppant de drapeaux bien deliez, & luy demandoient souvent si elle vouloit faire la caque, & elle respondoit qu'ouy, tellement qu'elle rendoit deniers à foison. Advint qu'une de leurs voisines eitant allée un jour en leur maison; & la voyant si bien garnie de tout ce qui estoit de besoin, s'esmerveilla grandement, & ne se pouvoit persuader qu'elles fussent devenues si-tost riches, veu qu'elles souloient estre plus pauvres que Job : les cognoissant neantmoins de si bonne vie, & si honnestes de leurs corps, que rien plus. Au moyen dequoy elle se mit cela si bien en son esprit qu'elle delibera de sçavoir, par quelque moyen que ce fut, d'où procedoit si grand bien. Et de fait, elle s'en alla vers leurs logis, & leur dit : Venez-ça, mes filles, comment avez-vous si bien remonté vostre maison en si peu de temps, veu que vous estiez si pauvres ? Alors Cassandre, qui estoit l'aînée, va respondre : Nous

avons changé une livre d'estoupe que nous avions avec une poupée, laquelle nous rend deniers à foison. Ce qu'entendant la voisine, conceut une si grande envie en son cœur, qu'elle delibera de la desfrober. Et si-tost qu'elle fut de retour en son logis, elle raconta à son mary, que les deux sœurs avoient une poupée qui leur donnoit or & argent toutes les nuits, & qu'elle avoit deliberé de la leur oster. Et combien que le mary se moquast des paroles de sa femme, si fit elle tant envers luy qu'il le creut. Mais il luy dit : Comment feras-tu pour la desfrober ? La femme respondit, vous ferez semblant un soir d'estre yvre, & prendrez vostre espée & courrez après moy, frappant de vostre espée contre les murailles, comme si me vouliez tuer : & moy feignant d'avoir peur que ne me tueiez, m'enfuiray à la rue. Cependant les deux sœurs qui sont pitoyables, me viendront ouvrir, & m'en iray cacher en leur maison, où je demeureray toute la nuit, & feray tout ce qui me sera possible pour l'avoir. Quand ce vint sur le soir, le mary de ceste bonne Dame print son espée toute rouillée, & en frappant çà & là par les murailles, se mit à courir après sa femme, laquelle pleurant & criant à haute voix, s'enfuit hors du logis. Ce qu'oyans les deux sœurs coururent aux fenestres pour entendre ce qui estoit advenu, & cogneurent à la voix que

c'estoit leur voisine qui se plaignoit ; tellement qu'elles descendirent incontinent , & luy allerent ouvrir la porte , & la retirerent en leur maison. Puis elles luy demanderent pour quelle cause son mary la poursuivoit ainsi en colere : elle respondit qu'il estoit venu ce soir si chargé de vin au logis , qu'il ne sçait qu'il fait , & pour autant que je le reprends de ceste yvrognerie , il a prins son espée , & s'est mis à courir après moy : mais parce que j'ay esté plus habile que luy , je me suis bien voulu absenter pour eviter plus grand scandale , & m'en suis venuë vers vous. C'est bien fait à vous , dirent les sœurs , vous demeurerez ceste nuit avec nous , de peur que ne tombiez en quelque danger de vostre vie , cependant l'yvrognerie de vostre mary passera. Et ayans appareillé le souper , elles souperent ensemble ; & après avoir engraisié la poupée , s'en allerent reposer. Quand l'heure fut venuë que la poupée eut besoin de fienter , elle dit : Mamma , la caque. Et Adamantine , suivant sa coutume , luy mettoit dessous quelque drapau net , & la poupée jettoit de l'argent dont toutes s'esbahissoient. La bonne Dame qui s'en estoit fuyee , consideroit tout ce mystere , une heure luy sembloit mille ans pour desrober la poupée. Quand ce vint sur point du jour , la bonne Dame se leva secrettement , cependant que les deux sœurs dormoient , & print la pou-

pée , sans qu'Aadamantine s'en peust apercevoir ; & les ayant esveillées print congé d'elles pour s'en aller en sa maison , en leur disant que son mary se pourroit bien estre deschargé de son vin. Si-tost qu'elle fut de retour en son logis , elle dit joyeusement à son mary : Vous ne sçavez pas , mon mary , nous avons trouvé maintenant nostre adventure , voyez la poupée que je vous disois , & attendoit avec grand desir la nuit à venir pour se faire riche. La nuit venue , elle print la poupée , & ayant fait allumer un bon feu , luy commença à oindre l'estomach & les reins , en l'enveloppant de beaux petits drapelets , puis la mit coucher dedans le liét : & s'estant pareillement despoüillée , se coucha près d'elle. Le premier sommeil passé , la poupée s'esveilla & dit : Madame , la caque : mais elle ne dit pas , mamme caque , parce qu'elle ne la cognoissoit pas ; & la bonne Dame , qui attendoit en veillant ce fruit , se leva incontinent du liét , & print un linge fort blanc & le luy mit dessous , en disant : Fais la caque , ma fille. La poupée en s'efforçant de tout son pouvoir , remplit le linge de si puante ordure , qu'on ne s'en pouvoit quasi approcher. Alors le mary luy dit : Ne vois-tu pas bien sotte que tu es , qu'elle t'a bien traitée comme tu merite , & suis encore plus lourdaut d'avoir creu telle folie. Mais la femme debatant tousjours avec le mary ,

affirma en jurant, d'avoir veu avec ses yeux propres, qu'elle avoit fait une grande quantité de deniers. Et en la voulant garder encore la nuit ensuivant pour faire nouvelle experience; le mary qui ne pouvoit souffrir une si grande puanteur, dit les plus grandes injures de ce monde à sa femme, & print la poupée & la jetta par les fenestres sur quelques baleyeures qui estoient vis-à-vis du logis. Advint que quelques païsans en ce temps là chargerent ces balieures sur une charette, & sans que personne s'en apperceust, la poupée fut mise sur la charette, & de ces ordures fut fait un fumier aux champ pour fumer les terres quand il seroit temps. Cependant le Roy Drusian allant à la chasse pour son passe-temps, en passant par là, eut grand desir d'aller à la selle; & estant descendu de son cheval, fit ce que requeroit nature: n'ayant dequoy se nettoyer, appella un serviteur, qu'il luy baillast quelque chose pour le nettoyer. Le serviteur s'en alla au fumier, & en cherchant dedans pour trouver quelque chose propre pour cest affaire, il trouva par fortune la poupée, laquelle il presenta au Roy, qui sans aucun soupçon la print, & l'ayant approchée de ses fesses pour se fourbir le trou bruneau, il se mit à crier à haute voix, à cause que la poupée l'avoit empoigné par la fesse, en le mordant si estroitement, qu'elle le faisoit quasi sortir

hors du sens. Quand ses gens eurent entendu cecy , ils coururent vers luy pour le secourir ; & en le voyant couché en terre comme demy mort , furent tous estonnez de ceste poupée qui le tourmentoit ainsi ; tellement qu'ils commencerent tous ensemble à l'oster ; mais c'estoit en vain , & tant plus ils s'efforçoient de la remuer de là , d'autant plus luy donnoit-elle grande passion , & ne se trouva jamais aucun qui la peust oster de là. Et aucunesfois elle luy empoignoit les testicules si estroittement , qu'elle luy faisoit voir toutes les estoilles du ciel en plein jour.

Quand le pauvre Roy fut retourné au palais , ayant la poupée attachée aux fesses , & ne trouvant personne qui la peust arracher de là , il fit crier à son de trompe , que s'il y avoit aucun de quelque condition que ce fust , qui voulust entreprendre de luy oster ceste poupée des fesses , qu'il luy donneroit le tiers de son Royaume , & si c'estoit une pucelle il l'espouseroit : promettant sur sa couronne & par tous ses grands sermens , de maintenir tout ce qui estoit contenu en ladite ordonnance. Quand cela fut publié , plusieurs accoururent au palais sous esperance d'obtenir ce prix ; mais la grace ne fut octroyée à personne , car il ne s'en trouva point qui la peust arracher de là , ains quand quelqu'un s'en approchoit , elle luy donnoit plus grand tourment & passion ;

tellement que le Roy (estant ainſi miſérablement tourmenté, & ne trouvant aucun remede à ſa douleur intolerable) eſtoit quaſi comme mort. Or Caſſandre & Adamantine qui avoient deſja tant pleuré & regretté leur poupée, ayans eſté abreuvées de ceſte publication, s'en vindrent tout droit au palais, & ſe preſenterent au Roy. Caſſandre, qui eſtoit la plus grande, commença à faire feſte à la poupée, & les plus grandes careſſes qu'on peutſt imaginer; mais la poupée en eſtreignant les dents, & preſſant les mains, tourmentoit encore plus fort le pauvre Roy. Adamantine qui eſtoit un peu plus eſloignée, s'approcha & dit : Sire, laiſſez-moy, s'il vous plaiſt, eſſayer mon aventure; & s'eſtant preſentée à la poupée, luy dit : Or ſus, ma fille, laiſſe en paix mon Seigneur, & ne le tourmente plus : en diſant ces propos, elle la careſſoit & embraſſoit. La poupée ayant recogneu ſa petite mere qui la ſouloit gouverner & manier, s'oſta des ſeſſes, en abandonnant le Roy, & luy ſauta entre ſes bras. Le Roy voyant cela, fut tout eſtonné, ſe mit à reposer, pour autant qu'il n'avoit jamais eſté à ſon aïſe par pluſieurs jours & nuits, pour l'extreme paſſion qu'il avoit ſenty. Quand Drufian fut guarý de ce mal, afin de ne violer ſa promeſſe, fit venir Adamantine, & en la voyant belle & de bonne grace, l'eſpouſa en preſence de tout le peuple,

ple, & maria bien-tost après honorablement sa sœur Cassandre, non pas sans grands triomphes & préparatifs, & depuis vesquirent ensemble longuement en grande tranquillité. La poupée ayant veu les magnifiques nopces des deux sœurs, & leur intention avoir eu bonne yssue, se disparut incontinent, & ne sceut-on depuis aucunes nouvelles qu'elle devint. Toutesfois je pense qu'elle s'en alla avec les fantômes, comme il advient.

La Nouvelle d'Alterie finie, fut grandement louée d'un chacun, avec ris infinis; considerant principalement que la poupée fiantoit si doucement, & mordoit si asprement les fesses du pauvre Roy. Cela fait, Madame commanda à Alterie de suivre l'ordre avec son Enigme, qui fut tel :

*Qu'est-ce qui a plus d'une palme en longueur ,
Pour bien fourny & gros à l'avenant ;
Assez hardy & se plaist de son heur ,
Et volontiers à l'homme se donnant ,
Il est plaisant à voir en sa valeur ,
Il porte braye & capuchon tenant :
Puis par à bas luy pendent deux sonnettes.
C'est un plaisir pourveu que t'en delectes.*

L'Enigme finy, Madame, qui avoit changé le ris en courroux & desdain, se montrant par le visage troublée, reprint assez rudement Alterie, disant que ce n'estoit point le lieu de raconter propos sales

& deshonneſtes entre Dames d'honneur ; & qu'elle ſe donnaſt bien garde une autre fois de faire le ſemblable. Mais Alterie eſtant un peu rougie au viſage , ſe tourna vers Madame , & luy dit : Madame , l'Enigme que j'ay propoſé n'eſt point ſale ; comme vous eſtimez , & de fait la noble compagnie en rendra bon teſmoignage , quand le ſujet ſera bien entendu : parce que mon Enigme ne ſignifie autre choſe , ſinon le faucon , qui eſt un oyſeau gentil & hardy , & vient volontiers au fauconnier. Il porte brayes , & les ſonnettes aux pieds , donnant grand plaſir & paſſe-temps à ceux qui prennent plaſir à la chafſe. Quand la vraye interpretation de ceſt Enigme fut entenduë , qui avoit eſté eſtimé auparavant deshonneſte , fut loué d'un chacun. Et Madame (ayant oſté toute mauvaiſe opinion qu'elle pouvoit avoir conceu à l'encontre d'Alterie) dreſſa ſa veuë vers Laurette , en luy faiſant ſigne qu'elle s'approchaſt , ce qu'elle fit en toute diligence. Et pour autant que c'eſtoit en ſon rang de raconter ſa Fable , elle luy dit : Je veux que vous impoſiez ſilence à voſtre bouche pour le preſent , & que preſtiez ſeulement l'oreille à eſcouter ce qu'on dira , non point que je faiſſe peu d'eſtime de vous , & que je vous eſtime moindre que vos compagnes à devifer ; mais c'eſt afin d'avoir ce ſoir plus grand plaſir & paſſe-temps. Laurette reſpondit ; Madame , tou-

tes vos paroles me sont exprès commandemens : & ayant fait une grande reverence , s'en alla seoir en son lieu. Puis Madame regarda au visage de Moulin , en luy faisant signe de la main qu'il s'approchast d'elle : & luy se leva incontinent , & luy alla faire la reverence. Alors Madame luy dit : Seigneur Anthoine , ce dernier soir de la semaine a grand privilege , & est licite à un chacun de dire ce qu'il veut : tellement que pour nostre contentement , & de ceste honorable compagnie , nous voudrions que vous nous racontissiez une fable Bergamasque , d'une telle bonne grace que vous sçavez bien faire : en ce faisant nous serons perpetuellement tenus à vous. Le Seigneur Moulin ayant entendu ceste conclusion , ne sceut que dire du commencement ; puis voyant de ne pouvoir eviter l'assaut , luy respondit ainsi : Madame , c'est à vous à commander & à nous d'obeyr ; mais n'attendez point de moy chose de plaisir , parce que nos Damoiselles ont si bien fait leur devoir à raconter leurs fables que rien plus. Toutesfois tel que je suis , je m'efforceray de satisfaire à vostre demande , non pas comme vous desirez & comme je voudrois bien , mais selon mon petit pouvoir , & s'estant retiré à sa place , commença ainsi sa Fable :

FABLE III.

Berthand de Valsable eut trois enfans tous bossus, & d'une mesme façon : l'un desquels s'appelle Jambon, & va par le monde cherchant sa bonne fortune; & estant arrivé à Rome, il fut tué & jetté dedans le Tibre avec deux autres siens freres.



'EST chose que, mes Dames; je vous dis bien grieve & mal-aisée à regimber contre l'aiguillon, qui vaut autant à dire, que c'est une mauvaise chose que le coup de pied d'un asne, encore est-il plus aspre d'un cheval. Or puis-que la fortune a voulu que je vienne à ceste entreprise de deviser, patience & obeyssance vaut mieux que sacrifice; car il n'y a damné que les obstinez. Et si je disois chose qui ne fust selon vostre contentement, ce n'est pas ma faute, mais de Madame, qui l'a voulu ainsi. Vous sçavez bien que le plus souvent l'homme va cherchant plus qu'il ne doit & luy advient, ou trouve ce qu'il ne croit pas; tellement qu'il se trou-

ve à la fin decû , comme fit depuis quelque temps en ça Jambon , fils de Berthaud de Valsable , qui cuidoit abuser ses freres, & luy-mesme à la fin demeura prins. Vray est qu'ils moururent à la fin tous trois malheureusement , comme vous entendrez , si vous me donnez un peu d'audience , ce que je vous raconteray maintenant.

Il faut donc que vous entendiez que Berthaud de Valsable , au pays de Bergame avoit trois enfans mâles , tous trois bossus , & qui se ressembloient si bien qu'il estoit impossible de les cognoistre l'un d'avec l'autre. L'un se nommoit Jambon , l'autre Breton , & le troisieme Santon. Jambon qui estoit le plus aagé , ne passoit point seize ans. Ce galand fut adverty que son pere Berthaud (à cause de la famine qui estoit au pays , & généralement par tout) vouloit vendre ce peu de bien qu'il avoit de patrimoine (car il y avoit bien peu de gens en ce pays là qui n'eust quelque chose de propre) pour substanter sa famille , s'adressa , comme l'aîné , vers ses freres , Breton & Santon , les plus jeunes , & leur dit : Mes freres , je serois d'avis , afin que nostre pere ne vendist ce peu de bien que nous avons , & que nous eussions après la mort dequoy nous survenir , que vous allissiez par le monde , afin de gagner quelque chose pour maintenir nostre maison , & je demeureray à la maison avec le vieillard pour le gouver-

ner : en ce faisant nous sauverons les despens, & cependant le mauvais temps se passera. Breton & Santon, qui n'estoient pas moins rusez que Jambon, luy respondirent : Très-cher frere Jambon, vous nous prenez icy tant au despourveu, que nous ne sçavons que répondre ; mais donnez-nous terme ceste nuit pour y penser, & demain nous vous répondrons. Les deux freres, Breton & Santon, estoient d'une ventrée, & s'accordoient mieux ensemble qu'avec Jambon : & si Jambon avoit une once de mechancheté, les deux autres en avoient bien deux livres : car on voit communement que l'esprit & la malice recompense où nature deffaut. Le jour ensuivant, Breton, suivant la charge & commission que son frere Santon luy avoit donnée, s'en alla trouver Jambon, & luy commença ainsi à dire : Mon très-cher frere Jambon, nous avons bien pensé & considéré à tout ce que vous avez dit, & cognoissant que vous estes le plus grand de nous autres, nous estimons qu'il vaudra mieux que vous alliez le premier par le monde, & que nous autres qui sommes encore petits, demeurions à la maison pour gouverner nostre pere. Et si vous trouvez cependant quelque bonne fortune pour vous & pour nous, écrivez-nous, & nous vous irons trouver incontinent. Jambon qui pensoit donner la trouffe à ses freres, ayant entendu la réponse, fut bien

çamus, & en barbotant entre ses dents,
 disoit en soy-mesme : Par mon serment
 ces gens icy sont plus malicieux que moy.
 Car il disoit cela pour faire aller les freres
 par le monde, afin qu'ils mourussent de
 faim, du temps de la cherté, & qu'il de-
 meurast maistre de tout : veu mesmement
 que le pere estoit sur le bord de sa fosse ;
 mais son entreprinse n'alla pas comme il
 pensoit. Ayant donc entendu la responce
 de ses deux freres, il commença à faire
 son paquet de quelques pauvres habits
 qu'il avoit ; & ayant prins un bissac, avec
 du pain & du fromage, & une bouteille
 de vin ; portant aussi en ses pieds une paire
 de souliers rompus de cuir de porceau, se
 partit de sa maison, & print son chemin
 vers Bresse ; & ne trouvant là aucun party
 pour luy, passa plus outre, & s'en alla à
 Veronne, où il trouva un bonnetier qui
 luy demanda s'il sçavoit point travailler
 de son mestier, & il respondit que non.
 Voyant qu'il n'y avoit rien pour luy, il
 laissa Veronne & Vincence, & s'en vint
 à Padouë : & si-tost qu'il fut veu de cer-
 tains Medecins, on luy demanda s'il sça-
 voit point panser les mules, & il respon-
 dit que non, mais qu'il sçavoit bien la-
 bourer la terre, & tailler les vignes ; &
 ne se pouvant accorder avec eux, il se
 partit de là pour aller à Venise. Après
 que Jambon eut long-temps cheminé sans
 trouver aucun party, ne se trouvant plus

denier ny maille, se trouvoit mal content. Mais après long chemin, quand ce fut le plaisir de Dieu, il arriva au port, & pour autant qu'il estoit sans argent, on ne le vouloit pas recevoir; tellement que le pauvre diable ne sçavoit plus de quel bois faire fiesches, & voyant que les bateliers qui tiroient les barques, gaignoient quelques deniers à cest estat, il commença pareillement à s'y employer: mais la fortune qui persecute tousjours les pauvres gens & malheureux, voulut, qu'en remuant quelque baston, la corde se vint à rompre, & en se detournant il luy tomba un gros baston sur l'estomach, qui le fit tomber esvanouy en terre, & fut quelque espace de temps qu'on ne sçavoit s'il estoit vis ou mort, & si ce n'eust esté quelques gens de bien qui le firent porter sur le bateau à Venise, je ne crois point qu'il ne fut mort. Quand il fut guarý, il se partit avec ces gens de bien, & s'en alla par la ville chercher quelque party. En passant par les espiceries, il fut veu par un espicier qui piloit des amendes pour faire du marsepain, & luy demanda s'il vouloit demeurer avec luy, & il respondit que ouy. Estant entré en la boutique, le maître luy bailla quelques confitures à nettoyer, & luy enseigna à partir les noires d'avec les blanches, & le mit en compagnie d'un autre valet de boutique pour travailler ensemble. En nettoyant ces confitures

tures avec ce valet, le bon compagnon les accoustroit & nettoyoit si bien, qu'il estoit l'escorce & la couverture de dessus, parce qu'il les sentoît douces, & laissoit le dedans. Le maître qui cogneut le mystre, print un baston en sa main, & luy donna de bons coups, en disant: Vous faites icy des gallands, gentils gourmands & belistres que vous estes, en maniant tousjours un baston sur leurs espaules, & sur le champ les envoya en la malheure. Quand Jambon se fut party d'avec l'espicier ainsi bien froté & estrillé, il s'en alla à saint Marc, & de bonne fortune en passant par le marché des herbes & salades, il fut appelé par un jardinier de Quioge, qui s'appelloit Vivian Viannel, qui luy demanda s'il vouloit demeurer avec luy, & qu'il le nourriroit bien, & luy feroit bonne compagnie. Jambon qui portoit sur soy la devise & l'enseigne de Siene, c'est à sçavoir le Loup affamé, luy-respondit qu'il en estoit content; & ayant vendu quelque peu d'herbes qu'il avoit, il monta en barque, & s'en alla à Quioge, & Vivian le mit à travailler au jardin & accoustier les vignes. Or Jambon estoit desja tout stilé pour aller haut & bas par Quioge, & cognoissant beaucoup d'amis de son maître. Et pour autant que c'estoit sur la saison des premières figues, Vivian en print trois des plus belles, & les mit dedans un plat pour les envoyer, ou donner à un sien amy.

de Quioge, nommé sire Pierre. Et ayant appelé Jambon, luy bailla les trois figues, & luy dit : Jambon, prens ces trois figues & les porte à mon compere sire Pierre, & luy dis qu'il les reçoive pour l'amour de moy. Jambon obeyllant à son maistre, diti Volontiers, maistre. Et ayant prins les trois figues, se partit joyeusement. Quand Jambon fut par chemin pour faire son message, estant assailly par la gourmandise, le traistre regardoit & guignoit ces figues, & dit à sa gueulle : Que dois-je faire ? en dois-je manger, ou non ? Sa gueulle luy respondit : Mange, mange, pauvre homme ; un affamé ne regarde à rien. Et pour autant qu'il estoit assez gourmand par nature, joint qu'il estoit affamé comme un loup, il print le conseil de la gorge, & empoigna une de ces figues, & luy commença à estreindre le cul, taster & retaster, en disant. Elle est bonne, elle n'est pas-bonne, si est, non est : qu'il l'entama jusques au milieu ; tellement qu'il n'y demeura que la peau. Après l'avoir mangée, il luy sembla d'avoir mal fait ; mais parce que la faim le pressoit, il n'en fit pas grand' estime, car il print la seconde figue, & en fit autant que de la premiere. Jambon voyant d'avoir fait un tel desordre ne sçavoit quelle contenance tenir, ou s'il devoit aller faire son message, ou s'en retourner vers son maistre ; & estant en ceste dispute, il print un peu de courage, &

delibera d'aller plus outre. Quand il fut arrivé vers le compere sire Pierre, il batioit à la porte; & pour autant qu'il estoit desja cogneu, on luy ouvrit incontinent, & s'estant présenté au sire Pierre, qui se pourmenoit par sa maison, luy dit: Que dis-tu de bon, mon fils Jambon? Dieu te gard'. Bonadies, respondit Jambon, mon maistre vous envoie icy trois figues; mais le diantre m'emporte si je n'en ay mangé deux. Comment as-tu donc faict, mon fils? par mon ame je fis ainsi, respondit Jambon. Et en prenant la troisieme la mit en sa bouche & la croqua comme les autres, & ainsi Jambon les mangea toutes trois. Le sire Pierre, voyant un si gentil tour, dit à Jambon: Mon fils, dis à ton maistre que grand mercy, & qu'il ne se mette point en peine de me faire tels presens. A quoy Jambon respondit: Non, non, sire, ne vous chaille, je le feray très-volontiers; & luy tournant les espaules, s'en retourna au logis. Vivian ayant esté adverty des bonnes vertus de Jambon qui estoit ainsi gourmand, & le voyant manger outre mesure, à cause qu'il estoit affamé, joint qu'il ne luy revenoit point en son ouvrage, le chassa hors de son logis. Le pauvre diable de Jambon se voyant sans maistre & ne sçachant où aller, delibera d'aller à Rome, & essayer s'il pourroit trouver meilleure fortune qu'il n'avoit fait auparavant, ce qu'il mit en execution. Estant

arrivé à Rome, cherchant & recherchant maître, il tomba par fortune entre les mains d'un marchand, nommé sire Ambroise du Mulet, qui tenoit une grosse boutique de draps; & s'estant accordé avec luy, il commença à garder la boutique: & pour autant qu'il avoit desja enduré beaucoup de pauvreté, il delibera d'apprendre ce mestier & se faire homme de bien. Or estoit-il assez fin & rusé, nonobstant qu'il fust bossu, laid & contrefaict, si est-ce qu'il se fit si expert & vaillant au mestier en peu de temps, que le maître ne se mesloit plus de vendre ny d'acheter, & se fioit grandement à luy, & s'en servoit à sa nécessité. Advint que le sire Ambroise estoit contraint d'aller à la foire de Recanat, avec draps & marchandise, & voyant Jambon assez suffisant pour telle entreprinse, & qu'il estoit assez fidele, l'envoya avec sa marchandise à la foire, & le sire Ambroise demeura pour garder sa boutique. Si-tost que Jambon fut party, la fortune voulut que le sire Ambroise tomba en une si grosse maladie, qu'en peu de temps il rendit l'esprit. Ce voyant la femme, qui s'appelloit Dame Felicette, peu s'en fallut qu'elle n'allast après, pour la grande perte qu'elle avoit fait, & de la desbauche de sa boutique.

Jambon ayant esté adverty des piteuses nouvelles de son maître, s'en retourna au

logis , & commença à gouverner les affaires de la maison. Dame Felicette voyant que Jambon estoit gentil compagnon , & qu'il y avoit desja un an passé que son mary estoit mort , craignant de ne perdre Jambon , avec les memoires & papiers de la boutique , se conseilla à quelques siennes commeres , si elle se devoit marier ou non , & en se mariant , si elle devoit prendre Jambon , facteur de la boutique , veu mesmement qu'il avoit esté longuement avec son premier mary , & qu'il sçavoit desja tout le train de la boutique. Les bonnes commeres pensans que cela seroit bien fait , luy conseillerent de le faire , & tout incontinent les nopces furent faites , tellement que Dame Felicette fut mariée à sire Jambon , & le sire Jambon fut mary de Dame Felicette. Se voyant le sire Jambon eslevé en si grand credit , estant marié & maistre d'une si belle boutique de draps , avec grand trafic , advertit incontinent son pere qu'il estoit à Rome , & le bon party qu'il avoit trouvé. Le pauvre pere qui n'en avoit entendu aucunes nouvelles depuis l'heure qu'il estoit party en mourut de joye ; mais Breton & Santon en eurent grande consolation. L'occasion advint que Dame Felicette eut besoin d'une paire de chausses , à cause que les siennes estoient rompuës & gastées , & dit à son mary Jambon, qu'il luy en fit faire une paire. Jambon luy respondit , qu'il avoit bien d'au-

tres affaires, & que si elles estoient rompuës qu'elle les racoustrast à son plaisir. Felicette qui se souloit tenir propre au temps de son feu mary, luy dit, qu'elle n'estoit pas accoustumée de porter les chausses piecetées, & qu'il luy en falloit de bonnes. Sire Jambon luy respondit, que la coustume estoit telle en son pays, & qu'il ne luy en feroit point d'autres. Et ainsi debatant d'un propos en l'autre, il commença à entrer en colere, & ayant haussé sa main, il luy donna un si beau soufflet, qu'il la jetta à ses pieds. Dame Felicette voyant que c'estoit à bon escient, le commença à outrager de grosses paroles, tellement que le sire Jambon se sentant interessé en son honneur, la commença à toucher à beaux coups de point, tellement que la pauvre femme fust contrainte d'avoir patience. Quand le temps chaud fut passé, & que le froid fut venu, Dame Felicette demanda à sire Jambon, une doubleure de sarge pour couvrir son pe-lisson qui estoit en mauvais poincts, & afin qu'il ne pensast point que ce fust un mensonge, elle le luy monstra. Sire Jambon ne se soucia point de le voir, mais luy respondit qu'elle le racoustrast & qu'elle le portast ainsi : car la coustume n'estoit pas en son pays de porter si gros estat, & maintenir telles pompes. Madame Felicette entendant tels propos se mit en colere, & dit qu'elle en vouloit, quoy qu'il

en fust : mais sire Jambon luy respondit , qu'elle se deust taire , & qu'elle ne le fit point monter en colere , & qu'il n'en feroit rien : & Dame Felicette le commença à irriter , disant qu'elle en vouloit avoir , tellement qu'ils entrèrent l'un & l'autre en si grande colere que rien plus. Mais sire Jambon, suivant sa coustume, la commença à frotter avec un baston , & luy fit un tel pelisson de coups , qu'il la laissa quasi pour morte. Voyant (Dame Felicette) le courage de Jambon ainsi renversé , commença à renier & maudire l'heure & le jour que jamais on en parla , & qui la conseilla jamais de le prendre pour son mary , disant : Est-ce ainsi que tu me traittes , poltron , ingrat , meschant & malheureux que tu es ? Est-ce icy le guerdon que tu me rends des biens que je t'ay fait ? car d'un pauvre valet que tu estois , je t'ay fait maistre , non seulement des biens , mais aussi de ma personne propre : me fais-tu ce tour icy , mastin que tu es ? mais ne te soucie , traistre , larron , tu t'en repentiras. Sire Jambon voyant que sa femme multiplioit en paroles , retouchoit & chargeoit dessus qu'il n'y manquoit rien. Tant y a que la pauvre femme estoit venue à telle extremité , que quand elle sentoit parler , ou remuer son mary , elle trembloit comme la fueille & pissoit d'angoisse. L'hyver estant passé , sire Jambon delibera d'aller jusques à Bologne , pour

quelques affaires qu'il pouvoit avoir, & principalement pour recevoir quelques debtes de la boutique, & luy falloit séjourner quelque temps; tellement qu'il dit à sa femme: Sçais-tu qu'il y a, Felicette, j'ay deux freres bossus comme moy, & ne nous pourroit-on bonnement cognoistre les uns d'avec les autres, & qui nous verroit tous trois ensemble, ne mettroit point de difference entre nous trois. Donne-toy bien garde, que s'ils arrivoient par cas d'aventure en ceste ville, cependant que je n'y suis pas, ils voulussent loger ceans, que tu ne les reçoives aucunement: car ils sont meschans tout outre, & te pourroient bien donner quelque trousse, puis s'en aller au diable, & demeurerois cependant avec les mains pleines de mouches, & si je sçay une fois que tu les loges ceans, je te feray la plus malheureuse femme de ce monde. Ayant dit ces paroles, il se partit. Devant qu'il fust dix jours de là, Breton & Santon arriverent à Rome, & s'en alloient cherchant & demandant de tous costez le logis de Jambon, jusques à ce qu'on leur enseigna la boutique. Voyant Breton & Santon, la belle & honorable boutique de Jambon, & si bien garnie de draps, ils furent grandement estonnez, ne pouvans imaginer comment il estoit possible qu'il eust amassé tant de biens en si peu de temps. Estans en cest esbahissement, ils s'approcherent de la boutique,

& dirent qu'ils vouloient parler au sire Jambon; mais on leur respondit qu'il n'estoit pas aupays, & que s'ils vouloient quelque chose qu'ils ne fissent que commander. Breton respondit, qu'il parleroit volontiers à luy, & s'il n'y estoit pas, qu'il voudroit bien dire un mot à sa femme. Et ayant fait appeller Dame Felicette, elle descendit en la boutique, & si-tost qu'elle eut apperceu Breton & Santon, le cœur luy dit que c'estoient ses beaux-freres. Breton ayant veu la femme de son frere, luy dit: Dame, est-ce vous qui estes la femme de Jambon? & elle respondit que ouy. Touchez-nous donc la main, dit Breton, car nous sommes freres de vostre mary Jambon, & vos beaux-freres. Dame Felicette qui se souvenoît encore des paroles de son mary Jambon & des coups qu'il luy avoit autrefois donné, ne leur vouloit pas toucher la main; si est-ce qu'ils sceurent si bien caqueter, qu'elle leur toucha leur main. Si-tost qu'elle eut touché la main à l'un & à l'autre, Breton luy dit: Ma sœur, m'amie, donnez-nous un peu à desjeuner, car nous mourons de faim, mais elle n'en voulut rien faire. Toutes-fois ils la sceurent si bien flatter & prier, que Dame Felicette en eut pitié, & les mena en la maison, & leur donna fort bien à boire & à manger, joint qu'elle leur donna logis pour dormir. Devant qu'il fust trois jours de là, ainsi que Breton & San-

ton devoient avec leur belle-sœur, voycy arriver Jambon; tellement que Dame Felicette (sçachant que c'estoit son mary) fut grandement troublée; & pour la crainte qu'elle avoit, elle ne sçavoit que faire; de peur que Jambon n'apperceust ses freres. Et ne pouvant trouver plus beau moyen pour lors, elle les fit retirer secrettement en la cuisine, où il y avoit un auge pour eschauder & plumer les pourceaux, & les fit cacher là dessous, leur commandant de ne dire mot. Si-tost que Jambon fut entré, voyant sa femme toute esmeuë & changée par le visage, luy dit: Qu'as-tu, que tu es si troublée? Il y a quelque chose: aurois-tu point quelque mignon ceans? Mais elle respondit doucement, qu'il n'y avoit rien. Cependant neantmoins Jambon la regardoit, & disoit: Par mon serment, tu as faict quelque chose. Aurois-tu point caché mes freres ceans? Elle luy respondit franchement que non. Alors il commença à manier & faire trotter le baston, comme de coustume. Breton & Santon, qui estoient dessous cest auge aux pourceaux, avoient si grand' peur qu'ils pissoient de rage, & ne s'osoient remuer ny toussir aucunement. Jambon ayant posé le baston, se mit à chercher par tout pour voir s'il trouveroit point quelqu'un: & voyant qu'il ne trouvoit personne, il s'apaisa quelque peu, & se mit après quelques affaires de la maison, & y fut assez

longuement : tellement que de la peur & de la chaleur de la puanteur excessive que rendoit l'auge à pourceaux , ces deux pauvres malheureux , Breton & Santon , rendirent l'esprit là dessous d'angoisse. Quand l'heure fut venue que le sire Jambon souloit aller en place pour trafiquer avec les marchands , il se partit du logis. Tout incontinent après , Dame Felicette s'en alla vers l'auge pour mettre hors du logis les beaux-freres , de peur que Jambon ne les trouvast en la maison : & ayant descouvert l'auge , elle les trouva tous roides morts , comme beaux pourceaux. La pauvre femme voyant un tel inconvenient , fut grandement faschée : & afin que cela ne vint aux oreilles de Jambon , elle cherche incontinent moyen de les jetter hors du logis , sans que personne s'en apperceust. Et selon que j'ay autrefois ouy dire , il y a une coustume à Rome , que si on trouve quelque pelerin ou estranger mort par les rues , ou en la maison d'autrui , il y a quelques gens deputez à cest office , quiles portent aux murailles de la ville , & les jettent dedans le Tibre ; tellement qu'on n'en entend jamais vent ny fumée. S'estant Dame Felicette par fortune mise à la fenestre pour voir s'il passoit point quelqu'un de ses amis , pour faire oster ces corps morts , voilà passer un des ces porte morts , auquel elle fit signe qu'il vint un peu parler à elle , & luy fit entendre qu'il y avoit

396 LA V. NUICT,
un trespaslé en sa maison, & qu'il l'em-
portast dedans la riviere du Tibre, sui-
vant la coustume. Or Dame Felicette avoit
desja tiré un de ces corps de dessous l'au-
ge, & l'avoit laissé en terre : quand le por-
te-mort fut monté, elle luy ayda à char-
ger ce corps sur ses espaules, & luy dit
qu'il retournast après pour recevoir son
payement. Ce galand l'ayant porté vers
les murailles, le jetta dedans le Tibre, puis
retourna vers la Dame, luy demander un
florin, & qu'il luy en appartenoit autant
pour son salaire ordinaire. Cependant que
ce compagnon portoit ce mort à la rivie-
re, Dame Felicette (qui estoit assez ru-
sée) avoit oisté de dessous l'auge l'autre
corps mort, & l'avoit mis contre l'auge,
tout ainsi que le premier. Estant de retour
vers Dame Felicette pour avoir son paye-
ment, elle luy dit : As-tu porté ce corps
mort dedans la riviere ? Ouy Madame,
respondit le bon compagnon. L'as-tu jetté
dedans ? dit la Dame. Comment, si je l'ay
jetté ? respondit-il. Et de quelle sorte ?
Or regarde si tu l'as jetté, dit-elle, voy le là
encores. Et en regardant ce corps mort,
il pensoit pour tout certain que ce fust ces-
tuy là mesme : tellement qu'il fut tout es-
tonné & honteux, en grondant & mau-
diffant, le chargea sur ses espaules, &
l'alla jeter dedans le Tibre, en le regar-
dant descendre contre bas par longue es-
pace de temps. En retournant vers Da-

me Felicette pour avoir son payement, il vint à rencontrer sire Jambon, qui ressembloit du tout à ceux qu'il avoit jetté dedans la riviere; en le voyant il entra en si grande colere, qu'il jettoit feu de tous costez, & ne pouvant plus endurer telle fascherie, & croyant pour certain que c'estoit celny qu'il avoit desja jetté par deux fois en la riviere, & que ce fust un mauvais esprit qui retournoit, il le commença à poursuivre avec une petite cognée qu'il portoit en sa main, & en donnatout droit à la teste de sire Jambon, en disant: Ah! poltron, meschant, ne feray-je autre chose pour tout aujourd'huy que de te porter dedans le Tibre? Et cependant il le coignoit en telle sorte, que le pauvre Jambon s'en alla pareillement parler à Pilate; puis le leva sur ses espauls, & le jetta dedans le Tibre. Voilà comment Jambon, Breton & Santon, finirent misérablement leur vie. Et Dame Felicette entendant ces nouvelles, fut fort joyeuse, estant delivrée de telle tempeste.

Ceste plaisante Fable fut tant agreable aux Dames, qu'elles ne se pouvoient tenir de rire & deviser. Et combien que Madame leur imposast souventesfois silence, si est-ce qu'elles ne se pouvoient abstenir de rire; mais le bruit cessé, elle commanda à Moulin de proposer son Enigme, ce qu'il fit en la maniere qui s'ensuit.

*Les os de mort venans de tombe obscure ,
 A tierce & sexte y sont tous demenez :
 Monstrans par points quelque grosse adven-
 ture ,
 Dont bien souvent les gens sont forcenex ;
 Et blasphemant l'autre lors se parjure ,
 Ce que souvent font cerveaux obstinez :
 Barbe de chair chantant de son bec d'os ,
 Dit qu'en bonne oye il faut poser le dos.*

Si la Fable racontée par le Moulin , pleut generally à tous , l'ingenieux Enigme fut beaucoup plus agreable , & quasi espouventable. Et pour autant que personne ne l'entendoit , les Dames le prierent d'une voix que ce fust son plaisir d'en lire l'interpretation. Le Seigneur Moulin voyant que tel estoit le desir de tous , afin de ne sembler point ingrat de son sçavoir , vint à interpreter , ainsi son Enigme : Mes très-cheres Dames , mon Enigme ne signifie autre chose que le jeu du tablier ; car les os de mort , qui sont hors de la sepulture , sont les dez qu'on tire hors de la gibessiere , & quand on fait venir trois , deux & as , ce sont les points qui montrent l'adventure : & tels points mettent le feu aux oreilles en jouiant au tablier ; aussi en la bourse , en gagnant bien suivant le jeu , il ne cesse pas d'aller quand il perd , pour la variation & changement des coups. Le joueur avaricieux se vient

après à esmouvoir , quand il tasche de gagner , avec blasphemes & maledictions si grandes , que je ne sçay comment la terre ne l'engloutit point. Après qu'ils ont bien joué , le coq se leve , qui a barbe de chair & le bec d'os , puis chante & admoneste qu'il est desja minuiet , & qu'il se faut aller coucher dedans un liêt , qui est de plume d'oye , & quand on est entré dedans , on diroit qu'on est dedans un fossé : que vous en semble donc ?

Ceste subtile interpretation fut attentivement escoutée d'un chacun , & n'y eut celuy qui ne se couchast sur la selle , pour les ris excessifs. Mais après que Madame eut commandé que chacun se teust , elle se tourna vers Moulin , & luy dit : Seigneur Antoine , tout ainsi que l'estoille Diane reluit entre toutes les autres , aussi la Fable que vous avez racontée , a le prix par dessus les autres , que nous avons entendu jusques à present. Moulin respondit : Madame , la louange que vous me baillez ne vient point de mon sçavoir , mais plustost de la grande courtoisie & gentillesse qui regne tousjours en vous ; mais si c'estoit vostre plaisir que le Trevisan en racontast une en bon villageois , je suis asseuré que vous la trouveriez meilleure que la mienne. Madame qui desiroit grandement de l'ouyr , luy va ainsi dire : Seigneur Benoist , n'entendez-vous pas ce que dit icy le Moulin vostre amy ? certes

il m'est advis que vous luy feriez grand tort si vous le faisiez trouver menteur : mettez donc la main à vostre gibeciere , & en tirez une Fable villageoise , de laquelle vous resjouirez la noble compagnie. Le Trevisan qui ne trouvoit point convenable d'usuiper l'office d'Ariane , qui venoit pour lors en son rang , s'excusa premierement : puis voyant de ne pouvoir eviter ce passage , commença ainsi la Fable , en disant :

F A B L E IV.

Marcel Verselois , fut amoureux d'Estienette , femme de François Rabot ; laquelle le fit venir en sa maison pour jouyr de luy à son plaisir : cependant qu'elle conjuroit son mary , il se sauva secrettement.



U E vous en semble , Madame , & vous noble assistance , le Seigneur Antoine ne s'est il pas bien porté ? ne vous a-t'il pas raconté une belle hystorie ? Si m'efforceray-je de me faire honneur. Nous autres bonnes gens de village avons tousjours ouy dire que les hommes

mes de ce monde se gouvernent en diverses manieres : mais moy , qui ne suis aucunement lettré , comme j'ay tousjours ouy dire à nos anciens , qui mal danse , bien triomphe , patience , il me faudra faire ainsi. Mais ne pensez point que je vueille dire cela pour fuyr la peine de vous raconter une nouvelle ; car je n'ay pas peur de ne la dire bien , d'autant que celle que vous a raconté le Seigneur Antoine , m'a si fort animé , que je ne vois jamais l'heure de commencer ; & peut-estre qu'elle ne sera pas moins plaisante que la sienne , veu qu'il est question de la finesse d'une femme de village , qui trompa son mary , comme vous entendrez.

Il y a au dessous de Piove de Sac , au pays de Padouë , comme il vous est à tous notoire , un village nommé Salmace , où fouloit demeurer , n'y a pas long-temps , un paysan nommé François Rabot , lequel estoit assez pauvre , au reste bien loyal , nonobstant qu'il eust gros esprit. Il avoit espousé une fille , yssue d'une famille qui s'appelloit les Gaillards , du village de Champ-Long , laquelle estoit jeune , rusée & esveillée , & se nommoit Estiennette , & outre ce qu'elle estoit bien adroite de sa personne , elle avoit un fort beau visage , tellement qu'il n'y avoit aucune paysanne aux environs qui fust sa pareille : & pour autant qu'elle avoit bonne grace à

baller, tous ceux qui la regardoient en devenoient amoureux. Au moyen dequoy il y eut un jeune compagnon assez beau & de bonne maison de la ville de Padouë, nommé Marcel Verselois, lequel en fut si amoureux, qu'il se trouvoit à toutes les festes où il pensoit qu'elle deust aller, & la faisoit dansser ordinairement. Et combien qu'il fust grandement amoureux d'elle, si tenoit-il son amour secret, de peur de faire parler les gens. Or Marcel sçachant que François son mary estoit assez pauvre, & qu'il vivoit du travail de son corps, & que depuis le matin jusques à la nuict, il travailloit pour les uns & pour les autres; il commença à hanter vers la maison d'Estiennette; & après s'estre petit à petit apprivoisé, il se mit à deviser avec elle. Et combien que Marcel eust deliberé en son cœur de luy manifester l'amour qu'il luy portoit, si craignoit-il toutefois qu'elle ne se courrouçast, & qu'elle ne le voulust plus voir, parce qu'il luy sembloit qu'elle ne luy faisoit point si bonne chere comme son amour meritoit; joint qu'il craignoit d'estre decelé par quelqu'un qui en advertist François son mary, & qu'il ne luy en fist après quelque desplaisir: car combien qu'il fust assez lourdaut, si ne laissoit-il pas d'estre jaloux. Cependant que Marcel hantoit vers ce quartier là où se tenoit Estiennette, en la regardant de près, il fit tant qu'elle apperceut qu'il es-

roit amoureux d'elle. Et pour autant qu'elle ne luy pouvoit faire bonne chere, pour beaucoup de respects, ny monstrier qu'elle fust amoureuse de luy, elle se plaignoit & tourmentoit en soy-mesme. Estant un jour Estiennette assise sur une busche qui estoit hors de la maison; & ayant sa quenouille garnie d'estoupes, qu'elle filoit pour sa maitresse, voicy venir Marcel, qui avoit prins un peu de bon courage, & dit à Estiennette: Dieu vous gard', m'amic Estiennette. Et vous aussi, le jeune fils, respondit Estiennette. Helas! dit Marcel, je meurs & languis pour l'amour de vous, & vous n'en faites conte, & ne vous souciez aucunement de moy. Estiennette luy respondit: Que sçay-je si vous m'aymez? Si vous ne le sçavez, dit Marcel, je le vous dis maintenant, avec grande douleur & passion. Je le sçay bien maintenant respondit Estiennette. Alors Marcel luy dit: Dites-moy par vostre foy si vous m'aymez? Et quoy donc? respondit Estiennette. Si vous m'aymiez comme vous dites, dit Marcel, vous le me monstrieriez par quelque signe; mais vous ne m'aymez point. Comment donc voudriez-vous que je le vous monstasse? respondit Estiennette. O! Estiennette, dit Marcel, vous le sçavez bien sans que je vous le die. Je ne le sçay pas, respondit Estiennette, si vous ne me le dites. Je le vous diray bien, dit Marcel, si vous me voulez es-

couter , & que ne le preniez point à mal. Estiennette luy respondit : Dites hardiment fire , car je vous promets sur mon ame , que si c'est chose bonne & pour mon honneur, je ne le prendray point à mal. Quand voulez-vous , dit Marcel , que je jouisse de vostre personne tant désirée ? Je voy bien maintenant , respondit Estiennette , que vous estes moqueur , & que vous vous gaudissez de moy : je ne suis pas vostre pareille , vous estes citoyen de Padouë , & je suis paysanne des champs : vous estes riche , & je suis pauvre : vous estes grand Seigneur , & je suis de travail : vous voudriez de grosses Dames , & je suis de basse condition : vous estes brave , avec le pourpoint ouvré , & les chausses decoupées , bordées de velours & de soye , & j'ay une pauvre cotte rompuë & piecetée ; & n'ay autre chose en ce monde que ceste robe que vous voyez sur moy , quand je vay danser aux festes : vous mangez le pain de froment , & moy de mil , de feves , encore n'en ay-je pas mon saoul ; je suis aussi sans pelisson pour cest hyver , pauvre femme que je suis , & si ne sçay plus que faire , car je n'ay argent , ny marchandise à vendre , pour acheter ce qui m'est necessaire. Nous n'avons pas du bled jusques à Pasques , je ne sçay comment nous ferons en si grand' cherté , & mille tailles qu'il nous faut payer tous les jours à Padouë. Las ! pauvres gens de village , il y

a grande pitié en nous. Nous endurons à labourer les terres & semer le froment, que vous autres mangez, & nous mangeons le seigle & autres pauvres semences. Nous taillons les vignes & faisons le vin, & bevons la despense, & bien souvent de l'eau. Ne vous chaille, dit Marcel, si vous me voulez contenter, vous n'avez faite de tout ce que vous sçauriez souhaiter. Vous dites bien tousjours ainsi entre vous autres hommes (répondit Estiennette) jusques à ce que vous ayez obtenu vos intentions; mais après que vous avez fait, vous vous en allez, & ne vous revoit-on jamais, & cependant les pauvres femmes sont abusées & deshonorées du monde, & (qui plus est) vous vous en vantez & lavez vostre bouche de nous, comme de vieilles charognes trouvées sur les fumiers: je sçay bien la maniere faire de vous autres citoyens de Padouë. Or sus, c'est assez, dit Marcel, laissons les paroles, & retournons aux faits, voulez-vous faire ce que je vous ay dit? Estiennette répondit: Allez-vous-en, je vous supplie, devant que mon mary vienne, car il s'en va tard, & n'arrestera gueres à venir: retournez demain sur le jour, & deviserons tant qu'il nous plaira, je vous ayme bien par mon serment. Mais parce qu'il avoit grand desir de parler à elle, il ne se vouloit point partir; tellement qu'elle luy dit derechef; Allez-vous-en, s'il vous

plaist, & ne tardez plus. Marcel voyant qu'Estiennette se courrouffoit quasi, dit : Adieu vous dy, ma douce amie, je vous recommande mon pauvre cœur, lequel vous avez entre vos mains. Et vous aussi mon esperance, respondit Estiennette, il est bien pour recommandé. Jusques à demain, si Dieu plaist, dit Marcel. C'est assez dit, respondit Estiennette. Quand ce vint au lendemain, Marcel attendoit d'un grand desir le temps pour retourner voir Estiennette ; & quand il creut cognoistre que l'heure d'y aller estoit venue, il s'en alla vers son logis, & la trouva en son jardin festoyant quelques treilles. Et si-tost qu'ils se furent veus, ils s'entre-saluerent & se mirent à deviser ; & après qu'ils eurent long-tems devisé, Estiennette luy va dire : Mon amy, vous devez sçavoir que mon mary s'en ira demain matin au moulin, & ne sera point de retour que le lendemain ensuivant, & s'il vous plaist vous viendrez au soir sur le tard, & je vous contenteray ; mais ne faillez pas, & donnez-vous garde de me tromper. Quand Marcel eut entendu ces bonnes nouvelles, il s'estime le plus heureux personnage de ce monde ; & ayant fait un saut de la joye qu'il avoit, il se partit d'avec elle. Si-tost que François fut de retour au logis, la bonne commere s'en alla au devant de luy, & luy dit : Sçavez-vous qu'il y a, François, il faut aller au moulin : car nous

n'avons plus que manger. Il y faut aller, répondit François. Je dy demain de grand matin, dit Estiennette. Demain soit, je m'en iray devant jour emprunter une charette avec les bœufs, à ceux pour qui je travaille, puis je viendray charger, & m'y en iray. Cependant Estiennette s'en alla apprester le bled, & l'ensacha, afin qu'il n'eust point autre affaire que de le charger sur la charette, & s'en aller chantant. Quand ce vint le lendemain, François chargea le bled que sa femme avoit ensaché le soir precedent, & s'en alla au moulin. Et pour autant que c'estoit aux jours cours, & que les nuits estoient longues, joint que les chemins estoient rompus par les pluyes, & fanges & glaces, avec le froid merveilleux, le pauvre François fut contraint de demeurer toute la nuit au moulin, ce que Marcel desiroit, & Estiennette pareillement. La nuit venue (suivant l'assignation donnée) Marcel print une couple de bonnes poules bien grasses, & toutes cuites, avec du pain blanc & du vin sans eau, qu'il avoit appresté devant que se partir du logis, & s'en alla secrettement au travers des champs au logis d'Estiennette. Estant arrivé, il la trouva près du feu, qui devuidoit du filet. Alors ils commencerent à banqueter, & après qu'ils eurent bien repeu, ils s'en allerent tous deux coucher dedans le liét. Et cependant que le pauvre niais de François

faisoit moudre son bled au moulin, Marcel blutoit la farine dedans le liêt avec sa femme. Quand ce vint sur le poinct du jour, les deux amans se leverent, de peur que François ne les surprint dedans le liêt; & ainsi qu'ils devoient ensemble, voicy arriver François qui commença à siffler devant le logis, & commença à appeller Estiennette pour luy allumer du feu, à cause qu'il mouroit de froid. Or Estiennette (qui estoit rusée & cauteleuse) ayant entendu la voix de son mary, de peur qu'il n'advint quelque mal à Marcel, & que le dommage & la honte ne tombast sur elle, s'en alla incontinent ouvrir l'huis, & fit cacher Marcel derriere la porte; puis s'en alla au devant de son mary, & le commença à caresser. Après que François fut entré dedans la court, il dit à Estiennette : Fay-moy du feu si tu veux, belle Dame, car je suis transi de froid; par le sang de saint Quentin, je me suis gelé de froid, tellement que je n'ay jamais peu dormir. Estiennette s'en alla incontinent au bucher, & print une bonne brassée de fagots, & luy alluma le feu, se tenant toujours près du feu, de peur que François n'apperceust Marcel. Et en devisant avec luy de plusieurs propos, elle luy va dire entre autres : Je vous veux faire un beau compte, mon mary. Qu'y a-t'il donc ? respondit François. Il est arrivé icy (dit-elle) cependant que vous estiez au moulin un

pauvre

pauvre vieillard qui m'a demandé l'aumône pour l'honneur de Dieu, & pour autant que je luy ay donné du pain & une escuelle de vin, il m'a enseigné une belle oraison pour conjurer le milan; laquelle j'ay apprins incontinent. Est-il possible ? respondit François. Ouy foy de compere, dit Estiennette, & si en suis fort joyeuse. Je te prie que je la sçache, respondit François. Il faut que vous la sçachiez, mon amy, dit-elle. En quelle maniere ? respondit François. Je le vous diray (dit-elle) si vous me voulez escouter. Comment donc ? dit François; ne me tiens plus en attente; je te prie. Il faut donc, dit-elle, que vous vous estendiez de toute vostre longueur, comme si vous estiez mort, ce que je ne voudrois pas par mon serment, & que vous tourniez la teste & les espaules vers la porte, aussi les genoux & les pieds contre l'ayvier. Puis je vous mettray un linge blanc sur le visage, avec nostre boisseau que je vous mettray en la teste. Voire, mais il n'y pourra pas entrer, dit François. Si fera dea, respondit Estiennette, vous le verrez tantost. Alors elle print le boisseau, & le luy ayant mis sur la teste, luy dit: Il ne pourroit estre mieux en ce monde. Cela fait, dit Estiennette: Ne vous remuez point & ne dites mot, autrement nous ne ferions rien, car je prendray nostre sas, & commenceray à passer. Cependant vous direz l'orai-

son ; & en ce faisant nostre conjuration sera faite : mais donnez-vous de garde sur tout de vous remuer , jusques à tant que je l'aye dite par trois fois ; puis vous verrez si le hua fera plus rien aux poulets. Pleust à Dieu (respondit François) que ce que tu dis, fust vray : ne vois-tu pas que nous ne pouvons nourrir aucuns poulets , que ce diable de hua ne les mange tous , & n'en pouvons tant edifier que nous puissions payer nos maistres , & les grosses tailles , & pour acheter de l'huile , du sel & autres choses pour le mesnage ? Par ce moyen donc , dit Estiennette , nous nous aydeions du nostre. Puis dit à François : Or sus couchez vous. Ce qu'il fit. Estendez-vous bien , dit-elle. Et il taschoit de s'allonger tant qu'il pouvoit. Voilà qui va bien , dit Estiennette. Alors elle print un linge fort blanc & net , & luy couvrit le visage ; puis print le boisseau qui estoit assez long , & luy fourra en la teste. Cela fait , elle print le sas , commença à sasser & dire l'oraison qu'elle avoit appris ; laquelle commençoit en la maniere qui s'ensuit :

*Tu escoquas avecque ta grimace ,
 Coquas te fais , & dans mon sas te sasse ;
 Fay mes pouncins , qui sont bien vingt & quatre ,
 Que le larron par mort ne puisse abatre ;
 Que le regnard malin ne les devore ,
 Et le gros rat ne les moleste encore ;
 Que mes petits la belette n'approche ,*

*Et le milan glouton ne les accroche.
Toi qui te tiens derriere ceste porte,
Entends ce fait, de cela je t'enhorte;
Ou autrement je conclus & arreste
Notoirement, que tu es une beste.*

Après que Estiennette eut dit son oraison en faisant continuellement, elle tenoit tousjours la veüe tournée vers l'huys, en faisant signe à Marcel, qui estoit derriere l'huys, qu'il s'enfuiſt. Mais luy qui n'entendoit pas encore ceste pratique, ne ſça-
chant à quelle fin Estiennette faisoit ce myſtere, ne ſe remuoit aucunement; mais pour autant que François ſe vouloit lever, il dit : Est-ce fait. Estiennette, qui voyoit Marcel ne s'oſter point de là, reſpondit : Ne vous bougez de par Dieu, ne ay-je pas dit qu'il me faut faire cela par trois fois? Vous verrez que nous gasterons tout, puis-
que ne voulez pas demeurer en une place. Point, point, dit-il, ce ne ſera rien. Tant y a qu'elle le fit coucher dere-
chef, & commença la conjuration comme la premiere fois. Quand Marcel eut compris ce qu'elle avoit fait, ſans que François s'en doutaſt aucunement, s'enfuit incontinent. Voyant Estiennette que Marcel s'eſtoit retiré, elle paracheva son oraison pour maudire & conjurer le hua. Puis fit lever son coqu de mary, & luy alla ayder à deſcharger la farine qu'il avoit amenée du moulin. Eſtant Estiennette en

sa cour, & voyant Marcel de loin qui s'en alloit hastivement, se mit à crier à haute voix. Ah ! le meschant oiseau ! hay ! hay ! si tu y viens, si tu y retournes, en bonne foy, je t'en feray aller queue basse. Vous semble-t'il qu'il soit gourmand ? ceste meschante beste y retournoit encore. Dieu te donne le mal an. Ainsi toutesfois & quantes que le hua venoit, & qu'il descendoit en la court pour emporter les poulets, il se frottoit premierement à la poule qui faisoit sa conjuration : puis on ne sçavoit qu'il devenoit, & s'en alloit la queue basse, & ne nuisoit plus aux poulets de François & de Estiennette.

La Fable du Trevisan fit tant rire les Dames, qu'elles crevoient quasi, n'y avoit celuy en la compagnie qui ne l'eust estimé vray payfan, tant il le contrefaisoit bien. Mais après que chacun cessa de rire, Madame tourna sa veüe gracieuse vers le Trevisan, & luy dit : Vrayement Seigneur Benoist, vous nous avez si bien consolées ce soir icy, que nous pouvons bien dire tous d'une voix, que vostre Fable n'a point esté moindre que celle de Moulin. Mais pour vostre contentement & de l'honorable compagnie, proposez, s'il vous plaist, un Enigme qui ne soit pas moins delectable que beau. Le Trevisan voyant le desir de Madame, ne luy voulut pas contredire ; mais se leva & commença ainsi à dire :

*Le Sire Jou en avant & arriere ,
S'en va branlant & chacun le peut voir ;
L'un d'un costé l'autre bien près se tire ;
Bien-tost après un se vient esmouvoir ,
Qui va frappant sur quatre par derriere :
Si du premier tu le pourras sçavoir ,
Pour mon amy toujours je te retien :
C'est Jou , te dis-je , & tel te le maintien .*

Après que le Trevisan eut avec ses con-
tenances de payfan , recité son Enigme ,
qui ne fut aucunement entendu ; afin que
chacun le peust facilement entendre, il l'ex-
posa ainsi en son langage. Afin de ne re-
tarder la compagnie , sçavez-vous que si-
gnifie mon Enigme ? Je vous le diray , si
vous ne le sçavez. Va sire Jou derriere &
devant , signifie le Jou qui tient les bœufs
liez ensemble à la charrue , & qui va haut
& bas par les terres , & par les chemins ,
estant veu de tous. Et ceux qui sont deçà
& delà , ce sont bœufs qui sont couplez.
Et celuy qui donne à quatre sur l'eschine ,
est le bouvier qui va après avec son esquil-
lon , piquant les bœufs qui ont quatre
pieds. L'exposition du rustique Enigme
pleut generally à un chacun , non pas
sans grandes risées. Mais le Trevisan qui
sçavoit que c'estoit à la gracieuse Cathe-
rine de raconter sa Fable ce soir , il se tour-
na vers Madame , & luy dit d'une conte-
nance affable : Madame (non point pour
Mm iij

troubler le bon ordre commencé, ny pour vous remontrer, veu que vous estes ma maistresse & singuliere Dame, mais pour satisfaire à l'honneste desir de l'amiable compagnie) je trouveroie bon que ce fust vostre plaisir de nous faire participans de vos biens, en nous racontant de vostre grace accoustumée quelque Fable de plaisir & recreation. Et si j'ay prins plus grande hardiesse qu'il ne m'appartient, ce que à Dieu ne plaise, je vous supplie m'avoir pour excusé, parce que l'amitié que je porte à ceste honorable compagnie, est la cause principale de telle requeste. Madame ayant entendu l'honneste & courtoise demande du Trevisan, baissa premierement les yeux en terre, non point par crainte, ny par honte qu'elle eust; mais pour autant qu'elle pensoit, que c'estoit plustost son office d'escouter, pour diverses raisons, que de raconter. Puis d'une contenance gracieuse & honneste, jetta sa veüe vers le Trevisan, & luy dit: Seigneur Benoist, combien que vostre requeste soit pertinente & honneste, si ne devez-vous pas pour cela estre si prompt à demander: pour autant que l'office de Fabloyer appartient plustost à nos Damoiselles, qu'à moy. Au moyen dequoy il vous plaira m'avoir pour excusée, si je ne satisfais pour le present à vos honnestes desirs, & que Catherine doit ce soir avoir le cinquiesme rang pour raconter la Fable, veu que le lieu luy est

escheu par le sort. Alors toute la joyeuse compagnie qui desiroit grandement de là ouyr, se leva, & commença à favoriser le Trevisan, en la priant humblement qu'elle ne deust point avoir esgard à la qualité de sa dignité, veu que le temps & le lieu permettent à un chacun, de quelque qualité & condition qu'il soit, de pouvoir raconter tout ce que bon luy semble. Madame se voyant si doucement priée, afin de ne sembler point ingrate, respondit en soufrian: Puisque c'est vostre plaisir, & que chacun se contente que je finisse ce soir avec une mienne Fable, je le feray volontiers, & sans plus faire aucune résistance, je la vais ainsi commencer.



FABLE V.

Madame Modeste, femme du sire Tristan Sanquet, en sa jeunesse acquiert avec ses mignons & amoureux, une grande quantité de souliers, qu'elle bailla en sa vieillesse à valets & autres personnes de basse condition.



LES richesses & biens mal acquis, le plus souvent perissent en bref espace de temps : car le vouloir divin permet qu'ils retournent par le mesme chemin qu'ils sont venus : ce qui advint à une femme de Pistoye, de laquelle on ne parleroit pas comme on fait à present, si elle eust esté autant sage & honneste, comme elle estoit folle & dissoluë. Et combien que la Fable que je vous veux raconter, ne soit gueres convenable à nous, veu qu'il n'en sort que honte & deshonneur, qui obscurcit & souille l'honneur & la gloire de celles qui vivent honnestement ; si vous la diray-je toutesfois, veu que ce sera une leçon & instruction pour suivre les bonnes & fuir les mauvaises, comme vous entendrez.

Vous devez donc entendre (très-honorables Dames) qu'en l'ancienne cité de Pistoie en Toscane , y avoit de nostre temps une jeune femme nommée Modeste, lequel nom n'estoit gueres convenable à sa personne , attendu sa mauvaise vie. Elle estoit assez belle & de bonne grace , au reste de basse condition , & avoit un mary qui se nommoit sire Tristan Sanquet, homme de bien & compagnable , estant du tout adonné à traffiquer , & toutes ses affaires luy prosperoient assez bien. Or Dame Modeste, qui estoit amoureuse tout outre , ne veillant continuellement en autre chose , voyant son mary estre du tout adonné à la marchandise & à solliciter ses affaires ; voulut de son costé commencer un autre train de marchandise, sans le sceu de son mary. Et se mettant tous les jours par maniere de passe-temps , tantost à une fenestre , & tantost sur une gallerie , regardoit tous ceux qui passoient par la rue ; & tous les jeunes gens qu'elle voyoit passer , elle les incitoit par œillades , & autres contenance amoureuses à l'aymer. Tant y a qu'elle mit si bonne diligence à mettre en avant sa marchandise , & y estoit si soigneuse , qu'il n'y avoit celuy en toute la cité , fust-il riche ou pauvre , gentilhomme ou roturier , qui ne voulust prendre & gouter de sa marchandise. Estant à la fin Madame Modeste parvenue en grand estat & reputation , delibera de com-

plaire à un chacun qui viendrait vers elle , & pour peu de cas : & de fait pour toute recompense & salaire , elle ne demandoit autre chose qu'une paire de souliers , qui fussent selon l'estat de ceux qui se donnoient plaisir avec elle : car si le mignon qui prenoit son passe-temps avec elle , estoit gentilhomme , elle demandoit les souliers de velours : s'il estoit artisan , de drap fin : & s'il estoit mecanique , de cuir simple : tellement que la bonne Dame avoit si grand apport , que sa boutique n'estoit jamais vuide. Et pour autant qu'elle estoit belle , jeune & de belle apparence , & que sa demande estoit petite , tous ceux de Pistoye la visitoient volontiers , passans le temps avec elle , & recueillans les derniers fruits d'amour. Somme Dame Modeste avoit desja remply un plein magasin de souliers , pour recompense de ses labeurs , & y en avoit un si grand nombre de toutes sortes , que qui eust esté à Venise , & visité toutes les boutiques , il n'en eust point trouvé la tierce partie , au regard de ceux qui estoient en sa maison. Advint que le sire Tristan son mary eut affaire de ce magasin pour mettre quelque marchandise qui luy estoit arrivée de divers lieux ; & ayant appelé Dame Modeste sa bien aymée , luy demanda les clefs de son magasin , lesquelles elle luy presenta sans faire aucune excuse. Le mary ouvrit le magasin , & cuidant le trouver

vuide , le trouva plein de souliers de diverses façons & qualitez , comme nous avons desja dit, dont il fut tout estonné, ne se pouvant imaginer d'où procedoit une si grande abondance de souliers ; & ayant appelé sa femme , luy demanda que signifioit un si grand nombre de souliers qui estoient en son magasin. La bonne Dame qui estoit du tout resoluë , luy va respondre : Que vous en semble , mon mary Tristan ? Estimez-vous estre seul marchand en ceste ville ? Vous estes bien abusé , car les femmes entendent bien la marchandise. Et si vous estes gros marchand & maniez beaucoup d'affaires & de grosse importance , je me contente de ce petit train , & ay mis ceste marchandise dedans le magasin , afin qu'elle fust plus assurée. Ne laissez pas de poursuivre vos trafiques avec toute diligence , de mon costé je feray fort bien mon devoir de solliciter les miennes. Le sire Tristan qui ne pensoit point plus outre , trouva bon l'esprit & industrie de sa prudente femme , luy conseillant de continuer telle magnanime entreprise. Continuant ainsi Dame Modeste secrettement ce train amoureux , ayant bon revenu de l'exercice de sa douce marchandise , devint si riche en souliers , que non seulement Pistoye , mais aussi toute grande cité en eust esté fournie plus qu'à suffisance.

Cependant qu'elle fut jeune , belle & de bonne grace , la marchandise ne luy

failloit jamais ; mais parce que le léger temps surmonte toutes choses , donnant le commencement , le milieu & la fin à tout , Dame Modeste qui avoit esté autrefois fresche , ronde , belle & en bon point , changea de visage , & non pas de vouloir ; elle changea aussi son poil & ses plumes en rides espouvantables , ayant le visage contrefaict , les yeux plorans , les tetons vuidés , tout ainsi qu'une vessie desflée , & quand elle venoit à rire , elle monstroït des ridés si hideuses , que chacun qui la regardoit en estoit tout estonné & se mettoit à rire. Estant donc devenue vieille contre son vouloir , ne trouvant plus personne qui l'aymast & luy fit la court comme auparavant , & voyant que la marchandise des fouliers cessoit , se tourmentoït en elle-mesme. Et pour autant que depuis le commencement de sa jeunesse jusques à l'heure presente , elle s'estoit adonnée à la paillardise & avarice , en quoy elle s'estoit tant accoustumée & nourrie , que fit oncques femmes de ce monde , encore ne trouvoit-elle aucun moyen de se pouvoir abstenir de tel vice. Et combien que de jour en jour l'humide radical (par lequel toutes plantes prennent vigueur , croissent & augmentent) vint à deffaillir , si ne laissoit-elle pas de continuer son mauvais & desordonné appetit. Se voyant donc privée de toute beauté de jeunesse , n'estant plus caressée ny

mignardée par les muguets, comme elle fouloit, elle print nouvelle deliberation. Et de fait, s'estant mise sur une galerie de son logis assez eminente, elle commença à faire l'amour avec tous les valets, portefaïs, ramonneurs de cheminées & autres canailles qui passoient par la rue, & tant qu'elle en pouvoit recouvrer, autant en tiroit elle à sa devotion; prenant avec eux son plaisir accoustumé: & tout ainsi qu'elle avoit taxé ses amoureux du temps passé en une paire de souliers (selon leur qualité & condition) pour le salaire de son insatiable luxure, aussi au contraire elle en donnoit une paire pour recompense de celui qui estoit le plus mastin, & luy rembourroit mieux son pelisson. Tant y a que Dame Modeste estoit venue en telle extremité, que tous les belistres & canailles de Pistoye courroient vers elle, les uns pour en prendre plaisir, aucuns pour s'en mocquer, & les autres pour recevoir le gentil salaire qu'elle donnoit. Somme devant qu'il passast peu de jours, le magasin qui avoit esté plein de souliers, fut en peu de temps vuide. Advint que le sire Tristan vouloit voir secrettement comment se portoit la marchandise de sa femme; & ayant prins les clefs du magasin sans le sceu de sa femme, le vint à ouvrir, & y estant entré, trouva que tous les souliers estoient esvanoüis; tellement que le sire Tristan en fut tout estonné, ne se

pouvant imaginer comment sa femme avoit peu depescher tant de souliers qui souloient estre dedans le magasin. Et estimant que sa femme fust toute d'or & d'argent pour le grand train & distribution qu'elle en avoit fait, se commença à consoler en soy-mesme, esperant de s'en ayder quand il en pourroit avoir besoing. Et l'ayant appelée à soy, luy dit tels propos : Escoutez, ma femme, m'amie & sage, j'ay cejourd'huy ouvert vostre magasin, & ay voulu voir comment se portoit vostre loyale marchandise, & pensant que les souliers fussent multipliez depuis l'heure que je les vis jusques à present, j'ay trouvé qu'ils sont diminuez, dont j'ay esté tout estonné. Puis j'ay pensé en moy-mesme, que vous les pouvez avoir vendus, & que vous en avez tiré un grand denier, tellement que j'en ay esté tout consolé : & si ainsi estoit, ce nous seroit un grand avancement. Alors Dame Modeste luy respondit, avec un grand soupir qui se partit du plus profond du cœur : Sire Tristan, mon mary, ne vous esbahissez point de cela ; car les souliers que vous vistes en si grande abondance, s'en sont allez par même chemin qu'ils estoient venus ; & soyez assuré que les choses mal acquises s'en vont en briefve espace de temps & perissent ; parquoy ne vous en estonnez point. Le bon sire Tristan qui n'entendoit pas le mystere, ne sceut que

dire , & craignant que ne luy en advint autant en sa marchandise , ne voulut point passer outre , mais commença à avoir l'œil de plus près à sa marchandise , craignant qu'elle ne declinast comme celle de sa femme. Se voyant Dame Modeste abandonnée de tous hommes , & privée des souliers qu'elle avoit gagné avec si grande douceur , elle tomba en une grande maladie , pour la douleur & passion qu'elle sentoît , & estant devenuë en peu de temps étiquë , finit miserablement ses jours. Voilà donc comment Dame Modeste , bien depourveuë d'esprit , finit sa marchandise , avec la vie , à son grand deshonneur & vitupere.

Estant la briefve Fable de Madame finie , chacun commença à rire d'un grand courage , en blasinant grandement Dame Modeste , qui vivoit modestement en toutes autres choses , excepté en sa luxure. Outre plus , ils ne se pouvoient tenir de rire quand ils venoient à considerer que les souliers avoient esté acquis doucement , & perdus par un mesme moyen. Mais parce que Catherine avoit esté cause d'esmouvoir le Trevisan pour faire que Madame raconlast sa Fable , elle la vint à piquer & larder , avec quelques douces paroles. Puis pour punition de telle faute commise , luy commanda expressement qu'elle recitast un Enigme qui ne fust point impertinent à la Fable qu'elle venoit de ra-

conter. Alors Catherine entendant le commandement de Madame , se leva incontinent , & se tournant vers elle , luy tint tels propos : Madame , les broquards que vous m'avez maintenant donné , ne me font point odieux , ouy bien de m'avoir donné la charge de raconter chose qui ne se parte point du sujet de la Fable par vous racontée , cela certainement m'est grief ; car je ne pourray pas dire chose qui vous soit agreable , puisque je suis ainsi prinse au depourveu. Toutesfois puisqu'il vous plaist que je fasse reparation de ma faute , je le feray comme vostre obeyssante fille & humble servante , & diray ainsi :

*S'estant soudain la belle Dame assise ,
De luy lever sa cotte je m'avise ;
Et desirant la rendre bien contente ,
Mon cas en main alors je luy presente ;
Puis luy haussant sa belle jambe nette :
Tout beau (dit-elle) la chose est trop estroite.
Donc pour luy faire un plaisir plus avant ,
Je le retire & le remets souvent.*

Le plaisant Enigme raconté par Catherine , ne fit pas moins rire la compagnie , que la joyeuse Fable de Madame. Et pour autant qu'il fust salement interpreté par plusieurs , elle voulut monstrier son honnesteté par beau moyen , en disant : Mes très-honorées Dames , la vraye exposition de nostre Enigme recité ne signifie
autre

autre chose , que le soulier estroit : car quand la femme veut essayer ses souliers , elle s'assied , & le cordonnier tenant le soulier en sa main , luy vient hauffer la jambe , & la femme luy dit : Faites , tout beau , car le soulier est trop estroit & me blesse. Alors le cordonnier l'oste & le remet par plusieurs fois , jusques à tant que la femme se porte contente de luy.

Après que l'Enigme de Catherine fut raconté & résolu , estant grandement loué de toute l'honorable compagnie , Madame cognoissant qu'il estoit desja tard , commanda , sous peine d'encourir sa mal grace , que nul se partit ; & ayant fait appeler le sage maître d'hostel , luy commanda de faire dresser les tables en la grande salle , & cependant que le souper s'apprestoit , on feroit quelques danses. Le bal finy , & les deux belles chansons doucement chantées , Madame se leva & print par la main le Seigneur Ambassadeur , avec le Seigneur Pierre Bembe , & tous les autres , & les mena en la chambre préparée , où estant baillée l'eau aux mains , chacun s'assit , selon son degré & dignité : puis on commença à banqueter avecques bonnes & delicates viandes , vins frais & exquis. Le festin finy , avec propos amoureux , estant un chacun devenu plus joyeux qu'auparavant , on commença à desservir , puis on se mit à danser. Mais pour autant que l'aube fresche & rougissante commen-

426 LA V. N U I C T ;

çoit desja à apparoiſtre , Madame fit allumer les torches, & accompagna le Seigneur Ambaſſadeur juſques aux degrez , en le priant de ſe trouver à l'aſſemblée , ſuivant l'ordre accouſtumé , ce qu'il fit avec tous les autres.

Fin du premier Volume.

960480

T A B L E

Du premier Volume.

P R E M I E R E N U I C T.

- U**N nommé Salard, se partant de Genes, vint à Montferrat, où il desobeit à trois commandemens du pere, ordonnez par son testament : & estant condamné à la mort, fut delivré, & retourna au pays, pag. 11
- Un fameux larron nommé Cassandrin, amy du Prevost de Perouse, luy desroba son liët & son cheval. Puis luy ayant présenté messire Severin lié dans un sac, devint homme de bien & de grande entreprinse. 32
- Messire Scrapafique deceu une fois seule par trois brigands, les abusa par trois fois, & finalement s'en retourna victorieux avec sa Nene. 47
- Thibaud Prince de Salerne veut espouser sa fille Doralice, laquelle estant sollicitée du pere, arriva en Angleterre, où Genese l'espousa, & eut deux enfans d'elle, qui furent mis à mort par Thibaud, dont Genese se vengea depuis. 61
- Demetrius Bassariot, se faisant nommer Gram-motivège, surprint sa femme Polissene avec un Prestre ; & l'ayant envoyée vers ses freres, qui la mirent à mort, il espousa après sa servante, 78

T A B L E.

SECONDE NUICT.

Galiot Roy d'Angleterre, eut un fils nay porc ; lequel se maria par trois fois ; & ayant perdu sa peau de porc , devint un très-beau jeune fils , qui depuis fut appelé le Roy Porc. 98

Philene Sisperne escolier , estudiant à Bologne , estant moqué par trois belles Dames , sous un festin faux , se vengea de toutes. 112

Charles de Rimini estant amoureux de Theodosie , sans estre aimé d'elle , à cause qu'elle avoit promis sa virginité à Dieu ; & Charles cuidant l'embrasser par force , en lieu d'elle , il embrasse des pots , des chauderons , broches & autres utensiles de cuisine : & estant ainsi barboüillé de noir , fut fort bien battu par ses serviteurs. 133

Le Diable entendant que les maris se plaignoient de leurs femmes , espousa Silvie , & prit pour compere Gasparin Bonci ; & ne pouvant plus durer avec sa femme , entra au corps du Duc de Melfe : puis son compere Gasparin l'en jetta dehors. 144

Simplice Roffi estant amoureux de Giliole , femme de Guirot paysan ; & estant trouvé par le mary , fut battu & frotté qu'il n'y manquoit rien : puis s'en retourna en son logis. 161

TROISIÈME NUICT.

Un nommé Pierre , estant insensé , retourna en son bon sens , par le moyen d'un poisson nom-

T A B L E.

mé Ton , qu'il print : & delivra de mort la fille du Roy Lucian ; puis la print en mariage , laquelle il avoit engrossie par enchantemens

175.

Dalphrene Roy de Thunis , ayant deux enfans , l'un nommé Listic , & l'autre Livoret , depuis surnommé Porcarol , à la fin print en mariage Bellissandre , fille d'Astarante Roy de Damas.

189.

Blanchebelle fille de Lamberic , Marquis de Montserrat , est envoyée par la marastre de Ferrandin Roy de Naples , pour estre tuée : mais les serviteurs luy couperent les mains , & luy creverent les yeux : & depuis fut guarie par une couleuvre , & s'en retourna joyeuse vers Ferrandin.

211.

Fortunio ayant receu une injure du pere & de la mere , s'en alla vagabond par le monde , & par cas d'aventure , se trouva en un bois , où il trouva trois animaux qui le recompenserent. Puis estant en Pologne pour une jousté , il obtint en mariage Doralice , fille du Roy.

231.

Isotte , femme de Lucafer Albani de Bergame , cuidant par finesse decevoir Travaillin vacher de son frere Emilian , pour le trouver menteur , perdit la metairie de son mary , & s'en retourna au logis avec la teste d'un taureau ayant les cornes dorées , & toute honteuse.

249.

T A B L E.

QUATRIEME NUICT.

Richard Roy de Thebes avoit quatre filles, l'une desquelles s'en alla vagabonde par le monde, & de Constance se fit appeller Constantin, & arriva en la cour de Cacus Roy de Bitinie, lequel par ses promesses & bonnes conditions, la print en mariage. 263

Hermion Glance d'Athenes print en mariage Philene Centurionne : & estant devenu jaloux d'elle, l'accusa en plein jugement ; & par le moyen de son amy Hipolite elle fut delivrée, & Hermion condamné. 281

Lancelot Roy de Provins, espousa la fille d'un boulanger, de laquelle il eut trois enfans males, qui estans persecutez par la mere du Roy, finalement par le moyen d'une eau, d'une pomme & d'un oyseau, ils vindrent en la cognoissance du pere. 292

Nerin fils de Galois Roy de Portugal, amoureux de Janeton, femme de maistre Raimond Brunel Phisicien, joüit de ses amours, & la mena avec soy en Portugal: & maistre Raymond en mourut de desplaisance. 315

Flamine Veralde se partit d'Hostie, & va cherchant la mort, & ne la trouvant pas, vint à rencontrer la vie, qui luy fit voir la crainte & essayer la mort. 330

CINQUIEME NUICT.

Guerin fils unique de Philippes Marie, Roy de Sicile, delivra un homme sauvage de la pri-

T A B L E.

- son du pere. Et la mere, pour la crainte du pere, l'envoye en exil. Et l'homme sauvage estant apprivoisé, delivra Guerin de plusieurs grands inconveniens.* 344
- Adamantine fille de Bagolane Savonnoise, fut espousée à Drusian Roy de Boheme, par le moyen d'une poupée.* 366
- Berthaud de Valsable eut trois enfans, tous trois bossus, & d'une mesme façon; l'un desquels s'appelle Jambon, & va par le monde cherchant sa bonne fortune: & estant arrivé à Rome, il fut tué & jetté dedans le Tibre avec deux autres siens freres.* 380
- Marcel Vercelois fut amoureux d'Estiennette, femme de François Rabot; laquelle le fit venir en sa maison pour joüir de luy à son plaisir; & cependant qu'elle conjuroit son mary, il se sauva secrettement.* 400
- Madame Modeste, femme du sire Tristan Sanquet, acquiert en sa jeunesse, avec ses mignons & amoureux, une grande quantité de souliers, qu'elle baille en sa vieillesse à valets, & autres personnes de basse condition.* 416

Fin de la Table.



